

TRACTATUS

DE BENEFICIIS ECCLESIASTICIS

CAROLI GAGLIARDI

**OLIM IN REGIO NEAPOLITANO ARCHI-GYMNASIO
JURIS CANONICI PROFESSORIS IN CATHEDRA DECRETI**

IN HAC NOVISSIMA EDITIONE ACCESSERUNT ANIMADVERSIONES

Et additiones

JOSEPHI ROMANI PRESS. NEAP.

**IN ARCHIEPISCOPALI LYCEO
UTRIUSQUE JURIS APOCRESSORIS SUBSTITUTI**

TOMUS II.



Neapoli

**EX TYPOGRAPHEO AD SIGNUM ANCORÆ
MDCCCXLII.**



CAP. VI.

DE COLLATORIBUS

- I. Beneficia ecclesiastica Praesules ecclesiastici dant, seu conferunt, clerici accipiunt.*
- II. Laici ea conferre nullatenus possunt.*
- III. Ecclesiastici collatores jure vel plenario, vel delegato, vel ordinario ipsa conferunt.*
- IV. Plenario conferendi jure Summus Pontifex potitur.*
- V. Unus a Papa, ab Ordinario aller si unum idemque beneficium obtinuerint non reservatum, vel prior in tempore, vel possessor, vel proxisus apostolicus praefertur.*
- VI. Impetrans beneficium viventis, neque post vacationem amplius poterit illud obtinere ex Reg. XXI.*
- VII. Nonnisi post vacationem licet beneficia petere, ac obtinere ex Reg. XXX. de verosimili notitia.*
- VIII. Praeventio Papae beneficia de jure patronatus non afficit.*
- IX. Per obitum cujusque familiaris Cardinalium vacantis beneficia nonnisi de consensu Cardinalis patroni in Curiapraesentis Papa confert.*
- X. Eaque si ad alterius Cardinalis collationem, remota familiaritate ultimi beneficiarii pertinerent, Cardinalis tunc non patroni, sed ordinarii collatoris consensus exigitur.*

I. Ea est naturalis conditio cujusque beneficii, ut illud alter det, alter accipiat. Sacrae tum Litterae condocent, ut *nec quisquam sumat sibi honorem, sed qui vocatur à Deo tamquam*

*

Aaron (1), aut mittitur ad ecclesiasticum ministerium a potestate ecclesiastica per Christum Dominum instituta (2), illudque susceperit per canonicam institutionem, seu collationem ab eo, qui dare potest. *Dandi jus quidem habet summus sacerdos, qui est Episcopus; dehinc presbyteri, et diaconi, non tamen sine Episcopi auctoritate propter Ecclesiae honorem, quo salvo, salva pax est ait Tertullianus* (3). *Sine Episcopo nemo quidquam faciat eorum, quae ad Ecclesiam spectant. Rata Eucharistia habeatur, quae sub Episcopo fuerit, vel cui ipse concesserit. Non licet sine Episcopo neque baptizare, neque agapen celebrare: sed quodcumque ille probaverit, hoc et Deo est beneplacitum, ut tutum ratumque sit quodcumque agitur*, inquit S. Ignatius (4). Prisci canones vulgo Apostolorum hoc etiam constitutum habent: *presbyteri, et diaconi absque voluntate Episcopi nihil peragunto: ipsius enim fidei populus Domini commissus est, et pro eorum animabus ab ipso repetetur ratio* (5). Perpetuum jus istud episcopale passim canones posteriores (6).

II. Quae duae res vero spirituales beneficii ecclesiastici naturam constituunt, officium, seu ministerium sacrum, seu jus inserviendi Ecclesiae, connexumque jus reciprocum percipiendi redditus altaris, et Ecclesiae, ambo postulaut, ut non alii possint, nisi ecclesiastici Praesules ecclesiastica beneficia clericis conferre. Laicos propterea incapaces omni jure cum conferen-

(1) Apostolus ad Hebraeos *cap. 5. vers. 4.* Hac sententia fretus Innocentius III. in *cap. qualiter 17. de electione*, irritandam censuit ejus electionem, qui administrationem Ecclesiae aggressus fuerat sine canonica institutione, et confirmatione. Consonat Bonifacius VIII. in *cap. avaritiae 5. eod. tit. in VI.*

(2) *Sicut misit me Pater, ita et ego mitto vos*, Dominus ait ad discipulos suos: Joannis *cap. 20. vers. 21.*

(3) Tertullian. *de Baptismo cap. 17.* Non dissidet S. Hieronymus in *dial. contra Lucifer.*

(4) S. Ignat. Martyr. *ep. ad Trallenses, et ad Smyrn.* Consonant Conc. Laodic. *can. 57,* et Tolet. *I. can. 20.*

(5) *Can. 38. vulgo Apostolorum.* Consonat *can. cunctis 41. C. 16. qu. 1.*

(6) Conc. Tolet. III, et IV, Cabilonense, Antiochenum, Aurelianense, apud Gratian. in *can. 2, et seqq. C. X. qu. 1.*

di ea, tum obtinendi, et canones, et leges renuntiant, eorum errorem depellendo, qui praedia, fructus corporeos, cetera bona temporalia in beneficiis potissimum spectabant, posthabito sacro jam exposito jure, ac ministerio, ut laicis praesertim patronis conferendi jus tribuerent. Enimvero Iustinianus Imp. edixit secundum canones fundatoribus Ecclesiarum non licere clericos inibi statuere, sed tantum suo eos Episcopo examinandos praesentare (1): simul Episcopo jus esse instituendi, seu confirmandi idoneos praesentatos, et indignos abijciendi (2). Idipsum placuit Carolo M. constituere (3). Quoad praebendas clericorum, et sacerdotum ex oblationibus, et eleemosynis quotidianis mobiles desumebantur, eas ne laici aliis concederent, nec suo sub dominio detinerent, sub anathemate sanxerunt priusci canones (4). Tum Ecclesias, et beneficia perpetuitatem ade-

(1) Justin. Nov. 57. Cap. 2, ad Mennam Archiep. *Si quis aedificans (ait) Ecclesiam, aut expendens in ea ministrantibus alimenta voluerit aliquos clericos statuere: non esse ei fiduciam ullam, quos vult per potestatem deducere tuae reverentiae ad ordinandos eos, sed examinari a tua sanctitate: sententiaeque tuae, et qui pontificalem sedem rexerit, semper hoc suscipere ordinationem, qui tuae beatitudini opportuni videbuntur existere, et Dei ministerio digni: ut non profanentur sancta Dei: (hoc videlicet quod sacris sancitur eloquiis.)*

(2) Idem. Nov. 123. cap. 18. Si vero, ait, qui ab eis eliguntur, tamquam indignos prohibent sacrae regulae ordinari: tunc sanctissimus Episcopus quoscumque putaverit meliores, ordinari procuret.

(3) Carol. M. an. 800, apud Balut. in *Capitular. Reg. Francor. t. 1. pag. 33*: *Resonuit in auribus nostris, ait, quorundam praesumptio non modica, quod non ita obtemperatis Pontificibus nostris, seu Sacerdotibus, canonum, et legum continet auctoritas, ita ut presbyteros, nescio qua temeritate praesentari Episcopis denegatis, et absque consensu Episcopi in vestras Ecclesias mittere audeatis. Praecipientes enim jubemus, ut nullus quilibet ex fidelibus nostris a minimo usque ad maximum in his, quae Deum pertinent, Episcopo suo inobediens apparere audeat.*

(4) B. Hieronymus in can. quia sacerdotes 13. et S. Damasus in can. hanc consuetudinem 15. C. X. qu. 1. Synod. Rom. III. sub Symmacho Papa in can. non placuit 23. et can. laicis 24. C. 16. qu. 17.

pta a laicorum sacrilegis collationibus, et usurpationibus eodem spiritali gladio vindicare Patres, ac Pontifices adeo studuerunt, ut laicales investiturae omnino deleverint (1). *Cum sanctuarium Dei jure hereditario teneri non possit: non debet aliquatenus sustineri, ut clerici Ecclesias a parentibus suis fundatas propria auctoritate detineant, aut laici filiis, vel aliquibus concedant easdem*, rescripsit Alexander III (2). Laicis ergo facultatem conferendi beneficia commune jus, quod viget, prorsus denegat. Vix Reges, nonnullaeque monasteriorum Abbatissae quasi episcopali jurisdictione fruenter eam ex Apostolicae Sedis indulto specialissimo habent.

III. Triplici autem jure Praesules ecclesiastici beneficia conferunt, *plenario, delegato, et ordinario*: nimirum Summus Pontifex *plenario*, et supremo, Cardinales, alique nonnulli apostolicum indultum habentes *delegato*, Episcopi, locorumque Ordinarii demum *ordinario*. Jus istud singulorum edisserere curatius mox oportet.

IV. In primis in Ecclesia universa, et cunctis ubique dioecibus *Ecclesiarum, personatum, dignitatum, aliorumque beneficiorum ecclesiasticorum plenaria dispositio ad Romanum noscitur Pontificem pertinere: ita quod non solum ipsa cum vacant, potest de jure conferre, verum etiam jus in ipsis tribuere vacaturis*, ait Bonifacius VIII. (3). Quandoquidem primatus Ecclesiae Romanae divino jure institutus, et sollicitudo Ecclesiarum omnium divo Petro, ejusque Sedi Apostolicae in perpetuum a Christo Domino demandata fecit, ut Papa, tamquam Episcopus oecumenicus, et Ordinarius Ordinariorum semper consueverit sexto ab inde saeculo cum quibuslibet Episcopis dioecesanis, locorumque Ordinariis concurrere in collationibus praebendarum, beneficiorumque etiam non reservatorum, eosque suum ad libitum intra sex quoque menses ipsis ad vacantia conferenda concessos praevenire pontificia colla-

(1) Conc. Moguntinuro I. sub Carolo M. in *can. laici* 37. Cabilonense II. in *can. inventum est* 38. Urban. II. in *can. decimas, et Ecclesias* 39. Alex. II. in *can. per laicos* 20. S. Greg. VII. in *can. suis deinceps* 12. *C. XVI. qu. 7.*

(2) Alex. III. in *cap. consuluit* 15. *de jurepat.*

(3) Bonif. VIII. in *cap. licet* 2. *de praeb. et dignit. in VI.*

tione vel pura, vel conditionali, seu mandato de providendo (1). Nullis quippe finibus plenariam ejusmodi potestatem pontificiam ecclesiasticae leges concludunt. Ipsius usui tantum et exercitio modus imponitur ex variis locorum, et gentium moribus, indultis, concordis, et statutis (2).

V. Si quando contigerit, quod Episcopus jure ordinario uni, et Papa jure praeventionis alteri unum idemque beneficium non reservatum, neque affectum conferant intra sex menses a die vacationis: prior in tempore erit potior in jure (3). *Si vero a Sede Apostolica, vel Legato ipsius uni, et ab Ordinario alteri eodem die idem beneficium conferatur, nec appareat, quae collatio fuerit primo facta:* erit potior conditio possidentis. *Si vero neuter possideat, is, cui Sedes ipsa contulit, vel Legatus* (propter conferentis ampliorem praerogativam) *erit alteri praeferendus*, ex textu Bonifacii VIII (4). Sunt vero qui adhuc putant juris praesumptionem in dubio episcopali favere collationi. Qui enim jure ordinario, et primitivo collationem ab

(1) Liqueat ex antedictis *cap. 5. num. 7. ad 11. num. 66.* Galli, aliaeque nationes in Synodis Constantiensi, Basileensi, et Tridentina quum studuissent reservationem Apostolicas Sedis amovere non modo generales, sed speciales etiam provisiones beneficiorum non vacantium: jus tamen istud plenarium praeventionis impetere ausi non sunt. Immo idipsum plane salvum voluit Synodus Basileensis *sess. 31*, Patresque Tridentini *sess. 7.* quum plura decrevisset ad reformandam disciplinam beneficiorum, initio ejusdem sessionis protestati sunt ea ipsos constituere, *salva semper in omnibus Sedis Apostolicae auctoritate.*

(2) Concordatorum lege an. 1818. art. X. cautum quod Canonici liberae collationis in Capitulis Cathedralibus, vel Collegialibus alternative conferantur tum a Sede Apostolica, tum a dioecesanis Episcopis: nimirum a Januarii mense usque ad Junium pontificiae collationi illos tribuendos esse sancitum: reliquis vero anni mensibus Pastorum jurisdictioni addici. Diserte tamen prima dignitas excipitur, quae dumtaxat a Sede Apostolica conferenda statuitur.

(3) Quemadmodum si ad duos eadem Sedes Apostolica litteras collationis unius, ejusdemque beneficii dederit diversis diebus, priorem quoque in tempore praeferendum, alio penitus excluso, rescripsit Honorius III. in *cap. Capitalum S. Crucis 30. de rescriptis.*

(4) Bonif. VIII. in *cap. si a Sede Apostolica 31. de praeb. in VI.*

suo dioecetano obtinuerit, is tunc videtur onus probandi exceptionem pontificiae praeventionis in adversarium suum jure transferre. Ad hanc vero praesumptionem excludendam stylus inolevit adijciendi litteris apostolicis clausulam *cum gratificatione opportuna*, quae praelationem tribuit provisioni apostolicae inter plures eodem die a diversis collatoribus datas.

VI. Ne quis eam contentionem vitaturus abripiatur improba cupiditate impetrandi beneficia viventium, ubi ex lethali morbo possessorum videantur jam jam vacatura, Gelasius Papa, et Concilium Lateranense III. sub Alexandro III. (1), tum Bonifacius VIII. (2) quascumque promissiones, vel gratias de beneficiis vacaturis nullas, et irritas ipso jure declararunt. Mox Cancellariae Regula XXI. ita statuit: *Si quis supplicaverit sibi de beneficio quocumque, tamquam per obitum alicujus licet tunc viventis vacante provideri, et postea per obitum ejus jus valet: provisio, et quaevis dispositio etiam vigore alterius novae supplicationis, vel gratiae dicto supplicanti per obitum hujusmodi denovo facienda, nullius sint roboris, vel momenti.* Itaque expetens fraudulentè beneficium ante vacationem, quod jam vacare per obitum exposuerit, heic duplici poena coercetur: nullum scilicet jus ad illud acquirit, quamvis gratia collationis post obitum fortasse providerit (3), sitque inhabilis ad illud postulandum post secutam revera vacationem: praeter ecclesiasticas censuras jure communi sancitas (4). Et Regula haec in collationibus etiam Ordinariorum, aut Legati apostolici locum sibi vindicat (5).

VII. Alia item Regula XXX. *de verosimili notitia* statuit: *quod omnes gratiae, quas Papa de quibusvis beneficiis cum*

(1) Gelasius in *cap. qui in vivorum* 1. et Conc. Later. III. in *cap. nulla* 2. *de concess. praeb.*

(2) Bonif. VIII. in *cap. detestanda* 2. eod. tit in VI.

(3) Hunc casum quum non definiant Gelasius, nec Alexander III., nec Bonifacius VIII., patet in aucupantes vacatura beneficia poenas canonicas hac Regula magis ampliatas, ut nullus ambitiosis fraudibus aditus supersit, nec voto captandae mortis, nec supplantationi concurrentium in tempore digniorum.

(4) Cit. *cap. 1. et 2. de concess. praeb.*

(5) Ex communi DD. sententia apud Rigaut: *Reg. XXI. num. 17., et seq.*, et in *Reg. XX n.º 26, et seq.*

cura, vel sine cura saecularibus, vel regularibus per obitum quarumcumque personarum vacantibus in antea sece-rit, nullius roboris, vel momenti sint, nisi post obitum, et ante datam gratiarum hujusmodi tantum tempus effluxe-rit, quod interim vacationes ipsae de locis, in quibus per-sonae praedictae decesserint, ad notitiam ejusdem San-ctissimi D. N. verosimiliter potuerit pervenire. At Papa dum a Romana Curia discesserit, relicto in ea Datario, vel Si-gnatore gratiarum: huic nunciatam notitiam vacationis verosi-milem sufficere Clemens VII. declaravit (1). Hanc ipsam Re-gulam sibi locum quoque vindicare, ubi Romana Curia videat-ur in congruo temporis intervallo accepisse notitiam vacatio-nis: sed cursorem, vel nuncium reapse ante obitum beneficiarii, seu ante vacationem impetrans miserit, in poenam *cursus am-bitiosi*, monet Claudius Fleury (2).

VIII. Quoties vero ad electionem, vel praesentationem alicujus pertineat provisio beneficii: eam tunc praeveniens Papa sere non afficit (3): nisi apertis ipse verbis eidem juri, seu eligendi, seu praesentandi derogaverit, ubi derogationibus pontificiis non adversentur leges, et consuetudines locorum.

IX. Vacantia item beneficia per obitum alicujus familiaris Cardinalium, jamdiu consuevit Apostolica Sedes non conferre, nisi accesserit consensus Cardinalis patroni in Curia praesentis. Cui ne fraus fiat, Regula XXXII. Cancellariae jubet: *quod im-petrans beneficium vacans per obitum familiaris alicujus Car-dinalis, teneatur exprimere nomen, et titulum ipsius Cardi-nalis, et si ille in Curia praesens fuerit, ipsius ad id accedat assensus, alias desuper gratia sit nulla: et idem servari voluit, si Cardinales quomodolibet ab ipsa Curia absentes, et ubilibet etiam in locis infra duas diaecesis vicinis degentes, familiamque, et lares in eadem Curia retinentes, ab ipsa Curia recesserint, ad eandem illico reversuri, et infra de-cem, vel ad summum quindecim dies v're, et personaliter reversi fuerint. Ita quod Cardinalibus, alias quam ut prae-*

(1) Clemens VII. die 23. Decembris 1533. apud Rigant. in *Reg. XXX. num. 1.*

(2) Cl. Fleury *lib. 2. Iur. Can. cap. 21.*

(3) Bonif. VIII. in *cap. in iulis* 16. §. 1, et 2. de praebendis.

fertur, ex quacunque causa quantumlibet necessaria, et hic necessario exprimenda absentibus, facultas praestandi consensum hujusmodi non competat: sed beneficia hujusmodi ad liberam Sanctitatis Suae, et Sedis Apostolicae provisionem, et dispositionem pertineant. Declarans Regulas, et constitutiones suorum praedecessorum, etiam a die earum editionis, et publicationis super assensu hujusmodi praestando sic intellectas, et intelligendas fuisse. Quodque si praedicti familiares eorundem Cardinalium familiares esse desierint, seu aliorum Cardinalium familiaritatem similem transierint, quod beneficia, quae familiaritate priori durante obtinuerint, et in quibus, vel ad quae priore ipsa familiaritae durante jus eis competierit, Cardinales, quorum prius familiares fuerint, suum habeant adhibere consensum. Decurans praesentem constitutionem locum non habere in illis beneficiis, quae familiares ipsi tempore obitus eorum in dicta Curia, vel intra eam obtinerent, aut antea obtinuissent, et ratione officiorum per eos obtentorum dictae dispositioni generaliter reservata, vel affecta fuisse apparent. Necnon illos quoad effectum dictae constitutionis familiares eorundem Cardinalium censi, qui ipsorum Cardinalium familiares continui commensales ad minus per quatuor menses, computato etiam tempore ante promotionem ad Cardinalatum fuisse probarentur. Decernens irritum etc.

X. Praetereaquae Regula XXXIII. ad evitandas lites, et contentiones, quae ex praecedenti sua constitutione exoriri possent, vestigiis praedecessorum suorum inhaerendo, statuit, quod si beneficia, quae per obitum familiarium continuorum commensalium eorundem Cardinalium in futurum vacabunt, cessantibus apostolicis reservationibus, ad alterius Cardinalis collationem, vel aliam dispositionem pertinere deberent, in dicta praecedenti constitutione non comprehendantur, quoad hoc ut in provisionibus talium beneficiorum super expeditione litterarum illius Cardinalis, cujus familiaris defunctus ille extitit, consensus requiri debeat. Sed beneficia hujusmodi ad collationem, seu quomodo dispositionem Cardinalis ordinarii collatoris, ut praesertur, libere spectare censeantur. Et si apud Sedem Apostolicam beneficia hujusmodi per obitum dictorum familiarium vacaverint, tunc in provisione talium beneficiorum super expeditione lit-

terarum Illius Cardinalis exigatur consensus, si in Romana Curia praesens fuerit, ad quem eorumdem collatio, et dispositio, ut praefertur, pertinere deberet: ita ut Cardinalis ordinarius collator in concursu cum Cardinale patrono semper praeferri debeat, salvo tamen semper indultis concessis, et concedendis eisdem S. R. E. Cardinalibus: decernens irritum etc.

CAP. VII.

DE COLLATORIBUS EX INDULTO EXTRAORDINARIIS.

- I. Cardinales communi fruuntur indulto conferendi beneficia etiam reservata in mensibus apostolicis vacantia.*
- II. Excipiuntur vacantia apud Sedem, et in Curia.*
- III. Quaeque dimiserint veri familiares Papae, aut Cardinalium, Cardinales ipsi, et Conclavistae.*
- IV. Simul quae duabus, pluribusve reservationibus coaequalibus afficiantur.*
- V. Personales ambo, vel ambo reales reservationes dicuntur coaequales; personalis una, et realis altera inaequales.*
- VI. Quum personae, tum officii respectu personales, ex quo plures reservationes indultum nunc excludunt.*
- VII. At plures uni officio adnexae qualitates, puta familiaritas Papae, ac dignitas protonotarii, unam ferunt reservationem.*
- VIII. Reservatio mensium cum reservatione personali, vel reali concurrens indulto vim non impedit.*
- IX. Absentes a Curia Romana Cardinales beneficia in dioecesis sibi commendatis tantum, non alia suis in titulis vacantia conferunt.*
- X. Nec suam ante promotionem vacantia conferunt sine indulto specialissimo.*
- XI. Reales etiam reservationes, et affectiones indultum comprehendit, sed non omnes.*
- XII. Extraordinaria hujus indulti potestas ordinariam praesupponit, fines dioecesis non excedit, neque ad exempla protenditur.*
- XIII. Aliis jus conferendi cum Episcopo simul habentibus ea nec prodest, nec nocet.*
- XIV. Nec jura eligendi, aut praesentandi ullatenus minuit.*
- XV. Devoluta ad Sedem Apostolicam beneficia non comprehendit.*

- XVI. Episcopalem Ecclesiam dimittentes Cardinales indultum obtinent conferendi beneficia inibi vacatura in octo mensibus apostolicis.*
- XVII. Obtinens a Cardinale beneficium ratione mensis apostolici, vel aliunde reservatum cogitur pontificias novas provisionis litteras impetrare.*
- XVIII. Novis constitutionibus, et Regulis Cardinales fere non obligantur.*
- XIX. Cardinales insuper beneficia in Episcopatibus suburbicariis, Ecclesiisque titulorum suorum in Urbe conferunt, quando in Curia resident.*
- XX. Trium basilicarum patriarchalium inferiora beneficia conferunt Cardinales Archipresbyteri, earumque Canonici.*
- XXI. Legatis, Nunciisque apostolicis, aliisque Praesulibus consuevit etiam indulgeri collatio beneficiorum.*
- XXII. Necnon Regibus.*
- XXIII. Qui ex apostolico privilegio possunt spirituales administrare collationem velut instrumenta Pontificis.*
- XXIV. Nedom expresse, verum etiam praesumpto ex immemorabili consuetudine.*
- XXV. Utroque suffultus Rex Neapolitanus plures dignitates, canonicatus, et beneficia inferiora confert.*

CAP. VII.

I. Singulis Romanae Ecclesiae Cardinalibus jamdudum consuevit Sedes Apostolica indultum concedere conferendi jure delegato *quaecumque beneficia* sibi subjecta *extra Curiam vacantia*, *quamvis reservata ratione mensium*, aut quod illa obtinentes fuissent familiares ficti praedecessorum Pontificum, aut Sedis Apostolicae notarii, subdiaconi, archipresbyteri, capellani, litterarum apostolicarum scriptores, abbreviatores, cubicularii, Nuncii apostolici, et subcollectores (1), et alii officiales praesentes, et futuri, quocumque nomine nuncupentur: quatenus beneficia hujusmodi ratione mensium apostolicorum, seu ex quavis alia causa dispositioni apostolicae reservata, seu ex generali reservatione apostolica affecta conferre, et de illis providere libere possint (2).

(1) Ex formulae fragmentis apud Rigant. in *Reg. I. Can. §. 4. cum. 14*, et 174. Eamque integram habet, illustratque commentario Anastasius Germonius de *Indult. Cardinal.*

(2) Ex Rigantio, et Germonio *ibidem*.

II. Hujusce mandati apostolici fines, quos indicant exscripta indulti verba, custodire diligenter oportet, neque ad alios ultra expressos casus extendere, ut collationes exinde valeant, quae illius vigore fient (1). Igitur quae *apud Sedem in Curia Romana* vacaverint beneficia, Cardinales ex indulto ejusmodi conferre in primis prohibentur quum reservatorum *extra Curiam* dumtaxat vacantium collatio eis indulgeatur (2). Nam Clemens IV. dum vacantia apud Sedem in corpore juris reservavit, palam dixit nemini prorsus licere ea conferre, *quacumque super hoc sit facultate munitus . . . , nisi eis sit super conferendis eisdem in Curia Romana vacationibus specialis, et expressa ab ipso Pontifice Summo auctoritas attributa* (3). Hac eadem ratione vacantia ex decreto beneficia eorum, qui ad episcopatum promoventur, Cardinales vigore communis indulti non conferunt (4). Nec ea, quorum retentio concessa Episcopo fuit in actu promotionis (5). Nec vacantia ob neglectam resignationis publicationem (6).

III. Quae illidem beneficia obtinuerint familiares veri Pontificum, continui nempe commensales, conclavistae, nec non Cardinales, eorumque familiares, ceteri Sedis Apostolicae officiales in recitato indulto non expressi, et per obitum ipsorum vacaverint extra Curiam, ea nequibit Cardinalis vigore communis ejusdem indulti conferre (7), strictam accipientis inter-

(1) Paulus in *l. diligenter* 5. *D. mandati*, Innoc. III. in *cap. cum dilecta* 22. *de rescriptis*, Honor. III. in *cap. venerabili* 37. *de off. et pot. jud. deleg.* et Bonif. VIII. in *cap. cui* 27. *de praeb. in VI.*

(2) Rigant. in *Reg. I. Canc. §. 1. num. 359. et seq.*

(3) Clem. IV. in *cap. licet* 2. *de praebendis in VI.* Hinc indulto quamvis amplissimo conferendi vacantia, vel vacatura *quacumque, et ubicumque, non obstante quocumque privilegio, de quo etiam oporteret de verbo ad verbum expressam facere mentionem*, nec etiam comprehendi beneficia *apud Sedem* vacantia, tenent Doctores apud Rigant. *loc. cit. num. 356.*

(4) Armind. Ricc. et Congr. particularis apud Rigant. in *Reg. 2. Canc. §. 3. num. 400. et seq. tom. 1.*

(5) Rigant. in *Reg. 1. §. 7. num. 191, et seq.*

(6) Rigant. in *Reg. 1. Canc. §. 1. num. 52.*

(7) DD. cum Rigantio in *Reg. 1. Canc. §. 8. num. 10, et seq.*

prelationem. Nam exceptio personarum, quas tale indultum enumerat, firmat regulam in contrarium. Speciali propterea indulto ampliori, quod suis Pontifices nepotibus nonnullisque benevolis Cardinalibus ad libitum largiuntur. Sedes Apostolica solet expresse mandare facultatem conferendi reservata, et affecta etiam beneficia eorum, qui *Papae, aut Cardinalium familiares continui commensales fuerint, aut per mortem Cardinalium, aut Episcoporum, et quorumcumque aliorum contentorum in extravag. ad regimen, seu aliarum constitutionum apostolicarum, seu ex quavis alia causa dispositioni apostolicae specialiter, seu alias generaliter reservata, seu ex generali reservatione, etiamsi illa multiplex, ac personalis, realis, vel mixta simul fuerit: non tamen ratione vacationis apud Sedem, nec ex persona cujuslibet conclavistarum, nec etiam ratione familiaritatis continuæ commensalitatæ nostrorum, seu Romani Pontificis pro tempore existentis familiarium continuorum commensalium, qui nunc sunt, vel alias, dum Cardinalatus honore fungebatur, fuerint* (1).

VI. Quum reservatio *multiplex* indulto hoc speciali adimatur expresse in gratiam Cardinalium nepotum: colligitur inde, quod commune indultum priori jam dicta forma conceptum Cardinalium tunc permittat extraordinariam beneficiorum reservatorum collationem, ubi ea uni reservationi personali obnoxia sint: secus ubi duæ simul in ipsis concurrant coaequales ejusdem nempe generis personales reservationes. Nam ex voto Ubaldi, et Verospi Rotæ Auditorum, quod requisivit, probavitque Paulus V. anno 1615, non comprehenduntur in praedictis indultis *beneficia duplici reservatione personali coaequali reservata, vel affecta* (2). Mox Urbani VIII, die 15. Julii 1642. constitutione sua edixit Cardinales *non potuisse, nec posse* vigore indulti communis *conferre beneficia duplici re-*

(1) His verbis conceptum indultum Card. Francisci Barberini, de quo egit Rota *dec. 14. par. 12. rec. fert Riganlius in Reg. IV. Canc. §. 5. num. 24.*

(2) Votum istud videtur apud Gratianum *discept. 982. num. 13. et seq.* At Cardinales contra illud frustra reclamaverunt contendentes indultis consuetis non refragari multiplices coaequales reservationes.

servatione personali reservata, vel affecta (1). Tandem Alexander VII. die 12. Aprilis 1666. declaravit specialius, et constituit: *beneficia protonotariorum, scriptorum, et aliorum officialium enumeratorum in extravag. ad regimen esse reservata, ubicumque decedant, etiam extra Romanam Curiam, et duas diaetas. Itemque reservationem beneficiorum obtentorum per dictos officiales intrare etiam ratione solius officii: et insuper protonotariatum ex militis resultantem, dictumque scriptoratum separatim adquisitum constituere duas reservationes personales conequales, exclusivas indulti* (2).

V. Uti conequales reservationes, et affectiones putantur, vel ambo personales, vel ambo reales: ita dispares dicuntur personalis una, et realis altera: vel ex dualibus quum personalibus tum realibus una potentior, quam altera, aut principalis una, et altera accessoria. De dualibus aequae personalibus locutos Paulum V, Urbanum VIII, et Alexandrum VII, jam exscripta ipsorum verba commonstrant. Duas itidem reales reservationes, affectionesque parem habere vim excludendi indultum, Rota definivit: dum Papa cuidam nonnulla beneficia commendaverat, eidemque mox ad Episcopatum promotio indulserat retentionem eorum, et ita his ex aequo manum apponendo suam in diversis casibus duas eis reales reservationes, seu affectiones infixerat (3). Sed reservationum aequalium duplicitas non oritur, nisi ex diversis earum speciebus unius ejusdemque generis: quia plures unius arboris fructus, quamvis augeant unam ejusdem pomi speciem, non tamen geminant diversam conequalem. Hinc si quis plurium Cardinalium familiaris fuerit, vel protonotarius a Collegio, tum a Legato apostolico, et Papa sit iterum iterumque creatus, vel officium Nuncii, aut subcollectoris, aliudve simile in pluribus locis gesserit: non duplicem, sed unicam reservationem ex familiaritate, vel dignitate protonotarii, vel officio is contrahit. Pariter sicuti ad duos ex intervallo episcopatus promotio Papa indulgeat retentionem beneficiorum: una tantum affectio ex ea duplici appositione manus papalis oritur (4).

(1) Urban. VIII. *const.* 288, quam exscriptam habet Fagnanus in *cap. sicut unire de excess. praelat. num.* 49.

(2) Alex. VII. in *const.*, quam refert Card. de Luca *disc.* 3. de *benefic. num.* 8.

(3) Rigant. in *Reg. I. Canc. §. 4. num.* 195.

(4) Rota *dec.* 523, *num.* 38, et *seq. par.* 19. *rec.* 10. 2. apud Rigant. in *rubric. Reg. §. 2. num.* 35, et *seq.*

VI. Familiarium, collectorum, cursorum, et cubiculariorum dumtaxat beneficia personali reservationi adscribunt omnes cum Rigantio (1). De beneficiis autem protonotariorum, aliorumque officialium disputabant DD. ante laudatam Alexandri VII. constitutionem, ad personalem ne, an localem reservationem pertinerent. Qui ea ad localem trahebant reservationem, fatebantur officialium beneficia constitutionibus extravag. *ex debito*, et *ad regimen* reservata esse non ratione personae, seu officii, sed respectu loci: quum in eisdem constitutionibus fingantur officiales, ubicumque ii decesserint, mortem in Curia obire; ideoque per istam loci fictionem beneficia ipsorum velut vacantia in Curia reservationem subire localem, non personalem (2). Cumque protonotarios, ceterosque officiales Paulus III. declaraverit, effeceritque Papae familiares (3): in eorum beneficiis reservationem per accidens personalem ratione familiaritatis officio adnexae agnoscebant, sed non insitam principaliter officio, seu personae (4), ut unicam in beneficiis familiarium, qui protonotariatum, aliudue officium exinde obtinerent, reservationem adstruerent. At post Alexandrinam constitutionem praevaluit sententia rebus judicatis obfirmata, quod officialium Sedis Apostolicae beneficia reservata censeantur nedum ratione familiaritatis a Paulo III. illis concessae, verum etiam ratione officii: proptereaque personalis haereat eis praecipua reservatio, quae simul cum alia personali, aut reali concurrens indultum excludit (5). Hinc duo si quis officia quaelibet diversa obtinuerit, quorum singula reservationem pariunt, ejus beneficia in duplicem reservationem incidere nunc judicantur (6). Quoniam

(1) Rigant. in rubr. Reg. §. 2. num. 38. et fin. et in Reg. 1. §. 4. num. 182. ex Rota coram Royas dec. 100.

(2) Lotterius, Barbosa, Rota et Card. de Luca apud Rigant. loc. cit. §. 4. num. 191. ad 193.

(3) Ex supradictis cap. V. n. 32.

(4) Lotterius cum Rigant. loc. cit. num. 196. contra Sarnensem.

(5) Card. de Luca apud Rigant. ibidem num. 198. Hinc Rota dec. 608. par. 5. rec. coram Bichio dec. 221, coram Dunozetto dec. 632. definit, et Pitonius tom. 4. discept. 105. num. 19. comprobatur, Cardinales vigore indulti communis conferre non posse beneficium vacans per cessum, vel decessum protonotarii simul subcollectoris.

(6) Rota dec. 476, num. 6. et seq. par. 18. rec. Card. de Luca de benef. disc. 102. Rigant. loc. cit. num. 185. et 236, et seq.

non ex sola familiaritate Papae, vel protonotarii dignitate officiis fere adnexa, (quam in una eademque persona duplicem ponere absurdum videtur) reservatio oritur: sed ex officio ipso duplici, et diverso eam derivare palam dixit Alexander VII. Sunt qui opinantur non reservata beneficia illorum officialium, quos laudatae extravagantes non enumerant, puta auditoris Camerae, ejusque locumtenentis, clericorum Camerae, procuratorum contradictarum, locumtenentis Avenionensis, ceterorum (1). Sed probabilior, et communior est aliorum sententia, quod Regula I. Cancellariae reservans beneficia officialium, officiales etiam creatos post extravagantem, ibique non expressos complectatur (2).

VII. Familiaritas vero, et dignitas protonotarii dum sunt uni eidemque officio simul adnexae, quia tamquam accessiones principalem officii naturam ambae sequuntur, et ab ipso absorbentur officio. non nisi unicam reservationem tunc ferunt beneficia istius officialis. Nam si reservationem in officio uno duplicarent praerogativae hujusmodi accessoriae, indultum Cardinalibus fere numquam suffragareiur, eis facultatem largiens conferendi reservata etiam beneficia, quae obtinuerint *officiales praesentes et futuri, quocumque ii nomine nuncupantur* (3). Necesse porro est, ut multiplices, diversaeque reservationum causae in unam personam distincte confluant, quoties velint beneficia ipsius multiplici reservationum vinculo obstricta judicari (4).

VIII. Inaequales, ac dispaes reservationes vim indulto non adimere, colligitur ex antedictis. Itaque in primis potentior una

(1) Cassidorus, Rebuff., Mandos., Arminius, Ricc., ceteri apud Rigant. *ibidem* num. 218. *et seq.*

(2) Rigant. *loc. cit.* num. 241. *et seq.*

(3) Rota *dec.* 266. num. 4. *et seq. par.* 13. *rec.*, et alibi apud Rigant. *ibidem* num. 173. *et seq.*

(4) De Referendario, qui postea protonotarius ex intervallo creatus est, agit Rota *dec.* 476. num. 6, *et seq. par.* 18. *rec.* et Card. de Luca *de offic. venal. cap.* 2. num. 16. De familiari Papae, et Protonotario Gratianus *discept.* 982. *post num.* 24. De cubiculario Papae, et Protonotario Mansus *consult.* 647. num. 5. *tom.* 7. De Auditore Rotae, ac Referendario Rota *dec.* 523. num. 45. *part.* 19. *rec. tom.* 2. de Nuncio, et Refer. Card. de Luca *de benef. disc.* 4.

aliam minorem absorbet, ideoque familiaritas Papae ex. gr. familiaritatem Cardinalis in una eademque persona conjunctam ita suffocat, ut unicam constituat reservationem (1): nisi quis maluerit duplicem ejusmodi familiaritatem ad unam reservationis speciem redigere. Personalis item reservatio, tamquam dignior trahens ad se realem, velut accessoriam efficit, ut si officialis ad episcopatum assumptus retentionem beneficiorum obtineat, haec extra Curiam inde vacantia Cardinalis ex indulto conferat: quia personalem reservationem ratione officii non aequat realis reservatio promanans ex affectione, seu appositione manus Pontificis (2). At affectio ex praevia personali reservatione obveniens, puta post dimissum officium subcollectoris, vel post extinctam familiaritatem, quum naturam personalis, non realis reservationis quidem adsumat: recte conjungitur cum alia personali reservatione pro excludendo indulto (3). Quoties insuper contigerit reservatorum beneficiorum vacatio in mensibus apostolicis: Cardinales ea, non aliter, quam vacantia in mensibus Ordinariorum, libere conferunt. Nam temporanea reservatio mensium difformis a personabilibus, et realibus reservationibus perpetuis quum sit, haec numquam cum aliqua earum ita conjungitur, ut coequales duas componat reservationes, indultumque idcirco numquam excludit (4).

IX. An idem jus vigeat in aliis temporaneis reservationibus vacantium, dum Cardinales ab suis titulis absunt (5), et quae vacante Sede praedecessoris Episcopi vacassent (6): operae pretium est heic inquirere. Ad Cardinales absentes quod attinet, antiqua indulti forma hunc habebat articulum: *tibi etiam, quan-*

(1) Ex antedicto Ubaldi, et Verospii voto, cui DD. adstipulantur apud Rigant. *in rubr. R.g. §. 2. num. 21.*

(2) Rota coram Millino *dec. 414*, et apud Novar. *in sum. Bullar. dec. 30. num. 18. et seq.* Rigant. *ididem num. 24, et 29.*

(3) Rota coram Seraphino *dec. 1251*. Duran. *dec. 154*, et DD. apud Rigant. *loc. cit. num. 30.* Hanc affectionis personalis speciem spectant ea indulti verba: *generaliter reservata, seu ex generali reservatione apostolica affecta*, apud Rigant. *in Reg. IV. Canc. §. 5. num. 46.*

(4) Videsis dicta superius *cap. V. num. 43. pag. 126.*

(5) De hac reservatione superius dixi *cap. V. num. 42.*

(6) De his dictum est eodem *cap. V. num. 39.*

do, et quoties de licentia nostra etiam pro sua voluntate ab eadem Curia ubilibet etiam extra montes abesse contigerit, quaecumque beneficia etc. (1). Cujusmodi verba absentibus etiam ab Urbe Cardinalibus concedere collationem beneficiorum, quae in Ecclesiis titularum, et diaconis vacarent, Doctores olim contendebant (2). Sed contraria nunc viget sententia, ex quo Innocentius XI. anno 1681. primus omnium recitato indulti articulo hanc addidit clausulam: *servata tamen quoad beneficia titularum, et diaconiarum, episcopatum cardinalitiorum constitutionis, seu Regulae VIII. Cancellariae dispositione* (3). Quum isthaec VIII. Regula Cancellariae, quam indulti forma recentior obfirmat, Apostolicae Sedi reservet speciatim beneficia in Cardinalium sex episcopatibus, necnon diaconis, et titulis, quoad ii a Romana Curia absunt. vacantia (4): fit exinde, ut Cardinales vigore hujusce indulti de licentia Papae a Romana Curia absentes beneficia in episcopalibus Ecclesiis, dioecesibusque sibi commendatis quolibet mense vacantia conferant, non illa, quae in diaconis, titulisque suis contigerit absentiae suae tempore vacare, quamvis alionde non reservata.

X. Quae tempore viduitatis Ecclesiarum usque ad provisionem successorum vacassent beneficia, per secundam Regulam Cancellariae reservata quum sint, Cardinales in ea successores facultatem conferendi sere non habent, nisi eam alicui Papa speciatim, et expresse indulserit. Quia singulis Cardinalibus communi indulto conceditur collatio beneficiorum, *quae extra Curiam vacare contigerit*: his plane verbis patefacta mens Pontificis futuras tantummodo post indultum vacationes respicit, nulloque pacto valet ad praeteritas retorqueri (5). Cardinalibus autem nepotibus suis, et alicui amicissimo largiri volentes collatio-

(1) Apud Germon. *de indult. Card. § tibi quoad vixeris.*

(2) Garzia, Kochier, Barbosa, Massobrius, ceteri apud Rigan-
in *Reg. 8. Canc. §. 1. num. 77. et seq.*

(3) Ex Rigan- *ibidem num. 122.*

(4) De qua superius dixi *cap. V num. 42.*

(5) Hunc sensum Doctores explicant unanimiter, et firman-
judicatae: Rota *dec. 566. num. 2. coram Cavalerio, dec. 4. de
privileg. coram Mohedano, dec. 10. num. 4. par. 13. rec. et
alibi apud Rigan. in Reg. 2. Canc. §. 3. num. 385, et seq.*

nem eorum etiam, quae ante ipsorum promotionem vacassent id consueverunt palam exprimere his aliis indulto adjectis verbis: *quae vacare contigerit, et nunc vacantibus* (1).

XI. Facultatem conferendi reservata quum ratione mensium, tum ratione fetae familiaritatis, et officii, seu *ex quavis alia causa* Cardinales quum habeant ex indulto communi, ex hisce verbis videtur indultum commune reales quoque reservationes comprehendere: at non omnes. Enimvero Cardinales vigore istius indulti conferre utique possunt beneficia, quae vacent per collationem incompatibilium reservatorum ab ipsis eadem indulti auctoritate factam, quamvis reservata realiter per extravag. *ad regimen* (2). At e contrario nequeunt providere primas dignitates Cathedralium, nec principales Collegiatarum (3). Neque concistorialia, seu in libris Camerae taxata beneficia (4). Nec litigiosa (5). Nec regularia exempta in saecularem statum redacta, et perpetuo reservata (6). Facultas autem, quae Cardinalibus indulto tribuitur conferendi beneficia etiam regularia, locum in iis habet, quae ad suam ipsorum collationem pertinent in monasteriis sibi commendatis, simul et in regularibus non exemptis, quae ipsis amota reservatione subjacent (7).

XII. Edisserenda supersunt haec alia indulti verba: *ad tuam etiam cum alio, vel aliis collationem, provisionem, praesentationem, electionem, institutionem, seu quamvis aliam similem, vel dissimilem dispositionem quomodolibet pertinentia* (8): quae nimirum amotis reservationibus tu vel solus,

(1) Ex Rigantio *ibidem* num. 396.

(2) Rigant. in *Reg.* 1. §. 8. num. 185.

(3) Idem in *Reg. IV. Canc.* §. 1. num. 38.

(4) Card. de Luca *de benef. disc.* 4. num. 6, Germon. *de indult.* §. *regularia* num. 82.

(5) Rota *dec.* 67. num. 7. coram Duran. et *dec.* 433. num. 44. coram Bichio, Rigant. *tom.* 3. in *Reg.* 29. *Canc.* §. 29. *Canc.* §. 2. num. 176, et 177, ubi refellit Card. de Luca aliter opinantem *disc.* 52. *de benef. num.* 15.

(6) Rigant. in *Reg. IV.* §. 3. num. 25. et *seq. tom.* 1. et in *Reg. IX.* §. 2. num. 121. *tom.* 2.

(7) Rota *dec.* 587, et 588. *par.* 4. *divers.* et *dec.* 289. coram Penia, apud Rigant. in *Reg. IV. Canc.* §. 3. num. 30.

(8) Ex Armino Riccio apud Rigant. *ibidem* num 74, et in *Reg. IX. Canc.* §. 3. num. 116.

vel conjunctim cum aliis posses jure ordinario conferre. Hujus articuli contextus patefacit indultum Cardinalibus Episcopis potestatem extraordinariam non egredi fines dioecesanæ jurisdictionis, eamque ita super ordinariam collocari, instar columnæ super basim, ut hac deficiente non possit ea consistere. Non possunt propterea Cardinales vigore indulti manum suam extendere ad beneficia exempta, quamvis intra suam dioecesim fundata (1): sed eorum collatio in mensibus ordinariis ad praelatos inferiores, abbatesque, in mensibus reservatis ad Sedem Apostolicam pertinet. Eodemque jure exemptionis beneficia in solo Lateranensi erecta non ab Episcopis dioecesanis, neque a Cardinalibus indulto auctis, sed a Capitulo Lateranensi in quatuor mensibus ordinariis conferuntur (2).

XIII. Aliis autem consortium cum Cardinale habentibus in collatione, vel institutione, aliave qualibet provisione beneficiorum nec prodest, nec nocet extraordinaria ejus potestas indulto personali quaesita. Enimvero *alius alterius privilegio speciali prohibetur uti*, ex regula Bonifacii VIII (3). Et *cum quid una via prohibetur alicui, ad id alia non debet admitti* (4). Iure hinc merito Urbanus VIII. die 29. Decembris 1725. declaravit indultum, quod solis Cardinalium personis conceditur, non suffragari Capitulis Cathedralium, nec aliis juris conferendi participibus, eisque nullum communicare jus in reservatis quum mensibus, tum beneficiis (5). Consequitur exinde, quod indultum non abroget apostolicas reservationes, earumque nec vincula abrumpat, neque obstacula removeat: sed puram putam delegationem apostolicam in beneficiis reservatis largiatur. Immo: propterea reservationes obstant, ne prisca ex indulto resurgat ordinaria potestas Episcoporum, Capitulorumque, neve ad pristinam redeat libertatem (6). Et versa vice Capitulis, aliisque

(1) Rota dec. 523, et 530. par. 1. rec. tom. 2, et alibi apud Rigant. loc. cit. num. 26, 77, et seq.

(2) Armin. Ricc. loc. cit. num. 77.

(3) Bonif. VIII. in cap. cum sane 9. de privilegiis in VI.

(4) Idem in cap. cum quid 84. eod. tit. in VI.

(5) Urban. VIII. const. 59, de qua dictum supra est cap. V. num. 43.

(6) Rot dec. 585. par. 5. rec. Card. de Luca de benefic. disc. 1. num. 37.



in collatione beneficiorum consociis nil juris detrahit indultum, nec eorum communem cum Cardinale collationem in quatuor mensibus ordinariis impedit (1). *Non debet enim alteri per alterum iniqua conditio inferri* (2), nec Pontificis gratia dari cum alterius detrimento.

XIV. Eligendi, vel praesentandi jura quo magis inviolanda sunt, eo minus indulto deminuuntur. Beneficia enim de jure patronatus laicali sub indulto Cardinalium non cadere, Rota censuit (3). Eaque a cunctis reservationibus exempta quum viderimus (4): liquet patronis laicis integrum esse jus praesentandi, quamvis vacatio beneficiorum de suo patronatu in mensibus apostolicis evenierit. Quod alia patronatus ecclesiastici in mensibus reservatis vacantia Cardinalis Episcopus vigore indulti conferre valeat, Rota pluries definivit (5). Ubi concurrat patroni ecclesiastici praesentatio, vel Capituli, aut Collegii electio, aut consensus, aut silentium: nullus erit ambigendi locus. Illis autem dissentientibus, et reclamantibus, ea oportebit ad incudem revocare, quae superius dixi de patronatu ecclesiastico (6).

XV. Quae ad Sedem Apostolicam beneficia devolvuntur ex negligentia alterius collatoris, non alium nisi Papam superiorem habentis in dioecesi Cardinalis Episcopi, vel ex sua ipsius negligentia (7), ea is conferre non potest vigore indulti. Nam reservationes indulto sublatae, vel suspensae devolutionem jure communi constitutam, quae diversam ab eis naturam habet, non complectuntur (8). Secus dicendum est, quoties ob alienam negli-

(1) Rota coram Bichio *dec. 99.*, et 433, coram Royas *dec. 30.*, apud Rigant. *loc. cit. num. 29.*

(2) Papin. in *l. non debet 74. D. de regulis juris.*

(3) Rota *dec. 290. par. 18. rec. num. 22*; et 23, coram Duno-
zetto *dec. 397. num. 22*, et alibi apud Rigant. in *par. 1. Reg.*
IX. Can. §. 2. num. 334.

(4) Hoc tract. *cap. 5. num. 71.*

(5) Rota coram Gregorio *dec. 33.* tum *dec. 298. num. 16*, et
dec. 329. num. 12. par. 9. rec., et alibi ab Armiundo Riccio lauda-
ta penes Rigant in *Reg. IV. et §. 3. num. 79.*

(6) *Cit. cap. V. num. 72.*

(7) Innoc. III. in *cap. licet magister 3. de suppl. negl. prael.*
et *cap. postulastis 15. de concess. praeb.*

(8) Rota coram Gypso in *Romana 28. Aprilis 1595*, apud Ri-
gaut. in *par. 1. Reg. IX. §. 13. num. 124.*

gentiam, puta Capituli Cathedralis Ecclesiae, ad Episcopum inculpabilem devolvunt canones collationem (1).

XVI. Consueverunt insuper Cardinales Ecclesias episcopales dimittere cum indulto conferendi, *ut prius* earum beneficia in octo mensibus apostolicis vacatura, quatuor aliis mensibus successori Episcopo relictis (2); quod nunc praeservatur integrum, ubi dimissa Ecclesia alteri Cardinali confertur. Sed hocce indultum quo magis extrordinarium est, eo strictiorem postulat interpretationem. Non licebit idcirco post dimissam Ecclesiam Cardinali renunciationes beneficiorum admittere, quum Ordinarius ipse non sit amplius (3): neque si moriatur exinde successor Episcopus, adrogare sibi ordinariam beneficiorum collationem in quatuor mensibus ordinariis vacantium (4).

XVII. Quisquis a Cardinalibus beneficium quomodolibet reservatum, vel in mense reservato vacans adipiscitur, ei lex ipsa indulti onus imponit impetrandi ab Apostolica Sede litteras *novae provisionis* cum solutione taxarum omnium intra quatuor fere menses, quotiescunque beneficij redditus vigintiquatuor ducatos auri de Camera, nullis deductis oneribus excederent. Ne quis autem sibi blandiatur id posse onus abjicere impune, fretus auctoritate Doctorum aliquot contententium Cardinales beneficia in apostolicis mensibus vacantia, et aliunde non reservata jure ordinario potius, quam delegato, conferre (5). Benedictus XIV. motu proprio in perpetuum sauxit: *ut nemo deinceps ab eisdem Cardinalibus ordinariis collatoribus provisos de beneficio in aliquo ex mensibus apostolicis praefatis vocato possit se quocumque praetextu eximere ab expe-*

(1) Alex. III. in *cap. nulla* 2. de *concess. praeb.*, et Innoc. III. in *cit. cap. postulastis*. Haec de re videsis dicta superius *cap. V. num. 12*, et inferius dicenda *cap. VIII*.

(2) De hoc indult. agunt Germon. de *indult. Card. §. per quae sublati*, et §. *commendase*, Gonzalez ad *Reg. 8. gl. 21. num. 36 et seq.* Card. de Luca de *benefic. disc. 2. et 31*, Rigant. in *Reg. 2. §. 3. num. 407. et seqq.*

(3) Rota coram Puteo *dec. 164. lib. 3*, Coccin. *dec. 870. num. 19*, et 20, Achill. de Grassis *dec. 1. de off. ordin.* Paris. de *resignat. lib. 7. qu. 12. num. 24*.

(4) Rota *dec. 422. par. 1. divers.* et DD. apud Rigant. *loc. cit. num. 411*.

(5) Ex supradictis *cap. 5. num. 43*.

ditione litterarum apostolicarum in forma novae apostolicae provisionis, juxta formam in indultis Cardinalibus concedi solitis praescriptam: alias e' apso tempore ibidem praefixo possit idem beneficium a Sede Apostolica praedicta impetrari (1) Nova autem provisio Sedis Apostolicae hanc inter alias continet clausulam: *dummodo beneficia praefata sub indulto comprehendantur* (2).

XVIII. Haec dicta patefaciunt, quomodo, quibus, et quando Cardinales debeant specialim reservationibus apostolicis Regularum Cancellariae obtemperare. Ceterum Regula LXX. eos generatim eximit declarando: *quod in quibuscumque constitutionibus, et Regulis per Sanctitatem Suam edendis non comprehendantur, neque comprehensi censeantur ipsi Cardinales, nisi illae eorumdem Cardinalium favorem concernant, vel constitutiones edendae de eorumdem Cardinalium, vel majoris partis eorum consilio editae fuerint, seu in eisdem Regulis, et constitutionibus facta fuerit ipsorum Cardinalium expressa mentio.*

XIX. Sex Cardinales Episcopi suburbicarii, alique Cardinales diaconi, et presbyteri quasi episcopalem jurisdictionem habentes in Ecclesiis titularum suorum (3) privilegio fruuntur, donec in Urbe, seu in Curia Romana resideant, conferendi beneficia in eisdem Episcopatibus, et Ecclesiis fundata (4), quamvis per obitum in Curia, et apud Sedem quandocumque vacantia. Quamdiu vero absentes inde fuerint ob quamlibet causam, vel necessariam, vel de licentia Papae, quamvis intra duas diaetas,

(1) Bened. XIV. in *const. cum sicut accepimus* 12. to 1. *Bullar.* Si quis vero Cardinalium indultum impetrare omiserit, neque acceptaverit, et beneficia non reservata malit in cunctis mensibus duodecim conferre vigore exceptionis eorum a Regula IX: locum tunc non esse reservationi Sedis Apostolicae, monet Rigan-
tius to. 2. pag. 89. num. 84.

(2) Ex Rigan. in *Reg. IV. Canc. §. 3. num. 34.*

(3) Honor. III. in *cap. his, quae* 11. *de majorit. et obed.*

(4) Germonius *de indult. Card. §. tum ratione* num. 14. Rigan. in *Reg. VIII. Canc. §. 1. num. 133.* Ejusmodi facultatem a jure communi repetunt Fagnanus in *cit. cap. his, quae* num. 22. Cobellius *de notitia Card. cap. 16. privil. 14. vers. collatio-
num*, et Card. de Albicis *discept. 1. num. 51.*

vel in diocesis episcopalis sibi commendatis moram faciant (1): ipso facto eis adimitur per Cancellariae Regulam VIII. vicaria conferendi potestas, quam eis Papa Urbis Episcopus, et ordinarius Collator sub conditione residentiae indulget (2). Atamen absentes a Curia ex permissu Pontificis Cardinales consueverunt in aliis episcopatibus praeter suburbicarios beneficia conferre vigore communis indulti, et id palam exprimentis (3). Nam unica reservatio beneficiorum scilicet vacantium in Urbe, seu apud Sedem, et in Curia videtur in gratiam Cardinalium titularium adempta generatim: nisi malueris cum Germonio, et aliis (4) dicere ea non vacare apud Sedem, sed jure ordinario a Cardinalibus conferri. Dum ea vero duplicem subeant reservationem coaequalem, locum non esse indulto Cardinalis adfirmat cum Rota Riganus (5). Mox continuo addit, et pluribus comprobatur auctoritatibus collationem beneficiorum ejusmodi vacantium per obitum Curialis pertinere ad Papam. Si ita se res habeat: non duplex reservatio coequalis, sed una vel inaequalis indultum istud excludit. Quandoquidem Cardinalis titularis, nisi obtinuerit speciale indultum conferendi reservata, ipsum ea conferre non posse, tametsi unica reservatio obvenerit ratione mensis ex obitu beneficiarii urbani extra Curiam in mense apostolico, scribit idem Riganus (6) ex rebus pluries judicatis. Quoniam vero explorati juris est, quod Cardinales omnes generatim excipiat a reservatione mensium ipsamet Regulae IX. littera, et beneficia Urbis nec expressim, nec tacite comprehendat: satis non video,

(1) Card. de Luca *de benefic. disc.* 142. num. 12. Nam Alexander VII. an. 1655. decrevit delendam ex Reg. VIII. eam clausulam, non tamen ob servitium Sedis Apostolicae, et cum licentia Sanctitatis Suae, vel apud eorum Ecclesias residentium. Quumque successores Pontifices hanc ipsam clausulam omittere in suis Regulis ad hanc usque aetatem consueverint: mens eorum inde arguitur nullam omnino causam absentibus a Curia Cardinalibus suffragari ad retinendum jus collationis.

(2) Card. de Luca *de benefic. disc.* 133. num. 14. Confer. huc dicta superius cap. V. num. 42.

(3) Ex supradictis num. 9.

(4) Apud Rigan. in Reg. 1. Canc. §. 1. num. 119.

(5) Rota dec. 599. num. 18. par. 18. rec. Rigan. loc. cit. num. 120.

(6) Idem loc. cit. num. 122, et 123.

cur beneficiariis Ecclesiarum Urbis extra Curiam in mense apostolico decedentibus, et beneficia tunc valeant Cardinales titulares conferre, alio indigeant indulto.

XX. Trium basilicarum Urbis patriarchalium S. Io. Lateranensis, S. Petri, S. M. Majoris beneficia majora (scilicet canonicatus, praebendas, dignitates, personatus, et officia Sedi Apostolicae reservata specialim esse per Regulam VIII, quum Papa sit proprius earum Ordinarius: Archipresbyteros vero Cardinales una cum Capitulis Canonicorum ex peculiaribus indulti conferre cetera beneficia inferiora, quum in eisdem basilicis existentia, tum quae alibi extra Urbem ad eas pertinent, jam dictum superius est (1). Ista haec autem collatio est inter Archipresbyteros, et Canonicos non eodem modo, sed varie divisa. Nam vetusta basilica Lateranensis consuetudo, vel concordia collationem beneficiorum intra basilicam Cardinali Archipresbytero, aliorum extra Urbem Canonicis tribuebat. Nunc omnium utriusque generis beneficiorum collatio intra, et extra Urbem ex nupera Innocentii XII. constitutione communis est Archipresbytero cum Canonicis, diviso tantum exercitio per alternas hebdomadas. Communio haec proprietaria collationis conservat Cardinali Archipresbytero integrum jus accrescendi, seu non decrescendi, ad eumque transfert collationem, quoties reservatio, vel aliud obstaculum Capitulo impediatur eam explere in hebdomadis Canonicorum (2). In duabus aliis basilicis, et exercitium, et proprietatem juris conferendi complectitur constituta hebdomadarum divisio. In Vaticana S. Petri alternatim Archipresbyter intra unam, Canonici intra hebdomadam alteram, quae a vespera Sabbathi ad alterius Sabbathi vesperam praecurrit, vacantia beneficia conferunt ex aequo (3). Sed in basilica S. M. Majoris ob inaequalem divisionem Archipresbyter confert vacantia in duabus hebdomadis, Capitulum in tertia quaque hebdomada, quae a media praecedentis Sabbathi usque ad sequentis Sabbathi mediam quoque noctem intercedit (4). Divisa vero proprietas inter-

(1) *Cap. V. num. 42.* De his privilegiis, et indultis agit Cohellius *loc. cit. §. verum.*

(2) *Rig. ut. in Reg. VIII. §. 1. num. 21. ad 23.*

(3) *Rigant. ibidem num. 16.*

(4) Quod constitutio Pii IV. in ea divisione hebdomadarum in

eos consortium et communionem. et reciprocum accrescendi jus quum excludat omnimodis: fit exinde, ut Cardinales vigore indulti paullo superius expositi nequeant manum extendere suam ad reservata in hebdomadis Canonicorum vacantia, quae Papa confert (1).

XXI. Legatis quoque non Cardinalibus, ac Nunciis, aliisque praelatis conspicuis consueverunt Pontifices ad libitum suum collationes beneficiorum delegare intra fines provinciae eis demandatae (2). Etsi enim Cardinales a latere Legati ordinariam potestatem sibi communi jure tributam habeant conferendi beneficia etiam reservata, et affecta (3), exceptis in Curia vacantibus (4), nec non devoluta ad Sedem Apostolicam (5), locorum que Ordinarios dioecesanos ea in re praeveniendi etiam per specialem reservationem (6); simul et praesentatos a patronis ecclesiasticis institueudi, secus a laicis (7), tamen simplices Legatos quum *missos*, tum *natos ex ipsius legationis munere nullam habere potestatem conferendi beneficia*; nisi eam alicui ipsorum Papa *specialiter duxerit indulgendam*, Innocentius IV. aperte declaravit (8). Hujusmodi indulto numquam potitos Nuncios pontificios in hoc Regno Neapolitano res est exploratissima.

basilica S. M. Majoris proprietatem assecerit, consortiumque ita excluserit inter Archipresbyterum, et Canonicos, fuse tradit Rigrant. in *Reg. 2. Canc. §. 3. num. 172, 180, 195, et 293.*

(1) Rigrant. in *Reg. VIII. cit. §. 1. num. 16. ad 20.*

(2) Ex traditis *lib. 1. Inst. Canonic. tit. 22. de Legatis, et Nuntiis num. 10, et 19.*

(3) Innoc. IV. in *cap. officii 1. de offic. legati in VI.*

(4) Clem. IV. in *cap. licet 2, et Bonif. VIII. in cap. praesenti de praeb. in VI.*

(5) Innoc. III. in *cap. litteras 4. de suppl. neglig. praelator.* Greg. IX. in *cap. venerabilis 37. de praebend.* Bonif. VIII. in *cap. quamvis 38. de praebendis in VI.* glossa in *cap. 1. de offic. legati in verb. ampliori.*

(6) Bonif. VIII. in *cap. praesenti 3. de offic. leg. in VI.* et in *cap. si apostolica 12. de praebendis in VI.*

(7) Innoc. III. in *cap. dilectus 6. de offic. legati, idemque in cap. cum dilectus 28. de jurep.* Bonif. VIII. in *cap. deliberatione 4. de offic. leg. in VI.*

(8) Innoc. IV. in *cit. cap. officii 1. de off. leg. in VI.*

XXII. Reges tandem supremosque principes beneficia aliquot ecclesiastica regio praesertim aere fundata, et dotata conferre jure extraordinario, nimirum ex privilegio Sedis Apostolicae vel expresso, vel praesumpto, usus conducet priscis, et recentibus auctoritatibus, et exemplis comprobatus. Innocentius III. refert, *quod decanatum, et praebendas Ecclesiae S. Petri de Curia in civitate Cenomanensi Rex Anglorum, et progenitores sui, qui eam de bonis suis fundaverant liberam, et exemptam, conferebant dioecetano Episcopo inconsulto* (1). Idemque Pontifex *causam, quae inter Ariensem Praepositum, et Comitissam Flandrensem super donatione* (libera scilicet collatione) *sex praebendarum sacerdotalium* agitata, apostolicis delegatis judicandam commisit (2). Eidem vero Comitissae Flandriae Mathildi, quae suo in praedio dotali Ecclesiam exstructura, et *jus patronatus, et praebendarum collationem* in ea sibi suisque successoribus reservari in limine foundationis expetiverat Innocentius ipse III, concessio dumtaxat patronatu noluit collationem praebendarum indulgere (3). Tum epistola Honorii III, habet:

(1) Innoc. III. ad Decanum, et Capitulum Cenomanensem in *cap. cum inter vos 6. de consuetudine*. Gregorianus textus Decretalium recitata verba non habet in mutilo fragmento decretalis Innocentii, at ea in lucem promitt Emmanuel Gonzalez, integriorem hanc epistolam exscribens.

(2) Idem Inn. III. in *cap. dilecto filio 40. de testibus*. Mox quod archidiaconatum conferret Princeps Achajae, adprobavit *ep. 28. lib. 13. reg.*

(3) Epistola haec Innocentii III. ad Mathildem Comitiss. Fland. ex *lib. 3. reg. ep. 192.* apud Emm. Gonzalez in *cap. praeterea 4. de jurepatr. num. 7*, ita se habet: *Oblata quidem nobis ex tua parte petitio continebat, quod cum in quodam loco cui dotalitii Nepa nomine ad honorem Dei Ecclesiam fundare proponas, et de bonis tuis sic plena manu dotare, quod Canonicis, qui Deo ibidem pro tempore servirent, necessaria vitae non desint, jus patronatus, et praebendarum collationem in ea sibi, ac successoribus tuis reservari petebas. Quorum primam admittimus, secundum vero non duximus concedendum, quum non expediat saluti id concedi. Quia cum devotione te asseras assumptis propositum in loco praedicto Ecclesiam construendi: adquires eo plus animae, quo minus in ea corpori reservabis.*

quod Decanus Andegavensis ex donatione Regis praebendarum ejusdem Ecclesiae collationem haberet (1). Et alia quod *Comitissa Flandrensis fecerit promissiones de non vacantiis beneficiis ecclesiasticis, in quibus jus obtinet patronatus, et donationes eorum in manibus posuerit alienis* (2). Gregorius IX epistola ad Fridericum II. Imp. data anno 1236. jus conferendi beneficia ecclesiastica in eo agnovit: non item committendi curam animarum illis adnexam (3).

XXIII. Quum ita se res habeant, cave putes absurdam in laicis principibus istam conferendi potestatem, quia spiritualement. Indulto enim pontificio bene fit, ut laicus spiritualis potestatis incapax eam, quae non ab ordine sacerdotali per impositionem manuum, sed ab ecclesiastica jurisdictione profluit, et mandari se junctim a sacra ordinatione consuevit vicario jure exerceat, velut instrumentum Pontificis, et collatoris ecclesiastici nudus minister, aut procurator (4). Qui Reges instar sacerdotum oleo sacro inunctos inde spiritualis potestatis capaces opinantur, nil omnino canficiunt: sat enim constat sua ex unctione difformi Reges nulla sibi jura sacerdotii acquirere (5). Nec scopum attingit Caro-

Unde devotionem tuam exhortamur in Domino, quatenus illud perficere studeas, quod ad tuam salutem, et ecclesiasticam pertinere dignoscitur honestatem.

(1) Honor. III. ad Episc. Priorem, et Archidiaconum Macloviensem in cap. *dilectus filius* 34. de praebendis.

(2) Idem in cap. *cum dilecta* 16, et ult. de concess. praeb.

(3) Rainaldus ad an. 1236. num. 14. hoc fragmentum ex epistola 398, et 253. Greg. IX. ad Frider. II. habet: *Esto quod aliqua beneficia vacantia conferas: ut curam tamen animarum illis adnexam committere valeas, jus spirituale, quod non cadit in laicum, non permittit, et in locum viventium, quos de gradu suo nec propria culpa, nec sui iudicis sententia dejecit, aliis substitui, jus datum coelitus interdicat.*

(4) Bouifacius VIII. quum laicum procuratorem ad agendum, et defendendum in causis spiritualibus admittat in cap. 1. de procurat. in VI. glossa marginalis in eod. cap. addit, quod renunciando etiam, vel acceptando beneficio idoneus procurator sit laicus nudi ministri personam gerens in ejusmodi spiritualibus. Id ipsum firmat cum Decio, et aliis Fagnanus in cap. *causam* 8. de elect. num. 15. et in cap. *contingit* 8. de arbitris num. 29.

(5) Ex traditis lib. 3 Instit. Canonic. tit. 19. 21, et seq.

lus Molinaeus ajens, quod *hujusmodi canonicatus, sacella, et similia beneficia ad meram, et perpetuae Regis collationem spectantia magis saecularia, et profana beneficia sunt, quam ecclesiastica, quamvis nonnisi clericis, quos tonsuratos vocant, conferantur: quia talibus ex voluntate Regis fundatoris destinata sunt. Unde non habent de se ullam administrationem clavium, vel Sacramentorum* (1). Hac enim opinione videtur is non capere satis neque naturam simplicis beneficii ecclesiastici nullam habentis curam animarum, Sacramentorumque administrationem, nec regias praerogativas in collationibus ecclesiasticis beneficiorum quorumlibet etiam curatorum.

XXIV. Itaque regia beneficiorum collatio ex privilegio, indultoque Romani Pontificis vel praesumpto repetenda est. *Expressum* dicimus, quoties liquet principem Ecclesiae fundatorem cum adsensu pontificio patronatum una cum jure conferendi in ea sibi, suisque successoribus reservasse. *Praesumptum* oritur ex longaeva observantia: ubi scilicet ab immemorabili tempore consueverint Reges arbitrio suo beneficia. et Ecclesias regii patronatus conferre inconsultis quum Episcopis dioecesanis, tum Romano Pontifice. Nam consuetudo immemorabilis conjecturam facit legitimam privilegii apostolici, seu juris conferendi in limine foundationis reservati, et obtenti (2).

XXV. Hoc in Regno Neapolitano regiam collationem beneficiorum regii patronatus ex privilegio quidem apostolico derivant nostri (3), quod in primis ostendunt publica monumenta, in re-

(1) Car. Molinaeus damnatus auctor in *Reg. de infirmis resigantib.* num. 416.

(2) Fagnanus in *cap. consuetudines 1. de consuetud.* num. 54. et seq. cum Felino, Probo, Aufrerio, Baldo, et Rota coram Crescentio, et Puteo in primis affirmat laicum ex consuetudine immemorabili cum fama privilegii posse jus ecclesiastica beneficia conferendi acquirere, secundum regulas juris communis: negat ex nova Urbani VIII. const. *Romanus Pontifex*, edita die 5. Junii 1641, qua improbantur quaevis attentata quum a ministris Sedis Apostolicae, tum a baronibus, et feudatariis contra libertatem, et jurisdictionem ecclesiasticam. At Urbanus nullum de Regibus verbum fecit.

(3) Io. Semeca auctor glossae in *comm. ad Gratianum in can.*

giis archivis permanentia, vel ex inveterata plurium saeculorum consuetudine conijcitur (1). Redundant plane tabularum codices et acta publica regiis rescriptis, et diplomatibus, per quae Svedi, Andegavenses, Aragonii, ceteri subsecuti Reges Neapolitani pleno jure contulerunt conspicuas dignitates quasi episcopales, Archipresbyteratum Altimuranum, et Prioratum S. Nicolai Bariensis, tum Abbatiam S. Egidii Altavillae; et insuper Canonicatus tam Capituli Lucerini alternatim cum Episcopo, quam S. Nicolai Bariensis alternatim cum Priore, cetera inferiora beneficia in variis Regni diocesisibus posita nedom simplicia, sed adnexam quoque habentia curam animarum (2).

XXVI. Tanta tot indultorum varietas efficit, ut collator quisque privilegiarius formam indulti sui observare adamussim debeat, ejusque fines nullatenus transilire (3). Cumque cujuslibet privilegii nativa indoles juri communi adversetur (4), strictam-

1. *Causa 16. qu. 7. observat laicis non competere inestituras beneficiorum, nisi auctoritate Papae habeat laicus investituras, sicut Rex Apuliae.* Andreas de Isernia in *proem. constit. Regni num. 50* contestatur quod Neapolitani Reges olim non modo praesentabant, sed et investiebant clericos de beneficiis ecclesiasticis, et illis haec *conferabant per privilegia papalia*, quae possunt hoc concedere laico. Minadous in *repetit. const. in aliquibus verb. Comitum, et Baronum* scribit in eodem regio patronatu cum jure conferendi Regem fungi vice Pontificis, et ordinarii. Marchio Falletti *ragionam. 6. ad litt. P.*, ea in re legatum Papae Regem nuncupat, jure non suo, sed a Papa accepto beneficia conferentem.

(1) Alexander Tartagna de Imola *to. 4. cons. 74. num. 10. Reges, et Principes saeculares*, ait, qui ex consuetudine, de cujus initio memoria non existit, habent potestatem conferendi in regnis suis praebendas, istud possunt facere: quia talis consuetudo tribuere videtur sibi privilegium. Et potest etiam poni exemplum in Rege Apuliae.

(2) Syllabum Ecclesiarum, beneficiorumque regiae quum collationis, tum praesentationis videsis apud B. Clioccarelli. *archiu. tom. 6. Scipion. Marzella descrizione del regno di Napoli pag. 389*, et Abbatem Troyli *to. 4. dell'ist. di Nap. par. 2. cap. 3. §. 1. num. 10, et seq.*

(3) Innoc. III. in *cap. cum dilecta 22. de rescriptis*, Paulus in *l. dtligenter 5. D. mandati*.

(4) *Jus singulare est, quod contra tenorem rationis propter*

que postulet interpretationem: illud nequit de uno ad alium casum vel consimilem extendi (1). Quoties propterea ex verbis ambignis, vel defectivis dubium emerit probabile, utrum haec, vel illa facultas indulto comprehendatur: sententia negans tunc tenenda est, exclusoque indulto sequi regulas juris communis oportet (2). Hinc facile conjicitur, cur Cardinales, ac Reges vigore indulti beneficia conferentes nequeant super illis perpetuas pensiones reservare, neque resignationes in favorem certae personae admittere, quae duae res ad Sedem Apostolicam pertinent.

CAP. VIII.

DE ORDINARIIS COLLATORIBUS.

- I. Ex priscis canonibus, et legibus Episcopi sunt nativi, et ordinarii beneficiorum collatores.*
- II. Suamque potestatem ratione triplici adnexam ordini episcopali tuerentur communi regula juris, quae tamen limitatur apostolicis reservationibus, et privilegiis, et patronatibus.*
- III. Regulae huic semper locus erit, nisi ex adverso probetur aliqua istarum exceptionum.*
- IV. Capitula Cathedralium communem cum Episcopis collationem jure generali, nunc speciali ex privilegio, statuto, et consuetudine habent variam.*
- V. Quota vocum Episcopi, et Capituli ex eodem jure vario, et speciali definienda est.*
- VI. Per vices inter Episcopos, et Capitula divisum alicubi est exercitium, vel proprietas juris conferendi.*
- VII. Poenitentarii, ac Theologi praebendae ab Episcopo solum conferuntur.*

aliquam utilitatem auct. constituentium introductum est, Paulus ait in l. 15. d. de legibus.

(1) Greg. IV. in cap. P. et G. 40. de offic. et pot. deleg. et cap. significante 34. de rescriptis. Quas a jure communi exorbitant, nequaquam ad consequentiam sunt trahenda, Bonif. VIII ait in cap. quae a jure 28. de reg. jur. in VI. Consonant Paulus in l. quod vero contra rationem juris 14. et Julianus l. in his 15. D. de legibus.

(2) Greg. IX. in cap. abbatem 40. de rescriptis.

VIII. Inferiores praelati sunt etiam collatores ordinarii.

IX. Ut Archidiaconi olim, ita Vicarii nunc Episcoporum institutionem agunt in beneficiis jurispatronatus, non collationem liberam sine mandato speciali.

X. Vicarius Capituli Sede vacante pariter instituendi, non conferendi jus habet.

XI. Collegio Cardinalium in conclavi etiam interdicta collatio est.

XII. Infra sex menses neglecta collatio ad alium devolvitur collatorem, ordinarium scilicet superiorem.

XIII. A Capitulo negligente ad Episcopum fere semper, ab Episcopo ad Capitulum aliquando fit devolutio.

XIV. Devoluta ut Metropolitanis conferant, iudicium devolutionis debet rite praesire.

XV. Quod Sedes Apostolica solet executoribus litterarum expresse mandare.

XVI. Post devolutionem irrita est Ordinarii collatio.

XVII. Legati a latere, natiq̃ue devoluta conferunt.

XVIII. Reservata, et affecta ad inferiores a Papa numquam devolvuntur, exceptis parochialibus.

I. Dioecesis Episcopis generatim quum prisci canones, ac leges dederint potestatem administrandi Ecclesias, capellasque omnes intra suos cujusque fines, earumque praebendas, et officia distribuendi (1): eos inde *ordinarios* beneficiorum collatores in primis jura ipsa denominant. Ex canone Concilii Antiocheni an. 341, *quaecumque res Ecclesiae sunt, convenit ... gubernari, et dispensari cum iudicio, et potestate Episcopi, cui totius plebis animae videntur esse commissae* (2). Omnes basilicae, quae per diversa loca constructae sunt, vel quotidie construuntur, placuit secundum priorum canonum regulam, ut in ejus Episcopi potestate consistent, in cujus territorio positaesunt, ait Synodus Aurelianensis (3). Omnia secundum constitutio-

(1) Videsis *can. 37. vulgo Apostolorum*, tum alios apud Gratianum *C. X. qu. 2.* quos indicavi superius *cap. 1. num. 16., et cap. 6. num. 1.*

(2) Conc. Antiochen. in *can. quaecumque res* 5. *C. 10. qu. 1.*

(3) Syn. Aurelianens. an. 511. in *can. omnes basilicae* 10. *C. 16. qu. 7.* Consonant ejusdem Synodi in *can. de his 7, et can. antiquos canones* 8. *C. 10. qu. 1.*

nem antiquam ad Episcopi ordinationem, et potestatem pertineant, ex canone Concilii Toletani III. an. 589. (1). In Synodo Cabilonensi I. an. 650. quoque decretum est, ut omnes Ecclesiae cum dotibus suis, et decimis, et omnibus juribus in Episcopi potestate consistent, atque ad ordinationem suam semper pertineant (2). Urbani II. epistola haec habet: Episcopus omnia sui episcopatus membra, videlicet archidiaconatus archipresbyteratus, decanias, vel aliquas praeposituras, Ecclesiae suae canonicas gratis absque omni venalitate distribuat (3). In Concilio Melphitano an. 1089. sub eodem Pontifice simul cautum: ut praeposituras Ecclesiae, sive canonicas praebendas etiam, quae canonicatus dicuntur, Episcopus sine venalitate distribuat (4). Concilium Lateranense I. sub Callisto II. an. 1123. insuper sanxit: ut secundum Apostolorum canones omnium negotiorum ecclesiasticorum curam Episcopus habeat. Utque nullus omnino Archidiaconus, aut Archipresbyter, aut Praepositus, vel Decanus animarum curam, vel praebendas Ecclesiae sine iudicio, vel consensu Episcopi alicui tribuat: immo sicut sanctis canonibus constitutum est, animarum cura, et rerum ecclesiasticarum dispensatio in Episcopi iudicio, et potestate permaneat (5). Alexander III. Cantuariensi Archiepiscopo rescripsit extirpandam radicitus fore pravam consuetudinem, quod clerici ecclesiastica beneficia sine consensu Episcopi diocesis, vel officialium suorum, qui hoc de jure possunt, recipiant: minus quam deceat cogitantes, quomodo id a sanctorum Patrum est institutionibus alienum (6).

II. Sacra clericorum ordinatio, cura animarum primaria, Ecclesiarumque fundatio, et erectio, quae omnia sunt juris episcopalis, ordinariam ejusmodi collationem beneficiorum singulis

(1) Tolet. III. in *can. sic quidam* 2. ead. C. et qu. et Tolet IV. in *seq. can. noverint* 6.

(2) Cabilon. I. in *can. decretum est* 3. ead. C. et qu. Iisdem fere verbis idipsum firmavit Carolus M. lib. 7. capitular. cap. 368.

(3) Urbanus II. creatus Pontifex an. 1088, ep. 15.

(4) Conc. Melphitanum an. 1089. *can.* 1.

(5) Conc. Lateran. I. sub Callisto II. *can.* 4. 7.

(6) Alexand. III. in *cap. ex frequentibus* 3. de institutionibus.

Episcopis ab initio vindicarunt. Conjuncta primum sacrae ordinationi mancipatio clericorum ad inserviendum certae Ecclesiae, procul dubio effecit, ut unus idemque Episcopus ordines quum minores, tum majores conferret, ordinatisque ministeria sacra, et officia cum adnexis praebendis, ac stipendiis distribueret. Mox animarum cura superior postulavit, ut Episcopus quisque suos coadjutores, et subministros ad eam exercendam necessarios, periculoque suo idoneos diligeret, rationem Deo redditurus de omnibus totius gregis dioecesanis capitibus. Tandem cultus Ecclesiarum clericos, diaconos, presbyteros eisdem famulatuos ab iis quoque ipsis expetivit, qui eas auctoritate sua, suorumque praedecessorum fundatas erexerunt, et dedicarunt. Propterea Episcopi bene fundatam in jure communi intentionem suam habere vulgo dicuntur, scilicet ex generali regula juris praesumitur ad eos ordinariam pertinere potestatem conferendi omnia, et singula beneficia intra suarum diocesum fines: iis tantum exceptis, quae vel sibi Apostolica Sedes reservavit (1), vel aliis extra ordinem conferenda ex privilegio, seu indulto speciatim concessit (2), vel consuetudo inveterata ad inferiores transtulit collatores (3), vel coaequales (4), aut voluntas fundatorum patronatui subjecit, eligendi, seu praesentandi jure patronis, vel ecclesiasticis, vel laicis eatenus reservato, ut nonnisi electos ab iis, vel praesentatos idoneos cogantur Ordinarii locorum instituere (5).

(1) Liquent ex supradictis *cap.* 5.

(2) Joannes IV. Syracusano Episcopo rescribens in *can. visis litteris* 1. C. 16. qu. 2. definivit in Ecclesiis monachorum pleno jure exemptis ad Abbates, non ad Episcopos pertinere institutionem, investituramque presbyterorum. *Divinae enim leges habent, et saeculares*, ait, *ut cujus est possessio, ejus sint institutio . . . majus enim fuit possessionem dare, quam sit investituram concedere.* Pariter Alex. III. in *cap. cum et plantare* 3. §. in *Ecclesiis de privileg.* in Conc. Later. decrevit, presbyteros in Ecclesiis templariorum, aliorumque regularium exemptorum, quae ad eos pleno jure pertinent, non debere Episcopis repraesentari: secus in aliis non pleno jure exemptis.

(3) Inn. III. in *cap. cum venissent* 6. de *institut.*

(4) Bonif. VIII. in *cap. Episcopum* 1. de *praescript. in Vl.*

(5) Conferenda huc sunt quae jam exposui in *tract. de jure patr.*

III. Haec juris regula tales patiens limitationes efficit, ut in rebus dubiis qui suam esse collationem extraordinariam, vel electionem, aut praesentationem contendunt, quotiescumque probationibus plenius, clarisque documentis in iudicio petitorio non ostenderint privilegium, vel consuetudinem rite praescriptam, vel jus patronatus, contra eos pro episcopali potestate sit ferenda sententia (1). Alexander III. autem rescripit Archidiaconum Richemundiae esse in plena possessione instituendi, aliorumque jurium tuendum, *donec probatum legitime fuerit ex adverso*, num ea praecessori Archidiacono Archiepiscopus Eboracensis personaliter ad vitam, an perpetuo concessisset cum consensu Capituli (2): ex eo juris civilis axioma, seu retinendae possessionis interdicto: *uti possidetis, ita litem pendente possideatis*.

IV. Quum vetusto proverbio dicerentur Canonici Cathedralis Ecclesiae membra, et caput Episcopus, ita unum corpus Capituli simul efficere, ut adigerentur Episcopi cuncta Ecclesiae negotia tractare cum totius olim Cleri, mox Capituli consilio, vel consensu (3): communem propterea cum Episcopis collationem quoque praebendarum et beneficiorum habebant olim Capitula Cathedralium ex ea ipsa juris regula (4). Sed processu temporum

(1) *Qui excipit, probare debet quod excipitur*: Celsus Ictus. docet in l. si pactum 9. D. de probat. Et cum Ulpiano, in exceptionibus dicendum est reum partibus actoris fungi oportere, ipsumque exceptionem, velut intentionem implere, l. in exceptionibus 19. D. eodem.

(2) Innoc. III. in cit. cap. cum venissent 6. de instit.

(3) Alex. III. in cap. novit 4, et cap. quanto 5. de his quae fiunt a prael. sine cons. Capit. Inn. III. in cap. tua nuper 8., et cap. pastoralis 9. eod. tit. S. Leo M. ad Siculos Episcopos de rebus Ecclesiae distrahendis rescribens in can. sine exceptione 52. C. 12. qu. 2., ait: cum totius Cleri tractatu, atque consensu id eligat, quod non sit dubium profuturum Ecclesiae. B. Hieronymus in can. olim idem erat 5. dist. 95., Episcopi noverint se, ait, magis consuetudine, quam dispensationis dominicae veritate presbyteris esse majores, et in commune debere Ecclesiam regere.

(4) Alex. III. in cit. cap. novit 4, decrevit institutiones, et destitutiones personarum ecclesiasticarum sine consilio fratrum a Patriarcha Hierosolymitano factas fore irritas. Innocentius III.

communione ejusmodi aegre ferentes Episcopi suam explere jurisdictionem consueverunt inconsulto Capitulo, perinde in ceteris rebus (1), atque in collationibus beneficiorum (2), Praelatique dignitatem singularem sibi solis vindicarunt neglectis communibus primi Canonici juribus (3). Itaque ab ordinario conferendi jure et consortio Episcoporum, exclusis Capitulis Cathedralium in plerisque dioecesibus praesertim Italiae (4: paucae uunc Ecclesiae sunt, in quibus Capitula ipsa non jure amplius generali, sed speciali tantum, eoque vario pro variis locorum statutis, pactisque fundationum, vel privilegiis, vel consuetudinibus potestatem habent conferendi beneficia in quatuor mensibus Ordinariorum, aut communem cum Episcopis, aut privativam sine ullo Episcoporum suffragio (5). Ut enim Praelatis licuit eodem

in *cap. tua nuper* 8. *eod. tit. de his, quae fiunt a prelat, itidem* rescripsit Episcopum non posse absque Capituli consensu Ecclesias in perpetuum aliis Ecclesiis concedere.

(1) Synodo Agathensi in *can. terrulas* 53. C. 12. *qm. 2.* placuit, ut terrulas *Episcopus sine consilio fratrum*, si necessitas fuerit, *distrahendi habeat potestatem*. Quamvis ex Conc. Carthag. in *can. placuit* 51. *eod. C. et qu.* Episcopis non liceret generatim vendere praedia Ecclesiae *inconsulto Concilio, vel cuncto presbyterio*. Bonifacius VIII. in *cap. non est* 3. *de consuetud. in VI.* declaravit non esse consuetudinem reprobendam, quod Episcopus in *inquirendis, puniendis, et corrigendis subditorum excessibus consilium sui Capituli requirere minime teneatur*.

(2) Coelestin. III. in *cap. ea noscitur* 6. *de his, quae fiunt a prelat. sine cons. Capit.* rescripsit: *ex antiqua, et probata consuetudine, vel concessa libertate* fieri posse, ut praelati in *Ecclesiarum, seu beneficiorum collationibus nullum Collegii, seu Capituli consensum debeant requirere*.

(3) Innoc. III. in *cap. postulastis* 15. *de concess. praeb.* palam distinguit, num Archiepiscopus simul cum Canonicis habeat ut Canonicus communem praebendarum donationem, seu collationem, an sejunctam ab eis, ut Praelatus.

(4) Saeculo XIV. Joannes XXII. in *extraraj. execrabilis un. de praeb., et dignit. §. ceterum sin.* edixit *ordinarios beneficiorum collatores* intelligi dioecesanos tantum *Episcopos*, et Ecclesiis Cathedralibus vacantibus *Capitula* eorundem.

(5) Innoc. III. in *cap. proposuit* 4. *de concess. praeb.* fert

singulari jure, et consuetudine ad sese avocare omnimodam collationem Capitulis amotis (1): ita vicissim Capitula potuerunt eam adipisci, seu retinere, vel ademptam Praelatis, vel ab iis neglectam (2).

V. Communem ubi collationem Episcopus una cum Capitulo habeat, necesse quidem non est, ut ipse conjunctim cum Canonicis in collegio conveniat ad electionem collationumque celebrandam: sed satis erit, si ad suffragia Canonicorum in collegio prolata vel unanimiter, vel majoris partis eorum in unum consentientis accesserit ex intervallo in diversis etiam loco, et tempore consensus Episcopi (3). Quoties autem Episcopus a Capitulo

donationes, seu liberas praebendarum collationes ad Capitulum Cameracense pertinere. Hoc in Regno Capitulum Neapolitanum nonnulla beneficia intra basilicam S. Restitutae fundata, quae de mensa Capituli dicuntur, confert Archiepiscopo inconsulto: cetera omnia quum in eadem basilica, tum in tota dioecesi Archiepiscopus solus inconsulto Capitulo, exceptis canonicatibus Ecclesiae Cathedralis, quorum collationem in quatuor mensibus ordinariis communem, et promiscuam simul habent Archiepiscopus, et Capitulum. Insuper Capitulum Trivicanum canonicatus, et dignitates Ecclesiae Cathedralis inconsulto Episcopo, alia cuncta beneficia solus Episcopus confert. Consimili jure Capitulum Beneventanum potiri tradit Rota coram Taya in Beneventana *juris conferendi, seu canonicatus die 4. Aprilis* 1680. Alia insuper Capitula, scilicet Novariense, Patavinum, Brixienae eo ipso jure frui, ex multis Rotae, ac Doctorum testimoniis fert Rigantius *to. 2. in par. 1. Reg. IX. Canc. §. 3. num. 129*: ibique refellit Card. de Luca *de benef. disc. 1. num. 22., et seq.* opinantem nulla reperiri Capitula, quae privativam ejusmodi collationem habeant.

(1) Ex Coelestino III. in *cit. cap. ea noscitur 6. de his, quae sunt a praelatis.*

(2) Innoc. III. in *cap. cum Ecclesia 31. de elect.* Episc. Florentino rescripsit, quod in Thusc. generalis consuetudo servetur, ut in Cathedralibus Ecclesiis solum Capitulum irrequisito Episcopo eligendi Canonicos habeat facultatem. Bonifacius VIII. in *cap. si a Capitulo 5. de concess. prae. in VI.* ponit, quod Capitulo alicujus Ecclesiae Canonicorum receptio, ac praebendarum collatio pertinebat.

(3) Ex *cap. 1. et 4. de his, quae sunt a majori parte Capituli.*

dissentiat, de quota votorum alterutrius disputari tunc solet. Sed quaestionis decisio pendet potissimum a statutis cujusque loci variis, vel a consuetudine, quae votum si duplex, vel unicum Episcopo tribuant, singulis vero Canonicis unum coaequale: facilis tunc erit numeratio vocum, et consensio majoris partis in unum. At si tantam vim solius Episcopi votum, quantam omnia totius Capituli suffragia ex consuetudine, vel statuto obtineant, et Capitulum vel totum, vel major pars ipsius ab Episcopo, tamquam Praelato dissentiat: eo casu nullus erit communi collationi locus (1). Nam divisio in duas ex aequo medietates, quod ad exercitium jure uno conferendi, alterutra earum sejuncta non sufficit ad illud unum integrum sufficiens. Nec episcopale votum integrae medietati aequipollens poterit umquam augeri adhaerentibus suffragiis partis minoris Canonicorum, quum hanc absorbeat eorundem pars major (2).

VI. Ad evitandas hasce dissensiones mos inolevit ita dividendi per vices *exercitium*, vel *proprietatem* communis ejusmodi juris, ut in una vacatione solus Episcopus, in altera Capitulum conferat, in tertia iterum Praelatus, in quarta mox Canonici, et sic deinceps redeunte gyro in aliis, quae subsequenter vacationibus (3). Diviso tantum *exercitio* viget jus accrescendi, seu non decrescendi: quoties nimirum in vice sua Episcopus impe-

(1) Ex traditis a Gonzalez in *Reg. 8. Canc. gl. 45. num. 51.* ceteris DD. apud Rigan. in *Reg. 2. §. 3. n. 237. et seq.* Spectasse huc videtur Innocentius III. in *cap. postulastis 15. de concess. praeb.* dum rescribens de collatione praebendarum ad Capitulum simul, et Archiepiscopum Ebrodunensem in Galliis pertinente distinxit, num Archiepiscopus ut Canonicus, an vero ut Praelatus jus conferendi cum Capitulo haberet. Consonat Bonifacius VIII. in *cap. a collatione 1. de appell. in VI.* Ei enim ut Canonico unam, vel duas voces in collegio tribuitas reor, ut Praelato integram totius medietatem

(2) Ex *cit. cap. 1., et seq. de his, quae sunt a majori parte Capit.*

(3) Bonif. VIII. in *cap. cum in illis 16. §. ult. de praebend. in VI.* loquitur de beneficiis ad aliquorum collationem, vel *communiter, vel divisim* spectantibus. Eamque divisionem hae in re comprobant Rota, et Doctores apud Rigan. in *Reg. 2. Canc. §. 3. num. 161., et seq. 183. et 191.*

diatur vel absentia, morte, aliove casu conferre, jus conferendi ea etiam vice solidetur, atque ad Capitulum pertineat. et e contrario suspensi, vel impediti Capituli vices, puta in mensibus apostolicis, expleat Episcopus fruens indulto (1). At divisa cum assensu apostolico *proprietas* nullum dat locum juri accrescendi: eamque ob rem vices Episcopi, vel suspensi, vel defuncti, vel absentis non Capitulum, sed Apostolica Sedes tunc implet (2). Ad hanc vero, vel illam divisionem, quae ex libera utriusque partis concordia, et voluntate oritur, nemo cogendus est (3): nam *in re communi potior est conditio prohibentis* ex regula juris (4).

VII. Canonici poenitentiarum officium, et praebendam a Capitulo numquam, sed ab Episcopo solo conferri Synodus Tridentina decrevit, imperans ut: *in omnibus Cathedralibus Ecclesiis poenitentiarius aliquis cum unionem praebendae proxime vacaturae ab Episcopo instituatur* (5). Idemque servatur in provisione canonicatus, et praebendae theologiae, quam perinde ac alteram poenitentiarum, praevio concursu coram Episcopo, et quatuor examinatoribus etiam non synodalibus conferendam jussit nupera Benedicti XIII. constitutio (6).

VIII. Praelati inferiores quasi episcopalem jurisdictionem habentes, nulliusque dioecesis locorum Ordinarii accensentur instar Episcoporum inter ordinarios beneficiorum collatores in suis Ecclesiis, locisque exemptis erectorum (7).

(1) Bonif. VIII. in *cap. si ad Episcopum un. ne sede vacante aliquid innovetur*, Rigant. loc. cit. num. 257, 251, 254. et 258.

(2) Confer huc dicta superius *cap. V. num. 43*.

(3) Rota in *Hispalensi divisionis simultaneae* 11. Febr. 1697 coram Muto, et 4. Junii 1700. coram Priolo, apud Rigant. 10. 2. in par. 2. Reg. IX. §. 4. num. 42.

(4) Bonif. VIII. in *cap. in re communi* 56. de reg. jur. in VI.

(5) Trid. in *cap. apostolus* 8. sess. 24. de reform.

(6) Bened. XIII. in *const. pastoralis*, 14. Kal. Junii 1725., quam habet appendix ad Conc. Rom. ejusdem Pontificis num. 2.

(7) De his loquitur Bonifacius VIII. in *cap. si soli Ordinario* 6. de concess. praeb. in VI, et in *cap. Ordinarii locorum* 3. de offic. ord. in VI, et Clementina un. de concess. praeb. Innocentius III. in *cap. cum ad nostram* 7. et ult. de instit. rescripsit, ad Abbatem quemdam ratione Abbatiae pertinere donationem, seu collationem tam custodiarum, quam aliarum dignitatum, ac praeben-

IX. Eodem conferendi jure participes Archidiaconos olim fuisse tamquam vicarios Episcoporum natos plane constat⁽¹⁾. Nunc vero ad officiales Episcoporum mobiles translata eorum jurisdicti ne ordinaria, hi quidem ratione officii de jure possunt *instituere* in ecclesiasticis beneficiis de jure patronatus electos, aut praesentatos a patronis⁽²⁾: at beneficia liberae collationis Vicarius generalis, nonnisi de speciali mandato Episcopi, Praelatique sui *conferre* potest⁽³⁾. Hinc ubi defecerit, vel non appareat ex litteris patentibus id speciale mandatum, nullius momenti erit collatio libera Vicarii cujuslibet generalis⁽⁴⁾.

darum in Ecclesia Patrinensi. Idipsum rescripsit priori Hostiensi et Superiori S. Fridi in *cap. ex tenore 13. de concess. praeb.*

(1) Archidiaconis sexto saeculo tamquam ordinarii jus fuisse eligendi cum plebibus novum Archipresbyterum in locum ejecti, vel defuncti, eumque instituendi, tradit S. Isidor. in *can. si in pluribus 20. dist. 63.* Alexander III. in *cap. super eo 15. de offic. deleg.* rescripsit Ecclesiae institutionem ordinariam ad Episcopum, vel Archidiaconum, vel Archipresbyterum pertinere. Idemque in *cap. referente 7. de praebendis* accepit, quod Archidiaconus unam ex duabus Ecclesiis a quodam Presbytero retentis ei ademerat, et alii Presbytero contulerat.

(2) Alexander III. in *cap. ex frequentibus 3. de institutionibus* Cantuariensi Archiepiscopo rescripsit clericis non licere beneficia ecclesiastica recipere *sine consensu Episcopi dioecesis, vel officialium suorum, qui hoc de jure possunt.*

(3) Innocentius III. in *cap. constitutus 11. de concess. praeb.* probavit, ratamque habuit Canonico delegatam ab Episcopo Laudunensi potestatem conferendi praebendam primo vacaturam. Nam *potest quis per alium, quod potest facere per seipsum*, inquit Bonifacius VIII. in *cap. potest 68. et cap. qui facit per alium 72. de reg. jur. in VI.* Et quoniam absentes a Curia Cardinales non possunt per sese beneficia in suis titulis vacantia conferre; nec enim id eis licebit per Vicarios inibi relictos agere sine speciali indulto, ex traditis a Rigantio in *Reg. 2. Canc. §. 3. num. 49.*

(4) Cum in generali concessione nequaquam illa veniant, quae quis non esset verisimiliter in specie concessurus, nec regulariter donare valeat is, cui bonorum administratio etiam libera est concessa: officialis, aut Vicarius generalis Episcopi beneficia conferre non possunt, nisi beneficiorum collatio ipsis

X. Neque ad Capitulum episcopali Sede vacante, neque ad Vicarium capitularem transit potestas conferendi beneficia, quae ad liberam solius Episcopi collationem spectant (1): *quum numquam inveniatur in jure cautum, quod Capitulum Sede vacante fungatur vice Episcopi in collationibus praebendarum*, ait Honorius III. (2). Adde, quod secunda Cancellariae Regula Papae reservat ea episcopalis collationis beneficia, quae viduata Sede episcopali vacent (3). At canonicas institutiones facere in beneficiis de jure patronatus Vicario capitulari utique licet (4), quemadmodum et Vicario episcopali.

XI. Collegium Cardinalium in conclavi pro novo eligendo Pontifice congregatum pariter nequit beneficia conferre ad Sedis Apostolicae dispositionem pertinentia (5).

XII. Quoties neglexerint collatores ordinarii, quos hactenus memoravi, vacantia beneficia conferre intra sex menses ab eo die, quo ad ipsos notitia vacationis pervenerit, numerandos, nullo interea vel facti, vel juris impedimento detenti, ad superiores pariter ordinarios tunc devolvi collationem jam praemonui superius (6). Eliquandum heic superest, quomodo, et quando ab Episcopo negligente ad Capitulum, et ab alterutro ad Papam, omisso medio Metropolitaram, fiat devolutio. Ex decreto Concilii Latera-

specialiter sit commissa, ait Bonifacius VIII. in *cap. cum in generali 3. de officio Vic. in VI.*

(1) Alexander III. in *cap. eam te 7. de rescriptis* ponit Decanum, et Capitulum Tornacense non potuisse vacante Sede praebendam in ea Ecclesia ei conferre, qui apostolicum de providendo mandatum obtinuerat: *quia donatio praebendarum ad Episcopum spectabat.*

(2) Honor. III. ad Canonicos Suessanos in *cap. illa devotionis 2. ne Sede vacante aliquid innovetur.* Hac itaque in re fallit ea juris regula: *is, qui in jus succedit alterius, eo jure, quo ille, uti debet*: Bonifac. VIII. in *cap. his qui 46. de reg. jur. in VI.*

(3) Ex supradictis *cap. 5. num. 16.*

(4) Bonif. VIII. in *cap. et si 1. de institut.* ait: *Etsi Capitulum sede vacante beneficia, quae ad collationem Episcopi pertinent, conferre non possit: tamen praesentatos a patronis potest admittere, si sint idonei, et instituere.*

(5) Ex Clementina *ne Romani 2. de electione.*

(6) *Cap. 5. num. 12, et cap. 7. num. 15.*

nensis III. *cum praebendas ecclesiasticas, seu quaelibet officia in aliqua Ecclesia vocare contigerit, non diu maneant in suspensio: sed infra sex menses personis, quae digne administrare valeant, conferantur. Si autem Episcopus, ubi ad eum spectat, conferre distulerit, per Capitulum ordinetur. Quod si ad Capitulum pertinuerit, et infra praescriptum terminum hoc non fecerit, Episcopus secundum Deum hoc cum religiosorum virorum consilio exequatur. Vel si omnes forte neglexerint, Metropolitanus de ipsis secundum Deum absque illorum contradictione disponat* (1). Innocentius III. sci-
scitanti Capitulo Ebrodunensi, an donatio praebendarum, quae ad Capitulum ipsum, et Archiepiscopum simul pertinebat, a Capitulo infra semestre neglecta, penes Archiepiscopum remaneret: respondit, *si, vos et Archiepiscopus infra tempus praescriptum circa hoc negligentes extiteritis: sicut nec ab illo ad vos, ita nec a vobis ad illum potestas devolvitur conferendi. Sed secundum statuta Lateranensis Concilii ad Superiorem transit donatio: nisi forte Archiepiscopus non ut Praelatus, sed ut Canonicus vobiscum jus habeat conferendi. Et in hoc casu cum dolose impedierit, dolus ei suffragari non debet* (2). Idemque rescripsit, electionem Cantoris, quam Episcopus, et Capitulum Salamantinum prout communiter spectabat ad eos, neglexerant, devolutam ad Archiepiscopum fuisse (3). Clemens III. Ecclesias, et beneficia juris patronatus ecclesiastici statuto Lateranensi complectens, *nisi praedictae personae, ait, intra tempus Lateranensi Concilio constitutum ad vacantes Ecclesias tibi personas idoneas praesentare neglexerint, ex tunc*

(1) Conc. Lateran. III. sub Alex. III. in cap. nulla 2. de concess. praeb. Septima Synodus oecumenica in can. cum simus 3. C. IX. qu. 3, institutionem oeconomorum in unaquaque Ecclesia neglectam ab Episcopis ad Metropolitanos, ab his ad Constantinop. Patriarcham devolvi, nullo definito negligentiae tempore, statuit. Ex Conc. autem Carthaginensi V. in can. constitutum 22. C. 7. qu. 1. colligitur, intra annum debere tunc Episcopum eligi in ea cathedra, cui intercessor datus esset. At Innocentius II. in can. obeuntibus 35. dist. 63. tradit, quod ultra tres menses vacare Ecclesiam SS. Patrum prohibent sanctiones.

(2) Innoc. III. in cap. postulastis 15. de concess. praeb.

(3) Idem in cap. dilecta 5., et ult. de suppl. neglig. praelat.

tibi liceat in eisdem ordinare rectores (1). Bonifacius VIII. dum statuit electionem Episcoporum in Cathedralibus Ecclesiis vacantibus a Capitulis neglectam non ad proximum Superiorem, sed ad Romanum Pontificem devolvi, *secus autem est*, ait, *in inferioribus Ecclesiis censendum* (2). Tum Clemens V. in Concilio Viennensi adfirmavit ex negligentia quum Episcopi ad Capitulum, tum Capituli ad Episcopum devolvi collationes beneficiorum (3). Idemque statuit, dum *regulares Praelati prioratus, Ecclesias, administrationes, aut quaecvis alia beneficia ad eorum dispositionem spectantia negligunt conferre infra tempus in Lateranensi Concilio constitutum: dioecesani locorum in non exemptis sua, in exemptis vero apostolica auctoritate negligentiam super hoc suppleant eorumdem* (4).

XIII. Ex iuribus istis haec fluunt consecutaria. 1. reciproca datur devolutio a Capitulo ad Episcopum, et ab Episcopo ad Capitulum, ubi per vices diviso inter eos exercitio communis collationis alteruter suam neglexerit vicem. 2: ubi communem, et indivisam uterque habeant collationem, nulla datur ab Episcopo ad Capitulum devolutio 3: at quoties Episcopus communem cum Capitulo ut Canonicus obtineat collationem, negligente Capitulo ad eum ut Praelatum fit devolutio (5), nullam si causam is de-

(1) Clemens III. in *cap. sicut nobis* 2. *eod. tit.*

(2) Bonif. VIII. in *cap. quamquam* 18. *de elect. in VI.* episcopatus enim vacantes, electionemque Episcoporum non extendi canonem Concilii Lateranensis de jure devolutionis, declaraverat jamdudum Innocentius III. in *cap. dilectus* 12. *de concess. praeb.* antequam Cathedrales Ecclesias Apostolicae Sedi reservare consuevissent Regulae Cancellariae.

(3) Clementina *si de beneficio* 4. *de praebendis.*

(4) Clement. *vn. de suppl. negl. Praelat.*

(5) Itaque duorum vices diversas gerit in communibus ejusmodi collationibus unus idemque Episcopus respectu diversarum qualitatum, officiorumque in ipso cumulatorum. Quare Bonifacius VIII. in *cap. a collatione* 11. *de appellat. in VI.* censuit quod appellare cuique liceat a collatione Capituli ad Episcopum, si ut Canonicus ipse in ea interfuit: secus autem, si ut Praelatus. Eademque ratione ductus Innocentius III. in *cap. cum capella* 16. *de privilegiis* rescripsit Canonicos capellae Ducis Burgundiae, qui parochiales Ecclesias extra illam simul retinebant, ut paro-

derit capitulari negligentiae : si cum dolo dederit, secus. 4: Capitulum si nullum sit cum Episcopo consortium in collationibus, ad Capitulum ex episcopali negligentia nequit ordinaria potestas conferendi, qua illud expers omnino est, devolui. 5: si Episcopus alternis cum Papa mensibus, et alternis cum Capitulo vicibus in collatione beneficiorum fruens neglexerit beneficium suae vicis conferre, quod vacasset in aliquo mensium alternorum mobiliu, puta Februario, Aprili, Augusto, vel Octobri: nec etiam ad Capitulum tunc, sed ad Papam collatio devolvitur (1), perinde ac si vacatio in mense reservato contigisset. 6: divisa inter Episcopum proprietate juris conferendi olim communis, nec etiam locus erit devolutioni ab Episcopo negligente ad Capitulum. 7: quoties ad solum Capitulum excluso Episcopo pertineat quomodolibet collatio beneficiorum, a Capitulo negligente ad Episcopum, Praelatumque suum ut immediatum superiorem ordinarium tunc ea devolvitur (2). 8: sed beneficia ob negligentiam inferioris collatoris ad Episcopum, vel Archiepiscopum devoluta hujus Capitulum Sede vacante non confert, quamvis episcopalem interea jurisdictionem exerceat (3). 9: electionem quoque, seu praesentationem patronorum ecclesiasticorum post sex menses negligentiae ita fieri caducam, ut libera provisio ad ordinarium collatorem devolvatur (4).

chos jurisdictioni Episcopi dioecesani subjacere, ut capellanos censeri ab eo exemptos.

(1) Ex recepta sententia Lotterii contra Hieronymum Gonzalez, quam firmat Rigan. *to. 2. in par. 2. Reg. IX. Cancell. §. 4. num. 46., et seqq.*

(2) Gl. in *cap. irrefragabili 13. de offic. ordin. verb. per Capitulum*, quam sequuntur Barbosa, Rebuff. Card. de Luca, et Rota apud Rigan. *in par. 1. Reg. IX. §. 3. num. 133. et 139.*

(3) Rigan. *in Reg. 2. Canc. §. 3. num. 144, ex ratione paulo superius expensa num. 10.*

(4) Fagnanus in *cap. nulla 2. de concess. praeb. num. 32.* scribit devolutioni locum non esse in institutionibus eorum, scilicet quos patroni infra legitima tempora praesentaverint, ratus, quod nullum Ordinariis locorum tempus ad instituendos electos, et praesentatos a patronis jura limitant. At quia Clemens VII. electionem, ac praesentationem intra semestre patronis limitavit, et Bonifacius VIII. inferiores Ecclesias, exclusis Cathedralibus,

XIV. Ab uno collatore ad alium superiorem gradatim devolvi caducam beneficiorum collationem exposita jura sat indicant. Sed verum usus commonstrat in dies hoc praesertim in Regno, quod devoluta ob negligentiam Episcoporum, aliorumque Praesulum beneficia numquam conferant Metropolitani, sed Romana tantum Sedes Apostolica. Hujus consuetudinis causa praecipua videtur esse difficultas in judicio probandi (auditis omnibus interesse habentibus) negligentiam ordinarii collatoris voluntariam nullo impedimento vel juris, vel facti excusabilem, et lapsum legitimum semestris, qui a die non vacationis, sed notitiae illius (1), aut impedimenti sublatis (2) decurrit. Nam nisi omnium jus in collatione habentium negligentia prius ostendatur in actis

ad electionem aliorum devolutioni ordinariae subjecit: opinio tanti viri, quantus est Fagnanus, minime tuta videtur. Quoad super electione, aut praesentatione lis pendeat ultra sex menses, nullam tunc negligentiam Ordinario imputari, quae valeat devolutionem inferre, vident omnes. At vel extincta lite, vel ubi nullam subiverit controversiam electio, ac praesentatio unius ad Ordinarium delata, non video cur facultas instituendi, perinde ac conferendi, eo sex menses negligente, ad Superiorem devolvi non debeat.

(1) Innoc. III. in *cap. quia diversitatem* 5. de *concess. praeb. semestre tempus*, ait, non a tempore vacationis praebendarum, sed notitiae potius, et commonitionis volumus computari. Card. de Luca in *summa de benef. num.* 18. putat, ubi vacatio extra dioecesim acciderit, numerari menses a die scientiae: at secutam in dioecesi vacationem, quia praesumitur ordinarius continuo sine mora scivisse, tunc ab ipsius vacationis die decurrere.

(2) Idem Innoc. III. *ibidem* rescripsit *tempus suspensionis Archiepiscopi in sex mensibus nullatenus computari; cum illa Lateranensis Concilii constitutio contra negligentes tantum fuerit promulgata . . . etsi fuerit sua culpa suspensus . . . nec tempus etiam, quo ad Apostolicam Sedem accessit, et apud illam permansit, vel recessit ab illa.* Gregorius IX. in *cap. his quibus* 60., et *ult. de elect.* declarat his, quibus interdicatur electio, tempus a canone statutum currere, ex quo in mora fuerint: nimirum eo ex die, quo impedimentum ipsi quum possent, noluerunt amovere. Nam *imputari non debet ei, per quem non stat, si non faciat, quod per eum fuerat faciendum*, ex Bonif. VIII. in *cap. imputari* 41. de *reg. jur. in VI.*

judiciariis, iique omnes rite audiantur: non licebit Metropolitano ad collationem uti ad se devolutam procedere, quum Lateranense Concilium hanc ei mandaverit sub conditione: *si omnes forte neglexerint* (1). Cujusmodi verbis non unum, sed duos plerumque semestres, alterum Capituli, seu inferioris collatoris, et alterum Episcopi cogitur Metropolitanus expectare.

XV. Sedes vero Apostolica vix unius cujuslibet ordinarii collatoris semestrem expectans consuevit vices illius ad alios etiam superiores intermedios devolutis supplere suo jure praeventiois (2), impletamque negligentiae conditionem non inquit in Curia sua, sed visis precibus impetrantis beneficium ut devolutum, qui eam asserit gratiam pontificiae collationis largitur cum conditionali clausula: *dummodo tanto tempore vacaverit, quod ejus collatio ad Sedem Apostolicam legitime devoluta sit* (3). Hujus porro clausulae vis est, ut impetrans a Papa beneficium uti devolutum adigatur coram executore litterarum apostolicarum rite probare negligentiam collatoris ordinarii nullo impedimento excusabilem, lapsumque semestrem integrum deductis impedimentorum intervallis (4).

XVI. Devoluti semel beneficii collationem ab eo, qui ante neglexerat factam nullius esse momenti ex antedictis liquet (5): nisi eam ex indulgentia ratam quandoque habeat Sedes Apostolica. Nam quidam praelati una cum suis Capitulis omnia beneficia sex mensibus elapsis quum contulissent ante adventum Legati apostolici, Innocentius III. rescripsit rem ex dispensatione dissimulandam, si essent dignis, doctisque viris collatae praebendae, easque ab istis possideri: secus, si indignis (6).

XVII. Legatos a latere Cardinales tamquam Papae Vicarios conferre jure ordinario intra fines provinciarum suarum beneficia etiam devoluta ad Sedem Apostolicam, superius monui (7).

(1) Fagnan. in *cit. cap. nulla 2. de concess. praeb. num. 35. et seq.*

(2) Fagnanus *loc. cit.*

(3) Ex Cancellariae Regula LVI, et traditis a Rigantio in *eandem Reg. num. 28. et seq. tom. 4.*

(4) Rigant. *loc. cit. num. 30.*

(5) *Cap. 5. num. 12.*

(6) Innoc. III. in *cap. litteras 4. de suppl. negl. praelat.*

(7) *Cap. 7. num. 21.*

Addit Fagnanus Legatos natos, videlicet Archiepiscopos Eboracensem, Cantuariensem (1), Rhemensem, et Pisanum potiri eadem auctoritate intra semestre unum (2): eisque duo semestria negatos ex Rotae sententia, et Innocentii III. epistola decretali (3), alterum ut Archiepiscopis, alterum ut legatis.

XVIII. Reservata, et affecta Papae beneficia nullum fere dant locum devolutioni (4), quamquam in Concilio generali Lugdunensi Gregorius X. constituisset beneficia, quae in Curia vacarent, intra mensem a Romano Pontifice non collata, redire ad collationem Ordinariorum (5). Excipe parochiales Ecclesias, quae post Papae obitum, vel in ejus vita vacaverint, Ordinariorum provisioni remissas a Bonifacio VIII. (6): quum eas ipsis liceat inde conferre, quoadusque novus Pontifex easdem suis Cancellariae Regulis denuo reservaverit.

CAP. IX.

DE BENEFICIARIIS (*)

(*) *Ad tit. XIV. lib. I. Decretal. de aetate, et qualitate, et ordine praeficiendorum.*

I. Instar militum praedia obtinentium clerici dicti sunt beneficiarii.

II. Beneficiis ecclesiasticis laicos incapaces jure divino canones proclamant.

III. Quinto saeculo possessiones Ecclesiarum laicis etiam, vel peregrinis, vel captivis per precariam concedi Symmachus indulgit.

(1) Alexander III. in *cap. cum non ignoretis* 1. *de offic. legati*, loquens de Cantuariensi Archiepiscopo ait: *qui legationis obtentu. . . in provincia sua vices nostras gerere comprobatur.*

(2) Fagnanus in *cit. cap. nulla* num. 38.

(3) Eboracensis Archiepiscopus unus ex legatis natis quum tempore semestri collationem neglexisset, ab eo ad Papam fuisse devolutam, rescripsit Innocentius III. in *cit. cap. licet* 3. *de suppl. neglig. praelat.*

(4) Rigant. *to* 3. in *Reg. num.* 30.

(5) Videsis dicta superius *cap. 5. num.* 14.

(6) *Cap. si apostolica* 35. *de praeb. in VI.*, de quo alias dictum eodem *cap. 5. num.* 17.

- IV. Precariae concessionones inde invaluerunt, quamvis B. Greg. M. ecclesiasticas res committi laicis velasset.*
- V. Septima Synodus octavo saeculo eas potentibus tantum laicis vetuit, agricolis permisit.*
- VI. Nono saeculo decretum ut precariae vacante sede concessae rescinderentur, et ecclesiastica, vel civili auctoritate fierent.*
- VII. Decimo saeculo viguit usus eas concedendi, et revocandi.*
- VIII. Undecimo canones instaurati, ne feudos presbyterales, seu beneficia ecclesiastica, seu canonicas praebendas laici obtinerent.*
- IX. Quae laicis dari ad usumfructum consueverunt praedia sine officio clericali, ea improprie dicebantur beneficia.*
- X. Clericis solis vera beneficia ecclesiastica ita conferuntur, ut laico sub conditione futuri clericatus viz Papa possit ea concedere, et foundationis lex adsensu pontificio probata.*
- XI. Praesentari tamen a patronis laicus potest sub conditione adsumendi clericatum intra quatuor, vel sex menses.*
- XII. Et jure Concordatorum an. 1741. laicus vel a fundatore vocatus, vel a compatronis praesentatus admittitur ad litem super controverso beneficio prosequendam cum clerico ab aliis praesentato.*
- XIII. Puerilis aetas regendis Ecclesiis non idonea, nec personatibus obtinendis.*
- XIV. Ante Tridentinum aetas annorum septem ad beneficia simplicia, decem ad Collegiatarum praebendas, quatuordecim ad illas Cathedralium sat erat.*
- XV. Ex Tridentino ante XIV. annum incoeptum nemini licet beneficium simplex obtinere.*
- XVI. In beneficiis vero simplicibus ante Tridentinum fundatis sufficit aetas annorum septem.*
- XVII. Quam Concordata an. 1741. non respuunt in iis, qui aetati dicuntur ad beneficia vel jure passivo, vel praesentationibus consanguineorum patronorum.*
- XVIII. Ad beneficia curata annus XXV. incoeptus, ad dignitates, atque canonicatus Cathedralium, et Collegiatarum saltem XIX. incoeptus requiritur, ut valeat collatio.*
- XIX. Ad suscipiendos ordines beneficiis adnexos anni spatium beneficiariis quibuscumque indulgetur: negligentes autem Parochi beneficium ipso jure amittunt, ceteri secus.*
- XX. Missas beneficii, vel capellaniae licet clerico per alium celebrare, nisi fundator beneficiario per seipsum celebrandas jussit.*
- XXI. Qualitates ordinis sacri, vel doctoratus, aliaeque beneficio adnexae, praebendis praesertim canonici theologi, et poenit.*

tentarii, ac dignitati archidiaconi, non actu in ipsa beneficii collatione seu institutione requiruntur, sed sufficit eas sere intra annum adquiri.

XXII. Ad Urbis Romanae beneficia, quae doctoratum postulant, non sufficit gradus in externa Universitate adeptus: neque hoc in Regno, nisi regium placitum accesserit.

XXIII. Illegitimi a beneficiis ecclesiasticis procul habentur.

XXIV. Et haereticorum filii.

XXV. Censuris etiam, et criminibus irretiti.

XXVI. Probitas morum, et scientia praesertim cantus Gregoriani, non genus nobile in beneficiariis expetenda.

XXVII. Iudices insuper caussarum, in quibus privatio beneficiorum irrogatur, eorumque consanguinei, et familiares.

XXVIII. Atque illitterati a beneficiis arcentur.

XXIX. Curata beneficia dignioribus conferri oportet.

XXX. Quae si de patronatu laicorum fuerint, dignus a patronis praesentatus, posthabitis dignioribus instituendus est.

XXXI. Beneficia sine cura dignis recte conferuntur in foro saltem externo.

XXXII. Saecularia saecularibus clericis, regularia regularibus professis sunt conferenda.

XXXIII. Canonicis Regularibus Lateranensibus, et SS. Salvatoris saecularia sine indulto apostolico conferre non licet.

XXXIV. Nec curata, aut residentialia presbyteris, et clericis Congregationis Missionis.

XXXV. In Regno Neapolis, et Siciliae beneficia, et pensiones nonnisi reghicolis conferuntur.

XXXVI. Capuanis indulgit Benedictus XIV. ne aliis, praeterquam in ea dioecesi natis, vel oriundis beneficia ejusdem conferantur.

I. Romanis *beneficiarii* dicebantur milites, qui ob res praecclare gestas praedium imperiali beneficio obtinebant, cujus ex fructibus compararent sibi subsidia vitae (1): iique dicti etiam sunt sequiori aevo *feudarii*, et *vassalli* (2). Canonistae pariter be-

(1) Caesar. lib. 1. *bell. Hispan.* ita scribit, *Pretejus non deserit sese, armat familiam: cum hac et praetoria cohorte certamen init, barbarisque equitibus, paucis beneficiariis suis.* Festus autem *beneficiarios* appellavit milites beneficio Imperatoris a militia vacantes: et *municipes* e contrario, qui non vacarent, sed munia reipublicae adhuc obirent.

(2) Carol. du Fresne in *glossario* verb. *beneficium*.

beneficiarios appellant, et vulgo *beneficiatos*, qui Ecclesiae proventus, et praedia ad vitam cum iure utendi, fruendi obtinent propter officium spirituale. Quinam beneficiarii esse in Ecclesia valeant, quibusve possint ecclesiastica beneficia conferri, operae pretium est heic inquirere.

II. Atque in primis edisserendum videtur, num laici beneficiorum ecclesiasticorum capaces iure canonico sint: quum eos aliquando matricularios, et beneficiarios fuisse monumenta veteris disciplinae satis indicant. Sacri canones, ac leges ipsos omnino incapaces clericalibus aequae officiis, ac beneficiis insimul connexis, tamquam rebus spiritualibus renunciant, iure divino suffulti. *Non arabis in bove simul, et asino. Non indueris vestimento, quod ex lana linoque contextum sit*, Dominus ait per Moysen (1). Idest ex sententia Concilii Hispalensis II, *homines diversae professionis in officio uno non sociabis. Unde oportet nos, et divinis libris, et sanctorum Patrum obedire praeceptis, constituentes, ut hi, qui in administrationibus Ecclesiae pontificibus sociantur; discrepare non debeant nec professione, nec habitu. Nam cohaerere, et conjungi non possunt, quibus et studia, et vota diversa sunt* (2). S. Damasus *panes, ait, sanctos Dominus Aaron, et filiis ejus comedendos jussit* (3). Officia simul clericorum ab officiis laicorum Ecclesia ab initio ita semper distinxit, ut nefas laicis esset clericalia usurpare (4).

III. Symmachus Papa ad Caesarium fratrem Arclatensem Episcopum rescripsit: *ne possessiones, quas unusquisque proprio Ecclesiae dedit, vel reliquit arbitrio, alienari quibuslibet titulis, atque distractionibus, vel sub quocumque argumento pateretur, nisi forte aut clericis bonorum meritum,*

(1) Deuteronomii cap. 22. vers. 10, et 11.

(2) Conc. Hispalense II. in can. in nona actione 22. C. 16. qu. 7.

(3) S. Damasus in can. hanc consuetudinem 15., et ult. C. 10. qu. 1.

(4) Tertullianus de praescrip. cap. 41. haereticos insectatur munia clericorum cum laicis commiscentes. *Alius hodie Episcopus, ait, cras alius: hodie Presbyter, qui cras laicus, nam et laicis sacerdotalia munera injungunt.* De iisdem loquens B. Hieronymus inquit: *omissis paucis hominibus, qui ipsi sibi, et laici sunt, et Episcopi.*

aut monasteriis *Religionis intuitu*, aut certe peregrinis, si *necessitas largiri suaserit*, sic tamen, ut haec ipsa non perpetuo, sed temporaliter perfruantur (1). Idemque Pontifex sexto ineunte saeculo in Synodo Romana constituit, ut nec usufructuario jure aliquibus ea dare liceat, nec data retinere praeter clericos, et captivos atque peregrinos (2). Exinde mos inolevit, quod Episcopi personis diversis tam clericis, quam laicis praedia ecclesiastica ad usumfructum instar beneficiorum conferrent (3).

IV. S. Gregorius M. Januario Calaritano Episcopo rescripsit cavendum de cetero, ne saecularibus viris, atque non sub regula degentibus res ecclesiasticae committantur, sed probatis de officio clericis (4). Sed Concilium Toletanum VI. anno 638. decrevit: ut si quis clericorum stipendium de rebus cujusquam Ecclesia Episcopi percepit largitate, sub precariae nomine debeat professionem scribere: ut nec per retentionem diuturnam praedictum asserat Ecclesiae, et quaecumque in usu perceperit, debeat utiliter laborare (5). Notant nihilominus Romani Correctores in regio Lucensi Codice Conciliorum haberi: si quis clericorum, vel aliarum quarumlibet personarum.

V. Septima Synodus oecumenica anno 787. permisit utique precarias fieri concessionem agrorum clericis, vel agricultoribus: nequaquam vero potentibus laicis, vel optimatibus, ne dif-

(1) Symmach. Papa ad Caesarium fratrem ep. 5. art. 1.

(2) Synod. Romana IV. sub Symmacho an. 502. cap. 4.

(3) Id liquet ex tit. 14. lib. 3. Decretal. de precariis. Id hujus rubricae paratitlo Anastasius Germonius haec docet. Precaria concessio longe differt a precario, quo de agitur in Pandectis. Est enim precaria species contractus colonarii, uti quum praedium rusticum, vel urbanum datur in aliquod tempus, quod est quinquennii; quo elapso is, qui dedit, seu ejus successor revocat, qui et iterum concedere potest, sed deinceps in quinquennium semper tenetur revocare. Hic sane contractus jureconsultis ignotus fuisse videtur. Precarium, de quo tit. 48. lib. 43. Digestor. est, quod precibus utendum datur tamdiu, quamdiu patitur is, qui concessit.

(4) S. Greg. M. in can. judicatum est 5. dict. 89.

(5) Conc. Tolet. VI. in can. saepe fit 72. C. 12. qu. 2.

facilis foret eorumdem revocatio ad Ecclesiae fiscum. *Quod si excusationem praeponderint*, Synodus ait, *damnum facere, et nihil ad prosectum agri existere, nec sic principibus, qui per loca illa sunt, tribuatur ager, vel locus, sed clericis, vel agricultoribus* (1).

VI. Concilium Gallicanum Mediomatricis, seu Metense anno 835. praecepit rescindi *praecarias*, et commutationes tempore viduarum Ecclesiarum factas ab iis, qui loca Episcoporum occupaverant, et nonnisi cum auctoritate ecclesiastica, vel civili, ubi opus esset, faciendas (2).

VII. Ut narrat Flodoardus Rhemensis Canonicus, qui floruit saeculo decimo, Ebbo Archiepiscopus *artificibus undecumque collectis sedes dedit, et beneficiis muneravit* (3). Archiepiscopus autem Hervaeus *recepit res diversas, et villas Ecclesiae: quae antecessor suus per precarias seu praestarias, diversis contulerat personis* (4). Idemque Flodoardus conqueritur seipsum, nonnullosque alios tam clericos, quam laicos injuste privatos fuisse *beneficiis* possessionum ecclesiasticarum ab Hugone Archiepiscopo Rhemensi, quibus a praecedentibus Episcopis munerati erant, eademque ab ipso pro libito suae voluntatis, quibus ei placuit, impertita fuisse (5).

VIII. Concilium Bituricense anno 1031. constituit, ut saeculares viri *ecclesiastica beneficia*, quos *feudos presbyterales* vocant (6), non habeant super presbyteros. Concilium Turonen-

(1) VII. Synodus can. 12.

(2) Syn. Metens. in can. *precariae* 44. C. 12. qu. 2.

(3) Flodoard. lib. 2. cap. 19. apud Thomasia. par. 3. lib. 2. cap. 19.

(4) Ex traditis ab eodem Flodoardo lib. 4. cap. 11. 13, et 18.

(5) Ibidem cap. 20.

(6) Quo ex tempore consuetudines feudales aevo Longobardorum inolevisent, ab Episcopis etiam, Ecclesiarumque Praelatis praedia ecclesiastica dare in feudum consuevisse, ostendit ejusdem juris feudalis textus initio lib. 1. tit. 1. de his qui feudum dare possunt, his verbis. Feudum autem dare possunt Archiepiscopus, Episcopus, Abbas, Abbatissa, Praepositus, si antiquitus consuetudo eorum fuerit feudum dare. Quid enim aliud est feudum, nisi jus praedio alieno in perpetuum utendi, fruendi, quod pro beneficio dominus dat ea lege, ut qui accipit, sibi

se anno 1060, *aut ministerium, aut beneficium*, ait *non nisi clericos habere, sanctorum Patrum sancivit auctoritas. Si autem Episcopus, aut Praelatus quilibet contra praefixam regulam aliquod ecclesiasticum ministerium, vel etiam ipsam praebendam, quae canonica dicitur, ordinare, aut dare laicis voluerit, libere liceat clericis contradicere* (1). Ex Alexandri II. sententia, qui sedere coepit anno 1061, *nullus laicorum Ecclesias, vel Ecclesiarum bona occupet, vel disponat* (2). Paulo post S. Gregorius VII. recensuit inter maximos haereticos, et antichristos, tamquam divini praecepti transgressorem quemdam Episcopum Bambergensem, *qui non Sacerdotibus propriae dioecesis decimas, et christianorum oblationes conferebat, sed potius laicalibus personis, militum videlicet, sive servitorum, et quod gravius est, consanguineis: et sicut Nicaena Synodus de simoniae censuit, et qui dat Episcopus, et qui recipiunt ab eo laici sive pretio, sive beneficio, aeterni incendii ignibus deputavit* (3). Concilium Pictaviense anno 1100. sancivit, *ut nullus de Clero, sive populo ecclesiastica bona jure consanguinitatis sibi requirat habenda* (4).

IX. Canones igitur quum antiqui, tum recentiores a veris beneficiis, ac rebus Ecclesiae possidendis, et administrandis semper laicos amoverunt. Quousque ordines a beneficiis minime sejungerentur: Episcopi laicis probatae vitae conferebant ordinem ecclesiasticum simul, et beneficium, eos in ordinatione ipsa

fidem, et militiae munus, aliudve servitium exhibeat. Hinc promiscua feudi, et beneficii nomenclatura ortum habuit.

(1) Conc. Turonense *can. 1, et seq.*

(2) Alex. II. in *can. nullus* 18. *C. 16. qu. 7.*

(3) S. Greg. VII. in *can. pervenit* 3. *C. 16. qu. 7.*

(4) Conc. Pictaviense in *cap. 1. de praeb. et dignit.* Emmanuel Gonzalez in hocce *cap. num. 3.* illam sequitur interpretum opinionem, quae *bona ecclesiastica* heic accipit pro beneficiis vere ecclesiasticis: ratus laicos quamvis beneficii incapaces, posse ad illud eo pacto praesentari, aut eligi, ut intra tempus jure praefixum ad ordines promoveantur. At pace tanti viri mens Patrum Pictaviensium percipitur ex dictis haecenus fuisse abusum diu inolitum reformandi, ut ne bona ecclesiastica deinceps, vel *beneficiario* titulo ad vitam, vel *precario* ad tempus laicis darentur amplius.

describendo inter matricularios clericos de proventibus certae Ecclesiae viventes. Postquam vero introducta est separatio beneficiorum ab ordinibus, nonnisi clericis prima tonsura saltem initiatis mera beneficia ecclesiastica donarunt, quae consistunt in jure spiritali percipiendi redditus ecclesiasticos propter officium spirituale (1). Tametsi laicis pauperibus etiam distribuebant portionem reddituum communium eis debitam, scilicet bona beneficiorum temporalia sine aliquo spiritali jure, vel ministerio: ut erant praedia ecclesiastica beneficiario, vel precario nomine concessa, quae improprie dicebantur beneficia. Nil ideo mirum videtur Thomassino (2), quod suos Ecclesia feudos laicis olim dedisset ad usumfructum, quum ex eorum donationibus reciproca tantum compendii ad ipsam rediret. Exploratissimum porro est bona temporalia beneficiorum a jure spiritali nimis differre: non aliter, quam a bonis hereditariis hereditatem ipsam in jure consistentem (3). Ut enim notat Baronius (4) olim beneficia improprie dicebantur possessiones Ecclesiarum vel ad vitam, vel ad tempus concessae ob necessitatem, aliamve rationabilem causam ex mera Episcoporum liberalitate. Propterea nonnulli perperam delinunt beneficium ecclesiasticum esse rem ecclesiasticam, quae clericis ratione officii utenda conceditur.

X. Ex antiqua idcirco non minus, quam nova disciplina solis clericis prima saltem tonsura initiatis beneficia verè ecclesiastica conferri possunt (5). Quinimmo in Ecclesiis Cathedralibus omnes canonicatus, ac portiones habere debent adnexum ordinem sacerdotii, diaconatus, vel subdiaconatus (6). Quare collatio, vel institutio beneficii ad favorem laicae personae nullius omni-

(1) Ex jam dictis superiori cap. 2.

(2) Thomassin. *par. 3. lib. 2. cap. 10. num. 10.*

(3) Ex superius dictis eodem cap. 2. num. 3.

(4) Baron. ad *an. 502. num. 36.*

(5) Id firmatum quoque est ab Innocentio XII. in Bulla *speculatores*, quam exposui *lib. 2. Instit. Canonic. tit. 10. num. 35. et seq.* Ea enim cogitur Episcopus familiari suo triennali, quem ad primam tonsuram promoverit, infra mensem conferre congruum beneficium, Patresque Tridentini in cap. *Episcopus 9. sess. 23. de ref.* decreverant illud familiari *statim* esse post ordinationem conferendum.

(6) Trid. in cap. *cum dignitate 12. sess. 24. de ref.*

no momenti est. Sunt vero qui tenent validam esse collationem beneficii laico factam cum clausula, si quamprimum ad clericatum fuerit assumptus (1), praesertim vero laico scholari de beneficio in manus Summi Pontificis resignato (2). Quod locum habere vix poterit, ubi suprema Romani Pontificis auctoritas id velit sine ullo subreptionis, vel obreptionis vitio. Foundationis etiam lex ad sensu pontificio firmata laicis patronis aliquando reservavit ecclesiasticam praebendam, vel dignitatem: sicuti in regia Ecclesia S. Nicolai Bariensis Carolus II. Andegavensis sibi, suisque in hoc Regno Neapolitano successoribus primam Thesaurarii dignitatem reservavit, praebendamque canonicam, quoties praesens in choro adfuisset (3).

XI. In beneficiis de jure patronatus DD. communiter tenent licere patronis praesentare laicum, vel incapacem sub conditione capacitatis, dummodo clericatus, vel capacitas superveniant intra quatuor menses laicis, vel sex menses ecclesiasticis datos ad praesentandum (4). Nam conditio hujusmodi in tempore verificata retrotrahitur (5). Et contra praesentatio habetur irrita, ubi intra idem tempus nec clericatus, neque capacitatem nominatus quaesiverit (6).

(1) Paris. *de resignat. lib. 4. qu. 2. num. 46.* et Graff. *de effect. clericat. eff. 15. num. 52.*

(2) Ventriglia *par. 2. prax. eccl. cap. 7. num. 12.*

(3) Ant. Beatill. *lib. 3. hist. Baren. pag. 443.* Ex Bibliotheca Cluniacensi *pag. 48.* constat etiam Andegavensi Comiti Ingelgerio, ejusque heredi in perpetuum a patribus in Concilio congregatis collatam praebendam canonicam in Ecclesia B. Martini Turonensis, ipsumque Ingelgerium vita ejus durante constitutum ejusdem Ecclesiae Thesaurarium, ac defensorem. Pariter Galliarum Regem in Ecclesia S. Ilarii Apamiarum primum obtinere canonicatum, fert Franc. Gigas *de pension. qu. 21. num. 4.* Marchionem Asturigae de stirpe Villalobos Canonicum in Ecclesia Leodiensi, perinde ac Barcinonae Comitem in Cathedrali Ecclesia Barcinonensi tradit Aug. Barbosa *par. 3. de potest. Episc. alleg. 72. num. 75.*

(4) Card. de Luca *de jurepatr. disc. 45. num. 7.*

(5) Rota in *Volaterrana beneficii 7. Decembris 1708.* coram Crispo.

(6) Pirr. Corradus in *prax. benef. lib. 4. cap. 6. num. 31, et 32.*

XII. Hoc tamen in Regno ex Concordatorum jure an. 1741. laicus ob passivum juspatronatus in fundatione praescriptum, vel proprio jure concurrens, vel a patronis activum jus praesentandialiquem de genere vocato habentibus nominatus ad aliquod beneficium, et omnibus praeditis requisitis, dummodo exhibeat litteras ordinarii, vel Episcopi sui testimoniales quoad scientiam, bonosque mores, ita legitimus habetur contradictor, ut valeat una cum clerico compraesentato jura sua experiri coram ecclesiastico Judice, et definitivam expeiere sententiam, utri debeat institutio controversi beneficii, tamquam proximiori, vel majoribus suffragiis suffulto, vel requisitas alias qualitates magis habenti, eo tamen pacto, ut post rem judicatam is tonsuram primo, deinde institutionem, ac possessionem beneficii canonicam obtineat (1). Tempus igitur quatuor, vel sex mensium jure Concordatorum non currit laico, litigiosum beneficium praetendenti vigore juspatronatus vel activi, vel passivi. Et merito quidem, nam impedito fere non currunt tempora; et quia, *si jus quae- rendum est radicatum*, inquit Cardinalis Fuscus, *sicuti non potest tolli jus quaesitum, ita impediri nequit, ut jus quae- rendum adquiratur*. Siquidem juris in spe de proximo exi- tura si in alium fiat derivatio, dicitur in fraudem fieri, vel in praejudicium tertii (2).

XIII. Hactenus de primo clericalis ordinis requisito in bene- ficiariis. Quod vero ad alterum actatis, nil canones antiqui sta- tuisse videntur, sed eam prudenti Episcoporum arbitrio reliquis- se, quum Apostolus scripserit: *nemo adolescentiam tuam con- temnat* (3). Quare prioribus Ecclesiae saeculis Summi Pontifices pueros ab infantia in ecclesiasticis ministeriis ante pubertatem inter lectores etiam, et exorcistas adscriptos probabant (4). Subin- de Concilium Toletanum II. anno 531, loquens de iis, quos vo- luntas parentum a primis infantiae annis clericatus officio mancipabat, statuit observandum, ut mox detonsi, vel ministe

(1) Concordata an. 1741. Cap. 4. art. 6.

(2) Card. Fuscus lit. I. concl. 625. num. 17. et concl. 629. num. 4.

(3) Ad Timotheum cap. 4.

(4) Praesertim Siricius in can. quicumque 3, et Zosimus in can. in singulis 2. dist. 77.

rio lectorum traditi in domo Ecclesiae erudirentur (1). Alexander III. rescripsit primus omnium indecorum esse: *ut hi debeant Ecclesias regere, qui non noverunt gubernare seipsos, quum ad Ecclesiarum regimen tales personae sint admit-tendae, quae discretionem praeeminent, et morum fulgent honestate. Nolentes itaque sustinere, ut parvulis Ecclesiae regimen committatur, mandamus quatenus nemini intra annum decimum quartum constituto personatum cujuslibet Ecclesiae concedere praesumatis* (2). Exinde Gregorius IX. Argentinensi Episcopo respondit, *quod pueri, et beneficiati, qui non possunt in Ecclesia deservire, in ea non debent idonei reputari* (3).

XIV. Paulus III. anno 1534. in sua Cancellariae Regula XXVIII. praescripsit aetatem *quatuordecim* annorum ad *praebendas* in Cathedralibus adipiscendas, *decem* in Collegiatis inferioribus, et *septem* ad capellanas, et beneficia simplicia

XV. Cujusmodi regulam sequentes Pontifices minime innovaverunt, propterea quod Concilium Tridentinum anno 1563. promulgatum definivit, quod *nullus prima tonsura initiatus, aut etiam in minoribus ordinibus constitutus ante decimum quartum annum beneficium possit obtinere* (4).

XVI. Sed quoniam futuris dant formam negotiis leges, et constitutiones, non ad praeterita facta trahuntur, nisi nominatim in eis de praeteritis caveatur (5): in praxi ea sententia inolevit, ut in beneficiis antiquis ante Concilium Tridentinum fundatis (scilicet ante annum 1563, quo promulgata Concilii decreta fuere) praesentari, et institui valeant clerici septennes: in aliis vero post Concilii publicationem nonnisi puberes. Eantque ob rem impuberes apostolicam aetatis dispensationem impetrare consueverunt a Summo Pontifice, qua fierent capaces obtinendi beneficia.

XVII. Eidem dispensationi hodie facessit negotium hoc in Re-

(1) Conc. Tolet. II. in *can. de iis 4. dist. 28.*

(2) Alex. III. in *cap. indecorum 3. de aetat., et qual., et ord. praefc.*

(3) Greg. IX. in *cap. super inordinata 35. de praeb.*

(4) Trid. in *cap. nullus 6. sess. 23. de ref.*

(5) *Cap. cognoscentes 2., et cap. quoniam 13., et ult. de constit.*

gno lex Concordatorum an. 1741. (1) requirens quatuordecim annos inceptos pro prima clericali tonsura, et consequenter pro beneficiis. Excipit autem solum *arctatos*, videlicet in limine foundationis, vel specialiter, vel sub nomine colectivo cujusdam familiae, seu stirpis generaliter vocatos jure patronatus passivo, aut a consanguineis suis activum patronatum habentibus praesentatos (2).

XVIII. Quod vero ad beneficia majora, idem Alexander III. in Concilio Lateranensi constituit, ut nemo decanatum, archidiaconatum, et alias dignitates adnexam habentes curam animarum, aut parochialem Ecclesiam suscipiat, *nisi qui jam vigesimum quintum annum aetatis attigerit*, et scientia, et moribus commendetur: utque easdem dignitates adepti *si Archidiaconus in Diaconum, Decanus, et reliqui admoniti non fuerint praefixo a canonibus tempore in Presbyteros ordinati, ab illo removeantur officio, et aliis conferatur* (3) Gregorius X. in Concilio Lugdunensi id etiam sanxit, quod ad parochiales Ecclesias (4). Dein Clemens V. in Concilio Viennensi decrevit: ut *qui dignitates, personatus, officia, vel praebendas, quibus certi ordines sunt adnexi, obtinuerint in Ecclesiis Cathedralibus, vel Collegiatis saecularibus, vel regularibus, nisi justo impedimento cessante ad hujusmodi ordines se promoveri fecerint intra annum*, nullam haberent, donec promoverentur, vocem in Capitulo, et medieta-tem distributionum amitterent (5). Martinus V. in Concilio Constantiensi omnes beneficiarios, qui negligerent ordinem beneficio suo adnexum suscipere intra terminum juris, ipso facto privatos iisdem beneficiis voluit (6). Constitutionem Viennensis

(1) Concordata cit. cap. 4. art. 3, et 5.

(2) Videsis quae jam exposui lib. 2. Instit. Canonic. tit. 10, n. 82.

(3) Alex. III. in cap. cum in cunctis 7. de elect. §. inferiora.

(4) Greg. X. in Conc. Lugdun. in cap. licet canon 14. de elect. in VI.

(5) Clementina ut ii 2. de aetate, et qualif., et ord. praefic.

(6) In Conc. Constantiensi Martinus V., die 21. Martii 1417, abrogatis dispensationibus cunctis, quas Romani Pontifices concessissent provisus ad Ecclesias, monasteria, prioratus conventuales, decanatus, archidiaconatus, et alia quaecumque beneficia, quibus certus ordo debitus est, vel adnexus, ne munus con-

Concillii tandem innovavit eisdem fere verbis Tridentina Synodus, superaddens: *ut ne aliis in posterum fiat provisio, nisi iis, qui jam aetatem, et ceteras habilitates habere dignoscantur: aliter irrita sit provisio* (1). Alteramque Lateranensis Concillii sub Alexandro III. constitutionem simul confirmavit, ampliavitque statuens: *ut in Ecclesiis praesertim Cathedralibus nemo deinceps ad dignitates quascumque post episcopalem, quibus animarum cura subest, promoveatur, nisi qui saltem vigesimum quintum aetatis suae annum attigerit, et in clericali ordine versatus, doctrina ad suum munus exequendum necessaria, ac morum integritate commendetur. Archidiaconi etiam sint in omnibus Ecclesiis, ubi fieri poterit, magistri in theologia, seu doctores, aut licentia in Jure canonico. Ad ceteras autem dignitates, vel personatus, quibus animarum cura nulla subest, clerici alioquin idonei, et virginti duobus annis non minores adseiscantur. Neminem deinceps ad dignitatem, canonicatum, aut portionem recipient, nisi qui eo ordine sacro aut sit initiatus, quem illa dignitas, praebenda, aut portio requirit, aut in tali aetate, ut infra annum initiari valeat* (2). Bonifacius VIII. quoque rescripsit, praebendam sacerdotalem conferri constituto saltem in aetate ad Sacerdotium apta debere (3). Parochialium vere Ecclesiarum resignatarios ubilibet, excepta Gallia, annis triginta non minores esse debere, Congregatio particularis sub Clemente XI. decrevit (4). Colligitur hinc irritam procul dubio fore collationem tam parochialis Ecclesiae, curatique beneficii, quam dignitatis, aut canonatus in Cathedralibus, aequae ac in Collegiatis Ecclesiis,

secrationis Episcopi, sive benedictionem Abbatis: aut ceteros debitos, aut adnexos ordines suscipiant statuit ut ii omnino intra terminum juris se faciant consecrari, seu benedici, seu ad aliam debitam ordinationem promoveri: alioquin sint ipsae Ecclesiae, monasteria, dignitatibus, personatibus, officiis, et beneficiis ipso jure privati, et aliis libere conferantur. Vide Fagnan. in cap. cum in cunctis §. inferiora de elect. num. 23.

(1) Trid. in cap. quicumque 4. sess. 22. de ref.

(2) Trid. in cap. cum dignitates 12. sess. 24. de ref.

(3) Bonif. VIII. in cap. ei cui 29. de praeb. in VI.

(4) Apud Rigant. to. 3. pag. 375. num. 39.

quae ante legitimam aetatem hisce canonibus designatam cuius fiat sine dispensatione apostolica (1): nisi cui specialim lex fundationis minorem aetatem indulserit (2).

XIX. Quod vero ad sacros ordines,abilitas ad eos intra annum suscipiendos generatim sufficit in actu collationis. At non omnes ea in re vel negligentes, vel contumaces pari poena coguntur ad suscipiendum ordinem curae parochiali, vel dignitati, vel canonicatui, vel praebendae, vel officio suo adnexum. Gregorius X. sanxit in citato canone Lugdunensi, ut provisos de parochiali Ecclesia, si promotus ad Sacerdotium intra annum non fuerit, Ecclesia sibi commissa sit ipso facto privatus, nulla etiam praemissa monitione (3). *Ad Collegiatas vero Ecclesias, etiamsi aliae parochiales extiterint, et ad assumptos ad earum regimen non extendi* canonem Lugdunensem de Parochis ad Sacerdotium intra annum promovendis, *sed antiqua jura servari debere potius in eisdem*, Bonifacius VIII. declaravit (4). Hinc Fagnanus recte docet, quod obtinens praeposituram, seu principalem dignitatem in Ecclesia Collegiata cum jurisdictione spirituali, ac temporalis in subjectas parochiales, et villas non incidat in poenam canonis Lateranensis, et Lugdunensis, si neglexerit intra annum suscipere Sacerdotium (5). S. Congregatio Concilii autem censuit eos, qui obtinent dignitates, praebendas,

(1) Ex postremis praesertim verbis *cap. 4. sess. 22. Concilii Tridentini* quod loquitur generatim de praebendis, canonicatibus, personatibus, dignitatibus, officiis tam Cathedralium, quam Collegiatarum.

(2) Apud Gallemart. in *Trid. cap. 12. sess. 25. de ref. n. 21.* S. Congregatio Concilii censuit hoc decreto non comprehendi canonicatum juris patronatus laicorum, ante Concilium fundatum, in cujus fundationis limine fuerit cautum, ut descendentes a fundatore possent ipsum obtinere, etiamsi non sint in sacris ordinibus constituti, sed simplices tantum clerici, donec ad Sacerdotium promoveantur. Fundationes post Concilium nisi pontificio adseuso probatae sint, nequeunt actati a Concilio oecumenico praescriptae derogare cum sola ordinariorum auctoritate.

(3) Greg. X. in *cap. licet can. 14. de elect. in VI.*

(4) Bonif. VIII. in *cap. statutum 22. de elect. in VI.*

(5) Fagnan. in *cap. cum in cunctis 7. de elect. ad §. inferiora num. 25.*

portiones in Ecclesiis, vel Cathedralibus, vel Collegiatis, non esse ipso jure iisdem privatos, sed privari tantum posse, si moniti renuant contumaciter ad ordines beneficiis suis adnexos promoveri (1). Idque ideo in Cathedralibus, et Collegiatis locum habere monet Fagnanus, quia earum dignitates sine cura, et Canonici, et beneficiarii ob negligentiae poenam ipso facto amittunt vocem in Capitulo, et medietatem distributionum ex canone Viennensi, quem innovavit Concilium Tridentinum: qui vero alia beneficia extra Cathedrales, et Collegiatis adnexos ordines habentia obtinent, eos ipso facto incidere in poenam amissionis beneficii sancitam in Concilio Constantiensi, quam Patres Tridentini minime abrogarunt (2). Alexander III. praeterea rescripit beneficiarios clericos posse propter Ecclesiae necessitatem, vel utilitatem ad sacros accipiendos ordines beneficiis etiam suis non adnexos compelli per amissionem locorum, beneficiorumque subtractionem (3).

XX. Quoties mandaverit fundator Missas beneficii, vel capellaniae a seipso constitutae celebrandas esse per aliquem Sacerdotem, vel Presbyterum ab heredibus, et successoribus patronis deputandum, et eligendum, qui Missas celebrare valeat: adhuc in praxi clericus primae tonsurae admittitur, atque instituitur, utpote capax adimplendi celebrationem Missarum per idoneos Presbyteros: eo tantum casu excepto, ubi fundator jusserit, quod capellanus, vel beneficiarius per seipsum debeat Missas celebrare: tunc enim vel Sacerdos, vel clericus Sacerdotio infra annum initiandus deligi omnino debet. Sacra enim Congregatio Concilii pluries respondit, nisi fundator expresse dixerit, quod praesentandus celebret *per seipsum infallibiliter*, non esse sacerdotale beneficium, et posse per alium adimplere onus Missarum: adeo ut clerico etiam primae tonsurae valeat

(1) Apud Fagnan. *loc. cit.*, num. 39., et in *cap. quaeris 6. de aet., et qual.* num. 31. Synodus etiam Pictaviensis in *cap. 1. de aet. et qual.* constituit, ut Abbates, Decani, Praepositi, Archipresbyteri aut fiant Presbyteri, aut amittant honorem: et Archidiaconi pariter, nisi fiant diaconi, praelationes amittant.

(2) Fagnan. in *cit. cap. cum in cunctis* num. 41, et ult.

(3) Alex. III. in *cap. quaeris a nobis 6. de aetat., et qual.*

capellania conferri, qui ea obtenta non cogitur ad Sacerdotium ascendere (1).

XXI. Ceterae similiter qualitates, puta doctoris, vel magistri, vel licentiati gradus, a jure, vel a statutis locorum, vel a fundatoribus volitae, regulariter in praxi actu non requiruntur tempore collationis, sed sufficit habitus, seu potentia eas infra annum obtinendi (2). Ex Tridentino: *Archidiaconi sint in omnibus Ecclesiis, ubi fieri poterit, magistri in theologia, seu doctores, aut licentiati in Jure canonico*. (3) Qui vero Archidiaconi nullam habeant curam animarum, nec jurisdictionem, eos hoc decreto non comprehensos, neque obstrictos ad magistri, vel doctoris, vel licentiati gradum adsumendum, S. Congregatio declaravit (4). *Hortatur etiam S. Synodus Tridentina ibidem, sed nullo praecepto cogit, ut dignitates omnes, et dimidia saltem pars canonicatum in Cathedralibus, et Collegiatis insignibus conferantur tantum magistris, vel doctoribus, aut licentiatis in theologia, vel jure canonico* (5). Sed ea ipsa decrevit officium, et praebendam Canonici theologi non alii conferendam, nisi qui *magister sit, vel doctor, vel licentiatus in theologia, vel jure canonico, et aetatem habeat an. XL.*

(1) Quam secuta est Rota penes Merlium *dec. 825. num. 8, et seq. tom. 2.*

(2) Rota *dec. 6. num. 11. par. 4. rec. tom. 2*, Card. de Luca *de fideic. disc. 9. num. 8.*

(3) Trid. in *cap. cum dignitates 12. sess. 24. de ref.*, de quo supra *num. 18.*

(4) Apud Gallemart in *declarat. ad cit. cap. cum dignitates num. 1, et 2.*

(5) Trid. *cit. cap. 12. sess. 24.* In Gallia jus Concordatorum Leonis X. cum Francisco I. statuit, ut Ordinarii locorum, et Episcopi beneficia in quatuor anni mensibus vacatura solis graduatis conferrent, qui scilicet gradum promeruerint, ac titulum *baccalaurei, vel licentiati, vel doctoris, vel magistri* artium in Academia, exclusis codicillaribus graduatis ex privilegio, seu diplomate quum regio, tum Pontificio: hoc tamen pacto, ut ad vacatura in duobus Aprili, et Octobri mensibus graduati simplices arbitrio Episcoporum diligerentur, in duobus aliis Januario, et Julio nominarentur ab Universitate.

vel alias qui aptior pro loci qualitate reperitur episcopali iudicio (1).

XXII. Ad beneficia, et officia Urbis Romae, quae doctoratum requirant, non suffragantur gradus in externa Universitate in posterum adepti post promulgatam a Benedicto XIV. constitutionem IV. Kal. Sept. 1744: sed necesse est, ut ipsi gradum ejusmodi susceperint in archigymnasio romano: exceptis dumtaxat illis, qui destinantur ad officia alicui nationi, vel civitati affecta (2).

XXIII. Justis ex nuptiis ortos, qui beneficia expetunt ecclesiastica, esse oportet. *Indecorum est, ut in Altaris officio illegitimus filius ministret*, inquit Innocentius III. (3). Quamobrem qui defectum patiuntur natalium, ad dignitates, personatus, et beneficia curam animarum adnexam habentia sine dispensatione Sedis Apostolicae nulliter promoventur (4). Beneficia vero, quibus non imminet cura animarum, non minus, quam ordines minores ex dispensatione solius Episcopi obtinere possunt (5). At Episcopi dispensatio non prodest filiis clericorum illegitimis ad beneficia obtinenda in iis Ecclesiis, ubi patres eorum habuerint, vel habeant beneficium, ut paternae incontinentiae memoria a locis Deo consecratis, quos maxime puritas, sanctitasque decet, longissime arceatur (6). *Non liceat filiis clericorum, decrevit Synodus Tridentina, qui non ex legitimo nati sunt matrimonio, in Ecclesiis, ubi eorum patres beneficium aliquod ecclesiasticum habent, aut habuerint, quodcumque etiam dissimile beneficium obtinere, aut in dictis Ecclesiis quoquo modo ministrare, nec pensiones super fructibus bene-*

(1) Trid. in cap. apostolus 8. sess. 24. de ref. qua de re inferius cap. 10. num. 29.

(2) Bened. XIV. in const. inter conspicuos 106. n. 28. et 29. to. 1. Bullarii.

(3) Innoc. III. in cap. cum decorem domus Dei 15. de filiis presbyter.

(4) Greg. IX. in cap. nimis 18. eod. tit.

(5) Bonif. VIII. in cap. is, qui defectum 1. eod. tit. in VI. Bened. XIV. de Syn. dioeces. lib. 13. cap. 24. num. 11.

(6) Alex. III. in cap. ad praesentiam 2., et seq. et Honor. III. in cap. dilectus 17. eod. tit.

ficiū obtinere, aut in dictis Ecclesiis quoquo modo ministrare, nec pensiones super fructibus beneficiorum, quae parentes eorum obtinent, vel alias obtinuerunt, habere. Ad haec reciprocae resignationes, si quae posthac a parentibus clericis in favorem filiorum fient, ut alter alterius beneficium consequatur, in fraudem hujus decreti, et canonicarum sanctionum factae omnino censeantur: nec collationes secutae vigore hujusmodi resignationum, seu aliarum quarumcumque, quae in fraudem factae fuerint, ipsis clericorum filiis suffragentur (1). Et Urbanus II. in Concilio Claromontano, presbyterorum filios a sacris altaris ministeriis jamdiu removerat (2). Quum et beneficium obtinere, et ministrare in paterna Ecclesia filiis illegitimis vetitum sit: S. Congregatio inde censuit non licere filio illegitimo confessiones poenitentium audire in ea Ecclesia, in qua officium Parochi obiverat pater illius (3). Eademque Ostunensi Episcopo respondit nullum jus esse filio illegitimo ad portionem adipiscendam emolumentorum Ecclesiae, in qua ejus pater dignitatem obtinuerat, debitam Presbyteris in ea celebrantibus, quantumvis filius ipse ad Sacerdotium indulto pontificio promotus sacrum in ea facere consuevisset (4). At ea ipsa censuit licere filio ejusmodi capellaniam laicalem non perpetuam illic obtinere, ubi pater illegitimus ut capellanus pariter mobilis inservisset (5): secus autem, si pater beneficium ecclesiasticum inibi habuisset (6). Legiti-

(1) Trid. in *cap. ut paternae* 15. *sess. 29 de ref.* Clemens VII. *const. 30.* in Bullario antiquo *to. 1.* edixit illegitimos clericorum filios nullo umquam tempore posse paterna beneficia obtinere, etiamsi alius ea intermediis aliquamdiu possederit, Fagnan. in *cap. ad extirpandas* 11. *de fil. presb. num. 7. et seq.*

(2) Urban. II. in *can. 1. dist. 56.*

(3) S. Congr. Conc. ad Vritanum Episcopum mense Julio 1548. apud Benedict. XIV. *loc. cit. num. 14.*

(4) S. Congr. Conc. ad postulata Ostunensis Episcopi die 15. Aprilis 1684., et 21. Junii 1686., apud Bened. XIV. *ibidem*

(5) S. Congr. Conc. ad Calaguritanum Episcopum an. 1585., et Pampilonensem an. 1587, *ibidem.*

(6) Fagnanus in *cit. cap. ad extirpandas num. 19. de filiis presbyter,* cui a stipulatur Benedictus XIV. *loc. cit.*

Tom. II.

matio hac in re nil suffragatur filiis presbyterorum (1); nisi per subsequens matrimonium facta sit (2). Ad nepotem vero legitimum ex filio presbyteri illegitimo natum nullatenus extendi hanc Tridentinam sanctionem ratio suadet, pluriesque respondit S. Congregatio (3). Neque ad patrem, qui nullo jure prohibetur beneficium filii illegitimi obtinere sine dispensatione etiam immediate (4). Quamquam Alexander III. inhabiles declaraverit filios presbyterorum etiam legitimos ad obtinendas Ecclesias, in quibus patres eorum nulla persona media ministrarunt, ut procul ab Ecclesia esset hereditaria successio (5).

XXIV. Filii haereticorum usque ad secundum gradum ex linea paterna et primi tantum gradus ex materna sunt inhabiles ad beneficia ecclesiastica, simul et officia saecularia: nisi ante mortem parentes emendatos, et regressos in Ecclesiae gremium fuisse consulerit (6).

XXV. Censuris ecclesiasticis obnoxii arceantur a quibuscumque beneficiis, donec obtineant absolutionem (7). Sed Pontifices collatores eam soleant in apostolicis collationum litteris expresse largiri ad effectum eorum dumtaxat consequendum. *Si enim Summus Pontifex scienter etiam excommunicato participet litteris, verbo, vel osculo, seu alio quovis modo, ipsum per hoc absolvere nulla ratione censetur: nisi se velle forsitan exprimat illum ex hoc pro absoluto haberi*, ait Clemens V. (8). Criminosos generatim omnes a beneficiis adipiscendis jura ca-

(1) Ex Fagnani probata sententia in *cit. cap. ad extirpandas* num. 33.

(2) Alex. III. in *cap. conquestus* 1. et *cap. tanta* 6. *qui filii sunt legitimi*.

(3) Apud Benedict. XIV. *loc. cit.* num. 19.

(4) S. Congr. die 2. Decembris 1628., apud Bened. XIV. *ibidem* num. 16.

(5) Alex. III. in *cap. ad extirpandas* 11. *de filiis presbyter.*

(6) Bonif. VIII. in *cap. statutum* 15. *de haereticis* in VI.

(7) Innoc. III. in *cap. dilectus* 36. *de rescriptis*, et *cap. postulat* 7. *de cler. excom. ministr.* Conferenda huc sunt, quae dixi lib. 4. *Inst. Canon. tit. 18. de poenis, et cens. eccles.*

(8) Clementina *si summus* 4. *de sent. excom.* Consonat Innoc. III. in *cap. si aliquando* 41. *cod. tit.*

nonica eo planius repellunt, quo saepius obtentis etiam eos vel ipso facto privatos, vel per sententiam privandos fore jubent (1).

XXVI. Nam probitas morum vitaeque honestas in personis ecclesiasticis praesertim beneficiariis requiritur (2). Ex Gregorii IX. sententia *non generis, sed virtutum nobilitas, vitaeque honestas gratum Deo faciunt, et idoneum servitorem, qui ad Ecclesiae suae regimen non multos secundum carnem nobiles, et potentes elegit, sed ignobiles, ac pauperes: eo quod non est personarum acceptio apud ipsum* (3). In conferendis canonicatibus, aliisque beneficiis etiam simplicibus, inquit Benedictus XIII. Episcopi non carnem respiciant, aut sanguinem: ad servitium attendant, et qualitates promovendorum. Advigilent insuper, ut in faciendis collationibus nec alii esuriant, nec alii ebrii sicut, justitia semper distributiva servetur prudenti collatorum arbitrio. In canonicatibus vero, ut supra conferendis, ceteris paribus, semper eos praeferant, qui tantum callent Gregorianum, et quoties collatio ad Sedem Apostolicam spectabit, ejusdem cantus peritia mentio fiat in testimonialibus, quae conceduntur (4). Qui vero iteralis, et ambitiosis precibus beneficia extorquere ab Episcopo nitentur, eos indignos censuit S. Carolus Borromaeus (5).

XXVII Judices caussarum beneficialium, vel criminalium, in quibus privatio beneficiorum irrogatur, eorumque consanguinei, affines, et familiares impetrare non possunt tam a Summo Pontifice, quam Ordinariis locorum beneficia per privationem eandem vacantia, ex Constitutione Pii IV., qui irritas ipso jure pronuntiat ejusmodi impetrationes, et impetrantibus istis nil suffragari Regulas de annali, et triennali possessione (6).

(1) Qua de re dicam *cap. ult. hujus tract.*

(2) S. Greg. M. in *can. non loca* 4. *dist. 40, et can. sicut excellentiam* 48. *C. 23. qu. 4.*

(3) Greg. IX. in *cap. venerabilis* 37. *de praeb.*

(4) Beved. XIII. in Conc. Roman. *tit. 6. de aetat., et qualitat. praefic. cap. 5.*

(5) Quem laudat et sequitur Benedictus XIV. *de syn. dioecesis. lib. 7. cap. 63. nnm. 4.*

(6) Hanc Pii IV. constitutionem habet Quaranta in *sum. bullar. verb. beneficiorum privatio.*

XXVIII. *Litteris carens non potest esse aptus saecris officiis*, ad Episcopos Lucaniae rescripsit Gelasius (1). Id jure divino imperatum, innuit Osea his Domini verbis: *quia tu scientiam repulisti, repellam te, ne sacerdotio fungaris mihi* (2). Verum Innocentius III. rescripsit: *etsi desideranda sit eminens scientia in Pastore, in eo tamen est competens toleranda; quia secundum Apostolum, scientia inflat, charitas autem aedificat, et ideo imperfectum scientiae potest supplere perfectio charitatis* (3). Jure hinc merito Cancellariae Regula XX. de idiomate statuit, nullius fore momenti collationes, quae tam in Curia Romana, quam extra fiant de parochiali Ecclesia, et quovis beneficio curam animarum habente quibuslibet nescientibus idioma loci, ubi Ecclesia, vel beneficium consistit. Nam Tridentina Synodus decrevit, ut Parochi singulatim lingua vernacula frequenter explicent vim, usumque Sacramentorum, et legem Domini (4). Honorius III. rescripsit ab officio episcopali removendum fore Callinensem Episcopum in Germania, qui nec didicisse grammaticam, nec Donatum umquam legisse jam fuerat confessus (5).

XXIX. Denique dignioribus conferri omnino debent, posthabitis dignis, beneficia cum animarum cura, ut sunt in primis Ecclesiae Cathedrales (6), tum parochiales (7). Quare S. Augustinus: *non sane putandum est leve peccatum, ait, in acceptione personarum habere fidem Domini Nostri Jesu*

(1) Gelas. in *can. illiterato*. 1. dist. 36.

(2) Oseae *cap. 4*.

(3) Innoc. III. in *cap. nisi cum pridem* 10. de *renuntiatio*.

(4) Trid. in *cap. ut fidelis populus* 7. sess. 24. de *ref.*

(5) Honor. III. in *cap. quamvis* 15. de *aetate, et qualitate*. Et Clemens XI. quemdam in Regno Neapolitano designatum Episcopum, qui nullum valuit verbum latinum respondere in examine quum publico, tum privato, renuit ordinare volens contra Deum, et canonicas sanctiones tantum in Episcopo tolerare defectum: sicut fert Rigant. in *Reg. XX. Canc. num. 41*.

(6) Trident. in *cap. sess. 24. de ref.*

(7) Idem in *cap. expedit* 18. *ead. sess. 24. de ref.* decrevit Parochos, praevio concursu eligendos, quos *magis idoneos* Episcopus judicaverit aetate, moribus, doctrina, prudentia, ceteris dotibus.

Christi. Quis enim ferat eligi divitem ad sedem honoris Ecclesiae, contempto paupere instructiore, atque sanctiore (1)? S. Thomas: *contingit quandoque, ait, aliquem esse meliorem simpliciter, qui tamen non est melior quantum ad hoc, quod beneficium percipiat: quid aliquis forte potest Ecclesiam magis juvare, vel per consilium sapientiae. vel per auxilium potentiae, vel quia servivit in Ecclesia. Non ergo Episcopus tenetur semper dare meliori simpliciter, sed tenetur dare meliori quoad hoc... Non enim potest esse, quod Episcopus unum praeferat alteri, nisi propter aliquam causam. Quae si quidem pertineat ad honorem Dei, et utilitatem Ecclesiae, jam quantum ad hoc ille est melior: si autem illa causa ad hoc non pertinet, erit acceptio personarum, quae tanto est gravior, quanto in rebus divinis committitur* (2). Prae oculis habcant collatores hocce B. Jacobi Apostoli oraculum. *Nolite in personarum acceptione habere fidem Domini Nostri. Etenim si introierit in conventum vestrum vir aureum annulum habens in veste candida, introierit autem et pauper in sordido habitu, et intendatis in eum, qui indutus est veste praeclara, et dixeritis ei: tu sede hic bene; pauperi autem dicatis: tu sta illic, aut sede sub scabello pedum meorum, nonne iudicatis apud vosmetipsos, et facti estis iudices cogitationum iniquarum? Nonne Deus elegit pauperes in hoc mundo, divites in fide, et heredes regni, quod promisit Deus diligentibus se? Vos autem exhonorastis pauperem. Si autem personas accipitis, peccatum operamini, redarguti a lege, quasi transgressores* (3).

XXX. Quoties autem curata beneficia sint de jure patronatus laicorum: nequit Episcopus patronos compellere ad praesentandos digniores, sed praesentatum, si repererit idoneum, tenetur omnino admittere, atque instituere (4).

(1) S. August. *ep.* 29. ad S. Hieronymum. An divitibus clericis conferre olim beneficia licuisset, dubiam fuisse quaestionem; nunc vero licere consentiit Benedictus XIV. *de syn. dioeces. lib.* 7. *cap.* 2. *num.* 2.

(2) S. Thomas *quodlibet* 6. *quaest.* 5. *art.* 3.

(3) S. Jacob. *ep. canon. cap.* 2. *vers.* 1, *et seq.*

(4) De hac re fusius infra dicemus in *cap.* 10. *de collatione*, ubi forma concursus ad parochiales explicabitur.

XXXI. Cetera vero beneficia sine cura animarum dignis, atque idoneis, etiam omissis dignioribus, licite conferri posse probabiliter doctores affirmant. Propterea quod Innocentius III. in Concilio generali indignos excludit, non vero dignos, atque idoneos dicens: *Gravis nimis est, et absurdum, quod quidam Ecclesiarum Praelati cum possint viros idoneos ad ecclesiastica beneficia promovere, adsumere non verentur indignos, quibus nec morum honestas, nec litterarum scientia suffragatur, carnalitatis sequentes affectum, non iudicium rationis: unde quanta damna Ecclesiis proveniant, nemo sanae mentis ignorat. Volentes igitur huic morbo mederi, praecipimus, ut praetermissis indignis, idoneos adsumant, qui Deo et Ecclesiis velint, et valant gratum impendere famulatum, fiatque de hoc in provinciali Concilio diligens inquisitio annuatim* (1). Accedit exceptio Tridentina de beneficiis curam habentibus animarum, quae sanxit ut dignioribus conferantur, firmans regulam in contrarium in ceteris beneficiis sine cura. *Nam si contrarium volebat, nulla erat difficultas conjunctim ea disponere* (2). Huic exceptioni superaddi potest praelatio graduatis indulta in regno Galliae vigore Concordatorum Leonis X. cum Francisco I. Si enim Episcopi coguntur inibi graduatis simpliciter, uti doctoribus, benemeritis, et dignioribus conferre beneficia in mensibus Aprilis, et Octobris vacantia, itemque graduatis per Academias nominatis in mensibus Julio, et Januario: consequens est, ut in reliquis mensibus beneficia personis non graduatis, minusque idoneis valeant concedere. Non desunt autem opinantes cum divo Thoma in foro externo quidem licitam, validamque haberi collationem simplicis beneficii digno factam, omisso digniori: sed in foro interno conscientiae non item, quum S. Thomas doceat *quantum ad conscientiam eligentis* necessum esse eligere meliorem (3). Sententia haec plane tutior est, ideoque digna, quam Praelati ecclesiastici sequantur in praxi.

(1) Innoc. III. in *cap. grave nimis* 29. *de praeb.*, quod firmavit Trid. in *cap. inferiora* 3. *sess. 7. de reform.*

(2) Textus ait civilis in *l. un. de caducis tollendis*, et Ulpian. in *l. item apud Labonem* 15. §. *hoc edictum D. de injuriis.*

(3) S. Thom. 2. 2. *quaest.* 63. *art.* 2.

XXXII. Saecularia beneficia nonnisi clericis saecularibus, et vicissim regularia nonnisi regularibus personis professis conferri possunt, ne vestem lino, lanaque contextam induant, ait Synodus Tridentina (1). Verum ex Romani Pontificis dispensatione Regulares quandoque saecularia beneficia obtinent in titulum perpetuum, et saeculares clerici regularia monasteria, seu abbatias in commendam, vel ad vitam, vel ad tempus ex Cancellariae Regula XLIII. (2).

XXXIII. Beneficia ecclesiastica saecularia conferri non posse Canonicis Regularibus Lateranensibus, aut Sanctissimi Salvatoris absque indulto apostolico, sacrae Urbis Congregationes saepe censuerunt (3): Tum reclamante Procuratore generali Canonicorum Lateranensium Clemens XI. anno 1713. rescipit, ut S. Congregatio Concilii totius causae cognitionem resumeret, ac definiret, an inspectis jure communi decretis Tridentinis, professione, et instituto Canonicorum Lateranensium, sine ullo respectu ad res interea judicatas, liceret Canonicis Lateranensibus, cum licentia dumtaxat suorum regularium praelatorum ad parochias saeculares, aut canonicatus Cathedralium et religiosis claustris demigrare, vitamque presbyteri saecularis agere. Sed re integra Benedictus XIV. eam sibi avocavit, auditisque votis concordibus theologorum, et canonicistarum in consilium suum adscitis, motu proprio declaravit *eosdem Canonicos Regulares absque indulto apostolico cujuscumque beneficii ecclesiastici saecularis, sive cum adnexo animarum curae, aut residentiae onere, sive etiam beneficii simplicis, et sine cura, ac personalem residentiam non requirentis, et cujuscumque pensionis ecclesiasticae vere incapaces esse, et censi debere, eisdemque nec jus commune, nec Tridentinae Synodi decreta, neque professionem ab ipsis emissam solitam, aut eorum peculiare institutum: neque demum ullam consuetudinem, usum*

(1) Trid. in *cap. regularia* 10. *sess. 14. de ref.* Id quod constitutum iamdiu erat ab Innoc. III. in *cap. cum causam* 27. *de elect.* et Bonif. VIII. in *cap. cum de beneficio* 5. *de praeb.* in VI.

(2) De commendis sermo redibit plenior infra *cap. 11.*

(3) S. Congr. Couc. an. 1581. probante Gregorio XIII. S. Cong. Episc., et Regul. an. 1671. sub Clemente X., iterumque Congr. Concilii an. 1693. sub Innoc. XII.

possessionem, seu quasi, aliumque omnino titulum pro hujusmodi praetensa capacitate ullatenus suffragari. Eis propterea prohibet egressum e claustris absque indulto apostolico, solo accedente consensu Abbatis generalis: etiamsi beneficia simplicia, vel pensiones ab Apostolica Sede impetraverint, sub poenis contra apostatis latis. Permittit autem patronis quum laicis, tum ecclesiasticis eos praesentare ad Ecclesias parochiales, aut canonicatus de jure patronatus sub conditione obtinendi, et beneplacitum Superioris generalis eorum ordinis, et indultum Sedis Apostolicae. Hoc autem arbitrio Pontificis reservatur, inspecturi antea testimoniales litteras tam Superioris generalis, quam Episcopi dioecesei quoad mores, et doctrinam. Idipsum observari mandat, quoties dioecesei locorum ordinarii eis voluerint beneficium residentiale collationis liberae sine concursu conferre. Prohibet insuper, ne iidem Canonici regulares admittantur sine pontificio indulto, et licentia Superioris generalis ad concursum in Ecclesiis curatis, vel praebendis canonici theologi, aut poenitentiarum ad liberam dioecesei collationem pertinentibus, vel patronatui ecclesiastico subjectis (1).

XXXIV. Curata pariter, ac residentia conferri nequeunt presbyteris, aut clericis Congregationis Missionis, collationesque factas, vel faciendas ipso jure irritas declaravit idemmet Benedictus XIV. (2). Etsi enim vota simplicia castitatis, paupertatis, obedientiae, ac stabilitatis in ea ipsa Congregatione emittant post biennalem probationem presbyteri; et clerici ejusdem, dum se toto vitae tempore manciant procurandae salutis pauperum rusticorum: ea tamen posse dissolvere solum Pontificem Romanum, et Superiorem ipsius Congregationis generalem in actu dimissionis; praeterea neminem, statuit Alexander VII., dum ejusdem Congregationis institutum ad preces S. Vincentii de Paulo fundatoris adprobavit. Mox inter constitutiones ejusdem a Clemente IX. confirmatas cautum: ut *dignitates ecclesiasticas abs-*

(1) Bened XIV. in *const. quod inscrutabili* 135, edita 7. Idus Junii 1741., to. 1. Bullarii.

(2) Idem in *Const. quo magis* 69., die 18. Decemb. 1742, eodem to. 1. Bull., ubi nullum sit verbum de beneficiis simplicibus, quae non prohibentur Missionarii obtinere cum licentia sui Superioris generalis.

que consensu Conventus generalis acceptare non possint, nisi Summus Pontifex id in virtute sanctae obedientiae praecipiat. Prioresque regulae ipsius, ne votum paupertatis violaretur appetitu inordinato bonorum temporalium, vetant Missionariis ad ullum beneficium, aut dignitatem ecclesiasticam sub quocumque praetextu adspirare (1).

XXXV. Qualitatem civis originarii, vel dioecesani jura communia non exigunt. Nam Innocentius III. Cardinali Sedis Apostolicae legato rescribens, Patriarcham Constantinopolitanum, qui aliarum Nationum clericos spernens, Venetos tantum in Constantinop. Ecclesiis instituebat, commonuit, *ut viros litteratos, et alios idoneos, undecumque originem duxerint, in praedictis Ecclesiis, et maxime in majori institueret* (2). Multis autem in locis statuta, legesque peculiare alienigenas, et externos a beneficiis adipiscendis arcere consueverunt. Ut sileam cetera: dum Barcinonae regnaret Carolus VI. alienigenas a beneficiis, et pensionibus hujus Regni Neapolitani omnino exclusit, et sequestrari mandavit fructus beneficiorum exteris interea collatorum (3). Quod iterum firmavit die 6. Augusti 1713. post imperialem Coronam acceptam. In Concordatis an. 1741. cautum est, ut omnia hujus Regni beneficia tam simplicia, et sine cura, quam residentialia, et curata, sive majora, sive inferiora, nec non pensiones ecclesiasticae regnicolis tantum conferantur: exceptis dumtaxat viginti millibus ducatis monetae Regni, quos imponere super Ecclesiis Cathedralibus, et Abbatialibus ad regiam nominationem non pertinentibus in favorem subditorum Status ecclesiastici: praeter alios totidem ducatos 20. m. pensionum super iisdem Ecclesiis non regiis reservandos pro regnicolis, quos Rex nominaverit (4). Siculis praeterea indulsit Carolus, ut non nisi civis originarii ad Cathedrales illius Regni Ecclesias nominarentur, excepta solum Panormitana, quam arbitrio Regis patroni consueverunt exteri obtinere (5) (*).

(1) Ex traditis ab eodem Benedicto XIV. *ibidem*.

(2) Innoc. III. in *cap. ad decorem* 5. *de instit.*

(3) Ex *to. 2. privilegiorum* Caroli VI. *pag. 227. et seq.*

(4) Concordata an. 1741. *cap. 8 art. 1. et 2.*

(5) Rigaut. *to. 1. pag. 209. Reg. 2. Canc. §. 1. num. 19.*

(*) Conventione novissima an. 1818, art. VIII. cautum he-

XXXVI. Capuanis, postulante Rege Carolo, Benedictus XIV. speciatim indulgit, ut omnes, et singulae dignitates, etiam post pontificalem majores in Cathedralibus, et principales in Collegiatis, necnon canonicatus, praebendae, et mansionariae, ceteraque beneficia in Cathedrali, Collegiatis, et Receptitiis Ecclesiis in dicta civitate, ac dioecesi consistentibus fundata, quae chori servitium adnexum habeant, et personalem residentiam requirant, necnon parochiales Ecclesiae quomodolibet affectae, ac reservatae, et quibusvis mensibus etiam apud Sanctam Sedem simul pensiones super iisdem beneficiis residentialibus imponendae, *nonnisi clericis, seu presbyteris in eadem civitate, vel dioecesi Capuana natis, vel oriundis conferantur*. Verum excipiuntur quaecumque beneficia regularia, ac monasteria, abbatiae, et prioratus in commendam concedi solita, ceteraque beneficia saecularia quomodolibet nuncupata, quae nec servitium chori, nec residentiam requirunt.

CAP. X.

DE COLLATIONE (*)

(*) Ad tit. VIII. lib. 3. Decretal. *de concess. praebendae*.
I. Concessionem, seu donationem beneficii liberam heic sonat

nesciorum provisionem in favorem subditorum Utrisque Siciliae Regni faciendam esse. Quamobrem art. XIX. Cod. LL. Civ. expresse sancitum ab adipiscendis hujusce Regni beneficiis exteris omnino excludi.

Praeterea art. XVII. ejusdem Conventionis decretum quod Pensionum reservatio; abrogata penitus Tertii Pensionabilis lege juxta Canonum sanctiones in posterum locum habeat. Clerici vero a Rege Nostro ad praedictas pensiones nominati Bullas ab Apostolica Sede obtineant, ut dum vitam agunt, illas percipere possint: Pensionariis tamen vita functis, Episcopatus, vel quodvis beneficium ab onere pensionis omnino liberum fore.

Postremo art. XVIII. statutum quod Summus Pontifex in perpetuum sibi reservaret super aliquas mensas episcopales, et abbas Regni designandas annuas pensiones in summam ducatorum duodecim millium, quas ille pro tempore suis subditis Status ecclesiastici pro lubitu conferet.

- collatio, et quandoque institutionem coactam in beneficiis de jurepatronatus.
- II. Ea jus in re tribuit perpetuum, et irrevocabile: jus ad rem electio, et praesentatio.
- III. Motu proprio collatores ordinarii, ad preces petentium Apostolica Sedes collationes beneficiorum largiuntur.
- IV. Forma collationis ordinarias quinque articulis constat.
- V. Pontificiae collationis litteras bullatas praestit supplicem libellus petentis in Signatura gratiae.
- VI. Gratia Signaturae, quamvis irrevocabilis executioni mandari non potest sine litteris Datariae.
- VII. Nullo temporis spatio, dum collator Pontifex vivit, arctantur provisi ad expediendas bullas: eo defuncto novae provisionis litteras debent intra sex menses a successore Pontifice accipere.
- VIII. Exigua viz beneficia per simplicem Signaturam conferuntur.
- IX. Litteras in forma gratiosa accipiunt, qui sua ostenderint Datario merita.
- X. Aliis ignotis conditionales litterae dantur in forma dignum.
- XI. Ex novae provisionis litteris convalescunt gratiae, collationes invalidae.
- XII. Dummodo nullitates, defectusque praecedentis apostolicae gratiae speciatim exponantur.
- XIII. Ad firmandam ordinarii collationem sufficit eam generatim dicere defectivam.
- XIV. Jus aliis quaesitum non tollit nova ejusmodi provisio.
- XV. Gratias a defuncto Pontifice signatas novus Pontifex ratas habet litteris in forma rationi congruit.
- XVI. Litteras autem vitiosas firmat novis litteris perinde valere.
- XVII. Gratias subrogationum si neutri: vel si nulli usqueveniant pro beneficiis litigiosis.
- XVIII. Coadjutores cum futura successione creare usi sunt Pontifices.
- XIX. Parochiales Ecclesiae, et animarum curae nonnisi per concursum conferri possunt ex lege Tridentina, exceptis laicorum patronatibus.
- XX. Quam explicuit, ampliavitque S. Pius V.
- XXI. Formam concursus, praelectionem dignioris, et appellationis modum tradidit explicatius S. Congr. Conc. jussu Clementis XI.
- XXII. Tum Benedicti XIV. constitutio.
- XXIII. Concursum dioecesanus Episcopus indicit semper, ac peragit in reservatis etiam collationibus Datariae, sine actis

nunciaturus magis dignum in vacatione mensis apostolici, sed acta ad eam in aliis reservationibus transmissurus.

XXIV. Patroni etiam ecclesiastici debent dignioribus inter concurrentes adprobatum eligere, ac praesentare.

XXV. Ob nimiam et reddituum, et concurrentium inopiam, et rizarum pericula Tridentinum indulget parochialem Ecclesiam sine concursu conferri.

XXVI. Resignatas, permutatas, devolutas animarum curas consuevit Sedes Apostolica sine concursu conferre, in hoc Regno nunc secus.

XXVII. Regias parochiales uni ex tribus per Capellanum Majorem propositis praevio saepe concursu Rex confert.

XXVIII. Theologi, et Poenitentiarii praebendas canonicas per concursum conferri dignioribus etiam oportet.

XXIX. Appellantes in collationibus per concursum dumtaxat audiuntur, in aliis liberis nequaquam.

XXX. Impetratio praepropera beneficii non vacantis irrita penitus est.

XXXI. Pensiones perpetuas reservare Ordinarii collatores nequeunt, sed solum temporaneas pro bono pacis.

XXXII. Extra dioecesim quoque possunt Episcopi collationes beneficiorum liberas dare.

XXXIII. Optionem canonicam alicubi antiquioribus gradatim indulget fundatio, privilegium, vel consuetudo, intra dies XX. explendam.

XXXIV. Collegium S. R. E. Cardinalium, et Ordo equitum Hierosolymitanorum, Capitulum Salernitanum hoc in Regno, et Messanense inter alia fruuntur optione.

XXXV. Praebendas quomodolibet reservatae Sedi Apostolicae nullum dant locum optioni.

XXXVI. Nec resignatio in factorem, nec permutatio, nec concursus, nec jus patronatus.

XXXVII. Cum pensione praebendam adeptus optare pinguorem non prohibetur.

XXXVIII. Coadjutor cum futura successione numquam, coadjutus quandoque optat.

XXXIX. Optantes collatione non egent.

XL. Sat est quod suam explicant, vel denuncient intentionem collegio per se, vel alium intra constitutos dies.

XLI. Optionum aliae titulum mutant, aliae non illae pensionem, reservationem, cetera onera in successorem transferunt, haec secus.

XLII. Optio retinendi alterutrum incompatible beneficium novis constitutionibus adempta hoc etiam in Regno exolevit.

I. Varias collationis notiones inquirent philologi (1). In sacris autem canonibus *collatio* idem plerumque sonat, quod Ecclesiastici beneficii concessio (2). Hoc vero vocabulum aut late, aut strictim sumitur. Acceptum late comprehendit perinde liberam, ac non liberam, seu coactam concessionem, quae scilicet ex juris necessitate sit ad favorem electi, aut praesentati ab aliis jus eligendi, aut praesentandi habentibus, quam doctores *institutionem* speciali nomine appellant (3). Nam beneficium ecclesiasticum non posse licite *sine canonica institutione* obtineri, quum dixerit Bonifacius VIII. (4): videtur ipse promiscuo sensu vocem institutionis pro collatione usurpasse. Et Coelestinus III. collationem nominat, quam paulo ante praesentationem dixerat (5). Stricta vero et

(1) *Conferre* quum apud latinos in communionem aliquid redigere potissimum significet, *collationem* hinc iureconsulti contributionem bonorum inter fratres, ac sorores factam communis successionis causa appellant: ad quam spectat rubrica Digestorum, et Codicis *de collatione bonorum*. Presbyteros post peracta divina mysteria convenire ad necessariam *collationem*, ad commune scilicet prandium, dixit Synodus Naunetensis in *can. quando* 11. dist. 44. Et B. Hieronymus illud Proverbiorum cap. 2. (*vacantes polibus, et dantes symbola*) exponens ait: *symbolum graecum nomen est, et interpretatur collatio: quum unusquisque soleat pro sua parte cibos conferre ad vescendum*. Dum comparamus res inter se, conferre cum Ictis quoque dicimus, praesertim cum Paulo in *l. amissione* 5. §. 1. *D. de capite minut.* Hoc sensu inscriptus libellus est *collatio legum Mosaic. et Roman.* apud Schuttingium *de jurisprudent. antejustin.* Saepe etiam *conferre* idem sonat, quod tribuere, largiri, concedere. Sic *beneficium in mulierem contulisse*, quispiam dicitur a Marcello in *l. proxime* 50 *D. de ritu nuptiarum*. Et Ulpianus docet consuevisse Praesides remittere ac ordinem nominatum, *Cajum, Sejum creent magistratum, vel alius, qui honor, vel minus in eum conferantur, l. siquidem* §. 3. *D. quando appellandum sit.* Haec notio ad rem nostram propius accedit.

(2) Petr. Blesens. ep. 70. Carolus du Fresne in *glossario verb. beneficiar.*

(3) DD. ad tit. 7. lib. 3. Decretal. *de institutionibus*, de quibus dixi jam satis in *Comm. de jurepatr. cap. 9.*

(4) Bonif. VIII. in cap. 1. *de reg. jur. in VI.*

(5) Coelestin. III. in cap. *ea noscitur* 6 *de his quae fiunt a praelatis*, ibique Gonzalez.

propria notione collatio non nisi concessionem liberam significat beneficiorum, nulla juris patronatus, vel electionis servitute affectorum: quae scilicet Ordinarii locorum, vel Summus Pontifex dant personis suo ipsorum arbitrio delectis, nullo jure coacti ad hunc vel illum praeeligendum, neque ad expectandam cujuspiam electionem, vel praesentationem. Isloque sensu nuncupatur saepe *donatio* (1), propterea quod collator gratis, et omnino libere alicui ex idoneis, ac dignis clericis beneficium concedit.

II. Per collationem sic stricte acceptam provisos acquirit jus *in re*, seu titulum beneficii, statim ac suum collationi praestiterit consensum, etiam ante adeptam possessionem. *Si enim tibi absenti Episcopus contulerit beneficium, licet per collationem hujusmodi, donec eam ratam habueris, jus in ipso beneficio, ut tuum dici valeat, non adquisis: ipse tamen Episcopus illud, nisi consentire recuses, in personam alterius conferre nequibit.* Quod si terminum ad consentiendum tibi assignaverit: eo etiam lapso, dummodo res integra fuerit, antequam alteri facta sit collatio, tuum poteris praestare consensum, et sic impedire quominus alteri fiat collatio, Bonifacius VIII. declaravit (2). Unde liquet post acceptatam collationem adquiri jus *in re*, ante acceptionem vero jus *ad rem* (3). Quod autem nobis quaesitum est sive *in re*, sive *ad rem*, sine facto nostro, nobisque invitis, ad alium transferri non potest (4). Quare differt collatio ab electione, et praesentatione, quae tribuunt solummodo jus *ad rem*, seu facultatem compellendi ordinarium collato-

(1) Innoc. III. in *cap. cum accessissent* 8. *de constit. primum. ceriatum in Tullensi Ecclesia*, inquit, *tanto tempore vacavit, quod ad nostras manus illius personatus esset donatio devoluta.* Eadem vox occurrit in *cap. eam* 7. *de rescript. cap. licet* 3. *de suppl. negl. prael. cap. proposuit* 4., *cap. quia diversitatem* 5., et *cap. pen. de concess. praeb. cap. fin. de offlc. Vicar. in VI.*

(2) Bonif. VIII. in *cap. si tibi* 17. *de praeb. in VI.*

(3) Ex regula juris, quam tradit M. Ant. Cucchus lib. 1. *Inst. major. tit. 6. de privileg. num.* 118.

(4) Poinpon. in l. *id quod nostrum* 11. *D. de reg. jur.* Et *factum legitime retractari non debet, licet casus postea eveniat, a quo non potuit inchoari*, ex Bonif. VIII. in *cap. factum* 73. *de reg. jur. in VI.*

rem ad electum, et praesentatum acceplandum, et instituendum in beneficio, nisi obstet canonicum impedimentum, atque repellendi adversarium competitorum jura potiora non habentem (1).

III. Forma collationis dupliciter concipi solet, vel *motu proprio* collatoris, vel *ad petitionem* beneficiarii supplicantis (2). Ordinariorum collationes semper ex inveterata Ecclesiae disciplina motu proprio fieri videntur, quum nullam faciant mentionem de petitionibus praeviis, ad reprobandum ambitum sacris canonibus, et legibus odiosum (3). Etenim in proemio collatores ferre exprimunt sese excitatos scientia, bonis moribus, aliisque meritis personae, cui providetur, ad conferendum beneficium, gratiamque liberalem erga eum exercendam.

IV. Rebuffus post relatum formulam collationis Ordinariorum docet eam quinque partibus constare. In quarum prima collator salutem dicit, cui beneficium conferre intendit, et collationis causam impellentem exprimit, illius scilicet merita. Secunda praemittit vacationis modum, ac tempus, titulum beneficii, locum, ubi situm illud sit: deinde reipsa disponit collationem, et investituram in favorem illius certae personae proprio nomine, et cognomine jam initio designatae. In tertia delegat omnibus tabellionibus, aliisque personis subditis, ut provisum in collatae Ecclesiae possessionem immittant. In quarta collator dicit jussisse litteras desuper expediri, signari, et tradi. In quinta demum adponitur data expeditionis (4).

V. Ad petitionem beneficiarii vero solent per Summum Pontificem beneficia conferri. Bullas enim apostolicas praecedat semper supplex petentis libellus, et *signatura gratiae*, videlicet scriptura in papyro petentis supplicationem in primis, dein pontificium in medio rescriptum manu vel Papae ipsius, vel delegati ejus Datarii tribus verbis conceptum, ad extremum clausulas praecipuas ad rem facientes, sine sigillo breviter continens (5). Quandoquidem in ea exponitur primo certum id beneficium eo

(1) Clementina *constitutionem* 4. *de elect.*

(2) Bonif. VIII. in *cap. si motu proprio* 23. *de praeb. in VI.*

(3) Cl. Fleury *Inst. jur. canon. par. 2. cap. 21.*

(4) Ex Rebuffo in *prax. benef. par. 1. tit. requisita in litteris collationum.*

(5) Ex definitione Rebuff. *loc. lit. tit. de signatura gratiae.*

certo modo vacare, quod ille supplicat per Sedem Apostolicam sibi conferri. Tum in medio papyri albo Papa rescribit vel manu sua: *fiat ut petiur*: vel manu delegati sui: *concessum ut petiur in praesentia D. N. Papae*. Primo rescripto vis major, quam secundo est. Nam signatura per *fiat* praeferitur alteri per *concessum* (1): si eadem die concurrant. Subinde succedunt clausulae necessariae, praesertim absolutio a censuris, derogationes, ceterae sumptuum, quas rei adjuncta varia postulant, in bulla extendendae fusius (2).

VI. Firmam, et irrevocabilem collationis gratiam sola signatura quidem efficit. Nam et verbo solum, et scripto sub quacunque forma, vel expressione, vel conceptione verborum potest gratia Pontificis consistere, nisi iusta ex causa irritetur (3). At vero ex Cancellariae Regula XXVII: *cum ante confectionem litterarum gratia sit informis. : . iudices vel in Romana Curia, vel extra eam existentes, et quicumque alii non juxta supplicationum signaturam super quibusvis impetrationibus, sed juxta litterarum super iisdem impetrationibus, et concessionibus confectarum tenores, et formas judicare debent* (4). Alia simul Regula XXXI. statuit: *quod omnes commissiones caussarum obtentu, vel occasione concessionum dumtaxat gratiarum apostolicarum de beneficiis ecclesiasticis, super quibus litterae apostolicae confectae non fuerint, ac processus desuper habendi nullius sint roboris, vel momenti* (5). Additque Regula LII. quod gratia cujuscunque dispensationis nulli cuiquam in iudicio, vel extra suffragetur, antequam super ea litterae apostolicae sint confectae (6).

(1) Ex Cancellariae Regula XXXIV. *de Signatura per fiat*.

(2) Formam Signaturae simplicis provisionis cum consuetis clausulis videsis apud Rebuff *loc. cit.*

(3) Clementina dudum 2. §. nos etenim *de sepultur.* Nam *de cet concessum semel a principe beneficium esse mansurum, ex cap. decet 16. de reg. jur. in VI.*

(4) Reg. XXVII. *de non judicando juxta formam supplicationum, sed litterarum expeditarum.*

(5) Reg. XXXI. *non valeat commissiones caussarum, nisi litteris expeditis.*

(6) Reg. LII. *ut nulli suffragetur dispensatio, nisi litteris confectis.*

Hinc factum est, ut gratia pontificiae signaturae, tamquam *informis* executioni demandari nequeat, nulliusque momenti sit executio facta sine litteris pergamenis gothica manu conscriptis, et signo plumbeo communis, vel sine authentico earum transumpto. Quandoque aliae dantur litterae *in forma brevis* ad capiendam Ecclesiae, vel beneficii possessionem nomine Camerae apostolicae cum decreto expediendi bullas sub plumbo infra sex menses a data supplicationis (1). Eamque ob rem ipso jure vacabit beneficium, cujus possessio sit absque litteris ejusmodi pontificiis apprehensa (2). Quo vero ad Cathedrales, et abbatiales irrita est possessio, et quaevis administratio novi Praelati, quam sine litteris pontificiis occupaverit, ac gesserit (3).

VII. Certum temporis spatium nullo jure limitatum est ad expediendas gratiarum litteras, quoad Pontifex, qui eas concessit per signaturam, vivat (4). Sed eo defuncto successor Pontifex consuevit per Cancellariae Regulam X. indulgere *sex menses* dumtaxat a die coronationis suae incipiendos, ut expediantur litterae in forma *rationi congruit* ad perficiendas gratias a praedecessore concessas (5). Tum ne fraudibus ansa detur ad eludendas legitimas impetrationes, stylus inolevit multis gratiis de beneficiorum *resignatione*, ac *cessionem*, tum *novae provisionis perinde valere, subrogationis, si neutri*, ceteris ut ajunt sanatoriis hanc adjicere clausulam: *quod infra tres menses proximos litterae apostolicae desuper expediri debeant* (6). Verum edicto speciali Datariorum nunc jam coguntur omnes, qui beneficia quum simplicia, tum residentialia per obitum vacantia, vel citra, vel ultra montes obtinuerint per signaturam,

(1) Card. de Luca *de benefic. disc.* 17. num. 18.

(2) *Ex const.* 33. Julii III, quam laudat Maudos. *ad cit. Canc. Reg.* 26. qu. 3.

(3) *Ex const.* Bonifacii VIII. in *extravag. injunctae* 1. *de electione*. Praeterea constitutiones Alexandri V, Julii II, et Pauli IV. promotos ad Cathedrales Ecclesias, et Abbatias, qui per annum expeditionem litterarum apostolicarum neglexerint, ipso jure privatos eisdem sanxerunt.

(4) Tradit Rigan. in *Reg. X. Canc. num.* 91. *et seq.*

(5) *Reg. V. de litteris in forma rationi congruit expediendis.*

(6) Rigan. in *cit. Reg. X. num.* 65.

accipere intra sex menses ab eo die numerandos, quo gratiae in albo ipsius Datariae promulgantur, litteras rite expeditas, aliter possint ea per alios impetrari (1).

VIII. Exigua vix beneficia ab onerosa bullarum expeditione excipiuntur, nimirum simplicia, quorum annui redditus duos cum dimidio, vel tres ducatos auri de Camera non excedunt, et curata, si fructus certi ducatos sex auri de Camera comprehensis etiam oneribus, aut si fructus una cum incertis duodecim ducatos auri similiter non excedunt (2): in his eum Sedes Apostolica fere indulget possessionem dari sine plumbatis litteris ex decreto simplicis signaturae.

IX. Duplex forma ex inveterato Cancellariae, seu Datariae Apostolicae stylo usuvenit in pontificiis collationum litteris, bullatis nimirum membranis: *forma gratiosa*, vel *forma dignum*, ut ajunt, seu *mandati de providendo*. Prior gratiam collationis *puram* largitur, posterior *conditionalem*. Quoties impetrator beneficii cum attestationibus sui Ordinarii, vel examinatorum Urbis, vel aliis informationibus arbitrio Datarii ostendit se quod ad mores, ac doctrinam idoneum ad beneficia ecclesiastica obtinenda, consequitur collationem in *forma gratiosa*, quae gratiam omnino perfectam largitur, et jus plenum in beneficio tribuit eatenus, ut possessionem, vel cum adstantia alicujus personae in dignitate ecclesiastica constitutae possit apprehendere.

X. Ubi autem praedicta deficiat probatio idonei petentis, expediuntur bullae in altera *forma conditionali*, quibus Ordinario loci, vel alicui executori apostolico committitur, ut si dignum, atque habilem repererit impetrantem, ei beneficium tunc auctoritate apostolica conferat, ipsumque in possessionem immittat. *Mandamus* (de stylo dicitur in bullis pontificiis) *quatenus si post diligentem examinationem dictum N. ad obtinendum be-*

(1) Idem *loc. cit.* n. 72. Anni spatium eis, qui ad Cathedrales vel Abbatiales Ecclesias promoti essent, concessum pro expeditione litterarum ab Alexandro V, et Julio II. *const. 4.* servunt Fagnanus, et Thomassin. apud Rigant. *ibidem* num. 74, et ult.

(2) Rigant *in nar. 1. Reg. IX. Canc. §. 2. num. 101*, monet expeditioni simplicis Signaturae locum non esse, quoties agitur de impetrandis, vel resguardis beneficiis tenuibus, vel derogatione medietati juris patronatus, vel subrogatione in jura defuncti.

neficium idoneum esse repperis, super quo conscientiam tuam oneramus, eidem dictum beneficium auctoritate apostolica conferas. Putant alii huic alteri formae nomenclaturam fuisse impositam ab aliis bullae initialibus verbis: *dignum arbitramur, et congruum.* Istaec collatio posterioris formae eatenus est conditionalis, ut post repertam personae capacitatem verificata conditione habeatur collatio ab initio valida, et perfecta. retrotrahitur enim ad tempus expeditionis, et licet impedita sit in executione, ea nihilominus tribuit proviso plenum jus ad titulum, non aliter, quam si collatio fuerit in *forma gratiosa.* Contra vero si reperiatur indignus, et non idoneus, collatio evanescit, perinde ac facta non sit, seu potius vim habebit mandati de providendo sub certa conditione, quo impetrans agere dicitur de jure quaerendo, non autem quaesito ex recepta sententia Curiae Romanae (1): istoque casu collatio non promanat immediate a Pontifice, sed potius ab Ordinario executore apostolico, adeout antequam executionem sit adeptus, nullum titulum in beneficio habere impetrans ipse dicatur, illudque resignare interim non possit (2).

XI. Praetereaue *novae provisionis* bullas, ut ajunt, largiri solet Summus Pontifex nedum iis, qui obtinuerint a Cardinalibus vigore indulti beneficia in mensibus apostolicis vacantia, vel aliunde reservata (3): sed etiam ad roborandam, firmandamque priorem collationem vel ab ipsomet formatam, vel ab Ordinario concessam, ut supplicantur defectus, ac sanentur nullitates, quae in anteriori provisione forsitan inciderint.

XII. Quum de pontificiis bullis sanitati restituendis agatis, Pontifex defectus, subscriptiones, et nullitates nominatim per impetrantem exprimendas tollit, ut convalescant priores apostolicae bullae. Ad id Regula XLII. Cancellariae *de supplendis defectibus* disponit, quod *si petatur suppleri in genere, nullatenus litterae desuper concedantur, nisi in petitione hujusmodi defectus exprimantur, vel per fiat ut petatur supplicatio si gnata fuerit* (4).

(1) Quam tradit Card. de Luca *de benefc. disc.* 71. in fine.

(2) Paris. *de resignat. lib.* 3. qu. 1. num. 149.

(3) Ex supradictis cap. 6. num. 17.

(4) Hujus rescripti praerogativa, et vis paulo superius exponitur hoc cap. num. 5.

XIV. At ubi vitiosa Ordinarii collatio sit confirmanda, defectus fere non exprimuntur in specie, sed generatim in pontificiis novae provisionis litteris per hanc generalem clausulam: *cum ex certis causis de viribus primae provisionis Ordinarii haesitetur, defectus omnes supremas potestas pontificia supplet.*

XIV. Verum in utrisque clausula conditionalis adjicitur: *dummodo tempore datae praesentium non sit in eodem beneficio alicui specialiter jus quaesitum.* Propterea haec nova provisio non retrahitur ad datam prioris. Et versa vice nullum eidem priori collationis jus detrahit inquiens: *eidem oratori sine praepjudicio juris ad illud jam aliunde, ut praefertur, quaesiti, sed jus juri addendo, et antiquum conservando, et de illo etiam providere volentes* (1). Huc pertinet Cancellariae Regula XVII. *de non tollendo jus alteri quaesitum.* Ceterum duae collationes unius ejusdemque beneficii in favorem unius personae non debent ambae valere, quoties posterior non faciat mentionem de priori: sed impetrans commodo utriusque carebit, si utraque uti voluerit (2). Secus dicendum, si una tantummodo utatur (3).

XV. Inter species litterarum novae provisionis recensentur itidem apostolicae litterae, quas nuncupant in forma *rationi congruit*. Videlicet ubi per solam supplicationem a Papa defuncto signatam provisiones vacantium beneficiorum factae sint, successor Pontifex sub die coronationis suae mandat suas expediri litteras pro antecedentis gratiae observantia, et executione, quae incipiunt recitatis jam verbis: *rationi congruit, et honestati*, ex Regula X. Cancellariae, quam paullo superius memoravimus (4).

XVI. Consimiles quoque litterae, quas nuncupant *perinde valere*, faciunt ut revalescant gratiae defuncti Pontificis infra annum concessae, ubi dubium sit easdem vitio nullitatis laborare ob subreptionem, aliumque defectum, sine tamen praepjudicio

(1) Formam litterarum novae provisionis videsis apud Rebuffum in *prax. benef. par.* 1. tit. *forma, et declaratio novae provisionis.*

(2) Innoc. III: in *cap. ex tenore* 19. *de rescriptis.*

(3) Idem in *cap. plerumque* 23. *cod. tit.*

(4) Reg. X. *de litteris in forma rationi congruit expediendis*, de qua dictum supra num. 7.

juris cuius alteri interea quaesiti. Nam Cancellariae Regula XII. *omnes, et singulas a Romano Pontifice praedecessore infra annum ante diem ejus obitus concessas gratiae, vel justitiae litteras temporibus debitis earum executoribus, seu iudicibus non praesentatas omnino revalidat, et in statum pristinum, in quo videlicet antea fuerant, vel pro quibus erant obtentae, quoad hoc plenarie restituit* (1). Non praesentatas, ait Regula, quae idcirco ad vitiosas, et invalidas praedecessoris litteras extendi non potest, nova speciatim confirmatione indigentes, neque ad acta quaelibet Sede vacante gesta, quae sunt sub novo Pontifice repetenda ex integro (2).

XVII. Insuper ubi utriusque colligantis titulus, et jus viribus careat, alteruter diligentius obtinere solet gratiam apostolicam vulgo nuncupatam *si neutri*, per quam colligans jus adipiscitur, quod antea non habebat. Quod si ambo eam obtinuerint, prior in tempore potior erit in jure, etiamsi anticipatio in momento consistat, propterea quod ex eodem fonte utraque promanet (3). Cuipiam vero extraneo litigiosum beneficium impetranti gratia *si nulli* conceditur. De his, aliisque id genus impetrationum, et subrogationum gratiis pontificiis plura jam superius dixi, admonens interea, quatenam ipsarum consueverit placitum regium sortiri (4).

XVIII. *Ut nemini in quibuscumque beneficiis ecclesiasticis permittantur* coadjutoriae cum futura successione, decrevit Synodus Tridentina (5). Sacris enim canonibus vetitum est beneficia, antequam vacent, conferri, vel promitti (6). Sed ipsa quum Synodus declaraverit in cunctis de reformatione decretis salvam esse auctoritatem Sedis Apostolicae (7), suo quidem jure usi Pon-

(1) Reg. XII. *de revalidatione litterarum praedecessoris.*

(2) Riganl. in *cit. Reg. XII. num. 33.*

(3) Honor. III. in *cap. capitulum S. Crucis 3o. de rescriptis*, de quo superius dixi *cap. 6. num. 5.*

(4) Vide *cap. 5. de reservat num. 61, 62, et 63.*

(5) Trid. in *cap. cum in beneficiis 7. sess. 25. de ref.* Temporaneos tantum coadjutores Parochis imperitis, vel defectivis dari permittit in *cap. quia illiterati 6. sess. 25. de ref.*

(6) Conc. Lat. III. sub Alex. III. in *cap. nulla 1. de concess. praeb.*

(7) Trid. in *cap. postremo 21. sess. 25. de ref.*

tifices Romani multos creare coadjutores cum futura successione consentientibus plerumque Ordinariis locorum consueverunt.

XIX. Parochialium tamen Ecclesiarum, et beneficiorum cum animarum cura collationem debet omnino praecedere examen in concursu coram examinadoribus synodalibus. Enimvero statuit Tridentina Synodus, *quum parochialis Ecclesiae vacatio . . . quodammodo contigerit* (sive in curia, sive extra illam) *etiam si reservata, vel affecta fuerit generaliter, vel specialiter...* Episcopus statim habita uotitia vacationis Ecclesiae⁽¹⁾, *per edictum publicum* vocabit ad concursum omnes, qui volent examinari: *transacto constituto tempore*, decem puta dierum, omnes, qui ad concursum descripti fuerint, examinabuntur ab Episcopo, vel ejus Vicario generali, atque ab aliis *examinadoribus synodalibus non paucioribus, quam tribus*. Quorum votis, si pares aut singulares fuerint, *accedere possit Episcopus*, vel Vicarius, quibus magis videbitur. Peracto deinde examine *renunciatur*, Synodus ait, *quocumque ab his examinadoribus idonei judicati fuerint aetate, moribus, doctrina, prudentia, et aliis rebus ad vacantem Ecclesiam gubernandam opportunis: ex hisque Episcopus eum eligat, quem ceteris magis idoneum judicaverit, atque, illi, et non alteri collatio Ecclesiae ab eo fiat*, an quem spectabit eum conferre. *Si vero juris patronatus ecclesiastici erit, ac institutio ad Episcopum, et non ad alium pertineat, is, quem patronus digniorem inter probatos ab examinadoribus censuerit, Episcopo praesentabit, ut ab eo instituat*. Cum vero institutio ab alio, quam ab Episcopo erit

(1) Tridentina Synodus in *cap. expedit* 18. *sess. 24. de ref.* in primis decrevit, ut *Episcopus, et qui jus patronatus habet infra decem dies, vel aliud tempus ab Episcopo praescribendum idoneos aliquos clericos ad regendam Ecclesiam coram deputatis examinadoribus nominet. Liberum sit tamen etiam aliis, qui aliquos ad id aptos noverint, eorum nomina deferre, ut possit postea de cujuslibet aetate, moribus, et sufficientia fieri diligens inquisitio. Et si Episcopo, aut Synodo provinciali pro regionis more videbitur magis expedire, per edictum etiam publicum vocentur qui volent examinari*. Primus hic Tridentini decreti articulus exolevit, quum solum usu vigeat episcopale edictum convocans concurrentes ad examen cum termino dierum decem.

facienda, tunc Episcopus solus ex dignis eligat digniorem, quem patronus ei praesentet, ad quem institutio spectat. Quod si jurispatronatus laicorum fuerit, debeat qui a patrono praesentatus erit, ab iisdem deputatis ut supra examinari, et nonnisi idoneus repertus fuerit, admitti: alias collatio, seu institutio tamquam subreptitia nullius momenti erit (1).

XX. Tum S. Pius V. Tridentinam legem hanc declarans, et amplians multa imperavit. 1: ut servetur Tridentina forma concursus. 2: Episcopus parochiam, quae in mense ordinario vacaverit, conferre infra sex menses debeat, alias devolvatur provisio ad Sedem Apostolicam. 3: ut vacante in mense apostolico Ecclesia, teneatur Ordinarius intra quatuor menses, praevio concursu significare Summo Pontifici, vel ejus Datario magis idoneum ex concurrentibus: aliter collatio apostolica fiat sine concursu, Ordinarii. 4: patroni intra legitimum tempus nimirum sex, vel quatuor mensium, praesentare unum, vel plures idoneos teneatur, et praesentatus intra duos inde menses institutionem petere, ac obtinere. 5: Ordinarius nequeat ultra decem alios dies prorogare terminum vel concurrentibus, vel patronis a Tridentino constitutum decem dierum ad nominandos idoneos clericos coram synodalibus examinadoribus. 6: parochiales omnino dignioribus conferantur, alias lecto minus digno posthabitus dignior valeat ab irrationabili iudicio Episcopi, et examinerum appellare ad Metropolitanum, et Sedem Apostolicam, vel si Metropolitanus, aut exemptus fuerit, ad viciniorem Episcopum, tamquam Sedis Apostolicae delegatum: non impedita interim executione praeelectionis ab Ordinario factae, atque per novum examen si constiterit de irrationabili iudicio, collatio revocetur. Quidquid aliter fuerit gestum, denique irritum declaratur, et inane (2).

(1) Necessitas publica videtur legem hanc Tridentinam postulasse. Nam *non est hoc consulere populis, sed nocere, non praestare regimen, sed augere discrimen: integritas enim praesidentium salus est subditorum*, scripsit S. Leo M. *ep. 1.*, alias 87. ad Episcopos Africae. Ad rem hanc videsis *inst. 12.* Lambertini, alias Benedicti XIV, qui necessitatem istam eligendi parochos digniores comprobatur exemplo architecti, cum Guilhelmo Parisiensi.

(2) S. Pius V. in *const. in conferendis 33.* data 15. Kal. April. 1567, quam exscribit St. Quaranta in *sum. bullar. tit. beneficio- rum parochialium collatio.*

XXI. Deinde litteris S. Congregationis Concilii die 10. Ianuarii 1721. de mandato Clementis XI, haec alia in conferendis per concursum parochialibus Ecclesiis praescripta sunt. 1 : ut assignentur eadem omnibus concurrentibus quaestiones, iidem casus, idemque textus Evangelii uno eodemque tempore, iisque certum, et congruum horarum spatium constituatur, intra quod casus resolvant, et quaestionibus respondeant latine, concinuilam vero componant materno, et vulgari sermone. 2 : ut concurrentes omnes in uno conclavi claudantur, in quo data singulis scribendi commoditate, et responsa et sermonem singuli sua manu scribant, et subscribant, e quo egredi, nisi postquam scripta confecerint, ac tradiderint examinadoribus, liceat nemini. 3: scripta responsa, et concinuilas tam Episcopus, vel Vicarius generalis, quam examinatores, et cancellarius concursus subscribant. 4 : collata inde per ejusmodi concursum ei Ecclesia parochiali, qui fuerit magis idoneus, ac dignior iudicatus, nisi intra decem dies a die collationis interponatur appellatio, non admittatur haec amplius tam a mala relatione examinadorum, quam ab irrationabili iudicio Episcopi. 5 : si quis tamen intra decendum appellaverit, acta concursus, vel originalia, vel eorum copia rite collata coram Vicario generali, vel alio per Ordinarium deputato, et subscripta per cancellarium, et examinadores synodales, qui concursus interfuerint, clausa et obsignata, ad iudicem appellationis transmittantur : ex quibus, nisi gravamen quod ad doctrinam liqueat, ad novum examen provocandi facultas frustra postulabitur. Quod vero ad mores, et reliqua, nisi probaverit appellans vel ex iisdem actis, vel aliis documentis non levibus illatum gravamen, frustra persequetur appellationem.

XXIII. Denique nuperis Benedicti XIV. litteris encyclicis, datis die 14. Decembris 1743. (1) clarius methodus conficiendi concursum constituta est sequentibus septem articulis. In primis, statim habita notitia vacationis Ecclesiae ad praescriptum Tridentini idoneus in ea per Episcopum deputetur Vicarius curatus cum congrua fructuum portionis assignatione, onera ipsius Ecclesiae sustenturus, donec ei de rectore provideatur. 2 :

(1) Benedict. XIV. in *const. cum illud* 63. to. 1. Bullarii.

publico evulgetur edicto notitia concursus cito post decem dies celebrandi, eodemque edicto clare admoneantur concurrentes, ut interim in curia episcopali suarum qualitaturn, meriturn, et munerurn probationes, attestations tam judiciales, quam extrajudiciales, aliaque id genus documenta, quae fraude vacent: ac veritate nitantur, exhibeant: alioquin decem lapsis diebus documenta ejusmodi, qualiacumque ea sint, nullatenus recipiantur. 3: eveniente die concursus, a cancellario episcopali singulorum merita, qualitates, et requisita fideliter deprompta ex documentis tempore habili exhibitis, in scriptis summam redigantur, et copia istiusmodi summarii tradatur non solum Episcopo, vel ejus Vicario generali, sed omnibus sigillatim examinatribus ad concursum adscitis, ut ferant quum de scientia, tum de vita, moribus, aliisque dotibus regendae Ecclesiae necessariis iudicium. 4: die praestituta habeatur coram Episcopo, vel Vicario generali. et tribus saltem examinatribus synodalibus concursus, servata tradita forma, totaque rerum in ea gestarum series scriptis diligenter enucleetur. Examinatores ad assequendam certam, et indubiam conjecturam scientiae, postquam diligenter expenderit singulorum peritiam in expiscando oretenus aliquo ecclesiasticae doctrinae capite, vel a sanctis Patribus, vel a sacro Concilio Tridentino, vel a Cathéchismo Romano excerpto, ac pari diligentia libraverint a quolibet scripto datas quaestionibus propositis responsiones, et postquam denique deprehenderint, qua quisque polleat gravitate sententiarum, et elegantia sermonis in conciuncula scripto pariter exarata, et textui Evangelico, vel alteri dato themati accommodata, parem, ni forte majorem solertiam examinatores adhibeant in perscrutandis aliis qualitatibus regimini animarum consentaneis, morum honestatem inquirant, gravitatem, prudentiam, praestita Ecclesiae obsequia, adquisitam in aliis muneribus laudem, aliaque spectabilium virtutum ornamenta, doctrinae arcto foedere consocianda: hisque omnibus conjunctim expensis, inhabiles per sua suffragia rejiciant, et idoneos Episcopo renuncient. 5: absoluto concursu, notulae requisitorum compendiariae comburantur, vel penes acta secreto custodiantur, et nemini ostendantur sine mandato Episcopi. Tum ab ipso Episcopo, cum primum libuerit, eligatur ex adprobatiss dignior, nec illi possessio aliquo appellationis, vel inhibitionis obtentu retardetur. 6: si quem clericorum autem appellare contigerit a mala relatione examinerum, vel ab irrationabili iudicio

Episcopi, coram iudice appellationis acta concursus integra omnino producantur per appellantem, et nisi illis visis, et gravamino comperito sententiam pronuntiandam fore sciat ex probationibus solum ab actis concursus elicitis, tam respectu doctrinae, quam aliorum meritorum, nulloque modo recipiantur quaecumque documenta a concurrentibus exhibita, vel expiscata post diem habiti concursus: hac enim in parte dumtaxat derogatum est memoratis litteris S. Congregationis anni 1721. 7: et ubi parochialis Ecclesia conferatur uni ex adprobatis, quem Episcopus magis idoneum ob aliquam sibimetipsi tantummodo notam causam judicaverit, conquerentibus aliis inter approbatos posthabitis causam eandem iudici appellationis litteris familiaribus significabit inviolabili secreto custodiendam, ad detergendam injustae praelectionis notam, quemadmodum Patres Tridentini praevidere caverunt (1), et protestabitur coram Deo se minime dictum malum bonum, et bonum malum, nec positurum tenebras lucem, et lucem tenebras. Quin si umquam suspecta videbitur fides iudicis appellationis de occulta ejusmodi causa praelectionis secreto servanda, certiore faciat Episcopus sacram Congregationem Concilii, ipsumque Summum Pontificem. Et ubi sententiam iudicio Episcopi conformem iudex appellationis pronuntiaverit: secundae appellationi locus non erit. Sin vero difforem, praelectus ab Episcopo, qui causa cecidit ad alium iudicem appellabit, retenta interim parochialis Ecclesiae possessione.

XXIV. Quoties autem collatio parochiarum, aliorumque beneficiorum cum animarum cura ad Sedem Apostolicam pertineat, iisdem pontificiis litteris Benedicti XIV. constitutum est, ut concursus ab Episcopo sine ullo discrimine reservationum apostolicarum indicatur, nulla ad hunc actum petita venia, vel licentia. Absoluto concursu, si curatum beneficium ratione mensium dumtaxat sit reservatum: Episcopus inter adprobatos eliget magis idoneum, et Datariae significet, nec acta concursus transmittat, nisi a Dataria requirantur. Sin vero beneficia ejusmodi curata ex alio quovis capite, quam mensium apostolicorum, S. Sedi reservata sint: eo casu acta concursus ultro transmittat ad Datariam Episcopus, intereaque absteineat a referendo dignioris iudicio juxta vetustum morem, tametsi familiaribus litteris de-

(1) Trid. sess. 24. *causae omnes 20. de ref. §. praeterea.*

nunciare Datario potest personam magis idoneam, et occulta forsitan impedimenta concurrentium (1).

XXV. Quod patroni ecclesiastici digniorem inter concurrentes ab examinadoribus probatos eligere, eumque praesentare Episcopo, si ad eum pertineat institutio, et ubi alius ab Episcopo jus habeat instituendi, non alium, nisi electum ab ipso Episcopo digniorem praesentare, a Patribus Tridentinis decretum jam videmus. Qua in re dubitanti Archiepiscopo Florentino rescripsit Benedictus XIV, in primis, quod patronus ecclesiasticus omnino teneatur in foro externo eum praesentare ad beneficium curatum, qui inter concurrentes ab examinadoribus coram Episcopo magis idoneus magisque dignus renunciatus erit. 2: quod Episcopus, ad quem institutio pertineat, patroni praesentantis iudicium de magis idoneo et digniori sequi tunc debeat, ubi ceteri concurrentium adqueverint, eorumque nemo reclamaverit: at aliquo ipsorum reclamante Episcopus partes iudicis tunc sumpturus inquirat, rectum ne sit patroni iudicium. 3: quod appellatio posthabiti concurrentis non suspendat institutionem ejus, quem patronus simul et Episcopus digniorem judicaverint: eam vero suspendat, si Episcopi sententia ab ea patroni discordet, usque ad exitum iudicii adpellationis. (2).

XXVI. *Si adeo exigui redditus, ait Tridentinum, dictae parochiali fuerint, ut totius hujus examinationis operam non fuerant, aut nemo sit, qui se examini quaerat subijcere, aut ob apertas factiones, seu subsidia, quae in aliquibus locis reperiuntur, facile graviores rixae, ac tumultus possint excitari: poterit Ordinarius, si pro sua conscientia cum deputatorum consilio ita expedire arbitrabitur, hac forma omissa, privatum aliud examen ceteris tamen ut supra servatis adhibere.* Licebit etiam synodo provinciali, si qua in supradictis circa examinationis formam addenda, remittendaque esse consuerit, providere (3).

(1) Haecenus ex *cit. const.* Benedicti XIV.

(2) Bened. XIV. in *const. redditae nobis* 4. die 9. Aug. 1746, to. 2. Bullarii.

(3) Trid. in fine *cit. cap.* 18. *sess.* 23. *de ref.* Hoc episcopale arbitrium remittendi concursus in parochiis tenuissimis agnovit Rota pnes Piton. *de contr. patr. post alleg.* 5. num. 32.

XXVII. In multis casibus parochiales Ecclesiae conferri sine concursu, et omissa examinis forma solemniori, scilicet in resignationibus ad favorem, et permutationibus, et devolutionibus, tradit Fagnanus (1). Quandoquidem quoties Ecclesia parochialis ad favorem certae personae in manibus Summi Pontificis resignaretur, consuevit Apostolica Sedes eam resignatario conferre in forma *dignum* sub conditione. si idoneus ab Episcopo reperiatur in examine coram synodalibus examinаторibus habendo: quum in resignationibus ejusmodi conditionalibus, quae vacationem Ecclesiae interea non inducunt, nequeat Episcopus concursum indicere.

XXVIII. Ad regiam vero collationem pertinentia beneficia, quibus adnexa cura animarum est, jamdiu consuevit Rex donare, seu conferre uni ex tribus regulariter per Capellanum Majorem praevio saepe concursu adprobatis, et propositis. Ei collationis gratia regio primum rescripto conceditur, dein diploma rite expeditur obsignatum sigillo regio in cera rubra impresso, eoque in theca cypria, quae funiculo colligata pendet, incluso.

XXIX. Canonici Theologi, et Poenitentarii praebendae, ut dignissimis omnium conferantur praevio concursu, et examine instar parochialium Ecclesiarum, decrevit Concilium IV. Mediolanensi (2). Synodus enim Tridentina decrevit neminem ad Canonici Theologi officium, et Sacrae Scripturae lectionem tam publice, quam privatim esse admittendum, nisi ab Episcopo loci antea examinatum, et adprobatum (3). Simul et Poenitentarii officium, et praebendam ei dumtaxat conferendam, idque in superiori capite jam praemonui, qui *magister sit, vel doctor, vel licentiatuſ in theologia, vel jure canonico, et aetatem habeat annorum quadraginta, vel alias qui aptior pro loci qualitate reperiatur episcopali judicio* (4). Cujusmodi constitutionibus ne fraus fieret, Benedictus XIII. jure merito sanxit, ambo praebendas, et officia Canonicoꝝ theologi, ac poenitentarii nunciis praevio concursu conferenda dignioribus,

(1) Fagnan. in *cap. mandato de simonia* num. 51. to. 5.

(2) Conc. IV. Mediol. an. 1579. *cap. 5.* apud Thomassin. *par. 2. lib. 1. cap. 32 num. 11.*

(3) Trid. in *cap. eadem* 1. sess. 5. de *ref.*

(4) Trid. in *cap. apostolus* 8. sess. 24. de *ref.*

et examen concurrentium fieri coram Episcopo, et *quatuor* saltem *examinatoribus*, etiamsi synodales non sint, ab eodem Episcopo actu deputandis, sive *saecularibus*, sive *regularibus*, in *theologica facultate licentiat*is, et *valde peritis*: ut collatio inde fiat magis idoneo, quem examinatores iidem probaverint, in mensibus ordinariis ab ipso Episcopo dioecesano, in mensibus autem reservatis ab Apostolica Sede, ad quam omnia concursus acta transmitti tunc oportet (1).

XXX. Appellandi, et reclamandi facultatem concurrentibus ad curata beneficia, et praebendas theologi, et poenitentiarii, quae per concursum conferri dignioribus oportet, utique dant jura haecenus exposita: nullam vero expetentibus beneficia simplicia liberae collationis. Querelae in dies multae quidem obstrepunt eorum, qui ecclesiastica beneficia liberae collationis ambiunt, et frustra a collatoribus Episcopis, vel ab Apostolica Sede postulant, easque non raro ad Regem recurrentes deferunt, qui sese per injuriam aliis ea impetrantibus posthabitos lamentantur. Sed liberum haecenus arbitrium ea in re Episcopis esse non deminuendum, nullaue vi cogendum, censuerunt pro Rege Nostro pupillo Ferdinando IV. Domini Regentes, ad regium Brundusii Gubernatorem rescribentes per Secretariam rerum ecclesiasticarum die 23. Januarii 1762.

XXXI. Quum nequeant beneficia antequam vacent, cuius conferri, aut promitti (2): irrita collatio erit, quam Ordinarius, vel Papa fecerit cujuslibet beneficii non vacantis, etiamsi post eam vacatio statim subsequatur. Ad vitandas hac in re fraudes, Cancellariae Regula XLVII. plane jubet: *quod si petatur ali-quod beneficium vacans per modum in Cancellaria apostolica exprimendum, talis impetratio non valeat, nec litterae desuper expediantur*. Et Bonifacius VIII. declaravit litteras apostolicas eum mandato de providendo ei, qui narraret beneficium ex resignatione vacare, non suffragaturas si possessor antequam resiguet, mortem obiverit (3): quum expressum

(1) Bened. XIII. in *const. pastoralis*, quam habet Romanum ejusdem Pontificis Concilium in *append. num. 2.*

(2) Ex canone Conc. Later. III. in *cap. nulla 2. de concess. praeb.*

(3) Bonif. VIII. in *cap. susceptum 6. de rescriptis in VI.*

unus vacationis modus alium non complectatur. Ut valeat igitur impetratio, et collatio, exprimendus est certus vacationis modus, puta per obitum, vel resignationem, vel privationem, vel professionem regularem, vel matrimonium ultimi possessoris proprio etiam nomine, et cognomine designandi (1). Addit Regula XLVI. quod *non dentur litterae super beneficiis vacaturis per ingressum religionis, nisi professio praecesserit datam desuper petitionis*. Quoties autem secula vacatio revera sit ante impetrationem, ne gratia Pontificis corruat ex certo vacationis modo per errorem fortasse narrato, adjici apostolicis litteris clausulae solent: *sive praemisso, sive alio quovis modo: vel alterius cujuscumque personae obitum, resignationem etc. etiamsi devolutum existat* (2).

XXXII. *Ut ecclesiastica beneficia sine diminutione conferantur*, regula juris est (3). Prohibuit sane Concilium Lateranense III, Abbatibus, Episcopis, aliisque Praelatis, *ne partem reddituum Ecclesiarum suis usibus appropriare praesumant: sed libertatem, quam sibi majores conservare desiderant, minoribus suis bona voluntate conservent* (4). Consuetum solummodo jus cathedraticum possunt sibi Episcopi collatores re-

(1) Rigant. in *Reg. XLVII. num. 7. et seq. tom. 3.*

(2) Eas explicat Rigant. *loc. cit. num. 32. et seq.* Videsis dicenda inferius *cap. 12. num. 14.*

(3) Eamque tradit rubrica 12. *lib. 3. Decretal.* hisce verbis concepta. Innocentius II. in Synodo Romana constituit, ut unus quisque *libere, et absque diminutione aliqua collata sibi dignitate, atque beneficio perfruatur, can. si quis praebendas 15, et ult. C. 1. qu. 3.* Alexander III. in Conc. Turonensi *cap. majoribus 8. de praeb.* indecorum nimis esse dixit, *ut minorum clericorum praebendae patiantur affectionem.* Idipsum rescripsere Innocentius III. in *cap. vacante 26,* et Gregorius IX. in *cap. cum. causam 36. de praeb.*

(4) Conc. Later. III. sub Alex. III. in *cap. prohibemus 7. de censibus.* Idque firmavit Innoc. III. in *cap. un. ut eccles. benef. sine diminut. conf.* rescribens Mediolanensi Archiepiscopo in Lateranensi Concilio prohibitum: *ne quis conferendo ecclesiasticum beneficium partem proventuum suis usibus retinere praesumat.*

servare (1): quod duos solidos, duos videlicet ducatos Regni nequit excedere (2). Pro bono pacis autem Episcopus potest auctoritate ordinaria, et iudex etiam compromissarius alteri ex duobus electis, aut praesentatis beneficium adjudicare, alteri pensionem annuam super ejus fructibus reservare ad vitam collitigantis beneficiarii dumtaxat, quam subire successor beneficiarius non tenetur (3). Ceterum pensiones perpetuas imponendi super ecclesiasticis beneficiis jus habet suprema tantum Romani Pontificis potestas.

XXXIII. Ad voluntariam jurisdictionem quum pertineat collatio beneficiorum, eam ubilibet etiam extra dioecesim ab Episcopis recte fieri, consentiunt doctores (4). Nam Innocentius III. probavit, quod Eboracensis Archiepiscopus, dum in partibus cismarinis extra proviuciam suam ageret, archidiaconalum Richemundiae contulisset (5). Leges enim ut proconsolibus (6), ita Episcopis, tamquam ordinariis locorum indulgent, suam ut jurisdi-

(1) Urbanus II. in Conc. Alverniae *can. quaesitum* 4. *C. 1. qu. 3, salvo*, ait, *Episcoporum censu annuo, quem ex eisdem altaribus habere soliti sunt.*

(2) Ex Conc. Bracarensi II. an. 572. in *can. placuit* 1. Pelag. II. in *can. illud C. 10. qu. 3*, Ivone Carnotensi *par. 3. cap. 136.* Honor. III. in *cap. conquerede* 16. *de offic. ordin.*

(3) Ex decretali epistola Innocentii III. in *cap. nisi essent* 22. *de praebendis*, quam fusius explicat Fagnanus. Pariter Alexander III. in *cap. cum venissent* 9. *de restit. spoliat.* non improbat, quod Canonici auctoritate Archiepiscopi annuam pensionem vivente clerico beneficiario perceperunt super Ecclesia ei collata. Idemque rescripsit Carnotensi Episcopo in *cap. de cetero* 5. *de transact.* quod census ejusmodi, seu pensio *vitam ejus, qui solverit, non excedit.*

(4) Cum gl. in *cap. novit ille* 7. *de offic. legati* verb. *terminos*, Rigant. in *Reg. 2. Canc. §. 3. num. 103.*

(5) Innocentius III. in *cap. post electionem* 7. *de concess. praeb.* In textu quidem vulgato desideratur haec clausula intercisae: *Archiepiscopo in partibus cismarinis agenti*: sed eam supplet Gonzalez ex Antonio Augustino.

(6) *Omnes proconsules statim ac Urbem egressi fuerint, habent jurisdictionem, non contentiosam, sed voluntariam*, ait Marcianus in *l. omnes. 2 D. de offic. procons.*

ctionem voluntariam exercere extra dioecesim valeant, secus contentiosam.

§. un. *De optione canonica.*

XXXIV. Optio canonica vicens alicubi ex lege foundationis, vel statuto, vel privilegio, vel consuetudine, sed non jure communi (1) vim habet impediendi, vel transferendi liberas Ordinariorum collationes in dignitatibus, praebendis, et canonicatibus Cathedralium, et Collegiorum: quoties nimirum velint, ubi mos est, Canonici antiquiores possessione non aetate gradatim praebendas, dignitatesque majores Apostolicae Sedi non reservatas, quae vacaverint, praeoccupare, alia, quam habebant, dimissa, suamque optandi voluntatem infra viginti dies a notitia vacationis decurrendos aperuerint (2). Unicum vero id spatium XX. dierum quum simul

(1) In canonicis quidem electionibus, ut seniores junioribus, antiqui novis, docti rudibus praeferantur, sacri canones jubent. Coelestinus I. ad Episc. Apuliae, et Calabriae rescribens: *quid proderit*, ait, *per singula clericos stipendia militasse, si hi qui praefuturi sunt, ex laicis requirentur? qui saltu praepropero sic alienum honorem ambiunt immoderata cupiditate transcendere?* can. *quid proderit* 7. dist. 61. S. Leo valde iniquum, et absurdum esse scripsit: *ut imperiti magistris, novi antiquis, et rudes praeferantur emeritis*, can. *statuimus* 8. ead. dist. 61. Gelasius in can. *ordinationes* 7. dist. 73 ad Episcopos Lucaniae rescripsit, *ne cujuslibet utilitatis causa, seu Presbyterum, seu diaconum his praeferrent, qui ante ipsos fuerint ordinati*. Concilium Agathense in can. *Episcoporum* 4. dist. 74. decrevit, ne quis Episcoporum posteriorem priori praeponat: nisi ob superbiam hujus, et simpliciorum illius naturam praeponendum aliquem elegerit Episcopus. Majora inde merita virtutum, et morum, et scientiae in causa fuisse, ut suo Episcopi arbitrio in liberis collationibus officiorum, et praebendarum juniores plerumque senioribus praeferrent.

(2) Naturae legemque optionis canonicae peculiarem edixit primus omnium Bonifacius VIII. in cap. *cum in tua* 4. et ult. de consuetudine in VI. Cum in tua Ecclesia, inquit, in qua consuetudo habetur, quod antiquiores canonici gradatim meliores, si voluerint, possint cum vacant per se, vel per alios optare praebendas non obstante mandato apostolico de providendo alicui de praebenda primo vacatura, poterunt ipsi antiquiores juxta consuetudinem optare, cum praebenda vacabit, et illa, quae optata non

omnibus detur, illud semel dilabatur tam primo negligentī, aliis posterioribus optandi jus habentibus (1). Si vacantem optaverit nemo, eam ipsam tunc Episcopus post viginti dies elapsos, vel post repudiatam (2) optionem probe conferet arbitrato suo: aliter conferret aliam ab optante vel uno, vel inter plures postremo dimissam, quae ipso jure ipsoque facto per optionem vacabit (3).

XXXV. S. R. E. Cardinales in primis privilegio fruuntur optandi collegii sui titulos, Episcopatus suburbicarios, et decanatum, ex quo Alexander V. in Concilio Pisano electus an. 1409. pro ea temporis conditione indulsit Cardinalibus utriusque obedientiae Romanae, et Avenionensis unos eosdemque titulos adeptis optare vacantes, ut alteros dimitterent (4). Id quod a subsecutis

fuerit (si nulli sit debita) erit illi, pro quo scripsimus, conferenda. In praebendis vero apud Sedem Apostolicam vacantibus. cum de ipsis per Romanum Pontificem ordinatur, locus praedictae consuetudini non existit. Ne autem pretextu ejusdem consuetudinis provisiones auctoritate apostolica faciendae ultra debitum differantur: statuimus, ut executores super ipsis provisionibus deputati optare volentes per viginti dies dumtaxat expectent, quibus elapsis, libere in non optatis ad exequenda tibi mandata procedant, praefata consuetudine non obstante.

(1) DD. communiter apud Monet. *de optione cap. 4. qu. 3. num. 11, et seq.* Nisi peculiare statutum, vel privilegium alicui Ecclesiae aliud spatium temporis vel longius, vel brevius indulerit

(2) Innocentius IV. in *cap. quia cunctis. 1. de concess. praeb. in VI.* rescripsit, quod post apostolicum de providendo mandatum, ut cuidam D. praebenda, vel dignitas sine cura, quam ipse duceret acceptandam, in Ecclesiae Carnotensi conferretur, Episcopus ejusmodi mandati non ignarus praeposituram deinde vacantem conferre non potuit, nisi antea ipsum D. requisivisset, an vellet eandem acceptare: quum legata cuipiam electione, vel optione unus ex servis hereditariis irritam quoque leges habeant manumissionem servi, antequam legatarius unum elegerit, vel optaverit, ab haerede factam.

(3) *Cit. cap. ult. de consuet. in VI.*

(4) Ex traditis ab Onuphrio Panvinio *de septem Urb. Eccles. cap. 3.* in fine, Pagio in *breviario gestor. Roman. Pontif. in vita Alex. V. tom. 2.* Spondano an. 1410, ceteris. Sunt nihilominus, qui initium ejusmodi optionis sumunt a Martino V: in his Flavius Cherubinus *ad Xisti V. const. 55. schol. 2. et Mersil. de Eccles. reddit. par. 1 cap. 12.*

Tom. II.

Pontificibus firmatum, moderatumque alibi jam diximus (1). In militari eitam religione equitum Melitensium S. Io. Hieros. vigere consuetudinem, ut equites antiquiores ante alios in ea recepti, et professi commendas Ordinis pinguiore in singulis vacationibus optent gradatim, res est exploratissima (2). Hoc in Regno Canonicis Cathedralis Ecclesiae Salernitanae optandi jus esse, rerum usus me docuit (3). Alexander VII. Canonicis Cathedralis Messanae die 18. Junii 1659. ex gratia speciali quidem indulsit, ut in futuris vacationibus canonicalium, et praebendarum illius Ecclesiae ex quavis causa etiam ratione mensium Sedi Apostolicae reservatorum fiant optiones a Canonicis, prout hactenus servatum fuit: dimittendas vero tunc ab optantibus Apostolica Sedes conferat (4).

XXXVI. In praebendis *apud Sedem Apostolicam* vacantibus nullum esse optioni locum, Bonifacius VIII. plane jam edixit. Regula IX. Cancellariae de reservatione mensium aperte abrogans *consuetudines etiam immemorabiles optandi majores et pinguiore praebendas* juxta clausulam, quam Sixtus V. suis primum Regulis addidit, efficit, ut optio sileat in vacationibus, quae in mensibus reservatis contingunt, ad liberam collationem vel Sedis Apostolicae, vel Cardinalis Episcopi vigore indulti pertinentibus. At optio ut revirescit in sex mensibus ab Episcopo residente alternatis cum Romano Pontifice, ita ob Episcopi absentiam, si quis mensium alternorum mobilium rediverit ad apostolicam reservationem, et ipsa tunc simul reservationi succumbet (5). Cumque per Regulam XV. revocentur generatim facultates *quibusvis personis jure, vel consuetudine concessae* conferendi beneficia reservata, vel affecta, quae amotis reservationibus *ad eorum collationem, provisionem, praesentationem, electionem*

(1) Instit. Canon. lib. 1. tit. 13. de Cardinal. num 6. Videsis Rigant. in Reg. VIII. Canc. §. 2.

(2) Ex Rota dec. 578. par. 1. rec. et. alibi.

(3) De eo jure actum in Rota in Salernitana Canonicatus 1. Martij 1734. coram Crescentio.

(4) Apud Rigant. in par. 1. Reg. IX. §. 5. num. 39.

(5) Io. Petr. Moneta de opt. canon. cap. 3. qu. 3. num. 55. et seq.

nem, et quamvis aliam dispositionem communiter vel divisim spectarent: Doctores inde consentiunt ex rebus in Romana Curia saepe judicatis, quod canonicam quoque optionem haec ipsa Regula complectatur velut speciem dispositionis, et electionis, ideoque optare praebendas quomodolibet reservatas, et affectas licere nemini (1). Vix indultum in foundationis limine optionem excipit Rigantius (2). Ne cui autem veniat in dubium optio in in praebendis quibuscumque reservatis vetita: Sedes Apostolica dum reservatas ejusmodi praebendas confert, de stylo Datariae consuevit in apostolicis etiam litteris speciatim derogare cuilibet statuto, et consuetudini optandi (3).

XXXVII. Excludunt praeterea optionem *resignatio* in favorem certae personae (4), *permutatio* mutuam inter ipsos permittentes resignationem continens (5), *concursum* ad praebendam theologalem, et poenitentialem, et curas animarum Tridentina lege, et constitutionibus apostolicis imperatus (6), *jus nominandi*, aut praesentandi, aut eligendi reservatum patronis quum laicis, tum ecclesiasticis (7). Nulla enim ratio patitur, quod optionis privilegium, quo ordinarii collatoris dumtaxat arbitrium refrenatur, legitimam cujusque libertatem resignandi, permutandique beneficia sua, aut in concursu ad animarum curas, officiaque theologi, et poenitentarii majorem exerendi virtutem, aut patronatum exercendi, publico, et communi jure concessam (8).

(1) Id quod assatim probat Rigantius in comm. ejusdem Reg. XV.

(2) Ibidem num. 56.

(3) Idem in par. 1. Reg. IX. §. 5. num. 24.

(4) Gonzalez in Reg. VIII. gl. 34. num. 35, post Rotam, et Parisium de resign. lib. 2. qu. 20.

(5) Moneta de optione cap. 3. qu. 5. num. 124. Nam ubi permutatio fiat secundum juris formam, beneficia invicem resignata non alii debent, nisi permutantes ipsi obtinere, qui alias minime resignassent, excluso etiam eo, qui jus haberet obtinendi beneficium primo vacaturum, et Bonifacio VIII. in cap. un. de rer. permut. in VI.

(6) S. Congr. Conc. apud Hier. Gonzalez loc. cit. num. 78. ad. 83.

(7) Moneta loc. cit. num. 112.

(8) Non debet alteri per alterum iniqua conditio inferri, ex Papiniano in l. non debet 74. D. de reg. jur.

Et versa vice nec poenitentiarius, nec theologus jus habent optandi alias praebendas, quum suas alii nequant optare (1). Idipsum de Canonico ad praesentationem patronorum instituto judicandum erit: nisi consuetudo specialim ei quoque optionem indulserit.

XXXVIII. Sed licebit Canonico antiquiori praebendam suam annua pensione onerata junioribus relinquere, alteramque vacantem optare immunem, et pinguiorem, ubi titulus nimirum optione mutatur, nisi pensionem cum fraude acceptasset, conscius vacationis cito futurae ex decumbentibus, puta canonicis graviter infirmis (2). Qui enim suo utitur jure, nemini facit injuriam (3). *Et rationi congruit, ut succedat in onere, qui substituitur in honore* (4).

XXXIX. Coadjutori cum futura successione jus optandi non esse inde colligitur, quia is unam cum coadjuto personam in collegio repraesentans nequit optantium gradus praevertere, nec numerum augere cum aliorum praejudicio. Coadjutus vero Canonicus tunc poterit aliam optare praebendam, ubi indulta coadjutori successio sit ad ordinariam dumtaxat praebendam optioni non subjectam: secus erit, si ad praebendam simul optabilem extensa ea sit (5).

XL. Collationem, seu investituram Episcopi, aliusve ordinarii non requiri in optionibus canonicis Rota saepe definivit ex communi Doctorum sententia (6). Nam ex textu Bonifacii VIII, alia quum sit *canonicorum receptio*, alia *praebendarum collatio*, et utraque facienda vel vocatis absentibus Canonicis, vel

(1) Sicuti S. Congr. declaravit apud Gonzalez *loc. cit. num. 79, et 18.*

(2) Gonzalez in Reg. VIII. *gl. 34. num. 43.* ex Rota coram Puteo lib. 3 dec. 155.

(3) Innoc. III. in *cap. cum Ecclesia 31. de elect.*

(4) Bonif. VIII. in *cap. rationi 77. de reg. jur. in VI.*

(5) Gonzalez *loc. cit. num. 97, et seq.* Hoc autem in Regno sublatis jam coadjutoribus cum futura successione, ex antedictis *num. 18.* nullus erit hujus distinctionis usus.

(6) Cassador. *dec. 7. de praeb. et alibi*, DD. apud Monet. *loc. cit. cap. 5. qu. 3. cum 32.*

non, juxta Ecclesiae consuetudinem (1): probe colligitur Canonico-
rum receptionem ex optandi consuetudine fieri sine ritu col-
lationis. Et ubi optio consueverit ab ipso Capitulo, vel ab eo, qui
Capitulo praesidet, admitti: admissionem ejusmodi tunc colla-
tionis, seu institutionis vicem supplere censuit Rota (2).

XLJ. Ad formam optionis explendam itaque sufficiet, quod in
Capitulo, seu Collegio Canonicorum rite congregato, et coram di-
gnitatibus, et Canonicis vel majorem partem conflantibus consti-
tuti antiquiores gradatim unus post alium per semetipsos, aut
per idoneos procuratores declarent palam sese illam optare prae-
bendam ab eo die vacantem per obitum illius ultimi possessoris,
vel renunciationem ejus liberam, vel alium quemlibet modum,
suamque ab se hactenus possessam dimittere junioribus optan-
dam, vel vacuam arbitrio Episcopi, aliusve collatoris ordinarii
concedendam: salvo sibi ad hanc ipsam regressu, quoties optio
ista suum fortassis non sortiatur effectum (3). Ubi accesserit ad
id continuo consensus Capituli, et praesidentis capitularis appro-
batio: in capitularium actorum codice tum perfecta optio descri-
bitur, atque in possessionem quisque optatae sedis, ac praeben-
dae immittitur more consueto. Si vero quis contradixerit, aut re-
clamaverit, quaestio ad forum competens deferenda tunc est (4).

XLII. Duplex autem genus optionis distinguere oportet: nimi-
rum altero novus titulus novae praebendae acquiritur, seu spi-
rituale jus adhaerens officio, et beneficio ecclesiastico, altero

(1) Bonif. VIII, in *cap. cum Ecclesiis* 83. *de praeib. in VI.* Ubi
glossa ad marginem adnotat, quod sola receptio non inducat col-
lationem.

(2) Rota coram Puleo *dec. 125. lib. 3. Achill. dec. 4. de praeib.*
Covarr. *lib. 3. var. cap. 16. num. 10.* Gonzalez. *loc. cit. num. 70.*

(3) Formam instrumenti, quo solet notarius factam optionem de-
scribere, habet Moneta *cit. cap. 5. num. 40.*

(4) Abbas *cons. 159. vol. 1.* tenet necessarium non esse Capi-
tuli consensum, sed sufficere quod optionis instrumentum Capitu-
lo denuncietur intra 30. dies. Addunt Rebuffus, et Covarruvius apud
Monetam *loc. cit. num. 37.* et Caldarinus *cons. 7. de consuetud.*
apud Gonzalez in *Reg. VIII. gl. 34. num. 54.* optanti licere va-
cuam possessionem optatae praebendae, rerumque ei adnexarum
adprehendere auctoritate propria. Sed hisce in rebus mos cujus-
que loci servandus est.

antiquus titulus non commutatur, nec dimittitur, sed retinetur cum novis optatis accessionibus rerum temporalium, et fructuum pinguiorum (1). Quoties vero alterutrum optionis genus in dubio sit, Rota censuit non mutari titulum (2). Alterum enim ab altero maxime diversos parit effectus. Horum praecipuus est, quod in primo genere optionis titulum mutantis omnia onera dimissae praebendae, praesertim pensio annua super ejus fructibus imposita, in successorem transeant, qui hanc inde, vel optione posteriori, vel collatione obtinuerit: in secundo autem genere, quo titulus non mutatur, onera cuncta, pensionem quoque secum ferat, qui ad aliam transiit sine novo titulo praebendam (3). Hac ipsa discriminis ratione fit, ut aliquo familiarium Papae, vel Cardinalis novam optante praebendam cum mutatione tituli, reservatio maneat infixae praebendae, quam dimiserit, successoremque afficiat: sed titulo per optionem non mutato, nova praebenda in reservationem cadat, uti subrogata in locum praebendae dimissae, quae libertatem a reservatione acquirit (4).

XLIII. Aliam optionis canonicae speciem in beneficiis incompatibilibus jus decretalium exhibet. Alexander III. enim rescripsit, quod duas habens Ecclesias, unam, *quam voluerit*, sibi retineret, alteram loci Ordinarius alii conferret (5). Et rursus, quod Archidiaconum in duabus Ecclesiis Burdegalensi, et Tolosana constitutum Archiepiscopus Burdegalensis *altero, quem maluerit, archidiaconatu* faceret esse contentum (6). Innocentius III. in Concilio Lateranensi IV. tale arbitrium optandi, seu eligendi alterum ex beneficiis vel curam animarum, vel residentiam adnexam haben-

(1) Gonzalez *loc. cit.* num. 61, et seq. Passerin. in *cap. cum in tua* 4. de *consuet.* num. 111, et seq. Rota *dec.* 626. coram Remboldo, et *dec.* 286. coram Merlino.

(2) Rota *dec.* 391. num. 8. *par.* 19. *rec.*

(3) Rota coram Blanchetto in *Cordubensi pensionis* 30. Aprilis 1593. coram Mohedano *dec.* 1. , 2, et 30. de *renunciat.* et alibi, Gigas, de *pension. qu.* 63. Paris. de *resignat.* lib. 1. *qu.* 8., Gonzalez *loc. cit.* num. 45. et seq.

(4) Rigant. in *Reg. IV.* §. 5. num. 159, post Zabarell. Passerin. Garz., et Rotam.

(5) Alex III. in *cap. referente* 7. de *praebendis.*

(6) Idem in *cap. praeterea* 14. *cod. tit.*

tibus ademit, statuens: ut *quicumque receperit aliquod beneficium curam habens animarum adnexam, si prius tale beneficium habebat, eo sit ipso jure privatus: et si forte illud retinere contenderit, etiam alio spoliatur. . . Hoc idem in personatibus esse observandum: addens ut in eadem Ecclesia nullus plures dignitates aut personatus habere praesumat, etiam si curam non habeant animarum* (1). Idipsum placuit Ioanni XXII. (2). Hanc denique Innocentii III. sanctionem firmavit etiam Synodus Tridentina (3). Abrogalam hinc penitus optionem alterutrius incompatibilis vident omnes, quae nullum idcirco locum habet. In Gallia tamen eam vigere adhuc, et cuilibet adepto secundum beneficium incompatible dari annum, et diem ad optandum, et eligendum, quod sibi retinere maluerit, Doctores tradunt (4).

CAP. XI.

DE COMMENDA

- I. Ad custodiam, vel depositum datur per commendam Ecclesiae administratio, vel cura.*
- II. Antiqui mores, et canones commendari ad tempus Ecclesias, et monasteria permittebant.*
- III. Episcopis praesertim vagantibus bellorum tempore, atque ad reformandos regularium mores unam in titulum, aliam commendatam dari olim consuevit.*
- IV. Nono saeculo commendare quoque laicis Ecclesias, et monasteria orsi sunt Galliarum Reges.*
- V. Id commonitionibus, et censuris Pontifices, et Patres emendare studuerunt.*
- VI. Commendas plurimas ab seipso largitas Clemens V. non sine caussa revocavit, alias a praedecessoribus concessas tum resciderunt Benedictus XII, et Clemens VI.*

(1) Innoc. III. in cap. de multa 28. cod. tit.

(2) Io. XXII. in extravag. execrabilis 4. de praeb. §. qui vero deinceps.

(3) Trid. in cap. quicumque 4. sess. 7. de ref. et cap. cum dignitates 12. sess. 24.

(4) Frau. le Roye lib. 2. instit. canon. cap. 16., et Wan-Espen par. 2. tit 20. cap. 4. num. 11., et seq.

- VII. Concilium Constantiense vetuit, et monasteria ultra decem religiosos continentia, et majores dignitates, et parochiales commendari.*
- VIII. Sed in Gallia commendae monasteriorum plus invaluerunt.*
- IX. Leo X. in Conc. Later. V. in consuetis abbatiarum commendis mensam conventualem ab ea commendatarium primus distinxit, et separandam jussit.*
- X. Clemens VII. Regi Galliae firmavit consuetudinem nominandi clericos saeculares ad regularium commendas.*
- XI. Tridentina Synodus monasteria, quae suam habent familiam regularem, et capita ordinum non commendari mavult.*
- XII. Sed religioso conventu destituta reliquit arbitrio Papae.*
- XIII. Si quid collationi in titulum obstat, potius commendam indulgere, quam aliam dispensationem consuevit Sedes Apostolica.*
- XIV. Commenda enim non mutat, sed conservat propriam vel beneficii saecularis, vel monasterii naturam: hinc mobiles ad nutum Abbatis Commendatarii collationes beneficiorum S. Antonii Viennensi hoc in Regno.*
- XV. Commendarum aliae ad vitam perpetuo, aliae ad tempus conceduntur.*
- XVI. Commendatarii Abbates nunc iisdem titularium juribus, et praerogativis fruuntur.*
- XVII. In Gallia coguntur commendatarii sacros ordines intra annum suscipere, et munia titularium, quoad fieri potest, obire.*
- XVIII. In Italia neque ad sacros ordines, nec ad residentiam obligantur: nisi curam animarum debeant ipsimet exercere.*
- XIX. Temporaneis parochialium commendas ad sex menses olim poterant Episcopi, et Capitulum Sede vacante: hodie secus post legem Tridentinam.*
- XX. Et perpetuas igitur, et temporaneas commendas Papa solus concedendi jus habet.*
- XXI. Tum aliquis Cardinalium, Praelatusve insignis, cui Papa indultum commendandi speciatim dederit, variis eonditionibus limitari solitum.*
- XXII. Nec beneficia regiae vel nominationis, vel collationis commendare licet sine indulto speciali Sedis Apostolicae.*
- XXIII. Cancellariae Regula XLIII. jubet expressam in signaturae gratiae mentionem commendas.*
- XXIV. Forma commendae jam consueta liberum usumfructum commendatario, instar titularis, largitur.*
- XXV. Sed nova commenda cujuslibet monasterii non concedi-*

tur, nisi cum decreto restaurandi aedificia, alienata bona recuperandi, et redeundi posthaec ad primaeuam tituli regularis naturam.

XXVI. *Abusus commendarum vitio non legis novae disciplinae, sed hominum irrumpentes usus earum legitimo, et proficuo nil detrudere valent.*

XXVII. *Hoc in Regno abbatiam S. Antonii Viennensis Papa commendare in perpetuum solet Archiepiscopo Neapolitano, ei dimittens collationem beneficiorum sub eodem titulo in toto Regno, exclusis tum apostolicis reservationibus, tum locorum Ordinariis.*

XXVIII. *Commendae regulares equitum Melitensium jure speciali a M. Magistro Ordinis conferuntur professis antiquioribus cujusque Nationis.*

I. Sub collatione commenda quandoque continetur (1). In commendam dare Ecclesiam idem sonat, quod eam custodire, seu depositi causa committere alicui administrandam, donec de idoneo rectore provideatur, adeout commendatarius pro *depositario*, vel *administratore*, vel *curatore*, vel *custode* habeatur (2).

II. Usus commendandi Ecclesias, et Cathedrales, et parochiales, et regulares clericis etiam saecularibus, vetustissimus est. S. Athanasius Alexandrinus commendatam sibi aliam Ecclesiam scribit (3). S. Ambrosius presbytero commendavit vacantem Ecclesiam Episcopalem ad forum Cornelii, donec ordinaretur Episcopus. Pelagius I., et S. Gregorius M. visitationem simul, et curam vacantium Ecclesiarum praesertim Catanensis, Panormitanae, Aprutinae commendarunt Episcopis vicinioribus (4). Ad monasteria quod attinet, saeculo VI. Concilium Aurelianense III.

(1) Scribit Rebuff. in *prax. benefic. ad Reg. Cano. de public. resignat. gl.* 16.

(2) *Commendare nihil aliud est, quam deponere*, docet Ulpianus in *l. commendare* 186. *D. de verb. sign.*

(3) Apud Nicephor. *hist. eccl. lib. 11.* S. Ambrosius *ep. 44.* *Commendo tibi fili, ait, Ecclesiam, quae est ad forum Cornelii, quo eam de proximo intervisas frequentius, donec et ordinetur Episcopus.* Simplicius Papa *ep. 9.* curam Ecclesiae, donec accusatio contra Episcopum Aulinii discuteretur, Severo Episcopo viciniore etiam commendavit.

(4) Pelagius I. in *can. Catinensis* 17, S. Greg. M. in *can. obitum* 16, *can. bene novit* 18., et *can. quoniam* 19; et *ult. dist.* 61.

Episcopis indulisit, ut clericos ab Ecclesia Cathedrali ad monasterium, aut parochiam transferrent, administrationem, h. e. commendae speciem suscepturos (1). S. Gregorius M. ad Ioannem Ravennatem Episcopum scribens, *aliqua loca dudum monasteriis consecrata, ait, nunc habitacula clericorum, aut etiam laicorum facta sunt, dumque hi, qui sunt in Ecclesiis, fingunt se religiose vivere, monasteriis praeponi appetunt, et per eorum vilam monasteria destruuntur. Nemo potest et ecclesiasticis obsequiis deservire, et in monastica regula ordinate persistere: ut ipse monasterii distractionem teneat, qui quotidie in ministerio ecclesiastico cogitur permanere. . . ego nullo modo patior, ut sacra loca per clericorum ambitum destituantur* (2). Idemque Mariniano Episcopo etiam Ravennati condoluit, *monasteria clericorum dominio praegravari: ita ut (ait) occasione quasi regiminis ea velut in proprietate possideant* (3). Simul rescripsit Maximiano Episcopo Syracusano, ut presbyteros, diaconos, ceteros cujuslibet ordinis clericos *per monasteria abbates* esse non permetteret, aut clericatus militiam deinceps non haberet, qui Abbatis locum praeposset (4). Dum vero septima Synodus oecumenica Nicaena II. an. 787. conscribit clericum in duabus Urbis cujuslibet Ecclesiis veluit: *ceterum in villis, ait, quae foris sunt, propter inopiam hominum indulgeatur* (5).

(1) Conc. Aurelian. III. an. 538. *can. 18.* N. Alexander in *hist. saec. VI. cap. 5. de Conciliis art. 15.* in eo canone notat, clericos ab Ecclesia Cathedrali ad monasterium translatos non abbatiae titulum, sed monasterii administrationem et commendae speciem suscepisse.

(2) S. Greg. M. ad Ioannem Episcopum Ravennatem in *can. pervenit 26. C. 18. qu. 2. et can. nemo 2. C. 16 qu. 1.* In hos duo canones Gratianus dissecuit istud fragmentum epistolae Gregorianae. Hanc vero ipsam Lud. Ant. Muratorius *dissert. 73. antiquit. Ital.* memorans, innuit alludere ad abusum commendarum tunc irrepen-tem in dioecesi Ravennate.

(3) S. Greg. in *can. dudum ad nos 27. C. 18. qu. 2.*

(4) Idem in *can. presbyteros 38. C. 16. qu. 1.*

(5) Septima Synodus in *can. clericus 1. C. 21. qu. 1.* In duarum etiam civitatum Ecclesiis clericum conscribi non oportet, ex antiquiori canone Concilii Chalcedonensis in *can. clericum 2. ead. C. et qu.*

III. Processu temporum quum disciplina regularis in permultis monasteriis, religiosisque domibus collaberetur, et Episcopi suas interim Ecclesias derelinquere cogerentur ob irruptionem hostium praecipue Saracenorum, qui Siciliae, Neapolis, aliasque Italiae regiones depraedabantur: factum est, ut Romana Sedes, Episcopis ejusmodi fugatis, alias Ecclesias Cathedralres, vel monasteria (1) in commendam perpetuam quoad viverent, saepe darent, quum ad eos ipsos sustentandos, tum ad reformandos regularium mores, vitamque communem instaurandam. S. Gregorius M. Agnellum Fundorum Episcopum, ea ab hostibus vastata urbe, constituit Episcopum Tarracinensis Ecclesiae *cardinalem: ita ut Fundensis Ecclesiae Episcopus* (ait) *esse non desinas, nec curam, gubernationemque ejus praetereas* (2). Leo IV, qui nono saeculo sedit, plurimasque instauravit Ecclesias a Saracenis vastatas, primus omnium videtur vocabula *tituli et commendae* explicatius distinxisse: dum rescripsit, quod plures Ecclesias retinens unam *titulatam*, aliam vero *sub commendatione* debeat retinere (3) auctoritate scilicet episcopali et canonica. Nam idem Leo IV. in Concilio Romano an. 853, Anastasium presbyterum cardinalem deposuit, quod in alienis parochiis relicta propria moraretur (4).

(1) Monasteria enim, seu Abatias, aliaque beneficia regularia conferre, vel commendare in perpetuum saecularibus clericis non alii potuerunt, nisi Romani Pontifices: ex quo S. Gregorius M. Gastorio Ariminensi Episcopo rescribens jussit, ut *Abbas in monasterio non per Episcopum, aut per aliquem extraneorum ordinetur*, can. *abbas* 2. C. 18. qu. 2. Et Pelagius in *sequ. can. abbatem* 4, eum monachis cujusque congregationis eligendum dimisit. Thomassin. *to. 1. vet. nov. disc. lib. 3. cap. 69.* affatim ostendit vetitum frequentibus Conciliorum decretis, ne quis praeter Pontificem Romanum monasteria, et regularia beneficia in perpetuum conferret.

(2) S. Greg. in *can. relatio* 5, et *can. illud quoque* 6, et *ult. C. 21. qu. 1.*

(3) Leo IV. in *can. qui plures* 3. C. 21. qu. 1. Tum Urbanus II. in Conc. Placentino an. 1095, in *duabus Ecclesiis* (ait) *aliquem titulari, non liceat: sed unusquisque in qua titularis est, in ea tantum canonicus habeatur.* can. *sanctorum* 2, et *ult. dist. 70.*

(4) Leo IV. in *cop. 2. de cler. non resident.* quod in vulgata

IV. Eodem saeculo nono videntur irrepsisse commendae ad vitam etiam laicales una cum investituris Ecclesiarum laicis. Baronius ad annum 839. fert Carolum Martellum in Gallia ante omnes Ecclesiarum, et monasteriorum Abbates creasse laicos Comites, et Duces pro remunerandis militiae laboribus (1), illiusque exemplum imitatos postea fuisse Carolum M. et Pipinum, Ludovicum Pium, Lotharium I, Ludovicum II, ceteros Galliarum Reges, et Principes (2). Ea de re conqueri non destiterunt Patres, ac Pontifices, praesertim Nicolaus I (3). At Reges reponebant sese ab eo more discedere non posse, ne viderentur suae reipublicae militiam defraudare (4).

V. Frequentes inde Conciliorum canones, et Pontificum decreta, et epistolae pro viribus connitentium sacrilegas ejusmodi invasiones amovere commonitionibus, et censuris. Joannes VIII. anno 877. Adelardum Episcopum excommunicavit quod Nonantulae monasterium callide petiisset ab Imperatore *quod nullus ait, umquam Episcoporum, vel judicum* (puta comitum) *in beneficium* adhuc quaesiverat (5). Alexander II. an. 1061. in Synodo decrevit, ut nullus laicorum Ecclesias, vel Ecclesiarum bona occupet, vel disponat. Qui vero secus egerit, ab Ecclesiae

Decretalium editione male inscriptum Leoni III. observat Gonzalez in notis ad hocce cap. 3.

(1) Baronius ad an. 839. num. 311. eam ob causam Carolum Martellum in tartaris damnatum cruciari scribit.

(2) Liquez ex Capitular. Caroli M. lib. 5. cap. 181, ex Conc. Aquisgran. II. an. 838. cap. 3. can. 19, et Meldense an. 845. cap. 9. Ivone Carnotensi ep. 181, Flodoard. lib. 2. hist. Rhemens. cap. 20, Lupo Servato ep. 11, et monumentis a L. A. Muratorio vulgaris dissert. 73. antiq. Ital.

(3) Nicolaus I. ep. ad Odonem Belloacensem Wala eximius Abbas Corbeiensis in ejus vita lib. 2. apud Mabillon. in actis SS. Benedictin. fertur ita Ludovico Pio Augusto adlocutus: *nemo te Augustorum clarissime fallat: quia valde periculosissimum est res semet Deo fideliter dicatas ad usus pauperum, et servorum Dei, violenter postmodum diripere, et ad saeculares usus contra auctoritatem divinam retorquere.*

(4) Car. du Fresne in glossar. latin. verbo *Abbatesscomites*.

(5) Ex. ep. 48. Joannis VIII. ad Carolum Calvum Imp. et ep. 49. ad Clerum Verouensem apud Murator. loc. cit.

liminibus arceatur. Per laicos nullo modo quilibet clericus, vel presbyter obtinet Ecclesiam, nec gratis, nec pretio (1). S. Gregorius VII. in Romana Synodo an. 1074, sanxit, ne quis *deinceps episcopatum, vel abbatiam de manu alicujus laicae personae suscipiat*: alias nullatenus inter Episcopos, vel Abbates habeatur, interdicens tam accipientibus clericis, quam dantibus investituram laicis *gratiam B. Petri. et introitum Ecclesiae* (2). Urbanus II. an. 1078, *decimas, et Ecclesias a laicis*, ait, *monachi non suscipiant absque consensu, et voluntate Episcoporum*: alias *canonica ultioni subiaceant* (3). Paschalis II. in Conc. Guastallensi an. 1106. decrevit excommunicationi subjacere clericum, abbatem, monachum, *qui per laicos Ecclesias obtinuerit*: laicos autem dantes ab Ecclesiae liminibus arcendos (4).

VI. Evulsis laicorum investituris, et commendis episcopalis potestas consuevit Ecclesias (5) ad tempus commendare sub Alexandro III. (6), et Honorio III. (7): tum irrepsit sensim, et invaluit nimium in clericis abusus polygamiae spiritualis, sc. plurium uni Cathedralium, et abbatiarum in commendam perpetuo ad vitam

(1) Alexand. II. in *can. nullus* 18, et *can. per laicos* 20. C. 16. qu. 7, ibique Romani Correctores epistolam ejusdem Pontificis collaudant.

(2) S. Greg. VII. in *can. si quis deinceps* 12. C. 16. qu. 7.

(3) Urban. II. in *can. decimas* 39. ead. C. et qu.

(4) Paschal. II. in *can. si quis clericus* 16, *can. constitutiones* 17, et *can. nullus* 18. ead. C. et qu.

(5) Urbanus II. in Concilio Placentino *can. sanctorum* 2. dist. 70. statuens quod *licet Episcopi dispositione unus diversis praeesse possit Ecclesiis*, canonicus tamen praebendarius unius tantum Ecclesiae esse debeat: commendas videtur arbitrio Episcoporum ita permisisse.

(6) Alexander III. in *cap. si constiterit* 12. de *accusat.* rescripsit, quod *Ecclesia non perpetuo concessa, sed ad tempus commendata* presbyter de violentia, et pernoctatione in tabernis convictus, vel confessus privandus esset.

(7) Honor. III. in *cap. dudum* 54. de *elect.* rescripsit, quod *nullus potuerit plures parochiales Ecclesias obtinere, nisi unam intitulatam, et alteram commendatam haberet*: h. e. ad tempus commendatam.

collatarum. Clemens V. in ipso sui pontificatus exordio an. 1308. *nonnullis clericis, et personis ecclesiasticis, ait, et religionis et saecularibus diversorum ordinum, dignitatis, conditionum, et statuum, patriarchales, archiepiscopales et episcopales Ecclesias, ac monasteria destituta pastoribus, sub commendae vel custodiae, seu curae, vel guardiae, aut administrationis titulo duximus perpetuo ad vitam, seu ad certi temporis spatium committendo . . . verum perspeximus evidenter, quod Ecclesiarum, et monasteriorum eorundem cura negligitur, bona, et jura dissipantur ipsorum, ac subjectis personis, et populis spiritualiter plurimum, et temporaliter derogatur, eisque redundant ad noxam, quae dicebantur cedere ad profectionem, ac nedum ipsis, sed etiam Romanae matri Ecclesiae graviora inde futura timentur pericula. . . volentes potius opportunum remedium adhibere, omnes, et singulas promissiones hujusmodi per nos factas quibuscunque . . . etiam S. R. E. Cardinalibus auctoritate apostolica nunc ex certa scientia revocamus, et decernimus de cetero non habere aliquam roboris firmitatem (:).* Mox Joannes XXII. nedum Cardinalibus, sed aliis etiam commendas Ecclesiarum, et monasteriorum largitus est, quas omnes, praeterquam Cardinalibus concessas, abrogavit Benedictus XII. successor ejus. Pariter commendas ab Innocentio VI. provisas rescidit Clemens VI (2),

VII. Concilium Constantiense anno 1414. decrevit, ut ne monasteria, aut magni prioratus conventuales, qui ultra decem religiosos, et claustralia officia habere consuevisset, nec dignitates majores post pontificalem in cathedralibus, et collegiatis, nec parochiales Ecclesiae nullis personis etiam Cardinalibus commendarentur amplius (3).

(1) Clemens V. in *extravag. ex supernae 2. de praebendis* inter comm. Guilielmus Durandus Episc. Mimatensis lib. *de modo generalis Concilii celebrandi*, quem ipsius Clementis V. mandato ante Concilium Viennense. conscripsit, *par. 3. rubr. 20*, abusus commendarum inter alia reformandum proposuit.

(2) Hanc Clementis VI. rescissionem fert Odoricus Raynaldus *ad an. 1353. num. 13*, priorem Benedicti XII. ejus vitae scriptores.

(3) Conc. Constantiens. in *appendice ad sess. 40, alias 43. art. 6. de commendis*, apud Philip. Labbaeum.

VIII. Sed monasteriorum commendae magis increbuerunt. Paulus II. suum incundo pontificatum anno 1464. fassus est in Conclistorio: *credere se a pontificatu Callisti III.* (ab anno scilicet 1455.) *ad eum diem amplius quam quincen'a monasteria esse jam commendata, atque adeo in metu sibi esse, ne corruptela haec maturius opinio in scandalum grate erumperet:* dum probavit sententiam Joannis Carvai adversantem novae insignis coenobii Gallicani commendae, quam nescio quis Episcopus ambibat (1).

IX. Leo X. in Concilio Laterense V. an. 1517. indemnitati monasteriorum consulere volens, vetuit monasteria numquam commendata commendari, quae vero commendata aliquando fuissent, nonnisi Cardinalibus, personisque benemeritis, et qualificatis commendari posse: et praecepit ut commendatarii mensam haberent a conventuali separatam (2).

X. Sed Clemens VI. Francisco I Galliarum Regi an. 1531. speciatim indulsit, ut vigore consuetudinis Rex clericos saeculares ad abbatias, et prioratus ea lege nominaret, ut solo commendationis titulo saeculare ea beneficia regularia possideant: exceptis monasteriis, quae sunt capita ordinum (3).

XI. Patres vero Tridentini praeoptarunt, ut monasteria jam commendata, et deinceps vacatura, quae suos conventus habent, nonnisi regularibus spectatae virtutis, et sanctitatis conferantur, praesertim quae capita sunt ordinum, utque in provisionibus horum monasteriorum principalium qualitas singulorum nominatim exprimatur, aliter facta provisio subreptitia esse censeatur, nullaue subsequenti triennali possessione adjuvetur (4). Ordinum capita sunt hoc in Regno monasterium Casinense a S. Benedicto fundatum in monte Casino, alte-

(1) Ex traditis a Cardinali Papiensi ep. 93, qui haec de suo addit ibidem: *Commendandorum ab initio coenobiorum non ea fuit ratio patribus nostris, ut saginae ecclesiasticorum illa darentur: sed ut fide, et studio Majoris alicujus ea, quae occupata a saecularibus essent, redimerentur, et divinus cultus in pristinum statum revocaretur. Deflexit res, et in abusum hunc venit odibilem Dei, et sorti nostrae infamem.*

(2) Leo X. in Conc. Later. V. sess. 9. in bulla *reform. Curiae.*

(3) Apud Rigant. in *Reg.* 43. num. 82.

(4) Trid. in cap. cum pleraque 21. sess. 25. de regularibus.

rumque Montisvirginis a S. Guilielmo institutum. Alibi alia, nimirum *Camaldusense*, et *Vallisumbrosae* in Tuscia. In Gallis *Cluniacense*; *Cartusianum* Gratianopolis, *S. Antonii Viennensis* apud Motam, *Praemonstratense* Canoniorum regularium Cruciferorum Hui ad Mosam, *Sanctissimae Trinitatis* redemptionis captivorum apud cervum frigidum, *Grandimontense*, cetera.

XII. Monasteria monachis destituta Patres Tridentini suo quidem silentio reliquerunt Sedis Apostolicae arbitrio commendanda, et providenda. In quibus autem conventus religiosorum viget, si commendari ea consueverint, adhuc in commendam perpetuam saecularibus Praelatis ea dari mos est hac lege, ut congruam fructuum portionem tradere pro mena conventualide beant commendatarii ac segregare juxta decretum Concilii Lateranensis V., quod auctoritatem Sedis Apostolicae in commendarum provisione studuit, ea divisione fructuum conservare. Hinc patet, cur post Tridentinum in Italia, et in hoc etiam Regno Neapolitano perplura monasteria, et abbatias regularium ordinis praesertim divi Benedicti, clerici saeculares in commendam perpetuam durante ipsorum vita a Summo Romano Pontifice obtinuerunt cum libera proventuum administratione, ac dispositione, non aliter quam veri beneficiarii, ac titulares perpetui, quemadmodum liquet ex Datariae Apostolicae litteris.

XIII. Tunc dare in commendam beneficia solet Curia Romana, quum aliquod obstat canonicum impedimentum, quominus eorum collatio in titulum fiat. Scilicet ubi Sedes Apostolica alicui ante aetatem legitimam velit beneficium curatum concedere, illud potius commendat, quousque ad annum canonibus praescriptum perveniat, deindeque confert in titulum, quam collationem anticipatam in titulum natu minori praevia dispensatione largiatur. Similiter monasteriorum abbatias clericis saecularibus frequentius commendat, quam supprimit earum qualitatem regularem (1). Et e contrario personis regularibus magis beneficia commendat, quam dispensationem indulgeat canoni-

(1) Rebuff. id observat in *prax. benef. tit. de commenda n. 7. et seq.*

bus (1) vetantibus, ne saecularia regularibus conferantur (2). Incongruum enim videtur, ut regulares saecularibus, et e converso subdantur (3).

XIV. Per commendam monasteriorum, et abbatiarum regularium auctoritate pontificia Praelatis, et clericis saecularibus concessam, ipsa regularis qualitas, et natura nil mutatur, sed in eodem statu perinde permanet, ac si commendatarius esset Abbas, vel Prior vota regularia professus (4), et quovis lapsu temporis ea non praescribitur (5). Exinde facile intelligitur, beneficia monasterio commendato adnexa non quidem perpetua, sed temporanea, atque ad nutum mobilia esse ob insitam regularibus beneficiis mobilem naturam. Qualia sunt ex. gr. S. Antonii Viennensis beneficia, quae Abbas commendatarius hoc in Regno passim confert clericis etiam saecularibus non in titulum perpetuum, sed cum revocabili jure administrandi ad beneplacitum, et nutum ipsius Abbatis conferentis (6).

XV. Duplex commendae species est, altera scilicet *perpetua*, ad vitam commendatarii duratura, et altera *temporanea*, quae postquam idoneo rectori collata in titulum erit Ecclesia, cessare continuo debet. Inspecta quidem natura commendae, ea tem-

(1) Trid. in *cap. regularia* 10. *sess. 14. de reform.* decrevit, ut regularia beneficia in titulum regularibus professis provideri consueta, cum vacare contingerit, religiosis tantum illius ordinis, vel iis, qui habitum omnino suscipere, et professionem emittere teneantur, et non aliis conferantur.

(2) Innoc. III. in *cap. dilectus* 2. *de capell. monac.*

(3) Rebuff. *loc. cit. num. 25.*

(4) Card. de Luca in *summa de benefic. num. 195, et disc. 64. num. 7.* Fagnan. in *cit. cap. in Ecclesiis num. 16. de capell. monachor.* Rigant. in *Reg. 43. num. 219.*

(5) Bonif. VIII. in *cap. cum de beneficio* 5. *de praeb. in VI.* declaravit beneficium qualitatem saecularem induere, si tanto tempore ab uno, vel pluribus saecularibus clericis constitutis in eo rectoribus continue gubernatum sit, ut *praescriptio legitima* sit completa, etiamsi ante, vel post religiosi quandoque ministraverint in eodem. Sed loquens palam textus hic *de institutis rectoribus* tacito sensu excludit praescriptionem in commendatariis, Passerin. in *eod. cap. 5. num. 21.*

(6) Videsis dicenda inferius hoc eodem *cap. num. 27.*

Tom. II.

8

poranea potius est, et revocabilis ad nutum superioris commendantis (1): quemadmodum quoque depositum revocabile est arbitrio deponentis. *Perpetuam* commendam Sedes dumtaxat Apostolica indulget, et quandoque non intuitu personae, sed Ecclesiae: quemadmodum e. g. Episcopo Aquini, et Pontiscorvi pro tempore commendavit Praeposituram Ecclesiae Atinensis.

XVI. Hodiernos commendatarios veris titularibus Doctores aequiparant (2): quum suos faciant pleno jure commendatae Ecclesiae fructus, liberamque administrationem exercent instar titularium. S. Congregatio Concilii praeterea censuit posse commendatarium non secus, quam superiorem regularem, dimissorias litteras ad ordines concedere, si constet monasterio commendato, ejusque monachis id privilegium fuisse concessum nominatim (3). Gregorius XIII. ad interrogata Concilii Rothomagensis anno 1581. rescripsit ex S. Congr. Conc. sententia: *commendatarios inter Abbates esse in Synodo recipiendos: abbates benedictos, et qui usum mitrae habeant, praecedere debere commendatarios: neutros vocem definitivam, sed consultivam tantum habere* (4). Propterea commendam nunc parum, vel nihil differre a titulo collationis, eamque tituli etiam canonici vim habere consentiunt Doctores (5).

(1) *Gl. in can. qui plures C. 21. qu. 1.*

(2) Fagnan. in *cap. in Ecclesiis de capell. monachor. num. 5.* Melitensium equitum Ordinis S. Io. Hieros. commendas instar beneficiorum ecclesiasticorum habet Rota coram Lancellotto *dec. 221. 532, et 565*, alibique. Videsis Escano in *propugnac. Relig. Hierosolym. discept. 10, et 11.* At commendas Ordinis S. Stephani Calatravae de Spatha officiis temporalibus aequiparari, et vera beneficia non esse commonet Ant. M. de Nigris *lib. 1. de vacat. beneficiis. cap. 12. num. 13.*

(3) S. Congr. apud Gallemart. in *declarat. ad cap. ordinationes 8. sess. 23. de ref. num. 4. §. item.*

(4) Ex actis Conc. provinc. Rothomagensis an. 1581, cui praesedit Carolus Cardinalis Borbonius, apud N. Alexand. in *hist. saec. XVI. cap. 7. art. 4. num. 23.*

(5) Gomesius, Mandosius, Kokier, Riganlius in *Canc. Reg. XXX. num. 32.* Rota coram Penia *dec. 1321, et 1409, tum dec. 569. par. 5. rec. num. 41. et dec. 523. num. 51. et seq. par. 19. rec.*

XVII. In Gallia omnes commendatarii ad sacros ordines intra annum suscipiendos coguntur. Nam in eodem provinciali Concilio Rothomagensi decretum est, ut *abbates, et priores regulares, atque etiam exempti, aut commendatarii, si aetatem praescriptam a jure ad suscipiendos sacros ordines attigerint, intra annum promoveantur: facultatesque de non promovendo, praeterquam in casibus a jure expressis concessae ad annum tantum suffragentur: alias Episcopus pro suo jure agat usque ad declarationem vacantium omnium beneficiorum. Promoti vero iisdem legibus ad celebrandam Missam, quibus omnes presbyteri, atque Episcopi obligentur, et compellantur ab Ordinariis, si fuerint contumaces, aut contemptores, Commendatarii, quamvis ad regularem observantiam non obligentur, ne tamen fiant sine iugo, atque omni regula, decet eos medium statum, atque ordinem sequi, et ostendere inter regulares, et saeculares clericos in vestitu, in victu, et in omni conatu. Tonsura utantur ampliori, quam Sacerdotes, habitu propius ad regularem accedente, nec existiment sibi commendatum monasteriorum regimen ad luxum, et prodigalitatem, aut augendam rem suam, et consanguineorum familiam, sed ad piam, et justam alienarum rerum dispensationem, et quarum non habent proprietatem, Deoque de omnibus reddendam esse rationem (1). Propterea in apostolicis litteris commendas in Gallia conferentibus additur de stylo decretum, ut infra annum sacris initientur, alioquin eo elapso, vacent ipso jure commendae (2). Ex decreto Concilii Rhemensis an. 1583. in Gallia compelluntur quoque commendatarii, vel eorum vicarii, ut intersint visitationibus, visitatoresque honeste excipiant, et executioni mandent quae in eis statuta fuerint (3).*

XVIII. In Italia, et alibi neque ad sacros ordines suscipiendos, neque ad residentiam commendatarii communi jure adiguntur: si monasteria omni cura spirituali, et conventu carent, vel

(1) Conc. Rothomagen. *tit. de monasteriis cap. 4.* Idipsum iisdem fere verbis constituit Conc. Aqueense an. 1585. *tit. de monasteriis.*

(2) Gallemart. in *adnotat. ad cap. 2. sess. 6. de reform.*

(3) Conc. Rhemense *tit. de regular; et eor. monast. cap. 21.*

si temporalem solummodo jurisdictionem habent, vel si animarum cura sacramentalis non commendatario, sed conventui solum incumbit, vel si jurisdictionem sacramentalem ex indulto apostolico habentes nequeant actu exercere ob externa impedimenta de facto, vel si jurisdictionem spiritualem actu exerçant sine cura animarum. E contrario ad utrumque tenentur: si animarum cura sacramentalis, vel monachorum, vel saecularium adnexa ipsimet commendatario sit (1).

XIX. Temporaneam ad sex menses commendam antiquo jure nedum Episcopus, sed Capitulum etiam Sede vacante posset concedere, ubi vel evidens necessitas, vel utilitas Ecclesiae suaderet. In Concilio enim Lugdunensi sub Gregorio X. statutum est (2), ut nemo Ecclesiam parochialem alicui commendare praesumat, nec umquam ultra sex menses: alias ipso jure irrita habeatur commendatio. Plures quidem parochiales Ecclesias nemini licuisse ab Episcopo obtinere, nisi unam in titulum, et alteram in commendam liquet ex antedicta Leonis IV. epistola (3). Rescripsit etiam Honorius III. Archidiaconum Ambianensem nequivisse canonice habere duas parochiales concessionem Archiepiscopi Rothogensis in titulum, licet alteram *intitutam*, alteram vero *commendatam* habere permisisset (4). At Concilium Tridentinum privatos ipso jure beneficiis ipsis maluit eos, qui duo, vel plura incompatibilia *per viam* quoque *commendae perpetuae, aut alio quocumque nomine, et titulo retinere praesumpserint* (5). Hinc S. Congregatio Concilii declaravit commendas, quae ad sex menses in Ecclesiis curatis fieri olim poterant ab Ordinariis locorum juxta canonem Lugdunensem, aliosque antiquiores nunc locum non habere amplius post Tridentinum (6). Hoc enim postremo Concilio oecumenico statutum est in vacantibus Ecclesiis parochialibus deputandos fore ab Episcopis non

(1) Ex adnotationibus Gallemart, *ad cit. cap. 2. Trid. sess. 6. de ref.*

(2) Greg. X. in *cap. nemo deinceps* 15. *de elect. in VI.*

(3) Leo IV. in *cit. can. qui plures* 3. *C. 21. qu. 1.*

(4) Honor. III. in *cap. dudum* 54. *de elect.*

(5) Trid. in *cap. quicumque* 4. *sess. 7. de reform.*

(6) Apud Gallemart in *declarat. ad idem cap. 4. sess. 7. n. 7, et ult.*

commendatarios semestres, sed vicarios, seu oeconomos cum congrua eorum arbitrio assignatione portionis fructuum, qui onera earundem Ecclesiarum sustineant, donec de rectoribus provideatur (1).

XX. Itaque Romani tantum Pontificis suprema potestas commendas monasteriorum Ecclesiarumque perinde perpetuas, ac temporaneas indulget, cui soli jus est sacris disciplinae canonibus, et cujuslibet Concilii oecumenici decretis apostolica dispensatione derogandi, quoties maluerit ad libitum suum quomodolibet commendare, quam conferre in titulum beneficia quum regularia, tum saecularia. Leo XI, qui sedit vix dies viginti septem, an. 1605. omnia beneficia et regularia, et saecularia, quae ante obitum Clementis VIII. praedecessoris sui vacaverant, valorem annum ducentorum auri de camera non excedentia, insigni exemplo ad sex menses commendavit tribus S. R. E. Cardinalibus Gallo, Razelio, et Madruzio (2). Et vicissim beneficia clericorum saecularium religiosis professis quandoque in commendam, et administrationem concesserunt Summi Pontifices, praesertim Innocentius XII, et Clemens XI. a Rigantio laudati (3). Hodiernae simul litterae, seu bullae Sedis Apostolicae ostendunt morem, stylumque concedendi S. R. E. Cardinalibus nedom Cathedrales Ecclesias, et monasteria, sed beneficia quaelibet, etiam simplicia clericorum saecularium in commendam perpetuam, quae ceteris clericis in titulum conferuntur, etiam cum dispensatione super pluralitate incompatibilium. Per Cancellariae Regulam II. Sedi Apostolicae reservata monasteria generatim excedentia ducentos annuos florenos auri, tam si conventum habeant, quam non, superius dixi (4).

XXI. Nonnullis autem Cardinalibus, aliisque benemeritis, et

(1) Trid. in *cap. expedit* 18. *sess. 24. de reform.*, ubi Galletmart. in *declar. num. 10.* fert duos aureos pro singulis mensibus a S. Congr. Conc. aestimatos pro conditione loci fuisse congruam vicarii curati portionem.

(2) Ex Rigant. in *Reg. 63. Canc. num. 8.*

(3) Rigant. in *Reg. 43. num. 19.*

(4) *Cap. 5. de reservat., et affect. num. 38.*

insignibus Praelatis indulserunt aliquando Pontifices ipsi, in his Urbanus VIII. Innocentius X, Alexander VII, Clemens IX. et X, Alexander VIII, Innocentius XII, et Clemens XI, facultatem commendandi beneficia, et monasteria tam commendari consueta, quam non, ea lege, ut novam apostolicam provisionem isti commendatarii deberent intra menses aliquot obtinere (1). Ad abusus autem in ejusmodi indultis reformandos, Congregatio particularis a Clemente XI. deputata decrevit die 16. Jan. 1701, 1: ut indulta commendandi non concedantur ad vitam, sed ad quinquennium, aliudve tempus limitatum personis tantum eximiis, et benemeritis, quibus numquam liceat commendare prioratus conventuales, et officia claustralia, nec beneficia curata, nec majores dignitates Cathedralium, et Collegiatarum, nec resignata in manibus Papae, nec vacantia quomodolibet apud Sedem Apostolicam. neque fundata in patria obedientiae apud Gallos. utque iis tantum Ecclesiae, et beneficia non excepta commendent, qui possint, ac velint recuperare bona alienata, ac restaurare aedificia Ecclesiarum: iisque recuperatis, ac relictis *in titulum* exinde conferant. Praeterea ut novis provisionibus apostolicis novarum ejusmodi commendarum addatur decretum *revertendi in titulum*, ab Apostolica Sede petendis infra menses octo a die provisionis vigore indulti, et non concedendis, nisi ante constiterit necessitas restaurandi aedificia, et bona ipsius recuperandi (2). Quandoquidem novae commendae iterationem denegare potius, quam concedere Apostolica Sedes consuevit (3).

XXII. Reges etiam, supremique Principes Ecclesias, beneficia, et abbatias regii patronatus cum jure quum nominandi, vel praesentandi, tum conferendi, nequeunt sine indulto speciali Sedis Apostolicae in commendam dare ad vitam, vel ad tempus limitatum: nec saeculares clericos ad regularia, aut regulares ad saecularia promovere suo vel nominationis, vel collationis jure, nisi accesserit Papae auctoritas (4).

(1) Apud Rigant, *ibid.* num. 30, et seq.

(2) *Ibidem* num. 32.

(3) Rigant. *ibidem* num. 71.

(4) Fagnan. in *cap. cum caussam* 12. de elect. Rigant. *loc. cit.* n. 43, et 44.

XXIII. Cancellariae Regula XLIII. disponit: *quod nulli saeculari de regulari, nec religioso de saeculari beneficio commenda detur, nisi in signatura, vel per clausulam ad partem super petitione commendae huiusmodi de commenda ipsa mentio fiat.* Et quoniam commendatum beneficium vacat *de facto* dumtaxat per cessum, vel decessum commendatarii, idemque simul *de jure, et de facto* vacat, *ut prius* vacaverat ex persona illius titularis, per cuius obitum, vel cessionem illud ipsum Sedes Apostolica primum commendavit ex rebus a Dataria, et Rota saepe judicatis (1): oportet idcirco ad vitandam obreptionem, ut impetrans enarret postremam vacationem *de facto* per cessum, vel decessum ultimi possessoris commendatarii. Nam si solam narraret vacationem *de jure ut prius*, quae ad titulum redit, commendam reticens, ejusmodi dolosae preces gratiam collationis vitarent.

XXIV. Haec forma verborum inolevit in pontificiis litteris monasteria ea commendantibus, quae dari in commendam consueverunt: *ut commodius onera sustentare valeas, de alicujus subventionis auxilio provideri cupientes, monasterium N. auctoritate apostolica tibi concedimus, et commendamus, ac providemus, per te quoadiu vixeris, tenendum, et possidendum, ita quod durante commenda huiusmodi de fructibus, redditibus, et proventibus ipsius monasterii disponere, et ordinare valeas, sicut veri abbates, et priores ipsius, qui fuerunt pro tempore, ordinare, et disponere potuerunt, et etiam debuerunt, alienatione tamen bonorum immobilium, et pretiosorum mobilium tibi penitus interdicta.* Si tamen clausulae istae in bullis apostolicis omitterentur, commendatarius fructus non faceret suos: sed rationem redditurus de eis futuro titulari esset, instar depositarii. Si adsit autem sufficiens in commendato monasterio familia religiosa, haec litteris pontificiis adjicitur clausula: *quod propter commendam nostram huiusmodi solitus monachorum, et ministrorum numerus non minuat* (2).

XXV. Quoties vero acciderit monasterium aliquod novae

(1) Apud Rigant. in Reg. I. Canc. §. 7. num. 233, 247, et 258.

(2) Ex Rigant. ibidem num. 51.

commenlae subijci ob urgentem aliquam causam necessitatis, vel utilitatis jam expositam, hae aliae conditiones, et clausulae litteris apostolicis adduntur: *quod dictus N. in primis, et ante omnia teneatur cautionem idoneam in actis curiae episcopalis de restaurandis dicti monasterii aedificiis, illiusque bonis alienatis recuperandis praestare, ac in restauratione hujusmodi summam Episcopo, sive tibi (executori) bene visam infra terminum ab eodem Episcopo, sive a te statuendum, ratam partem scilicet summae hujusmodi singulis annis expendendam, et de praemissorum implemento in actis ejusdem curiae episcopalis in fine cujusque anni docere: alias cautione hujusmodi non praestita, vel etiam ea praestita, et infra terminum praefatum restauratione usque ad summam designatam non facta, ac in actis praefatis non justificata, in-quemlibet eventum hujusmodi commenda de dicto monasterio cesset, eaque cessante, dictum monasterium vacet eo ipso, et dictus N. ad restitutionem omnium fructuum perceptorum per censuras ecclesiasticas, aliaque opportuna juris, et facti remedia cogi, et compelli possit, et debeat. Volumus praeterea, quod dicto N. cedente, vel decedente, aut alias dictum monasterium quomodolibet dimittente, vel amittente, illud amplius non commendetur, sed ad pristinam tituli naturam reverti, et personae regulari idonea conferri debeat, ac si dicto N. numquam commendatum fuisset: et si commendari contigerit absque speciali mentione, et derogatione posterioris voluntatis nostrae, hujusmodi commenda de dicto monasterio nulla sit eo ipso (1).*

XXVI. Sunt qui vellent, in his monachi potissimum, commendas omnes radicitus convellere, tamquam abnormes, et prae-
cis Ecclesiae legibus improbatas: dum exaggerant plus aequo, declamantes perniciem regularis disciplinae, ruinas aedium sacrarum, luxum commendatariorum ex eis promanantia. Vicissim alii corruptos mores regularibus ipsis exprobrant, profligatam e claustris paupertatem, degenerem a primitiva institutione formam vivendi, abusum pecuniae: unde palam sit necessitas sustinendi commendas nedum consuetas in monasteriis conventu fratrum carentibus adhuc, verum in pinguioribus etiam

(1) Rigant. *ibidem* num 60.

in religiosa familia instructis, quae portionem congruam reddituum pro sua mensa, et sustentatione jam habet sejunctam a redditibus commendatariorum. Qui privato interea calamo student leges, ac mores ita receptos emendare in melius, et veterem Ecclesiae disciplinam instaurare, dum novam vigentem carpunt andacissime; ii quidem ipsi non vident mobilem disciplinae naturam arbitrio summarum solummodo potestatum subjectam, eoque minus capiunt causas ejusmodi mobilitatis pro conditione temporum, locorum, personarum varias. Abusus itaque varios in commendis simul, et titulis, aliisque rebus Ecclesiae ortos, et repullulantes in diem vitio non legis novae, sed hominum vertunt rectius aequi rerum aestimatores: usum proficuum, et quandoque necessarium probant, et collaudant: Synodus Tridentina eas propterea non improbandas censuit, sed nonnullos reformavit abusus, alios Romani Pontificis pietati, ac prudentiae corrigendos reliquit pro conditione temporum, et locorum. Nam Principes, qui nominandi jus habent, praesertim Galliae Reges usque adeo passi non sunt regium sibi froenari arbitrium nominandi Regulares dumtaxat ad abbatias monasteriorum, quum clericos plerumque saeculares consueverint ad eas regis nominationibus promovere (1): ut non dubitent Galliae scriptores Summo Pontifici negare facultatem reducendi in titulum monasteria commendari solita (2).

XXVII. Abbatiam Praeceptoriae generalis Neapolitanae S. Antonii Viennensis monasterio Viennensi in Delphinatu olim unitam Paulus V. Jo. Baptistae Victorio primus omnium commendavit, mox Urbanus VIII. Cardinali Magalotto nedum in commendam dedit, sed unionem ipsius, omniumque adnexorum dissolvit, nullumque jus deinceps Viennensi monasterio in ea superesse decrevit anno 1626. (3): cui pro sustentando procuratore generali in Curia Romana praeceptoriam S. Antonii civitatis Sarnensis adnexuit. Subsecuti deinde Pontifices Archiepiscopis Neapolitanis eam commendare gradatim consueverunt

(1) Id quod observat N. Alexander in. *hist saec.* 16. *dissert.* 12.

(2) Fleury *Inst. Iur. canon. par.* 2: *cap.* 26.

(3) S. Congr. Conc. in *Neap. collationis benefic.* 8. *Julii* 1690. Rota in *Neap. seu Tranen. praepceptoriae* 20. *Jun.* 1696. coram Molines, apud Rigan. in *Reg. IV.* §. 4. *num.* 15.

Omnia vero beneficia ubilibet intra Regnum consistentia sub eodem titulo S. Antonii quum libera, et simplicia, tum de jurepatronatus, et curata ad collationem, vel institutionem ordinariam istius Abbatis olim titularis, nunc commendatarii pertinere palam est (1). Nam S. Congregatio particularis sub Urbano VIII, in Neapolitana Praeceptoriae S. Antonii Viennensis 6, Julii 1627, ad quinque postulata dubia respondens censuit 1: Praeceptorem generalem *habere fundatam intentionem conferendi praeceptorias, et alia membra generalis praeceptoriae* in toto Regno, *nec non cetera beneficia, quae conceduntur in constitutione Clementis VII, sive ratione ejusdem privilegi, sive ex dispositione juris communis*. 2: extendi ad beneficia etiam jurispatronatus laicorum: *quoad institutionem una cum jure devotivo*. 3: eadem beneficia *esse manualia de sui natura, exceptis curatis, et electivis*. 4: ea *non cadere sub reservatione: posse tamen cadere sub affectione, nisi haec tollatur per indultum, cujus copia transmittatur*. 5: *Ordinarios non posse conferre, nisi obstet legitima praescriptio cum requisitis* Perusinae I. Benvignati coram Pamphilio, et Ferrariensis coram Penia, *et nisi obstet ultimus status cum requisitis* (2).

XXVIII. Ad commendas Melitensium equitum S. Jo. Hierosolymitani hactenus dicta non pertinent. Hujus enim sacri militaris Ordinis, et commendae, et bajulivatus, et prioratus, et praeceptoriae, et hospitalia, et cetera beneficia nullis subjacent apostolicis reservationibus, nec Regulis Cancellariae, etiamsi apud Sedem, et intra duas ab Urbe diaetas quomodolibet vacaverint (3): quum ipsamet Regula IV. Cancellariae, reservans dignitates conventuales, et praeceptorias ordinum quorumcumque, palam excipiat beneficia *militarium*, scilicet Or-

(1) Ex Clementis VII. *const.* 2. §. 19, Rota *dec.* 71 coram Durano, Montan. *contr.* 81., S. Congr., et Rota apud Rigant. *loc. cit.* num. 20, et 57.

(2) S. Congr. particularis apud Rigant. *ibidem* num. 52.

(3) Ex Pii IV. *const.* 9. §. 5, et 23, Rota coram Puteo *dec.* 138. *lib.* 1, Achille de Grassis *dec.* 9. *tit. de praebendis*, Escano in *propugn. Relig. Hierosol. discept.* 10. *cap.* 3. num. 13., et seq: Rigant. in *Reg. I. Canc.* §. 1. num 319. Multas nihilo-

dinum militarium. Sed a M. Magistro ejusdem Ordinis conferuntur, ubi jurisdictionem, administrationemque adnexam habeant, non nisi equitibus antiquioribus in eo professis tantum cujusque linguae, seu nationis, salvo antiquioribus jure optandi jam superius exposito. Non professis indulgere aliquando consuevit Sedes Apostolica, ut posset commendas ejusmodi jurisdictionem habentes obtinere cum onere emittendi professionem (1). Quae tamen jurisdictione sunt expertes, eas conferri personis etiam non professis, sed ad profitendum idoneis suscepto habitu licebit (2). Administrationem, liberamque in pios usus dispositionem, sicut beneficiarii clerici saeculares, utique habent commendatarii, bajulivi, ceteri hospitalarii Melitensis religionis (3): sed non proprietatem, quae ipsi manet Ordini adnexa (4). Iique ad residentiam tenentur, alias fructus non faciunt suos (5). Aequitas juris tum suavit, ut cujusque nationis, et linguae commendas, bajulivas, ceteras Ecclesias, domosque religiosas administrandi, seu adipiscendi jus haberent

minus collationes commendarum, beneficiorumque sacrae ipsius Religionis, dum in Curia, et apud Sedem vacassent, ab Apostolica Sede factas fert Rigantius *ibidem* num. 323. Idemque addit in §. 7. *ejusdem Reg. I. num. 57.* vacare per promotionem ad Episcopatum commendas, et prioratus Ordinis S. Io. Hierosolymitani: Summum vero Pontificem de iis, non ut reservatis disponere, sed locum dare *smultioni*, ait, favore *antianorum*, ex Rotae *dec. 221.*, 532, et 566. in *Milevitana commendae* coram Lancetta.

(1) Rot *dec. 329. par 2. rec. Thomassin. par. 2. lib. 3. cap. 20.* Rigant. in *Reg. LIX. Canc. num. 11.*

(2) Escano *loc. cit. discept. 13. cap I. num. 25.* Rigant. *ibidem* num. 6. Tertia, et quarta ex decem regulis generalibus Ordinis S. Io. Hieros. per eum expositis Clero Gallicano ita se habent. 3, *Quod juspatronatus providenti, et instituendi personas idoneas ad bajulivas, prioratus, praeceptorias, hospitalia, membra et alia beneficia, et loca dicti Hospitalis ad Magistrum, et Conventum spectat.* 4. *Beneficia dicti Ordinis obtinentes, et fructus percipientes infra sex menses post intimationem habitum suscipere, et professionem emittere tenentur.*

(3) Rigant. in *Reg. XLII. num. 233.*

(4) *Ex statutis Ord. Hierosol. tit. 5. num. 1.*

(5) *Ex iisdem statutis tit. 18.*

soli ejusdem equites, exclusis alienigenis (1). Hinc plura in Capitulis generalibus decreta de commendarum diviso vel promiscuo usu inter plures ejusdem linguae prioratus, vel plures ejusdem Regis provincias (2). In hoc autem Regno Neapolitano statim ac imperiali rescripto Caroli VI. cautum est, ut non nisi regnicolae cunctas Regni Ecclesias, et beneficia quaelibet obtinerent: religiosi equites Melitenses nostri jure merito postularunt sese eo ipso indulto frui etiam debere.

CAP. XII.

DE PRECUM VERITATE SUBREPTIONE ET OBREPTIONE
IN IMPETRATIONIBUS (*)

- I. Collationibus pontificiis ea semper inest conditio, si preces veritate nitantur.*
- II. Easque tam subreptio falsitatem suggerens, quam obreptio veritatem reticens rescindit.*
- III. Quum dolosa obreptio, vel subreptio, tum quae sine dolo causam gratiae dederit, irritas ipso jure litteras efficit: secus, quae non causa fuit collationis, et sine fraude irrepsit.*
- IV. Impetrantis, et nomen cum agnomine, et dioecesis, ea etiam, in qua sit beneficium, sunt exprimenda.*
- V. Simul et qualitas beneficii.*
- VI. Et valor annuus certorum reddituum.*
- VII. Levis error in sexta parte toleratur pro sustinenda collationis gratia, nullus pro impetratione posteriori.*
- VIII. Certi redditus deductis oneribus in exprimendo valore computantur.*
- IX. Errorem valoris plura excusant, eumque licet in expeditione bullarum emendare, augendo valorem in tertia parte.*
- X. In concistorialibus valor antiquus in libris Camerae taxatus attenditur, in aliis nonnumquam Regulae derogatur.*
- XI. Resignationes irritas facit majoris valoris dolosa expressio.*
- XII. Ordinariorum collationibus nil efficit valor vel reticitus vel falso expressus.*
- XIII. Annatarum species quatuor expressionem valoris postulant.*

(*) Ad tit. XLIII. lib. I. Decretal. de rescriptis.

(1) Ex Statut. tit. 5. num. 14.

(2) Videsis Iacobum Bossium in hist. Melitensi.

- XIV. Vacationis modum certum exponi etiam oportet.*
XV. Alius vacationis modus non suffragatur, nisi expressus revera de facto acciderit.
XVI. Quaevis possessio facti reticita vacationem veram excludit in litteris generaliter expressam.
XVII. In collationibus Ordinariorum vacationis modus impune reticetur.
XVIII. Quonam mense reservato, et an in Curia, vel extra eam acciderit vacatio, narrandum simul est.
XIX. Et an familiaris Cardinalium is fuerit, per cujus cessum, vel decessum vacat beneficium.
XX. Impetrantis praeterea dignitas, aliorumque beneficiorum possessio.
XXI. Numerus item praebendarum, et canonicatum in Ecclesiis numeratis non excedendus.
XXII. Errores in impetrationibus admissi novis vel precibus, vel provisionibus emendari solent.
XXIII. Emendatio aliis nocitura difficilior est.
XXIV. Levia errata facile diluuntur.

I. Collationes a Sede Apostolica ad petitionem beneficiariorum expeditae hanc semper continent conditionem vel expressam, vel tacitam, si *preces veritate nitantur* (1). Enimvero hanc ipsam, quoties in pontificiis litteris non pateat expressa, subintelligendam esse declaravit Alexander III. (2). Cumque consueverint in supplicatione, et signatura gratiae, quae litteras praebet, sigillatim Pontifices rescribere *fiat, ut petitur*, ad narrata, et exposita sese hujusmodi verbis referre salis indicant. Tum Cancellariae Regula LXI. palam jubet, *quod in litteris super beneficiis per constitutionem execrabilis vacantibus ponatur clausula*, si est ita: *similiter de quibuscumque narratis informationem facti requirentibus* (3). Civili etiam jure cau-

(1) Nam in contrahendo quod agitur, pro cauto habendum est, Pomponius ait in l. cum quid 3. D. de rebus creditis, et si certum petatur.

(2) Alex III. in cap. ex parte 2. de rescriptis.

(3) Hanc ipsam clausulam si est ita, similem alteri, si preces veritate nitantur, probavit Innocentius III. in cap. olim ex litteris 25. eod. tit.

tum est, ut *responsuro Principi vera precatio rem aperiat cognoscendam* (1).

II. Quamobrem tacita veritate, vel suggesta falsitate extortae litterae tamquam subreptitiae, vel obreptitiae sunt irritae, nulliusque momenti (2): quum suffragari non debeant ei, qui suppetiit. *Subreptio* dicitur, quum falsis, et mendacibus precibus rescripta impetrantur: *obreptio* autem, quum veritas in precibus reticetur. Sed quandoque Pontifices, et Icti eisdem vocibus promiscue utuntur, nullum discrimen inter eas quoad effectum facientes (3).

III. Innocentius III. hanc perpetuam tradidit normam pro dijudicanda nullitate litterarum apostolicarum. Ubi dolosa, vel fraudulenta obreptio, seu subreptio fuerit, semper irritas ipso jure litteras esse. Ubi autem sine dolo, ac fraude, sed ignoranter, bonaque fide veritas tacita, vel mendacium expositum sit, qua expressa, quove tacito Pontifex nullas prorsus litteras dedisset, vel aliquod celatum sit, quod expressum in diversam sententiam Pontificis animum traxisset: eas pariter esse invalidas, tamquam concessioni causam dantes. Secus vero si veritate exposita, mendaciove suppresso adhuc litteras Papa concessisset: tunc enim delegatus secundum juris ordinem ad eas exequendas procedere poterit. *Nos igitur*, Pontifex ait, *inter eos, qui per fraudem, vel malitiam, et illos, qui per simplicitatem, vel ignorantiam litteras a nobis impetrant, hujusmodi credimus discretionem adhibendam, ut hi, qui priori modo falsitatem exprimunt, vel supprimunt veritatem, in suae perversitatis poenam nullum ex illis commodum consequantur, ita videlicet, quod delegatus, postquam sibi super hoc facta sit fides, nullatenus de causa cognoscat. Inter alios autem, qui posteriori modo litteras impetrant, duximus distinguendum, quae falsitas suggesta fuerit, vel quae veritas sit suppressa. Nam si talis expressa sit falsitas, vel ve-*

(1) Sic Theod. et Valentin. Florentin. rescripsero in *l. instrumentorum* 8, et ult. *C. de precibus Imp. offerendis*.

(2) Innoc. III. in *cap. cum nostris* 6. de *concess. praeb. cap. cum dilecta* 22. de *rescriptis*, Greg. IX in *cap. ex insinuatione* 37. *eod. tit.*

(3) Emm. Gonzalez *ad cap. 20. de rescriptis* num. 4.

ritas occultata, quae quamvis fuisset *lacita*, vel *expressa*, nos nihilominus saltem *in forma communi litteras* dedissemus, *delegatus non sequens formam in litteris ipsis adpositam*, secundum ordinem juris in causa procedat. Si vero per hujusmodi falsitatis expressionem, vel suppressionem etiam *veritatis litterae fuerint impetratae*, qua *lacita*, vel *expressa*, nos nullas prorsus litteras dedissemus, a *delegato non est aliquatenus procedendum*, nisi forsitan *catenus*, ut *partibus ad suam praesentiam convocatis*, de *precum qualitate* cognoscat, ut sic in utroque casu eadem ratio, quae *delegantem moveret*, moveat etiam *delegatum*, et ubi *delegans suas litteras denegaret*, *delegatus etiam suae cognitionis officium nullatenus interponat* (1). Hinc necessum est recte intelligere, quae debeant pro impetrandis beneficiis exprimi, simul, et clausulas adijci solitas in litteris apostolicis de stylo Curiae Romanae pro dijudicanda validitate, vel nullitate provisionis apostolicae.

IV. In primis ergo exprimi debet supplicantis nomen, agnomen, et dioecesis, in qua et is ortum, vel fixum domicilium habuit, et beneficium situm est: ne locus pateat in duobus Titulis, vel duobus corporibus errandi. Papa enim indigenis mavult, quam exteris providere cujusque dioecesis Ecclesias, et beneficia, praesertim curata, quae nulliter impetrant exteri nescientes idioma loci (2). Nec violanda locorum statuta, et privilegia sunt, quibus cautum alicubi speciatim est, ut amotis, et exclusis omnino exteris, beneficia, et pensiones ecclesiasticas possent soli, aut regnicolae, aut dioecesani, aut indigenae hujus, illiusve urbis, vel loci obtinere: quemadmodum de Neapolitanis, et Siculis, et Capuanis jam dictum supra (3).

V. Qualitas beneficii, num scilicet simplex, vel curatum, dignitas, vel personatus, vel liberae collationis, vel de jure patronatus, vel electivum quoties reticeatur nullitatem litterarum

(1) Innoc. III. Canonico Pictaviensi in *cap. super litteris* 20. *de rescript.*

(2) Ex Cane. Reg. XX *de idiomate*, quam superius explicui *cap. 9. num. 28.*

(3) *Cit. cap. IX. de beneficiariis num. 35, et 36.*

inducit ex Cancellariae Regula LVII. (1). Eoque vel maxime qualitas exprimenda est singulorum monasteriorum, quae *capita* sunt, et primates ordinum (2), sive abbatiae, sive prioratus filiae illorum capitum nuncupantur: aliter impetranti obreptio nequaquam subsequens possessio etiam triennalis suffragabitur (3).

VI. Deinde verus annuus valor fructuum, seu reddituum vacantis Ecclesiae, seu beneficii per florenos auri, aut ducatos auri de Camera, seu aliam monetam secundum communem aestimationem exprimendus est: alioquin ob fallacem valoris narrationem nullas fore collationum gratias, sancitum est Cancellariae Regula LV. (4), tam ob interesse annatarum, quam ut

(1) *Canc. Reg. LVII.* de expressione qualitatuum benefic. in impetrationibus *vult*, quod super beneficiis ecclesiasticis de qualitatibus illorum, *videlicet*, an dignitates, personatus, vel officia sint, eisque imminet cura animarum, et ad illa consueverint per electionem assumi, mentio fiat: alias gratiae desuper factae sint nullae. Etsi qualitates huiusmodi affirmative, vel conditionaliter non exprimantur, negativa expresse desuper fiat in beneficiis, quae tales qualitates, vel eis aliquas consueverint habere.

(2) Ea recensui superius *cap. 11. num. 11.*

(3) Trid. in *cap. cum pleraque 21. sess. 25. de regularib.*

(4) *Canc. Regula LV.* de exprimendo valore in impetrat. *disponit*, quod in gratiis, quas quibusvis personis de beneficiis vacantibus, seu certo modo vacaturis fieri contigerit, illorum . . verus annuus valor per *marchas argenteas*, aut *sterlingorum*, vel *libras Turonenses parvorum*, seu *florenos auri*, aut *ducatos*, vel *uncias auri*, seu *aliam monetam* secundum communem aestimationem exprimitur: nisi personae praedicta beneficia, quae tum obtinuerint, aut in quibus, vel ad quae jus eis competit, juxta ipsarum oblationes, aut alias dimittere teneantur: alioquin gratiae praedictae sint nullae. Et idem servetur in gratiis, quas a S. S. *motu proprio* emanare contigerit, quoad beneficia tamen, de quibus per S. S. pro tempore providetur, seu provideri mandatur, aut alias disponitur, ac litteris, per quas pro tempore ad Ecclesiarum Patriarchalium, Cathedralium, ac monasteriorum regimina *promotis* conceditur, ut *monasteria*, et *alia beneficia* ecclesiastica saecularia, et regularia per eos obtenta, et in quibus, et ad quae jus eis competit, *retinere possint*. De valore ducatorum auri de Camera, et florenorum, eorumque ratione ad hujus Regni monetam superius sat dixi *cap. de reservat., et affect. num. 38.*

Papa certiozem habeat nolitim qualitatis beneficiorum pro re-
cta eorumdem distributione (1), provisurus ne quis relictio, vel
deminuto valore suum supra meritum, et indigentiam plus ae-
quo de beneficiis accipiat, neque per falsam valoris expressio-
nem aequum pontificiae dispensationis modum intervertat (2).
Et quamquam annata non solvatur pro beneficiis 24. ducatos
auri de Camera non excedentibus: verum quoque valorem
oportet beneficii quantumlibet exigui exprimere (3).

VII. Stylus nihilominus invaluit tolerandi excessum valoris
in sexta parte, seu sustinendi collationem apostolicam, quam-
vis consluerit, quod vera fructuum quantitas in sexta parte
expressam quantitatem excedat (4). De minimis enim curare
Praetor non solet. Si quis vero impetraverit ob falsam valoris
expressionem beneficium alteri jam collatum, narrans fructus
ejusdem ex. gr. *ascendere* ad ducatos quadraginta, quos alter
falso exposuerat ducatos 24. *non excedere*: impetrans cogitur
usque ad obulum ostendere valorem fructuum, quem expres-
sit per *ascensum*, nullam erroris vel levissimi tolerantiam ex-
perturus in alterius detrimentum (5).

VIII. In valore hujusmodi exprimendo, et probando certi red-
ditus tantum computantur, non incerta emolumenta, quae so-
lent intuitu personalis tantum servitii, et praesentiae in fun-
ctionibus adventitiis adquiri (6): et *distributiones quotidianae*
appellantur (7). Et e contrario deducuntur onera necessaria.

IX. Erroneam valoris expressionem saepe excusat mobilis

(1) Rot. dec. 185. par. 3. rec. num. 3, Card. de Luca de be-
nef. disc. 90. num. 8.

(2) Ut notat Gomesius in prooemio ad eandem Reg. LV. de
expr. valore.

(3) Rigant. in Reg. LV. num. 19.

(4) Card. de Luca in summa de benef. num. 158, et cit. disc.
90. Rota, et alii apud Rigant. loc. cit. num. 95.

(5) Rota coram Cerro dec. 578. num. 5; et alii apud Rigant.
ibid. num. 100. et seq.

(6) Card. de Luca in summa de benef. n. 156.

(7) Idein cit. disc. 90. n. 13, et in summa n. 287. Si beneficii,
vel praebendae fructus in quotidianis distributionibus consistunt,
valorem consuevisse tunc exprimi, non excedentem 24. ducatos
auri de camera tradit Rigant. loc. cit. n. 44.

honorum locatio, credulitas ex publica fama, consensu natio in provisione praedecessoris, immutatio consueti status beneficii, ceterae huiusmodi caussae: praesertim vero clausula cum facultate augendi, vel minuendi apponi solita in supplicationibus ex Cancellariae Regula LXV. *quod fructus augeri possint in tertia parte vigore clausulae* dumtaxat in expeditione bullarum (1). Itaque bullis expeditis consummata dicitur eadem clausula, neque non integra nullam vim habet (2).

X. Ab ista tamen Regula excipiuntur concistorialia beneficia, quorum valor praesens non exprimitur, et bullae expediuntur habita ratione antiqui valoris in libris Camerae apostolicae taxati, quamvis vel augmentum, vel diminutionem passus ille fuerit. Et quandoque Pontifex eidem Regulae derogat, praesertim in provisionibus motu proprio, in quibus valorem, vel ignoratum, vel qualitercumque tacitum declarat pro expresso habere. Addit Rebuffus beneficii valorem exprimi non debere, cujus retentio per apostolicam dispensationem, non prius collatio impetretur (3).

XI. In resignationibus non minui, sed augeri per fraudem solet beneficii valor, ut videatur sufficiens pensioni plus aequo solitae. Edixit autem Cardinalis Corradinus Innoc. XIII. pro datariis jussu Pontificis: *ut qui beneficia etiam simplicia resignare voluerint, teneantur exprimere in suis libellis, a quo tempore possideant beneficia, quae resignare intendunt, nec non verum annum valorem eorundem, praesertim quando resignationes fieri debent cum reservatione pensionis, in quibus plerumque, ut reservari possit major pensio, valor fru-*

(1) *Reg. LXV. ipsamet declarat in vim clausulae, seu concessionis ejusmodi valorem ipsum usque ad tertiam partem valoris expressi, et in prima, quae desuper fiet, litterarum expeditione dumtaxat augeri posse, at eas, quas litteris jam expeditis cum expressione valoris specificati, aut non integro augmento praedicto, denuo desuper expediri contigerit, litteras cum aliquo augmento valoris huiusmodi nullius esse roboris, vel momenti, etiamsi motu proprio beneficiales gratiae, et dispositiones quaecumque a S. S. emanaverint.*

(2) *Rot. dec. 108. par. 10. rec. n. 11, Card. de Luca cit. disc. 90. n. 20.*

(3) *Apud Rigant. in Reg. LV. n. 27.*

ctuum solet augeri: alias resignationes fore nullas, et irritas (1).

XII. In collationibus, quas Ordinarii faciunt, non exprimitur valor, qui relinqui olim in litteris etiam Sedis Apostolicae consueverat.

XIII. Originem istius Regulae de exponendo valore alii tribuunt Joanni XXII, qui reservavit Sedi Apostolicae fructus primi anni beneficiorum inferiorum deinceps vacantium, exceptis episcopatibus, et abbatibus regularibus (2): alii Bonifacio IX, qui anno 1392. durante schismate ad suppeditandos armorum sumptus immensos imperavit, ut quicumque beneficium adipisceretur, episcopatum quoque, vel abbatiam, dimidium annui redditus fisco persolveret apostolico (3). *Annatae* nomen generaliter in quatuor species dividitur a Fagnano (4). Prima species denotat *integrum* unius anni redditum. Secunda *dimidiam* partem veri valoris annui beneficiorum inferiorum, quae integre Summo Pontifici reservatur. Tertia accipitur pro *communi servitio*, seu pro certa quantitate solvenda pro singulis episcopatibus, et abbatibus secundum taxam antiquam, cujus dimidium Papae abdicatur, reliquum sacro Collegio Cardinalium in Urbe praesentium distribuitur. Quarta pro *minutis servitiis*, seu quinque portuunculis, quae nonnullis Papae ministris, et officialibus dividuntur. Quinta pro *quindennio*, quod singulis quindecim annis persolvitur pro beneficiis perpetuo unitis juxta Pauli II. constitutionem (5).

XIV. Vacationis *modus*, et *causae* etiam exprimi debet. Quum vacatio per obitum a cessione, ac renunciatione differat, et hanc ea non complectatur ex textu Bonifacii VIII. (6): vacatio per obitum oportet ut impetranti, simul ac Papae, ejusve Datario

(1) Rebuff. in *prax. benef. tit. forma novae provisionis* verb. *eorumque fructuum* n. 1, et seq.

(2) Jo. XXII. in *extravag. 11. de praebendis*.

(3) Odoric. Rainald. *ad an. 1392. n. 5*, et Platina in *vita Bonif. IX.*

(4) Fagnan. in *cap. praeterea, ne praelati vices suas, vel Eccl. sub annuo censu concedant.*

(5) Paul. II. in *const. deoet Romanum.*

(6) Bonif. VIII. in *cap. susceptum 6. de rescriptis. in VI.*, de quo dictum est supra *cap. 10. num. 26.*

ionotuerit verisimiliter ante impetrationem ex Cancellariae Regula XXX: quae gratiam irritat, nisi post obitum beneficiariorum, et ante datam gratiae tantum temporis effluxerit, quantum necesse est ut interim vacationis notitia verisimiliter de uno ad alterum locum pervenire naturali modo potuerit (1). Pariter in vacationibus per religiosam professionem haec debet praecedere diem supplicationis ex Regula XLVI (2). Modus in Cancellaria exprimendus nullatenus admittitur, nec suffragatur ex Regula XLV (3).

XV. Addit Regula LVIII: *si reservetur beneficium per contractum matrimonii, non dentur alii modi vacationum de futuro, nec censeatur beneficium reservatum specialiter, vel affectum, nisi sequatur matrimonium. Sed in beneficiis per promotionem, aut ingressum religionis, vel assecutionem incompatibilium vacaturis ponatur clausula, etiamsi non petatur* — cum beneficia huiusmodi praemisso, vel alio quovis modo, praeterquam per obitum obtinentis vacare contigerit — *etiamsi vacent: decernens irritum etc.* Hinc Doctores consentiunt, quoties gratia collationis pontificiae ad unum aliquem vacationis modum expositum sit *dispositive* (ut ajunt) restricta: clausulam, quae de stylo adjicitur litteris apostolicis, *sine praemisso, sive alio quovis modo*, non suffragari, nisi cum primus vacationis modus expressus, cui per clausulam eandem alii etiam incerti cumulantur, *de facto* sit verus, vel saltem habeat famae fomentum (4). Nam impetrans beneficium aliquod, hoc, vel illo modo vacans, aut diuturna vacatione ad Sedem Apostolicam devolutum, eam vacationem *de facto* secutam debet in primis ostendere, quam exposuit, eique non proderit sola vacatio *de jure* (5).

(1) De qua supra dictum est *cap. 6. de collatoribus n. 7.*

(2) De hac superius dixi *cap. 10. n. 20.*

(3) Hanc habes exscriptam eodem *cap. 10. n. 26.*

(4) Card. de Luca in *summa de benef. num. 162*, Caesar de Grassis *dec. 124. n. 7*, Rigant. in *Canc. Reg. 47. n. 54, et seq. et in Reg. 58. n. 112.*

(5) Innoc. III. in *cap. cum nostris 6. de concess. praeb.* suis quum litteris mandasset praeposituram Ecclesiae Lausanensis conferri thesaurario Lausanensis, qui eam ex diuturna vacatione devolutam exposuerat, eique ipsam pontificii executores adjudicas-

XVI. Eademque ratione habetur irrita impetratio beneficii, quod commendatum possideretur ab aliquo, si Pontifici exposita non fuerit commendatio (1): quamvis ob commendam non cesset prima ejusdem vacatio. Quoniam litteras de alterius licet colorata, merique facti possessione mentionem non facientes impetrandi cuique nil prodesse jam novimus (2), et antequam vacent beneficia, nemini concedenda esse constituit Concilium Lateranense III. (3), vacare autem non videtur, quod commendatarium habet possessorem.

XVII. Ordinarii vero collatores motu proprio, ut dixi, beneficia distribuentes non tenentur certum in litteris suis modum vacationis exprimere, eorumque collatio rata semper erit, quomodocumque vel de facto, vel de jure vacatio contigerit (4).

XVIII. Mensis etiam reservatus, in quo acciderit vacatio, exprimendus est in precibus ex textu Regulae IX. Simul et an in Curia intra duas dietas, vel extra eam secuta sit.

XIX. Familiaritas exponenda insuper est in beneficiis vacantibus per cessum, vel decessum alicujus ex familiaribus Cardinalium: ne fraudetur in eisdem impetrandis consensus vel Cardinalis patroni ex Regula XXXII, vel Cardinalis Ordinarii collatoris ex Regula XXXIII. (5).

XX. Dignitas quoque impetrantis, et alterius beneficii possessio nisi exponantur, nova collatio irrita est: quum velle Pontifex jure praesumatur, ut personae pluribus redditibus abundantes per litteras apostolicas pauperes clericos super minoribus beneficiis non inquietent (6). Eoque magis non valebit col-

sent, ut *de jure vacantem* ob promotionem Praepositi ad Episcopatum, quamvis ab ipso Episcopo retentam communi canonicorum consensione, seu nova electione, Papa irritam fuisse litterarum suarum executionem pronuntiavit: *cum praepositura illa*, ait, *non vacaret de facto, quia talis possessio plus habet facti, quam juris*.

(1) Ex supradictis *cap. 11. de commenda num. 23. DD. in cap. nemo de elect. in VI.*

(2) Ex *cil. cap. cum nostris 6. de concess. praeb.*

(3) Sub Alex. III. in *cap. nulla 2. eod. tit.*

(4) Rota coram Puteo *dec. 33. lib. 2. coram Carillo dec. 395. lib. 3*, et alibi apud Rigant. in *Reg. 47. n. 19, et 20.*

(5) Videsis dicta superius *cap. 6. num. 9, et 10.*

(6) Lucius III. in *cap. ad aures 8. de rescriptis.*

latio, si falso exposuerit impetrans, qui beneficium licet exiguum possidebat, sese beneficium ecclesiasticum non adhuc esse consecutum (1). Hinc ad evitandas fraudes de stylo in litteris pontificiis, quoties dispensationem retinendi beneficia prius obtenta non postulet impetrans, adjicitur clausula, quod orator duo, vel tria simplicia, et personalem residentiam non requirentia beneficia non habet, quorum, insimul fructus 24. duc. auri de Camera non excedunt, aut quod alia beneficia non possidet.

XXI. Impetrationem praebendae in Ecclesia numerata, si numerus Canonicorum non expressus excedatur, etiam non aucto praebendarum numero, non valere Innocentius III. rescripsit (2). Unde colligitur necessitas exprimendi numerum, et Canonicorum, et praebendarum statuto, vel consuetudine praefixum, ne obreptio fraudulenta inanem faciat impetrationem praebendae alicujus supra numerum vacantis.

XXII. Errores in ejusmodi qualitatibus vel reticitis, vel falso narratis non raro irrepentes cauti solent impetrantes novis precibus sinceris emendare. Si nemo jus aliquod super eodem beneficio interea quaesivit, reformatio re integra nullum incurrit offendiculum, quoties eam velit Datarius indulgere. Cardinalis Corradus Alexandri VII. Prodatarius die 16. Januarii 1662. decrevit: *si nondum fuerit registrata supplicatio, super cujus emendatione petitur secunda gratia, quia necessaria non est gratia perinde valere, reformatio non denegatur: nisi aliter nobis vel Datario pro tempore existenti visum fuerit. Post completam vero bullarum expeditionem, nempe illarum plumbationem, et registrationem, non concedantur reformationes, sed tantummodo perinde valere, aut novae provisiones, excepto casu alicujus materiae levis, veluti formae gratiosae, vel similis, nisi aliter nobis, vel eidem Datario pro tempore existenti visum fuerit: et tunc quoties dabuntur hujusmodi reformationes, omittatur in supplicationibus reformationum hujusmodi clausula: dummodo, si litterae apostolicae jam expeditae fuerint, vigore praesentis gratiae non corrigantur (3).*

(1) Greg. IX. in cap. si proponente 42. eod. tit.

(2) Innoc. III. in cap. constitutus 16. eod. tit.

(3) Apud Rigant. in Reg. 44. Canc. num. 25, et 26.

XXIII. Si quod alicui praejudicium sit emendatio illatura, tunc haerebit negotium in difficultate quum signandi novam supplicationem, tum expediendi litteras cum reformationibus sdb anticipato die prioris supplicationis. Statuit enim Cancellariae Regula XLIV: *quod super quibuscumque reformationibus signatis super impetrationibus quorumcumque beneficiorum vacantium, vel certo modo vacaturorum, in quibus petitur, quod litterae super prima data expediri possint, si ex hujusmodi expeditione sub tali data cuquam videatur posse fieri praejudicium, litterae hujusmodi sub ipsa prima data nullatenus expediantur, nisi reformationes hujusmodi per fiat sub prima data signatae fuerint.* Hocce quidem rescriptum, quo praevertitur intermedia cujuspiam alterius impetratio, non facile indulgetur, illudque oportet ex gratia petere speciatim nova supplicatione cum inserto prioris supplicationis tenore (1). At reformationis gratia sub eo ipso die, quo petitur, sine scrupulo datur facilius.

XXIV. Leves autem defectus in forma gratiose saepius incidentes, quoties videantur sine circumveniendo animo incidisse, nullasque insidias menti pontificiae struxisse, mos est supplendi, et sanandi pluribus etiam, quam duabus supplicationibus, quae signantur uno eodemque die prioris datae, tamquam ab ea promanantes: ejusque tenorem non exprimunt, sed qualitates tantum, particulasque in prima omissas exponunt, addendo ad extremum clausulam *cui prius* sine necessitate petendi speciale rescriptum Regula XLIV. imperatum (2). Quandoquidem Cancellariae Regula LXXII. et Ultima *de potestate Rmi. D. Vicecancellarii, et Cancellariam Regentis* inter alia disponit: *quod Vicecancellarius, seu Datarius possit corrigere nomina, et cognomina personarum, non tamen earum, quibus gratiae, et concessionis fiunt, ac beneficiorum, dum tamen de corpore constet* (3).

(1) Nam Alexander III. in *cap. ceterum 3. de rescriptis* declaravit nullius fore momenti secundum rescriptum, quod nullam de primo faciat mentionem.

(2) Rigant. *ibidem* num. 7, et seq.

(3) Nam ex civili textu Marciani in *l. falsa demonstratio 33, et Florentini in l. nominatim 34. D. de condit.*, et *demonst. falsa* cujusque rei demonstratio, quoties certum aliunde sit corpus demonstratum, non nocet.

(*) Ad tit. XI. lib. 5. Decretal. de verb. sign. et Cancell. Reg. LVI. de clausulis.

- I. Sententias, et finalem, et intermedias clausula significat.
- II. Consuetae clausulae multae in litteris pontificiis tacite subintelliguntur.
- III. Expressae autem si a stylo discordent, vel vitiosa latinitate sint conscriptae, suspicionem ingerunt falsitatis.
- IV. Earum aliae substantiales, aliae superfluae.
- V. In quinque classes distribuuntur.
- VI. In prima sunt, quae pertinent ad exordium litterarum, et vim causae impellentis fere habent.
- VII. In secunda spectantes ad narrationem facti, quae si errorem contineant, gratiam plerumque vitiant.
- VIII. Tertiae classis ad dispositionem, quarum aliae conditionales, aliae causales.
- IX. Conditionales vim gratiae suspendunt, et subjiciunt eventus conditionis, secus causam, vel modum exprimentes.
- X. Particulae si, dummodo, quatenus, postquam, nunc pro tunc, et ablativus absolutus conditiones fere indicant.
- XI. Modalis dispositio aliquid faciendum imponit post perfectam gratiam, statuitque poenam vel rescissionis, vel censurarum.
- XII. Causa finalis, et modus unum idemque sonant saepius.
- XIII. In diem concepta dispositio non conditionalis, nec modalis, sed pura est: quemadmodum et temporanea, seu ad beneplacitum concedentis.
- XIV. Ordinarii collatores nec diem, nec conditionem valent adjicere, indultarii vix modum novae provisionis.
- XV. Clausularum aliae conjunctivae, aliae disjunctivae.
- XVI. Species vacationum aliquae disjunctim exprimuntur, aliae generatim, vel quovis modo.
- XVII. Ampliatives clausulas petentibus indulget Regula LVI.
- XVIII. Plures vacationum species non complectitur generalis clausula quovis modo.
- XIX. Quidam alii ad majores non extenditur.
- XX. Cum adnexis, et connexis quae veniant.
- XXI. Absolutio a censuris nil ultra litterarum effectum prodest, neque insordescentibus.

XXII. *Quarto, clausula derogatoria generalis neque ad decreta Concilii generalis, neque ad Regulas Cancellariae, neque ad locorum statuta, privilegia, vel consuetudines extenditur.*

XXIII. *Executionem moderantes clausulae ad quintam classem pertinentes nil dispositioni addunt, vel detrahunt.*

XXIV. *Decretum irritans quandoque additur ad cautelam executionis.*

XXV. *Data diei extendenda sine notis numerorum litteras claudit.*

XXVI. *Eaeque tempus figit qualitatibus personae, et servat suam cuique praerogativam temporis.*

XXVII. *Et parva, et magna data usu viget.*

XXVIII. *Inter plures uno die, eademque data concurrentes nonnulli praeferuntur gradatim, nisi Papa gratificationem alicui speciatim indulserit.*

XXIX. *Annus ab Incarnatione incipit in litteris sub plumbo, a Nativitate Domini in brevibus sub annulo Piscatoris.*

I. Clausula proprie dicitur, quae sententiam, orationem, carmen, litteras claudit et finit, quam vulgus conclusionem appellat (1): sed Jureconsulti eam saepius accipiunt pro quacunque parte, seu articulo cujuslibet scripturae (2). Utamque notionem vox ista heic habet. In litteris apostolicis adponit quum soleant clausulae multiformes quum de stylo communes; tum peculiares pro rerum adjunctis variae, quae varios pariunt effectus: earum vim expendere curatius debent Ordinarii locorum, et apostolici executores, ne in gratiis, mandatisque Pontificum exequendis cespitent, vel haereant, vel ab aequo, et recto declinent per imprudentiam.

(1) Cicero *ep.* 2. *Quoniam mihi, ait, nullum scribendi argumentum est, utar ea clausula, qua soleo.* Seneca *ep.* 67, *nec potest dici hoc non esse par maximis bonum, quod beatæ vitæ clausulam imposuit, cui Epicurus extrema voce gratias egit.*

(2) Ulpian. in *l. sed etsi* 23. §. 3. *D. ex quib. caus. major.* Ait Praetor, aut cum eum invitum in jus vocare non liceret, neque defenderetur. Haec clausula ad eos pertinet, lectus inquit, quos more majorum sine fraude in jus vocare non licet. Idem in *l. La-beo* 25. §. 1. *D. de recept. arbitr.* explicat clausulam compromissi. Tum senatusconsulti clausulam in *l. utrum* 23, *D. de hered. petit.* Stipulationis clausulam Venulejus in *l. ex clausula* 17. *D. judicatum solvi.* Paulus clausulam testamenti in *l. sed etiam* 31. *D. de legatis* 1, ceteri.

II. In primis clausulas quidem omnes de stylo consuetae, etiamsi non exprimantur, pro appositis, et expressis habent, sensuque tacito subintelligi consentiunt doctores (1). Cujusmodi sunt, *si est ita, si preces veritate nitantur, ut asseris, veris existentibus narratis* (2), *si beneficium vacat, vel quatenus vacat, dummodo non sit alteri jus quaesitum, vel sine juris alieni praejudicio* (3), vel *quantum de jure poteritis* in causae cognitione, ac decisione quibuscumque mandata (4).

III. Verum si eae ipsae, dum exprimuntur, a stylo, et more Curiae diffformes appareant, et insolitis verbis conceptae, gravem suspicionem falsitatis ingerunt (5). Nam Innocentius III. falsas ex eo pronunciavit quasdam litteras in speciem papales, quod contra morem Sedis Apostolicae in eis Episcopo datus esset *dilecti filii* titulus, et sermo pluralis ad unam personam directus (6). Vitiosa itidem latinitas eas eodem falsitatis vitio laborare sat indicat: quum Lucius III. rescripserit nullam esse fidem adhibendam pontificiis litteris, quae continerent errorem in latinitatis constructione manifestum (7).

IV. Clausularum aliae *substantiales* et *momentosae* adeo gratiam signatam, litterasque Sedis Apostolicae alliciunt, ut iis non adimpletis, vel non comprobatis, collatio pontificia corruat et irrita fiat: aliae *non*, sed tamquam leves, aut inanes, et supervacaneae dispositionem numquam vitiant, neque vim gratiae enervant, quamvis earum implementum defecerit. Quatenam ad hoc, illudve genus pertinent, nostra magis interest nunc inquirere.

V. Quinque partes litterarum apostolicarum, *proemium*,

(1) Kokier *ad Reg. de non toll. jus quaesit. num.* 15.

(2) Hanc inesse tacitam litteris suis rescripsit Alex. III. in *cap. ex parte 2. de rescriptis*.

(3) Hanc aliam Bonif. in *cap. quamvis 8. de rescriptis in VI.* Nam Imp. Theod., et Valentin. in *l. rescripta 7. C. de precib. Imp. offerend. rescripta contra jus elicitum ab omnibus iudicibus refutari praecipunt: nisi forte sit aliquid, quod non laedat alium, et prosit petenti.*

(4) Emm. Gonzalez in *cap. ex parte 2. de rescriptis n. 6.*

(5) Innoc. III. in *cap. caussam 18. de rescriptis.*

(6) Innoc. III. in *cap. quam gravi 6. de crimine falsi.*

(7) Lucius III. in *cap. ad audientiam 10 de rescriptis.*

narratio precum, dispositio gratiae, derogatio contrariis, et executio, quinquuplicant classes clausularum: quum suas unaquaeque pars clausulas peculiares habeat.

VI. Haec in exordiis bullarum *in forma gratiosa* exprimi solent: *Vitae, et morum honestas, aliaque laudabilia probitatis, et virtutum merita* uniuscujusque impetrantis, quae dicuntur Papam inducere ad gratiam liberalem, vel *litterarum scientia, vitae, morumque honestas*, cetera pro doctoribus: vel *Religionis zelus, et vitae merita* pro regularibus. In forma dignum haec alia: *Dignum arbitramur, et congruum, ut illis se reddat Sedes Apostolica gratiosam, quibus ad id propria virtutum merita laudabiliter suffragantur . . . volentes dilectum filium N. apud nos de vitae, ac morum honestate, aliisque probitatis ac virtutum meritis multipliciter commendatum horum intuitu favore prosequi gratioso*. Illujusmodi praemissa merita nemo unus impetrantium cogitur executoribus ostendere: quia ad causam non finalem, sed impelleptem pertinent (1). Regula vero juris ex probatissima, quamlibet concessionem ex falsa causa impellente non vitari, nec irritam fieri (2). Cum Gregorius X. in Concilio Lugdunensi statuerit *evidentem* solummodo scientiae, vel alium personae defectum, id si electis promovendis ad dignitates obji-

(1) Id scite monet Rebuffus in *cit. prax. tit. forma, et declaratio novae provisionis* n. 15.

(2) Pomponius in *l. damus* 52. *D. de condit. indebiti* ait: *damus aut ob causam, aut ob rem. Ob causam praeteritam: veluti cum ideo do, quod aliquid a te consecutus sum, vel quia aliquid a te factum est: ut etiamsi falsa causa sit, repetitio ejus pecuniae non sit. Ob rem vero datur, ut aliquid sequatur: quo non sequente, repetitio competit*. Similiter Paulus in *l. in summa* 65. §. 2. *D. eodem*, respondit, *id quoque, quod ob causam datur, puta quod negotia mea adjuta ab eo portavi, licet non sit factum: quia donari volui, quamvis falso mihi persuaserim, repeti non posse*. Certam notam discriminis inter causam impellentem, et finalem Pomponius, et Paulus pulam haec designant: dum causam praeteritam esse definiunt, quam impellentem nos dicimus, sequentem vero, seu rem futuram, quam nos finalem. Quandoquidem philosophi consentiunt, finem actionum humanarum esse primum in intentione, ultimum in executione.

ciuntur, examinandum initio fore (1), ea hinc jure digna quisque praesumitur, qui evidenter indignus non appareat. Ad primam hanc classem pertinent clausulae *motu proprio*, *ex certa scientia*, id genus aliae, quae nullam postulant probationem extrinsecus. Si quae vero in exordio exprimantur, quae in aliis litterarum partibus repetuntur (2), aliam vim habent mox explicandam.

VII. Omnia, quae narrantur in precibus, quam in facto constent: eatenus probanda sunt, ut manifesta pateat veritas precum nullo subreptionis vitio corrupta. *Ad omnia* quidem *superius narrata referri* conditionalem clausulam *si est ita*, seu expressam, seu tacitam, rescripsit Innocentius III. (3). Qua nimirum fit, ut gratiam nolit penitus Papa concedere, si narrata res ita non sit. Ad hanc ipsam gratiae conditionem firmandam alludunt iteratae in litteris clausulae, *sicut accepimus*, *oblata petitio continebat, ut asseritur, ut praetenditur, ut praemittitur, ut supra*. Praeterquam quod Cancellariae Regula LXI. cautum est: *quod in litteris super beneficiis per constitutionem execrabilis vacantibus ponatur clausula*, si est ita: *similiter de quibuscumque narratis informationem facti requirentibus*. Singula vero facta, quae narrantur vel ultro, vel necessitate juris, non unius, ejusdemque momenti esse, erroresque in eis narrandis incidentes, alios tolerari, alios emendari, alios nullam admittere curationem, dixi jam superius (4).

(1) Greg. X. in *cap. si forte II. de electione in VI.* Huc spectat ea item exordii forma, quam supra retulimus *cap. 5. n. 11. lit. b: ad hoc nostrum nos compellit officium, ut Christi pauperibus, prout quemque dignum noverimus, praestemus adjumentum*. Et alia similis S. Greg. M. relata superius eodem *cap. 5. n. 7. lit. f: imbellicitati ejus, atque necessitatibus consulentes intuitu pietatis*. Consimilis ea est, quam nunc etiam usurpari in litteris commendarum, *ut commodius onera sustentare valeas, de aliqujus subventionis auxilio providere cupientes*, jam praemonui superius *cap. 11. n. 24.*

(2) Paulus in *l. Titia 134. §. 1. D. de verb. oblig.* respondit: *plerumque ea, quae praefationibus convenisse concipiuntur, etiam in stipulationibus repetita credantur: sic tamen, ut non ex ea repetitione inutilis efficiatur stipulatio.*

(3) Innoc. III. in *cap. olim 25. de rescriptis.*

(4) *Cap. 12. de precum veritate etc.*

VIII. Tertia classis clausulae, quas dispositio complectitur, negotium plus facessunt quam numero, tum veritate, ac sensu plerumque ambiguo. Quandoquidem dictiones *prout, sicut, secundum, quemadmodum*, et similes clausulis istis adjectae modo conditionem, modo causam denotant. *Haec determinatio* — secundum praeteriti temporis morem — *et causalis, et conditionalis potest intelligi*, (docet Innocentius III.), *et tam ad personale, quam impersonale verbum referri. Ubi enim impersonale verbum determinat, conditionalis intelligitur, et est sensus: concedimus subrogationem Abbatis S. Silvani apud Altiacense monasterium in vestra semper dispositione consistere secundum praeteriti temporis morem, idest si mos praeteriti temporis talis fuerit. Si vero verbum determinet personale, causaliter debet intelligi, ut sit sensus: concedimus secundum praeteriti temporis morem, idest quia mos praeteriti temporis sic obtinuit subrogationem. Hic autem sensus rectior esse videtur: hactenus Pontifex (1). Hanc ipsam regulam adhibuit Rota in clausula: prout hactenus consuetum extitit (2).*

IX. Maximum vero discrimen inter duo haec genera clausularum quam Innocentii textus reliceat, operae pretium est heic statuere apertius. *Conditionalis* clausula plane vim habet suspendendi gratiam provisionis usque ad eventum conditionis: adeo ut quoties defecerit conditio, fiat caduca, et irrita dispositio (3).

(1) Innoc. III. in *cap. Abbate S. Silvani* 25. *de verb. sign.* Quam hoc in textu exponit clausulam Innocentius III. fert Emm. Gonzalez in notis ad hocce *cap.* ex Gallia Christiana to. 4, et Alberto Miraeo *de coenobiis Belgicis cap.* 40., adjectam eam fuisse privilegio, quod Paschalis Papa, et Callistus II. monasterio S. Bertini fundatori, et reformatori Alticensis monasterii S. Silvani ord. S. Benedicti in Germania in dioecesi olim Morinensi, nunc Audomarensi concesserant, ut ex ipsius S. Bertini collegio Altiacensis Abbas eligeretur *secundum praeteriti temporis morem*. Sed Monachi Altiacenses de suo ipsorum gremio eligere Abbatem contendentes negabant in facto consuetudinem, eamque *conditionaliter* positam in apostolicis privilegii litteris fuisse asseverabant, ut vim omnem privilegio conditionali adimerent.

(2) Rota coram Coccino *dec.* 448.

(3) Conditio in praeteritum, non tantum in praesens tempus relata statim aut perimit obligationem, aut omnino non differt, *ait Modestinus in l. conditio* 100. D. *de verb. oblig.*

Quoad vero pendeat incertus ejusdem eventus, sola stat spes exequendae dispositionis post impletam conditionem, instar creditoris conditionalis (1): quum interea nec cedat, nec veniat dies executionis pendente adhuc conditione (2). *Causalis* autem, quae scilicet causam praeteritam, seu impellentem spectat, quamvis ea falsa fuerit, dispositionem jure, nec destruit (3): quemadmodum nec falsa demonstratio nocet (4). Nam *demonstratio plerumque vice nominis fungitur, nec interest falsa, an vera sit, si certum sit, quem testator demonstraverit*, Florentinus ait (5). Hoc autem inter demonstrationem, et conditionem interest ex ejusdem Jureconsulti sententia, quod *demonstratio plerumque factam rem ostendit, conditio futuram*. Insuper oportet *modales* clausulas a conditionalibus distinguere. *Nec enim parem dicemus cum Scaevola eum, cui ita datum sit, si monumentum faciat, et eum, cui datum est, ut monumentum faciat* (6). Nam prior particula *si* conditionem, posterior *ut* modum designat. Quoties modus non impleatur, dispositio modalis non irrita erit ipso jure: sed locus datur ad eam, quae ab initio valuit, rescindendam, et abrogandam (7). Eamque distinctionem adhibuit Ulpianus defi-

(1) *Ulp. in l. conditionales 54. De verb. sign. conditionales creditores dicuntur, ait, et hi, quibus nondum competit actio, est autem competitura: vel qui spem habent, ut competat.*

(2) *Ulp. in l. cedere diem 213. D. de verb. sign. Idemque in l. legata 41. D. de condit. sub conditione relicta, inquit, non statim, sed cum conditio extiterit, deberi incipiunt.*

(3) *Ex supradictis cap. 12. n. 43.*

(4) *Marcianus in l. falsa demonstratio 33. D. de condit. et demonstrat., et causis, et modis.*

(5) *Florentin, in l. nominatim 34. D. eod.*

(6) *Scaevola in l. eas causas 80. D. eod. Consonat rubrica C. de donat. quae sub modo, vel condit, vel cert. temp. confic.*

(7) *In legatis enim, et fideicommissis etiam modus adscriptus pro conditione observatur, ex Antonini rescripto in l. 1. C. de his, quae sub modo legata, vel fideicommissa relinquuntur. Propterea modus nonnumquam a jureconsultis conditio dicitur. Scaevola in l. libertis 107. D. de condit. quum exponeret legatum domus ita conceptum sub modo: ut in ea habitent liberti, ne de nomine exeat, quaesivit, an conditio adposita (ne de nomine exiret) an respiciens quoque legatum pertineret.*

niens quaestionem *de additione in diem pura* sub modo, aut *conditionali* (1).

X. Conditionem fere indicant particulae *si, dummodo, quatenus, et postquam*. Igitur *conditionales* clausulae sunt, *si idoneum reperiatis, si est ita, si ad te spectaverit* (2), *si et postquam vacationi locus factus fuerit*: in impetrationibus ob crimen, *si neutri, vel si nulli* sit jus quaesitum (3), *si aliquid canonicum non obest impedimentum*. Vel *dummodo tempore datae praesentium non sit a'leri jus quaesitum, dummodo intrusus non sit, dummodo patronorum accedat assensus, dummodo a medietate saltem patronorum sit praesentatus, dummodo nulla intercesserit simoniae labes, nec alia illicita pactio, dummodo remaneant centum pro rectore*. Vel *quatenus non sit contraria statutis, quatenus sit in usu, quatenus idoneus reperiatur, quatenus vacet, quatenus opus sit* (4), vel *postquam* clericatum, aut habitum regularem susceperit (5), ceterae id genus. Per ablativum quoque absolutum saepe concipiuntur ejusmodi conditionales clausulae (6): ex.

(1) Ulp. in *l. quoties* 2. *D. de in diem additione*, quaerens utrum pura, et modalis, an conditionalis esset emptio fundi in diem addicti, hoc videlicet pacto, *nisi quis intra Kalendas Januarias proximas meliorem conditionem fecerit*, respondit ita distinguens: *si quidem hoc actum est*, ut meliore allata conditione discedatur, *erit pura emptio, quae sub conditione resolvitur: sin autem hoc actum est*, ut perficiatur emptio, *nisi melior conditio afferatur erit emptio conditionalis*.

(2) Hanc exponit Bonif. VIII. in *cap. cum aliquibus* 4. *de recriptis*. in VI.

(3) De his supra dictum est *cap. 10. n. 17*.

(4) Rota coram Io. B. Coccino *dec. 35. n. 1*.

(5) Ex Rota *dec. 6. n. 2. par. 2. rec. et dec. 323. n. 17. par. 5. rec.* Iavolenus lectus. in *l. inter illas* 21. 7. *D. verb. sign.* docet: cum *fari potuerit, et postquam fari potuerit, multum interest: nam posteriorem scripturam uberiorem esse constat*. Scilicet vox *postquam* vim conditionis habet uberiorem voce *cum*; quae tempus, seu diem dispositioni adjectum indicat.

(6) Scaevola in *l. a testatore* 109. *D. de condit. et demonstr.* hanc explicat conditionalem dispositionem testatoris, *ut acceptis centum nummis restitueret Titia haereditatem coheredi suae*.

gr. *veris expositis*, vel *rebus sic stantibus*. *constituo tibi legitime de narratis, verificato prius jurepatronatus* quod asseritur, *accedente consensu patronorum* etc. Quoties ergo aliqua istarum conditionum litteris pontificiae collationis adjecta non impleatur: gratia collationis eo ipso perimitur, et corruit, et perinde habetur, ac si nulla ab initio fuerit. Quandoque conditionalis gratiae formam apertius indicat ea alia clausula *ex nunc pro tunc*, quoties jam expositis conditionalibus clausulis superadditur (1). Si electus ultra mensem praestare consensum electioni suae distulerit, omni jure *ex tunc* se noverit eo ipso privatum, similiter dixit Innocentius IV. (2). Particula vero *ex tunc*, sicut et *tum* extremum tempus condictum significat (3).

XI. *Modales* clausulae faciendum aliquid plerumque jubent post gratiam perfectam, et executioni demandatam (4). Quales sunt ex. gr. *quod animarum cura, si quae imminet, nullatenus negligatur, verum tenearis gradum Doctoris*, vel *sacros ordines intra annum suscipere*, vel *professionem fidei emitte* in manibus Episcopi, aut Vicarii generalis, aut coram Capitulo *intra duos menses* a die captae possessionis, vel *pensionem annuam scutorum tot clerico N. persolvere*, id genus aliae. Quae in transgressores statuunt, vel poenam vacationis *ipso facto*, vel privationem sententia judicis rite infligendam, vel censuras ecclesiasticas, e. gr. *alias lapsis diebus* ad solvendum provisionem designatis *ingressus* Ecclesiae Episcopo pensionario *interdictus existat*, vel sententiam ex-

(1) Cassador. *de praebend. dec.* 3. n. 15.

(2) Innoc. IV. in Conc. Lugd. cap. quum sit 6. *de elec. in VI.*

(3) Pompon. in l. si his 4. *D. de condit. et demonstr. si ita scriptum sit*, Ictus ait, si in quinquennio proximo filius Titio natus non erit, tum extremum quinquennio tempus significat.

(4) Cujus in l. demonstratio 17. §. ult. *D. de condit. si cui in hoc legatum sit*, ait, ut ex eo aliquid faceret, veluti monumentum testatori, vel opus, aut epulum municipibus faceret, vel ex eo, ut partem alii restitueret: sub modo legatum videtur. Clausula *facere oportere* ad modum refertur a Paulo in l. facere 189. *D. de verb. sign.* Hanc enim, ait, significationem habet, ut absteineat quis ab eo facto, quod contra conventionem fieret, et curaret, ne fiat.

communicationis incurrat clericus, vel perpetuo suspensus existat eo ipso ordinatus in sacris.

XII. Finem plerumque, seu *causam finalem* clausula *sub modo* concepta exprimit, quum modus, et finis promiscuam saepe obtineant notionem. Quia quodlibet beneficium datur propter officium, et ministerium ecclesiasticum (1): patet clausulas eas, quae residentiam, curamque spiritualem, aut S. Scripturae lectionem, aliudve munus beneficio adnexum imperant, ad causam finalem collationis pertinere (2). Qualis ea est, quae in provisionibus commorantium in Vrbe adjicitur, *ut a Curia intra duos menses recedere, atque adire ad suam residentiam debeant*. Hinc est, cur desertores residentiae, officiique sui, vel status clericalis ob cessantem causam finalem amittant vel ipso facto, vel per sententiam privationis beneficia sua (3). Idem clausulae in commendis novis monasteriorum imponentes commendatariis onus recuperandi bona, et aedificia restaurandi, *alias* monasterium eo modo commendatum *vacet eo ipso* (4), vim causae finalis habent.

XIII. Gratia pura *in diem* collata rarior est, quae scilicet non conditionalis, nec modalis effectum protrahit suum, quoadusque dies adscriptus advenerit, vel certus, vel incertus (5). Po-

(1) Ex supradictis *cap. 2. n. 2.*

(2) Ex summario supplicationis causam, seu rationem dignosci, ob quam Pontifex confert, Rigantius monet *tom. 1. in Reg. 2. Canc. §. 3. n. 298.*

(3) Singulas privationis causas dicam inferius *cap. 22, et ult.*

(4) Id quod explicui superius *cap. 11. n. 25.*

(5) Ex *cit. l. cedere diem 213. D. de verb. sign. stipulatio ita concepta: cum morieris, dari? nonnisi moriente eo committitur*, Papinianus ait in *l. ex ea parte 121. §. 2. D. de verb. oblig.* Ejusmodi designatio temporis nonnumquam conditio a Ictis dicta est, praesertim ab Ulpiano in *l. haec conditio: filiae meae cum nupsorit 10. de condit. et demonstr.* Ex Papiniani sententia, *dies incertus conditionem in testamento facit, l. dies 75. D. eod.* Et *pactum, quod in tempus certum collatum est, non magis inducit conditionem, quam si ex die debitor solvit, l. sufficit 56. D. de condit. indebiti.* Ulpianus docet inter incertum, certumque diem discrimen esse ex eo, quod certa die promissum, vel statim dari potest: totum enim medium tempus ad solveudum liberum pro-

Tom. II.

stulatis Principum, vel illustris patroni vix aliquando indulgens Apostolica Sedes ecclesiasticam dignitatem cum adnexa jurisdictione, vel animarum cura concedit impuberi hoc pacto, ut *postquam* ad aetatem legitimam is pervenerit, accessum, vel ingressum ad eam dignitatem vacantem statim habeat auctoritate propria, ejusque administrationem, curam, onera sustineat interim idoneus presbyter. Quandoque ad tempus limitatum commendas arbitrio Papae concedi jam diximus. Dispensationem praeterea retinendi beneficia ante promotionem obtenta consueverunt promoti ad Cathedrales, aliasque Ecclesias incompatibiles obtinere olim *usque ad beneplacitum* vel Papae promoventis, quod per obitum ipsius eo ipso expirat, vel *usque ad Apostolicae Sedis beneplacitum* perpetuo duraturum, donec fuerit e successore revocatum, *quia Sedes ipsa non moritur*, ait Bonifacius VIII. (1).

XIV. Communi jure quum civili, tum canonico quoniam *actus legitimi conditionem non recipiunt, nec diem* (2): Ordinarii locorum idcirco suis beneficiorum collationibus nullam possunt conditionem, vel diem adicere (3). Qui tamen ex indulto beneficia reservata, vel affecta conferunt, ii debent suis collationum litteris modum adicere, seu onus petendi novam provisionem apostolicam intra quatuor menses plus minus, *alias* beneficia ab ipso vacare censeantur (4).

XV. Rursus clausularum aliae conjunctionem inter se habent indicatam particulis, *et, simul, praeterea*, aliae alternationem, seu disjunctionem ex interjecta particula *vel, aut, seu* (5). *Disjunctivo modo conditionibus adscriptis alteram*

missori relinquitur. *At qui promisit* incerta die ex. gr. si aliquid factum sit, *vel* cum aliquid factum sit: *nisi cum id factum fuerit, dederit, non videtur fecisse quod promisit, l. stipulatio 38. §. inter 16. D. de verbor. oblig.* Eandem differentiam probat Poinponius in *l. legatis 1. D. de condit., et dem.*

(1) Bonif VIII. in *cap. si gratiose 5. de rescriptis in VI.*

(2) Papin. in *l. actus legitimi 77. D. de reg. jur* Bonif. VIII. in *cap. actus 50. eod. tit. in. VI.*

(3) Gl. in *cap. si gratiose de rescriptis in VI.*

(4) Ex antedictis *cap. 5. n. 43. lit. d. pag. 126, et reg. et cap. 7. n. 17.*

(5) *Haec verba ille, aut ille, disjunctivae orationis sunt: dis-*

defecisse non oberit, altera, vel postea impleta, Papinianus respondit (1). Nam *ubi verba conjuncta non sunt, sufficit alterutrum esse factum*, ex Pauli sententia (2). Seu ut Bonifacius VIII. loquitur, *in alternativis sufficit alterum adimpleri* (3). Hinc Alexander III. rescripsit, *cum aliqua sub disjunctione mandantur, quorum unum verum est, alterum falsum*, sufficere, quod alterutrum constiterit esse verum (4). E contrario conditiones conjunctivas oportet omnes adimpleri (5). Verum conjuncta nonnumquam pro disjunctis accipi, et disjuncta pro conjunctis, et soluta pro separatis, monet Paulus Ictus (6).

XVI. Ut falsus, vel erroneus vacationis modus ne obesset apostolicis collationibus, de quo dixi jam superius (7): invaluit mos addendi quum precibus impetrantium, tum litteris pontificiis has alternativas clausulas, *per obitum N.*, vel *alicujus cujuscumque personae*, sue *praemisso*, sive *alio quovis modo*. His porro clausulis fit, ut mens Pontificis non unum dumtaxat vacationis modum expressum respiciat, sed sese ad alium quemlibet non expressum extendat (8). Hinc Rota saepe censuit

junctionum est, veluti cum dicimus aut dies, aut nox est, Proculus ait in *l. haec verba* 124. *D. de verb. sign.*

(1) Papin. in *l. cum pupillus* 78. §. un. *D. de condit. et demonstr.*

(2) Paul. in *l. in eo* 110. §. 3. *D. de reg. jur.*

(3) Bonif. III. in *cap. in alternativis* 70. eod. tit. in VI.

(4) Alex. III. in *cap. inter ceteras* 4. *de rescriptis*.

(5) *Si quis ita stipulatus fuerit, decem aureos das, si navis venit, et Titius consul factus est? non alias dabitur, quam si utrumque factum sit. Idem in contrarium, dare spondes, si nec navis venit, nec Titius consul factus sit? exigendum erit, ut neutrum factum sit*, ait Scaevola in *l. si quis ita* 129. *D. de verb. obligat.* Pariter Paulus in *l. si heredi* 5. *D. de condit. instit.* inquit: *si heredi plures conditiones conjunctim datae sint, omnibus parendum est, quia unius loco habentur: si disjunctim sint, cuilibet.* Consonat Iulianus in *l. si is, qui* 13. §. 2. *D. de rebus dubiis*.

(6) Ex Labeonis sententia, quam tenet Paulus in *l. conjunctio-nem* 29. *D. de verb. signif.*, et *l. saepe ita* 53. *D. eodem*.

(7) *Cap. 12. n. 15.*

(8) Passerin. in *cap. susceptum de rescript. in VI. n. 41*, alii-que DD. *passim*. Generalis ejusmodi clausula nullam exceptam re-

ei qui beneficium, ut vacans per resignationem obtinuerat cum dicta clausula *sive praemisso, sive alio quovis modo*, sufficere quod vacasset ob promotionem: et impetranti ob dimissionem habitus clericalis suffragari vacationem ob matrimonium (1). Aliae vero clausulae, seu *per obitum cujuscumque personae*, seu *per liberam resignationem*, ideo superadduntur, quia ex. gr. specialim petita *per obitum* alicujus provisio videtur adeo *dispositive*, ut ajunt, ad modum in precibus expressum neminemque inibi nominatum restringi, ut ad alterum non expressum nequeat vigore clausulae generalis extendi (2). Ceterum *quovis modo* quodvis tempus non contineri, palam est. Quod igitur petitum beneficium sit, ut vacans in mense reservato, nulliter impetratur, illud si vacaverit in mense ordinario, et versa vice (3).

XVII. Alias insuper clausulas hac ipsa in re ampliores (*ampliatives* vulgo appellant) petentibus indulget Cancellariae Regula LVI. *de clausulis*. Ea enim tantum est, *quod quando Papa providet, seu mandat provideri alicui de beneficio ecclesiastico vacante, tunc dari poterunt clausulae, si petantur etiam si illud quovis modo etc., seu per constitutionem execrabilis vacat, et specialiter reservatum inter aliquos litigiosum sit, et ejus collatio devoluta fuerit: et pro colligante, vel subrogationem petente. . . . clausula ponatur, etiam si dictum beneficium ex eo, quod talis collector, vel unicus subcollector, abbreviator, vel familiaris (4), notarius, aut dictae Sedis officialis fuit, dispositioni apostolicae generaliter reservatum existat, dummodo non sit in eo alicui spe-*

linquere vacationem videtur. Nam M. Tullius orat. *de lege agraria* ait: *adscriptis aliudve quid: qua brevitate rem nullam esse exceptam videtis*. Tum ex Cuii sententia, *semper specialia generalibus insunt, l. semper 147. D. de reg. jur.*

(1) Apud Rigant. in *Reg. 47. Canc. n. 33. et seqq. tom. 3.*

(2) Ex supradictis *cit. cap. 12. n. 13.*

(3) Rigant. in *Reg. 47. n. 55.*

(4) Si scriptum vel ita sit: *clericorum tuorum cedentium, vel cedentium beneficia: ii veniunt, qui per te non quaesiti propterea, vel recepti sine fraude sunt familiares tui domestici commensales*, ait Bonif. VIII. in *cap. sicut 5. de verb. sign. in VI.*

cialiter jns quaesitum. In reliquis vero nulla clausula datur, unde reservatio generalis elici possit, nisi desuper signaturae per duplex fiat signata sit, aut reservatio, vel alias specialiter habeatur.

XVIII. Ex hujus Regulae textu conficitur, clausulas ejusmodi si libello supplicationis petantur, non concedi, neque in literis exprimi: si vero ultra petita concedantur, ad expressum modum vacationis, qui causam dispositioni dedit, eas quandoque restringi jam observavimus. 2: quod vacationes ex retentione incompatibilium vigore extravag. *execrabilis*, vel reservati litigiosi, vel devoluti, vel per cessum, aut decessum Papae familiarium, et officialium S. Sedis, exprimendae singulatim sunt clausulis specialibus: quum generalis clausula, *vel quovis modo* eas fere non compellatur, sicuti nec etiam vacationes beneficiorum cuivis generali reservationi subjectorum in Curia, seu apud Sedem contingentes. Propterea in precibus, et rescripto signaturae, et litteris Datariae saepius ita scribitur: *etiamsi tanto tempore vacaverit, quod ejus collatio ad Sedem Apostolicam legitime devoluta sit, vel cujus collatio, ut asseritur ad Sedem Apostolicam legitime devoluta est* (1): *etiamsi generalis reservatio, et in corpore juris clausula resultet, seu etiamsi apud Sedem, et in Curia vacaverit* (2).

XIX. Clausula *quidam alii*, vel *quaedam aliae* ad amplificandum adjectae pares, vel minores complectitur, non majores, seu digniores quum personas, tum res (3): neque ad successores re integra protenditur (4).

XX. *Cum omnibus adnexis*, seu *cum omnibus juribus, et pertinentiis suis* conferri beneficium quoque dicitur, ut quae ei semel unita membra, et quacsita bona sint, quum corporalia, tum incorporalia, nullatenus ab eo separantur (5). Et quo-

(1) De hac dictum superius cap. 8. num 15.

(2) Rigant. in *cit. Reg. 47. n. 42.*

(3) Innoc. III. in cap. *Sedes Apostolica* 15. de *rescriptis*, et Inn. IV. in cap. *cum in multis* 2. eod. tit. in VI.

(4) Gregor. III. in cap. *significavit* 36. de *rescriptis*.

(5) S. Greg. M. in cap. *quia monasterium* 2. de *relig. domib.* monasterium in fundo Marciano situm cum omnibus rebus suis, vel quae ei competunt actionibus univit monasterio Surrentino Agapiti albatis.

ties Principes possessionem, sive domum cum *integro statu* donaverit: huic verbo eandem vim esse, quae his aliis *cum adjacentibus, et mancipiis, et pecoribus, et fructibus, et omni jure suo*, rescripsit Constantinus Imp. (1).

XXI. Ad majorem impetrantis cautelam cuivis rescripto, gratiaeque pontificiae semper adjicitur clausula *absolutionis a censuris ad effectum* ipsius gratiae, de qua agitur, *dumtaxat consequendum* (2). Nam Innocentius III. rescripsit *clericis* excommunicationis vinculo innodatis *ecclesiastica beneficia conferri non posse*, nec ab illis ea licite retineri: *nisi forsitan cum eis fuerit misericorditer dispensatum* (3). Et Gregorius IX. declaravit *ipso jure rescriptum non valere, si ab excommunicato super alio, quam excommunicationis vel appellationis articulo fuerit impetratum* (4). Verum Cancellariae Regula LXVI. de *insordescentibus, ne personis, pro quibus litterae Suae Sanctitatis emanabunt, ob generalem absolutionem a censuris ecclesiasticis, quibus ligati forent, ad earum effectum indifferenter concedi, et in litteris apostolicis apponi solita, praestetur occasio censuras ipsas vilipendendi, et insordescendi in illis: statuit, et ordinavit hujusmodi absolutionem, et clausulam in litteris, quas in futurum cum illa concedi contingeret, non suffragari* 1: non parentibus rei indicatae, 2: incendiariis, 3: violatoribus Ecclesiarum, 4: falsificatoribus, et falsificari procurantibus litteras, et supplicationes apostolicas, et illis utentibus, 5: receptatoribus et fautoribus eorum, ac res vetitas ad infideles deferentibus, 6: violatoribus ecclesiasticae libertatis, 7: via facti ausu temerario apostolicis mandatis non obtemperantibus, 8: et nuncios, vel exequutores Apostolicae Sedis, et ejus officialium ejus commissa exequentis impredientibus,

(1) Constantin. in *l. si quando* 2. C. de bonis vacant.

(2) *Hisce verbis concepta legitur absolutio*: » Te a quibusvis » excommunicationis, suspensionis, et interdicti, aliisque ecclesiasticis sententiis, censuris, et poenis a jure, vel ab homine latis, » si quibus quomodolibet innodatus existis, harum serie absolventes, et absolutum fore censentes ad effectum praesentium tantum consequendum »

(3) Innoc. III. in *cap. postulastis* 7. de cleric. excom. etc.

(4) Greg. IX. in *cap. ipso jure* 1. de rescript. in VI.

qui propter praemissa, vel aliquod eorum excommunicati a jure, vel ab homine per quatuor menses scienter excommunicationis sententiam hujusmodi sustinuerint. Et generaliter quibuscumque aliis, qui censuris aliquibus etiam alias, quam ut praefertur quomodolibet ligati in illis per annum continuum insorduerint. Itaque absolutio ista non alium producit effectum, nisi ut valeat provisio beneficii, quod Apostolica Sedes contulerit excommunicato, vel suspensio, vel interdicto cuilibet, qui excommunicationis in primis octo casibus per quatuor menses, aliumve censuram per annum contumaciter non sustinuerit. Nam taxativa particula *dumtaxat* ad hunc effectum omnes alios excludit effectus (1).

XXII. Succedunt quarto loco clausulae derogatoriae quum speciales, tum generales contrariis constitutionibus, quae pontificiae gratiae aliter obstarent, illiusque executionem impedirent (2). Generalis derogatio ita scribitur: *non obstantibus constitutionibus, et ordinationibus apostolicis quibuscumque in contrarium facientibus*. Verum ad Conciliorum generalium decreta non extenditur ista generalis clausula, quae specialem postulant derogationem (3). Neque ad Regulas Cancellariae, quarum aliqua si obstitit, eam necesse est initio litterarum

(1) Pariter Ulpianus in *l. 1. §. 1. D. si mentor falsum modum dixerit*, docens quod haec actio dolum malum dumtaxat exigit, et culpam, et casum fortuitum excludit. Idem Paulus in *l. naturalis 5. §. 1. in sin. D. de praescriptis verbis*, tu dumtaxat culpam praestare debes, ait, eadem particula innuens exclusisse casus omnes fortuitos. Hinc Rebuffus in *prae. benef. tit. de forma novae provis. num. 15.*, probe monet, eum, qui absolvitur ad solum effectum adipiscendi beneficium, non posse divinis se ingerere, nec sacrum celebrare, nec sacros ordines exercere, ipsumque alias incurrere poenam irregularitatis, nec alia beneficia ab ordinariis collatoribus obtinere.

(2) Iulianus in *l. 2. D. de inspiciendo ventre* monet edictum de custodiendo partu derogatorium esse Carboniani decreti.

(3) Honorius III. in *cap. ex parte tua 3. de capell. monach.* rescripsit litteras Apostolicae Sedis aliquid indulgentes contrarium Lateranensi Concilio III., de quo nulla in eisdem litteris mentio erat, nullius fore momenti, velut spurias, et apocryphas. Rota coram Coccino *dec. 269. num. 6.* idipsum censuit.

distincte enarrare, ut speciali postea derogatione decernantur ipsam illis litteris non obstat: quum ea etiam generalis clausula, *non obstantibus Regulis Cancellariae, quarum tenores habeantur pro expressis*, hodie non sufficiat (1). Nam Regula LXXI. seu penultima ipsius Cancellariae declarat, *quod praemissis, et quibusvis aliis Regulis Cancellariae numquam censetur derogatum in quibuscumque constitutionibus, litteris, brevibus, indultis, et aliis ordinationibus apostolicis, etiam motu proprio, et ex certa scientia emanatis, per quaecumque verba, et decreta derogatoria, irritantia, universalia, et amplissima, et clausulas quantumvis efficacissimas, etiam derogatorias, atque specialis, et individuae expressionis vim habentes, nisi facta fuerit de illis expressa mentio, et non aliter, nec alio modo*. Derogationem quoque *statutis, consuetudinibus, et privilegiis Ecclesiarum* jam dicta generalis clausula non complectitur (2). Et ubi eisdem derogetur speciatim, salvum adhuc putant doctores jus aliis exinde quaesitum, ejusdemque appellationis beneficium dari ab executione rescripti abusiva (3).

XXIII. Ad *executionem* pertinentes clausulae perfectam gratiae dispositionem fere non amplificanti, nec restringunt, nec temperant, nec mutant: *cum in concessione gratiae ad eam non augendam, sed exequendam debeant, quae de inhibitione sequuntur, referri*, ex Clementis V. sententia (4). Quae fornam executionis, et executorum personas, ac potestatem respiciunt, in proximo cap. XIV. exponam commodius.

XXIV. Ad ipsas autem accedere simul consuevit clausula decernens *irritum, et inane, si quid secus a quoquam contigerit attentari*. Quoties irritans ejusmodi decretum in litteris

(1) Rigant, in *Reg. LXXI. num. 13. usque ad 21*, post Rotam, et DD.

(2) Gratiam generalem non derogare generali privilegio, statuto, et consuetudini, nisi expresse dicatur, Bonifacius VIII. rescripsit in *cap. si propter 10. de rescriptis in VI.* At speciale rescriptum, seu mandatum derogare generali constitutioni, et privilegio etiam non expresso, affirmavit Alexander III. in *cap. sicut Romana de rescriptis*.

(3) Van-Espen *par. 2. jur. eccles. tit. 25. cap. 5. num. 26.*

(4) Clem. V. in *elementin. 1. de praeb., et dignit.*

adscriptum sit contra violatores, ac transgressores mandatorum Sedis Apostolicae, non modo possessionem, sed titulum quoque inficit cujusque eam, vel hunc spreto mandato apostolico adepti (1). Illis enim casibus locum habet ea juris regula: *quae contra jus fiunt, debent utique pro infectis haberi* (2). Sed ubi mandata pontificia de providendo sint sine decreto irritante data, eorum transgressio non irrita plerumque facit contraria gesta. Nam Bonifacius VIII. rescripsit valere factam ab Ordinario collationem alteri, eo posthabito, qui apostolicas litteras impetraverat, et ostenderat: nisi Pontifex inibi decrevisset fore *irritum, et inane*, quod contra eas fieret (3).

XXV. Concluduntur denique litterae per adscriptionem diei, mensis, et anni, sub quo eae dantur, quam vulgo *datam* appellant. Cancellariae Regula XVI. *de dictionibus numeralibus* disponit, *ut in apostolicis litteris committendi crimen falsi tollatur occasio quod dictiones numerales, quae in dictis litteris ante Nonas, Idus, et Kalendas immediate poni consueverunt, per litteras, et syllabas extensae describantur, et ille ex praedictis litteris, in quibus hujusmodi dictiones aliter scriptae fuerint, ad bullariam* (h. e. registrum bullarum) *nullatenus mittantur* (4). Vox ista *nullatenus* innuit nullius fore momenti bullatas litteras cum signis numerorum contractis.

XXVI. Multis plane rebus prospicit obsignatus datae gratiae dies. 1: tempus figit, in quo debet impetrans actu habere idoneam aetatem, aliasque necessarias ad beneficium qualitates (5). 2: securos quum alios reddit de juribus antea quaesitis non tollendis, tum impetrantem ipsum contra futuros deinceps expiscatores ejusdem gratiae. Prior enim in tempore, ita po-

(1) *Marta de clausulis par 2. claus. 29*

(2) Bonif. VIII in *cap. quae contra 64. de reg. jur. in VI.*

(3) Idem in *cap. si soli 9. de concess. praeb. in VI.*

(4) Instrumentis etiam publicis ut numerales dictiones integre, non signa, seu notae arabicae numerorum adponantur, jure civili cautum est, *l. 1. et fin. D. de confirmat. l. 1., et 2. C. de veteri jure enuel. Auth. quod sine C. de testam. §. nos igitur Auth. de testam. imperf.*

(5) Bonifacius VIII. in *cap. si eo tempore 9. de rescript. in VI.*

tior in jure est (1): ut posterior non valeat personam legitimi contradictoris contra eum agere (2). At Bonifacius VIII. ex duabus collationibus puram posteriorem conditionali anteriori praeferendam censuit (3). Et quoties impetratur aliquod beneficium, quod alius nulliter obtinisset, vel injuste retineret: tunc posteriorem in data prioribus *anteferri* Papa speciatim rescribere solet.

XXVII. Et *parvam*, et *magnam datam* usu vigere in signatura gratiarum tradit Rigantius (4). *Parvam datam* supplici libello, dum exhibetur, Officialis parvarum datarum adscribit eum dumtaxat in finem, ut Datarius exinde ea visa *magnam datam* extendat sub eo ipso die. Si quis autem error in supplicationibus detegatur post eam sub parva data signatam, emendari solet alia supplicatione cum clausula *cui prius* provisum est, et nova signatura sub eo ipso die prioris supplicationis.

XXVIII. Duobus ob datas uno die apostolicas litteras ad idem beneficium concurrentibus, Bonifacius VIII. constituit eum primo praeferendum, qui non esset antea canonicatum alium adeptus, mox qui litteras executori apostolico primus praesentaverit, tandem qui pluribus eligentium votis cooptaretur, *nisi ex tenore litterarum expresse appareat*, quem Papa praeferre maluerit (5). Tum Cancellariae Regula XVII. praecipit, *quod de concurrentibus in data ejusdem diei super vacantibus, seu certo modo vacaturis beneficiis illi, quibus gratiae motu proprio conceduntur, ceteris simili modo gratias non habentibus, alias graduati non graduatis, aut inter graduatos magis graduati, ac inter aequaliter graduatos prius graduati, nec non colorato titulo possessores non possessoribus, ac inter personas alias in Curia praesentes absentibus ab ea,*

(1) Idem in *cap. qui prior* 54. *de reg. jur.* in VI, Honor. III. in *cap. capitulum* 30. *de rescriptis*, idemque Bonif. in *cap. si à sede* 31. *de rescript.* in VI.

(2) Rota coram Celso *dec.* 155. num 13., et in Neritonensi beneficio 9. Jun. 1682. coram Ursino §. *quibus*.

(3) Bonif. VIII. in *cap. si pro te* 13. *de resc.* in VI.

(4) Rigant. in *Reg. XVII.* num. 38., et seq.

(5) Bonif. VIII. in *cap. duobus* 14. *de rescriptis* in VI.

ac inter praesentes, non beneficiati beneficiatis, et similiter inter absentes, ceteris paribus, oriundus non oriundo, et dioecesanus non dioecesano. In reliquis vero singuli, qui prius apostolicas desuper litteras eorum executoribus praesentaverint, aliis in ipsorum, de quibus agi contigerit, beneficiorum assecutione praeferantur (1). Dum propterea signat Pontifex gratias, alicui earum adjicitur clausula *cum gratificatione opportuna*, quae vim habet praeferendi ceteris in eadem data supplicantibus gratificatum unum.

XXIX. Anni cursum in apostolicis litteris Datariae, et Cancellariae bulla plumbea signatis ex antiquo stylo inchoant ab Incarnatione D. N. J. C., a die nimirum 21. Martii, in quo festum incidit Annuntiationis B. M. V., adeo ut praecedentes duo menses Januarii, et Februarii cum anterioribus Martii diebus referentur ad praeteritum aerae vulgaris annum, qui decurrit a Circumcisione Domini, seu prima die mensis Januarii. In aliis vero litteris Secretariae Brevium, quae sub annulo Piscatoris in cera rubra impresso dantur, annus incipit a Nativitate Domini, scilicet die 25. Decembris (2).

CAP. XIV.

DE EXECUTIONE LITTERARUM APOSTOLICARUM (*).

(*) *Ad tit. XXIX. lib. 1. Decret. de offic. et pot. Jud. deleg.*

- I. Litterae apostolicae vel paratam habent executionem, vel morosam praevia causae cognitione.*
- II. Quae puram gratiam largiuntur, et quoties vacua erit possessio beneficii, sine mora, et nemine citato, executioni mandantur.*
- III. Quaeque possessionem nomine Camerae proviso apostolico indulgent, in forma Brevis cum pacto expediendi infra sex menses litteras sub plumbo.*

(1) De concurrentibus, quorum alter apostolicam, alter ordinariam habuerint collationem, videsis dicta superius *cap. 6. num. 5.*

(2) Card. de Luca *de pension. disc. 26. num. 8*, Card. Petra *in const. apost. to. 1. pag. 15*, Rigant. *in cit. Reg. XVII. num. 34.*

- IV. Conditionales vero litterae morosam postulant executionem citatis, et auditis partibus.*
V. Puras gratias merus executor.
VI. Conditionales mixtus citatis interesse habentibus, et caussa cognita ad effectum perducit.
VII. Ab executore mixto datur appellatio etiam suspensiva, secus a mera, et simplici.
VIII. Mixtus executor impletis litterarum conditionibus fit merus.
IX. Litterarum apostolicarum executio aequiparatur executioni testamentorum.
X. Eam manifesta solum vitia, non occulta altioris indaginis impediunt, nec leves errorum correctiones.
XI. Nudus, et simplex contradictor paratam non impedit executionem, et summam auditur.
XII. Legitimus autem contradictor formam iudicii ordinariam exigit.
XIII. Conditio non tollendi jus alteri quaesitum inest cunctis pontificiis collationibus.
XIV. Sine caussa temere impediunt executionem litterarum apostolicarum incurrunt excommunicationem.
XV. Colligantium jura dioecesanis Episcopis, vel executoribus apostolicis discutienda relinquit.
XVI. Executio dignitatibus, et Canonicis Cathedralium delegatur, intra duas dietas iudicium exercituris.
XVII. Executor, ubi electa industria personae est, per semetipsum agit executionem, secus per alium.
XVIII. Clausula ad executores pertinens attendenda.
XIX. Vicecancellarius causas beneficiarias in Curia delegat.

I. Apostolicas litteras exequi idem sonat, ac pontificiam gratiam ad effectum perducere, et mandata in eis explicita reapse implere (1). Executio autem duplici modo perficitur: tam scilicet *manu militari*, seu armata (2), quam forma *juridica*, et

(1) *Executorem* eum solum esse, qui rei judicatae vigorem ad effectum videtur adducere, textus defuit in l. *executorem* 8. C. de execut. rei judic.

(2) Executionem militarem habet textus in l. in criminali 5. C. de jurisdictione omni judic. Qui restituere jussus iudici non paret, si habet rem, *manu militari* officio iudicis ab eo possessio transferatur, Ulpianus ait in l. qui restituere 68. D. de rei vind.

canonica, seu officio iudicis, et jure potestatis delegatae (1), ut nulla injuria, neque vis fiat ei, qui in possessionem beneficii auctoritate apostolica sit mittendus, vel in ea manutenendus.

II. Celerem, expeditamque executionem postulant generatim litterae Sedis Apostolicae super beneficiorum provisionibus puris, et sine conditione in *forma gratiosa* concessis. Nam Bonifacius VIII. rescripsit, quod si mandatum apostolicum de providendo intra dies ab executore praefixos Capitulum tamquam ordinarius loci non adimplevisset: executor ipse canonicatum posset *in continenti etiam sine alia Capituli vocatione, vel monitione, si vacaret*, dare proviso apostolico (2). Quoties vacua nimirum sit possessio beneficii, de quo agitur, et nihil obstande ex earundem litterarum apostolicarum ventre videatur, quod altiozem exigat indaginem, vel adscriptae conditionis implementum: executor apostolicus in eis datus eum, qui gratiam pontificiae collationis obtinuit, sine mora immittit in possessionem beneficii, non aliter quam executor collationis ordinariae, seu bullarum episcopalium.

III. Praeterea litterae omnes in *forma Brevis* sub annulo Piscatoris datae ad suum immittendi provisum in possessionem beneficii reservati, vel affecti nomine Camerae apostolicae, quoadusque is intra sex menses alteras Datariae litteras sub plumbo obtinuerit, omnino expediendas, ut gratia collationis perpetuam exinde firmitatem adquirat: nullam in executione moram patiuntur, sed suum effectum sortiri statim debent (3). Lapsis autem sex mensibus, qui neglexerit interea bullarum expeditionem obtinere, ipso facto jus acceptae possessionis amittit, et beneficium ipso jure vacabit (4).

(1) Si quis missus fuerit in possessionem, et non admittatur: *potestate* ejus inducendus est in possessionem, qui eum misit . . . Sed melius erit dicere, *extra ordinem ipsos jure suae potestatis exequi* oportere decretum suum: nonnumquam etiam per *manum militarem*, *idem Ictus inquit in l. si quis missus 3. D. ne vis fiat ei, qui in poss. miss. erit.*

(2) Bonif VIII. in *cap. si capitulo 5. de concess. praeb. in VI. Rigant. l. 3. in Reg. 43. Cancell. n. 7*, quod executor apostolicae provisionis citare neminem debeat, nec partes iudicis adsumere, dum vacua sit possessio beneficii.

(3) Card. de Luca *de beneficiis disc. 17. n. 18.*

(4) Ex supradictis *cap. 10. num. 6.*

IV. Morosa vero fit executio gratiarum conditionalium, quoties nimirum exposita in precibus, et narrata in litteris sub plumbo datis necessariam postulent probationem, unde an ea sint vera, liqueat (1), ex illis puta clausulis, *constito, si est ita, si dignum repperis, verificato prius jurepatronatus ex fundatione, vel dotatione, citra illius approbationem, accedente consensu patronorum pro majori parte, vel saltem pro medietate, si laicorum tantum ex fundatione etiam, vel dotatione etiam nobilium, et illustrium*, vel conditiones eisdem litteris adjectae sint adimplendae, aut oporteat earum implementum manifestari (2), vel obtinuerit legitimus contradictor, aut litterae ipsae aperte jubeant, ut vocentur antea, et audiantur interesse habentes in vim clausulae, *vocatis vocandis*. Tunc enim executores apostolici partes judicis adsumere plane debent, negotium rite cognoscere auditis partibus, eoque cognito decernere, utrum apostolicae litterae sint executioni demandandae, an non (3). Rem vero debent cognoscere juxta formam sibi litteris mandatam, et juris aequitatem (4). Quae enim

(1) Ex antedictis *cap. 12.*

(2) De quibus dictum est superiori *cap. 13.* Nam conditio quum sit pactio certam legem in se continens: oportet ut eam impleri ante executionem omnimodis curet executor.

(3) *Innoc. III. in cap. super litteris 20. de rescriptis loquens de officio executoris delegati ait: « partibus ad suam praesentiam » convocatis de precum qualitate cognoscat » ut etc. Greg. IX. in cap. ex insinuatione 37. eod. tit. « in executionis negotio, inquit, juxta directum ad vos pro ipso mandatum ratione praevia procedatis. » Alex. III. in cap. si quando eod. tit. « qualitatem negotii, pro quo tibi scribitur, ait, diligenter considerans, aut mandatum nostrum reverenter adimpleas, aut per litteras tuas, quare adimplere non possis, rationabilem causam praetendas: quia patienter sustinebimus, si non feceris, quod prava nobis fuerit insinuatione suggestum ».*

(4) *Alex. III. in cap. ex parte tua 13. de offic. jud. deleg. « Si » quando judici delegato, ait, expediat formam sibi statutam » servare, debet tamen rationabiles exceptiones admittere, et in » causa juxta juris aequitatem procedere: nisi exprimat in litteris nostris, quod nullae debeant exceptiones admitti »*

contra formam rescripti gesserit executor, ea omnia viribus carebunt (1).

V. Duplex forma executionis efficit, ut executor vel *merus*, et *simplex* dicatur, qui priorem adhibet exequendi formam: vel *mixtus*, qui posteriorem. Executor itaque *merus*, et *simplex*, acceptis, visisque pontificiis litteris, regioque placito pro eis exequendis expedito, statim ac noverit extrajudiciaria informatione veritatem rerum expositarum, decernet eas per sese *verificatas jam esse, et executioni demandandas, ac proinde immittendum provisum illum apostolicum in realem possessionem illius Ecclesiae, seu beneficii, implorato etiam, quatenus opus, brachio saeculari adversus quoslibet impediētes, vel turbantes, vel ad amovendum injustum detentorem. Si vero eum ipsum in possessionem collati beneficii reipsa immiserit, traditaeque possessionis actus ex instrumento publico, aliove scripto ad calcem litterarum ipsarum pateat: adhuc praesumitur comprobatio narratorum rite praecessisse (2).*

VI. At *mixtus* executor judicis personam adsumens debet in primis contradictorem legitimum, vel coloratum beneficii possessorem, omnesque interesse habentes in jus vocare coram sese per suas litteras citatorias (si certi sint, personaliter si vero incerti, vel absentes, per edictum) cum inserto tenore delegationis apostolicae, seu litterarum S. Sedis, quibus mixta ejusmodi executio ei mandata sit (3): mox auditis partibus ju-

(1) *Innoc. III, in cap. causam 18, et cap. cum dilectum 21. de rescriptis.* « Quomodo si rerum judicatarum executor datus partes sibi judicis vindicavit, et contra rem judicatam aliquod pronuntiaverit: sententia ab eo dicta vim rei judicatae obtinere nequaquam potest » *ex rescripto Philippi Imp. in l. si ut proponis 6. C. de executione rei judicatae.*

(2) Alexander III. in *cap. de cetero 5. de sent., et re judic.* apertius rescripsit nullam executori mero facultatem esse cognoscendi negotium, qui deferre incidentes in executione quaestiones ad Sedem Apostolicam debet. *Dum non cognitio, sed executio tantum demandatur*, ait Innoc III. in *cap. pastoralis 28. de offic. deleg.* executor obsequi debet, ac executioni mandare sententiam delegantis, etsi illam sciat injustam.

(3) Factam, possessore non citato, executionem litterarum nullam, irritamque habet Rota coram Coccino *dec. 348, num. 3.*

dicium super executione instruat, processumque via ordinaria, terminum scilicet ordinarium impertietur utrique parti ad suas producendum probationes testium, et scripturarum super omnibus hinc inde praetensis. Tum secundum allegata, et probata, expletis omnibus iudicii ritibus, definitivam promulgabit sententiam, *fore litteras apostolicas vel exequendas*, vel *non exequendas*. Et non nisi postquam ea in rem iudicatam tansi-
verit vel lapsu decem dierum sine appellatione, vel per conformes tres sententias post appellationem ad executionis actum devenire tandem poterit, immitendo scilicet provisum reapse in possessionem.

VII. Quandoquidem adversus iudicium, sententiamque executoris mixti datur legitimo contradictori locus appellandi quod ad utrumque effectum devolutivum, et suspensivum: nulliusque momenti erit possessio, quam ipse dare attentaverit, vel potest interpositam appellationem, vel intra decem dies ad appellandum iure concessos (1). Ab executore autem simplici, et mero appellare non licet, nisi modum excesserit (2). Huc referenda ea est clausula in bullis beneficiariis frequentissima: *contradictores auctoritate nostra appellatione postposita compescendo* (3).

VIII Si nullus post citationem contradictor compareat ad oppugnandas apostolicas litteras aliam conditionem continentes, vel causae cognitionem demandantes: executor tunc mi-

(1) Card. de Luca in *sum. benefic. num.* 261, et seq.

(2) Ab executore sententiae (scilicet mero) appellare non licet: sed ab eo, qui sententiam male interpretari dicitur, appellare licet, *Iurecons. Macer. ait in l. ab executore 4. D. de appell. Pariter Innocentius III. in cap. novit 43. de appellat. rescripsit secundum jus ab executoribus appellari non posse, nisi forsitan modum excederent in exequendo.*

(3) Clausulam *appellatione remota* in medio litterarum adjectam ad praemissa tantum referri, non ad sequentia diversa, rescripsit Gregorius IX. in *cap. inquisitioni 71. de appellat.* At Goelestinus III. in *cap. secundo requiris 41. eod. tit. respondit: cum verba intentioni deserviant, et haec sit nostra intentio, ut de omnibus articulis, in commissione positus iustitia suum consequatur effectum: in omnibus appellatio intelligitur interdicta, quamvis in uno ea esset speciatim vetita.*

xtus implota conditione, et re summam cognita sit merus (1). Itaque iudicium executivum in istis casibus non respuunt conditionales litterae (2).

IX. Ad normam executionis testamentorum, quam statuit Iustinianus in *l. fin. C. de edicto D. Hadriani tollendo* (3), dirigi executionem litterarum apostolicarum tradit Rota (4). Igitur quemadmodum testamentarius heres cito vacuum hereditatis possessionem obtinet, ubi testamentum integrum nulloque vitio externo, vel manifesto affectum ostenderit, morosum tunc iudicium in foro competentis subiturus, quam alius possessionem rei hereditariae praecoccupavit, vel ipsi eam postulari contradixerit: sic provisorius apostolicus in vacuum beneficii possessionem tunc immittitur, ubi nullam patent in apostolicis litteris vitium falsitatis, vel subreptionis, vel defectivae conditionis, nullumque iis exequendis impedimentum objecerit legitimus contradictor.

X. Idipsum Benedictus XIV. firmavit, statuens apostolicas litteras executioni tradendas non esse ab iis, ad quos ene diriguntur, si obreptionis, aut subreptionis vitio aperte laborent, aut si deficere comperiat conditio, sine qua concessae non fuissent (5). Quae igitur non aperta, nec manifesta ipsius vi-

(1) Rota coram Coccino *dec. 225. num. 2*.

(2) Rota coram Othobon. *dec. 122, et 154*.

(3) « Sancimus, ait inibi Iustinianus, ut si quis ex asso, vel ex parte institutus competentis iudici testamentum ostenderit non cancellatum, neque abolitum, neque ex quacumque suae formae parte vitiatum, sed quod in prima figura sine omni vituperatione appareat, et depositionibus testium legitimi numeri vallatum sit; mittatur quidem in possessionem earum rerum, quae testatoris mortis tempore fuerint, non autem legitimo modo ab alio detineatur, et eam testificatione publicarum personarum accipiat. Sin autem aliquis contradictor extiterit: tunc in iudicio competentis causae in possessionem missionis, et subsecutae contradictionis ventilentur, et ei possessio adquiratur, qui potiora ex legitimis modis iura ostenderit, sive qui missus est, sive qui antea detinens contradicendum putavit.

(4) Rota coram lo. B. Coccino *dec. 431. n. 3*.

(5) Bened. XIV. in *const. magnae nobis 51. de execut. dispens. Tom. II.*

ua, quae scilicet ulteriorem indaginem requirunt, executionem impedire non valent (1). Nec leves scriptionum errores rasura quamvis visibili, sed censura correcti in locis non suspectis (2). Nam Innocentius III. censuit nullum falsitatis, vel suspicionis signum in litteris oriri ex paucarum litterarum rasura, quae sapientis animum in dubitationem nullatenus vertat (3).

XI. Distinguendus ad rem hanc praeterea est *legitimus* contradictor a *nudo*, seu *simplici*, seu *illegitimo*. Illic nimirum simplex, et nudus contradictor, qui nullum probabile jus quaesiverit neque in re, neque ad rem, quamvis citari, et audiri summam debeat: paratam nihilominus executionem bullarum non eludit, eamque iudicio ordinario obnoxiam non efficit, nec suspensivam habet appellationem (4). Tales ex. gr. sunt qui beneficium Sedi Apostolicae procul dubio reservatum, vel affectum ex Ordinarii collatione praecupaverit, vel aliud ab Apostolica Sede per manifestam subreptionem, vel obreptionem nulliter impetrarit, et quilibet in vitiosam possessionem intrusus. Horum enim possessio facti solius, et sine legitimo titulo quum vacua de jure putetur, et provisio, seu collatio tamquam infecta: sat erit ipsos audire *simpliciter, et de plano, sine strepitu, ac figura iudicii* (5). Ad hos etiam comprimens, et excludendos pertinet ea litterarum clausula: *amoto quovis alio illicito detentore* (6).

XII. Secus res autem se habet cum legitimo contradictore. Nam hujus bona jura ambigua, et probabiles exceptiones or-

sat. apostol. super impedim. matrim. to. 2. Bullarii. Manifestum, et evidens vocabula synonyma esse tradit Nicolaus III. in *cap. constitutionem 2. de verb. sign. in VI.*

(1) Rota coram Coccino *dec. 225. num. 3.*

(2) Rigant. in *Reg. 27. num. 178., et seq. tom. 3.*

(3) Innoc. III. in *cap. ex conscientia 9., et ult. de crimine falsi*, ibique Fagnanus. Consonant Alex. III. in *cap. ex litteris 3.*, et Honorius III. in *cap. ex parte 11. de fide instrum.*

(4) Rota coram Coccino *dec. 144. n. 15.* appellatione suspensiva contradictores de facto non frui definit.

(5) Iuxta formam traditam in Clementina *saepe contingit 2. de verb. sign.*

(6) Quam explicat Bonif. VIII. in *cap. tibi, qui 12. de reser. in VI.*

dinarium postulant iudicium, plenam scilicet rerum dubiarum eliquationem, et juridicas probationes in termino ordinario ab utraque parte rite producendas, et definitivam sententiam, a qua licebit appellare cum utroque effectu devolutivo, et suspensivo, quadusque transitum faciat in rem judicatam. Itaque si quis beneficium plenum, quod aliquis possideat, expiscaverit exponens, quod illud ipso jure vacaverit ob crimen a possessore patratum, vel ob subreptitiam, obreptitiamque illius impetrationem, aut incapacitatem: possessor ejusmodi personam legitimi contradictoris tunc sustinet coram executore mixto (1), sese purgaturus a delato crimine, vel subreptionem ab suis praecedentibus litteris abesse, aut seipsum idoneum, et capacem ostensurus. Pariter qui beneficium de jure patronatus obtinuerit cum derogatione medietati vocum, vel parti etiam minori compatronorum, legitimum is offendet contradictorem ab aliis compatronis praesentatum, quo audito, necesse est, ut numerus, et quota vocum pro alterutro compraesentato liquideatur in iudicio ordinario. Insuper quisquis videatur bonum, et probabile jus fovere ad impediendum executionem collationis apostolicae, quod legitimis facti probationibus eliquari oportet, eum ut contradictorem legitimum audiet mixtus executor. Quoties autem exceptiones adversus apostolicam gratiam collationis non facti, sed juris tantum quaestionem promoveant: paratam tunc executionem litterarum non adimunt: quum eas debeat executor in continenti definire sola librorum aptione, et consilio peritorum (2).

XIII. Omnibus propterea pontificiis collationibus beneficiorum, vel aperte adjicitur, vel tacite subintelligitur clausula conditionalis: *dummodo tempore datae praesentium non sit alicui specialiter jus quaesitum*, et hac alia *sine alicujus praesentio* (3). Doctores gratiam clausulis hisce fieri conditiona-

(1) Card. de Luca *de benef. disc.* 73.

(2) Idem *loc. cit.* n. 29. et 30., Gratian. *discept.* 740. n. 48. Aliquando juris dubia exceptionem, quod altiorem requirat indaginem ex aliqua facti mixtura, ab hac regula excipit Rota *dec.* 270. *in fin. par. 10. rec.*

(3) Ex Cancell. Regula 17. *de non tollendo jus quaesitum alteri.*

lem commonet (1). Jus autem *in re* ; nō *ad rem* per eandem aliis praeservari docet Rebuffus (2).

XV. Quum temere impediētes usum ecclesiasticae jurisdictionis , et executionem mandatorum Sedis Apostolicae possint censura ecclesiastica coerceri ex communi jure decretalium (3): in eo tamen, qui executionem litterarum apostolicarum impediunt, anathema, seu censuram excommunicationis majoris ipso facto sanxit primus omnium Clemens VII. (4), tum alii Pontifices in Bulla coenae Domini singulatim innovarent. Benedictus XIV. specialim illos anathematizat, *qui per se, vel per alios auctoritate propria, et de facto, ac temere impediunt* (5). Eos nimirum, qui sine justa, et probabili causa, nulloque jure (id quod obsignata Pontificis jureconsultissimi verba sonant) Potestati ecclesiasticae resistunt per injuriam, aut vim, aut contumaciam, proptereaue damnationem sibi adquirunt ex Apostoli sententia: non alios, qui justam, vel probabilem impediendi causam habeant, suaeque jura quomodolibet quaesita studeant contradicendo tueri, ubi Sedis Apostolicae litteras per frau-

(1) Gomes. et Rigant. in *comm. ad eandem Reg.*

(2) Rebuff. in *prax. benef. tit. forma, et declaratio novae provisionis.*

(3) Alex. III. in *cap. quaesitum 1, et cap. significasti 7. de offic. et pot. jud. deleg.*

(4) Clemens VII. *const. 47. in Bullar. to. 4. par. 1, mox in sua coenae Domini Bulla.*

(5) Bened. XIV. in *const. pastoralis 14*, quam publicavit die coenae Domini 1741, *tom. 1. Bull. sua*, nem excommunicatos, inquit §. 14, et anathematizandos omnes, et quoscumque, qui per se, vel alios *auctoritate propria de facto* . . . Beneficiales, et decimarum, ac alias causas spirituales, et spiritualibus adnexas ab auditoribus, et commissariis nostris, aliisque iudicibus ecclesiasticis avocant, illorumque cursum, et audientiam. . . impediunt. . . vel executionem litterarum apostolicarum, seu executorialium processum, ac decretorum quomodolibet impediunt. *Marginale vero summarium hujusce articuli ita habet:* « Temere avocantes a delegatis Sedis Apostolicae, aliisque iudicibus ecclesiasticis causas Beneficiales, et spirituales. Tum impediētes executionem litterarum apostolicarum, aliorumque expeditionum supradictorum iudicium ».

dem, vel dolam extortas oppugnant canonicis, et legitimis exceptionibus. Nam suus qui jure utitur, nemini facit injuriam, nullumque reatum incurrit.

XV. Impedientium jura, quamvis ambigua, et probabilia, quae neque a patrosatu, neque a fundationis lege, locorumve statutis, neque a moribus, legibusve Regni, sed aliunde profluunt, legitimam regio placito impedimentum adstruere non valent. Ea ideo Episcopis dioecesanis, vel executoribus apostolicis rite discutienda remittuntur, quotiescumque, oppositis non obstantibus, regium placitum conceditur pontificis litteris, Sedisque Romanae provisionibus, quoniam ad forum ecclesiasticum beneficiales causae pertinent jure quum communi, tum speciali Concordatorum an. 1741. (1).

XVI. Incertos quidem judices, vel ad futura negotia dari vetuit Lucius III. (2). Apostolici mandati executionem Dignitatibus, vel Canonicis Ecclesiae Cathedralis dirigendam statuit Bonifacius VIII. (3), vel Officinali Episcopi, aut Priori Conventus Clementina constituto (4). Hinc est, cur judices in Synodis eligendi debeant Dignitatem, vel Personatum, vel Canonikatuum in Cathedrali habere (5), qui officium delegati Sedis Apostolicae sint obituri. Si vero ultra duas diaetas extra dioecesim trahere partes ad iudicium prohibentur (6).

XVII. Delegati a Summo Pontifice executores facultatem subdelegandi aliis mandatam sibi jurisdictionem intique habent jure communi (7), non secus, quam delegati a Principe iudices (8): nisi electa industria personae videatur (9). Cancellariae Regu-

(1) Concordat. an. 1741. cap. 6. art. 4., quod jam explicui lib. 3. Instit. Canon. tit. 7. num. 18, et seq.

(2) Luc. III. in cap. adhaec 10. de rescriptis.

(3) Bonif. VIII. in cap. statutum 11. de rescriptis in VI.

(4) Clementina etsi principalis 2. eod. tit.

(5) Bened. XIV. lib. 4. de Syn. dioec. cap. 5. num. 2.

(6) Ex traditis a Bened. XIV. ibidem.

(7) Innoc. III. in cap. pastoralis 28. de offic. et pot. jud. deleg. Honor. III. in cap. cum causam 62. de appell. et Clementina un. de offic. deleg.

(8) Gordianus in l. a iudice 5. C. de judiciis.

(9) Greg. IX. in cap. quoniam 43. de offic. deleg. Bonif. VIII. in cap. is, cui 12. eod. tit. in VI.

la XVIII. *de executione facienda statuit, quod quotiescumque per Signaturam Papae, vel de ejus mandato factam super exequendis aliquibus cum adjectione proprii nominis, vel dignitatis cujusvis iudex datur: litterae desuper expedientur cum expressione, quod idem iudex executionem faciat per seipsum.* Scilicet aliis ne subdeleget (1). Istam nihilominus clausulam *per seipsum* in nullis fere litteris beneficialibus quum in forma *dignum*, seu commissaria, tum in forma gratiosa adponi Rigantius commonet (2).

XVIII. Quandoquidem litterae apostolicae, quas unas tantum pro singulis beneficiorum provisionibus in forma *dignum*, non aliis de stylo inscribuntur, nisi Ordinario loci, Episcopo scilicet dioecetano, vel generali ejus Vicario (3), sine clausula *per seipsum procedat*, sed cum hac alia aequipollenti: *si per diligentem examinationem idoneum esse reperiis, super quo conscientiam tuam oneramus, canonicatum, seu beneficium illud auctoritate nostra conferas.* Per hanc vero clausulam posteriorem non prohibita subdelegatio videtur probabilius, nec electa industria personae (4). Quum vero ea de re disputent Doctores: ego censeo subdelegationem, iisdem clausulis non obstantibus tunc valere, ubi partes consenserint: secus, ubi dissenserint. Nam ex textu Gregorii IX. *is, cui injungitur*, ut personaliter *negotium exequatur, potest dummodo partes consenserint, hoc aliis delegare: praeterquam si inquisitionem fieri, vel Ecclesiis de Praelatis, vel aliis ministris provideri mandaremus: cum in his omnibus casibus industriam, et fidem personae, cui talia committimus, eli-*

(1) Sotus, Kochier, Rebuffus, ceteri apud Rigant. in *Reg.* 48. num. 8, et *seqq.* tenent vetitam ei, qui jussus a Papa est *per seipsum* procedere, facultatem subdelegandi. Alii negant cum Rota *dec.* 611. num. 11. *coram Cerro*, et *dec.* 104. *par.* 13. *rec.* Th. de Rosa de *executor. litt. apost. lib.* 1. *cap.* 10. num. 5. putantes non praecceptum, sed monitionem fieri ejusmodi verbis.

(2) Rigant. in *Canc. Reg.* 43. num. 5. *to.* 3.

(3) Signatura gratiarum in forma *dignum* postremam habet clausulam: *committatur Ordinario.* Cujus vis est, ut litterae plumbatae, inde ad Episcopum dioecesanum, vel ejus Vicarium dirigantur.

(4) Garc., Gratian., Amayden., caeteri apud Rigant. *loc. cit.* num. 14, et *seq.*

gere videamar (1). Pro collationibus autem in *forma gratiosa* binæ semper litterae dari uno eodemque die solent, *principales* nimirum, et *executoriales* ut ajunt. *Principales* ad eum ipsum diriguntur, qui gratiam collati sibi beneficii obtinuit. *Executoriales* vero ad idoneos executores a proviso ipso postulatos, videlicet ad Praelatum aliquem in Urbe degentem, duosque alios in partibus, vel Dignitate, vel Personatu, vel Canoniatu, vel protonotarii, aut judicis synodalis munere decoratus inscriptae his verbis concipiuntur (2): *Discretioni vestrae per apostolica scripta mandamus, quatenus vos vel duo, aut unus vestrum, si et postquam dictae litterae vobis praesentatae fuerint, per vos, vel alium, seu alios auctoritate nostra immittatis eum in possessionem. . . contradictores per censuras ecclesiasticas appellatione proposita compe- scendo* (3). Si quid autem *arbitrio* executoris committatur, is temperare tunc poterit rigorem juris, quamvis arbitrium judicis aequitatem, et regulas juris declinare prohibeatur (4). Clausula vero *prout de jure, et quantum de jure poteritis*, obstringit apertius executorem ad servandum juris ordinem (5).

XIX. Ex Cancellariae Regula LXXII, et ultima Vicecancellarius potest *omnes causas beneficiales etiam non devolutas committere in Curia cum potestate citandi ad partes* in gradu scilicet appellationis (6). *Insuper committere absolutionem illorum, qui ignoranter in supplicationibus, vel in litteris apostolicis aliquid scriberent, corrigerent, vel delerent.*

(1) Greg. IX. in *cap. quoniam* 43, et *fin. de offic. jud. deleg.*

(2) Thom. de Rosa *de executor. litter. apost. cap. 2. num. 7, et seq. Rigant. ibidem num. 3.* Quoniam tempore mos inoleverit delegandi executoribus pontificias beneficiorum collationes, et litteras, jam dictum supra est *cap. 5. de reserv. pontif. num. 6.*

(3) Coelestinus III. in *cap. sciscitatus* 13. *de rescriptis* exponens clausulam istam, *ut si duo vel tres, quibus litterae diriguntur, ipsis exequendis simul interesse nequiverint, unus, aut plures nihilominus exequatur*: censuit ei locum esse, tam si *de facto*, quam si *de jure* non possint executores per sese procedere.

(4) Rota coram Io. B. Coccino *dec. 278. num. 1, et 4.*

(5) Innoc. III. in *cap. causam* 18. *de rescriptis.*

(6) Sicuti observat Rigant. in *Reg. 72. num. 45. et seq.*



INDEX

CAPITUM TOMI II.

CAP. VI.	<i>De collatoribus.</i>	3
CAP. VII.	<i>De collatoribus ex indulto extraordinariis.</i>	11
CAP. VIII.	<i>De ordinariis collatoribus</i>	32
CAP. IX.	<i>De beneficiis</i>	48
CAP. X.	<i>De collatione</i>	74
CAP. XI.	<i>De commendis.</i>	103
CAP. XII.	<i>De precum veritate, subreptione, et obreptione in impetrationibus.</i>	124
CAP. XIII.	<i>De clausulis</i>	136
CAP. XIV.	<i>De executione litterarum apostolicarum</i>	153